

宿雨清幾句


朝陽晨帝城

望奔人樂業

瓊上踏歌行



全唐詩 二



中华古典精华文库

全 唐 诗

（ 第二部 ）

第四十一卷

卷 41_1【中和乐九章·歌登封第一】

卢照邻

炎图丧宝，黄历开璿。祖武类帝，宗文配天。
玉鸾垂日，翠华陵烟。东云干吕，南风入弦。
山称万岁，河庆千年。金绳永结，璧丽长悬。

卷 41_2【中和乐九章·歌明堂第二】

卢照邻

穆穆圣皇，雍雍明堂。左平右域，上圆下方。
调均风雨，制度阴阳。四窗八达，五室九房。
南通夏火，西瞰秋霜。天子临御，万玉锵锵。

卷 41_3【中和乐九章·歌东军第三】

卢照邻

遐哉庙略，赫矣台臣。横戈碣石，倚剑浮津。
风丘佛箴，日域清尘。岛夷复祀，龙伯来宾。
休兵宇县，献馘天闳。旆海凯入，耀辉震震。

卷 41_4【中和乐九章·歌南郊第四】

卢照邻

虔郊上帝，肃事圆丘。龙驾四牡，鸾旗九旒。
钟歌晚引，紫炁高浮。日丽苍璧，云飞鸣球。
皇之庆矣，万寿千秋。

卷 41_5【中和乐九章·歌中宫第五】

卢照邻

祥游沙麓，庆洽瑶衣。黄云昼聚，白气宵飞。
居中履正，稟和体微。仪刑赤县，演教椒闱。
陶钧万国，丹青四妃。河洲在咏，风化攸归。

卷 41_6【中和乐九章·歌储宫第六】

卢照邻

波澄少海，景丽前星。高谋诞圣，甲观升灵。
承规翠所，问寝瑶庭。宗儒侧席，问道横经。
山宾皎皎，国胄青青。黄裳元吉，邦家以宁。

卷 41_7【中和乐九章·歌诸王第七】

卢照邻

星陈帝子，岳列天孙。义光带砺，象著乾坤。
我有明德，利建攸存。苴以茅社，锡以牺尊。
藩屏王室，翼亮尧门。八才两献，夫何足论。

卷 41_8【中和乐九章·歌公卿第八】

卢照邻

蹇蹇三事，师师百僚。群龙在职，振鹭盈朝。
丰金辉首，珮玉鸣腰。青蒲翼翼，丹地翘翘。
歌云佐汉，捧日匡尧。天工人代，邈邈昭昭。

卷 41_9【中和乐九章·总歌第九】

卢照邻

明明天子兮圣德扬，穆穆皇后兮阴化康。
登若木兮坐明堂，池濛汜兮家扶桑。
武化偃兮文化昌，礼乐昭兮股肱良。
君臣已定兮君永无疆，颜子更生兮徒皇皇。
若有人兮天一方，忠为衣兮信为裳。
餐白玉兮饮琼芳，心思荃兮路阻长。

卷 41_10【关山月】

卢照邻

塞坦通碣石，虏障抵祁连。相思在万里，明月正孤悬。
影移金岫北，光断玉门前。寄言闺中妇，时看鸿雁天。

卷 41_11【上之回】

卢照邻

回中道路险，萧关烽候多。五营屯北地，万乘出西河。
单于拜玉玺，天子按雕戈。振旅汾川曲，秋风横大歌。

卷 41_12 【紫骝马】

卢照邻

骝马照金鞍，转战入皋兰。塞门风稍急，长城水正寒。
雪暗鸣珂重，山长喷玉难。不辞横绝漠，流血几时干。

卷 41_13 【战城南】

卢照邻

将军出紫塞，冒顿在乌贪。笳喧雁门北，阵翼龙城南。
雕弓夜宛转，铁骑晓参驩。应须驻白日，为待战方酣。

卷 41_14 【梅花落】

卢照邻

梅岭花初发，天山雪未开。雪处疑花满，花边似雪回。
因风入舞袖，杂粉向妆台。匈奴几万里，春至不知来。

卷 41_15【结客少年场行】

卢照邻

长安重游侠，洛阳富财雄。玉剑浮云骑，金鞭明月弓。
斗鸡过渭北，走马向关东。孙宾遥见待，郭解暗相通。
不受千金爵，谁论万里功。将军下天上，虏骑入云中。
烽火夜似月，兵气晓成虹。横行徇知己，负羽远从戎。
龙旌昏朔雾，鸟阵卷胡风。追奔瀚海咽，战罢阴山空。
归来谢天子，何如马上翁。

卷 41_16【咏史四首】

卢照邻

季生昔未达，身辱功不成。髡钳为台隶，灌园变姓名。
幸逢滕将军，兼遇曹丘生。汉祖广招纳，一朝拜公卿。
百金孰云重，一诺良匪轻。廷议斩樊哙，群公寂无声。
处身孤且直，遭时坦而平。丈夫当如此，唯唯何足荣。

大汉昔云季，小人道遂振。玉帛委奄尹，斧钺婴缙绅。
邈哉郭先生，卷舒得其直。雍容谢朝廷，谈笑奖人伦。
在晦不绝俗，处乱不为亲。诸侯不得友，天子不得臣。
冲情甄负甑，重价折角巾。悠悠天下士，相送洛桥津。
谁知仙舟上，寂寂无四邻。公业负奇志，交结尽才雄。

良田四百顷，所食常不充。一为侍御史，慷慨说何公。
何公何为败，吾谋适不同。仲颖恣残忍，废兴良在躬。
死人如乱麻，天子如转蓬。干戈及黄屋，荆棘生紫宫。
郑生运其谋，将以清国戎。时来命不遂，脱身归山东。
凛凛千载下，穆然怀清风。

昔有平陵男，姓朱名阿游。直发上冲冠，壮气横三秋。
愿得斩马剑，先断佞臣头。天子玉槛折，将军丹血流。
捐生不肯拜，视死其若休。归来教乡里，童蒙远相求。
弟子数百人，散在十二州。三公不敢吏，五鹿何能酬。
名与日月悬，义与天壤俦。何必疲执戟，区区在封侯。
伟哉旷达士，知命固不忧。

卷 41_17【赠李荣道士】

卢照邻

锦节衔天使，琼仙驾羽君。投金翠山曲，奠璧清江滨。
圆洞开丹鼎，方坛聚绛云。宝贶幽难识，空歌迥易分。
风摇十洲影，日乱九江文。敷诚归上帝，应诏在明君。
独有南冠客，耿耿泣离群。遥看八会所，真气晓氤氲。

卷 41_18【早度分水岭】

卢照邻

丁年游蜀道，班鬓向长安。徒费周王粟，空弹汉吏冠。
马蹄穿欲尽，貂裘敝转寒。层冰横九折，积石凌七盘。
重溪既下漱，峻峰亦上干。陇头闻戍鼓，岭外咽飞湍。
瑟瑟松风急，苍苍山月团。传语后来者，斯路诚独难。

卷 41_19【三月曲水宴得尊字】

卢照邻

风烟彭泽里，山水仲长园。由来弃铜墨，本自重琴尊。
高情邈不嗣，雅道今复存。有美光时彦，养德坐山樊。
门开芳杜径，室距桃花源。公子黄金勒，仙人紫气轩。
长怀去城市，高咏狎兰荪。连沙飞白鹭，孤屿啸玄猿。
日影岩前落，云花江上翻。兴阑车马散，林塘夕鸟喧。

卷 41_20【奉使益州至长安发钟阳驿】

卢照邻

跻险方未夷，乘春聊骋望。落花赴丹谷，奔流下青嶂。

葳蕤晓树滋，滉漾春江涨。平川看钓侣，狭径闻樵唱。
蝶戏绿苔前，莺歌白云上。耳目多异赏，风烟有奇状。
峻阻将长城，高标吞巨舫。联翩事羁勒，辛苦劳疲恙。
夕济几潺湲，晨登每惆怅。谁念复当狗，山河独偏丧。

卷 41_21 【和王爽秋夜有所思】

卢照邻

寂寂南轩夜，悠然怀所知。长河落雁苑，明月下鲸池。
凤台有清曲，此曲何人吹。丹唇间玉齿，妙响入云涯。
穷巷秋风叶，空庭寒露枝。劳歌欲有和，星鬓已将垂。

卷 41_22 【望宅中树有所思】

卢照邻

我家有庭树，秋叶正离离。上舞双栖鸟，中秀合欢枝。
劳思复劳望，相见不相知。何当共攀折，歌笑此堂垂。

卷 41_23 【宿晋安亭】

卢照邻

闻有弦歌地，穿凿本多奇。游人试一览，临玩果忘疲。

窗横暮卷叶，檐卧古生枝。旧石开红藓，新河覆绿池。
孤猿稍断绝，宿鸟复参差。泛滟月华晓，裴回星鬓垂。
今日删书客，凄惶君讵知。

卷 41_24【于时春也，慨然有江湖之思，寄赠柳九陇】

卢照邻

提琴一万里，负书三十年。晨攀偃蹇树，暮宿清冷泉。
翔禽鸣我侧，旅兽过我前。无人且无事，独酌还独眠。
遥闻彭泽宰，高弄武城弦。形骸寄文墨，意气托神仙。
我有壶中要，题为物外篇。将以贻好道，道远莫致旃。
相思劳日夜，相望阻风烟。坐惜春华晚，徒令客思悬。
水去东南地，气凝西北天。关山悲蜀道，花鸟忆秦川。
天子何时问，公卿本亦怜。自哀还自乐，归薮复归田。
海屋银为栋，云车电作鞭。倘遇鸾将鹤，谁论貂与蝉。
莱洲频度浅，桃实几成圆。寄言飞凫舄，岁晏同联翩。

卷 41_25【至望喜瞩目言怀贻剑外知己】

卢照邻

圣图夷九折，神化掩三分。缄愁赴蜀道，题拙奉虞薰。
隐轸度深谷，遥袅上高云。碧流递萦注，青山互纠纷。
涧松咽风绪，岩花濯露文。思北常依驭，图南每丧群。

无由召宣室，何以答吾君。

卷 41_26 【赤谷安禅师塔】

卢照邻

独坐岩之曲，悠然无俗纷。酌酒呈丹桂，思诗赠白云。
烟霞朝晚聚，猿鸟岁时闻。水华竞秋色，山翠含夕曛。
高谈十二部，细核五千文。如如数冥昧，生生理氛氲。
古人有糟粕，轮扁情未份。且当事芝朮，从吾所好云。

卷 41_27 【赠益府裴录事】

卢照邻

忽忽岁云暮，相望限风烟。长歌欲对酒，危坐遂停弦。
停弦变霜露，对酒怀朋故。朝看桂蟾晚，夜闻鸿雁度。
鸿度何时还，桂晚不同攀。浮云映丹壑，明月满青山。
青山云路深，丹壑月华临。耿耿离忧积，空令星鬓侵。

卷 41_28 【赠益府群官】

卢照邻

一鸟自北燕，飞来向西蜀。单栖剑门上，独舞岷山足。

昂藏多古貌，哀怨有新曲。群凤从之游，问之何所欲。
答言寒乡子，飘飘万余里。不息恶木枝，不饮盗泉水。
常思稻粱遇，愿栖梧桐树。智者不我邀，愚夫余不顾。
所以成独立，耿耿岁云暮。日夕苦风霜，思归赴洛阳。
羽翮毛衣短，关山道路长。明月流客思，白云迷故乡。
谁能借风便，一举凌苍苍。

卷 41_29【送梓州高参军还京】

卢照邻

京洛风尘远，褒斜烟露深。北游君似智，南飞我异禽。
别路琴声断，秋山猿鸟吟。一乖青岩酌，空伫白云心。

卷 41_30【大剑送别刘右史】

卢照邻

金碧禺山远，关梁蜀道难。相逢属晚岁，相送动征鞍。
地咽绵川冷，云凝剑阁寒。倘遇忠孝所，为道忆长安。

卷 41_31 【同临津纪明府孤雁】

卢照邻

三秋违北地，万里向南翔。河洲花稍白，关塞叶初黄。
避缴风霜劲，怀书道路长。水流疑箭动，月照似弓伤。
横天无有阵，度海不成行。会刷能鸣羽，还赴上林乡。

卷 41_32 【失群雁】

卢照邻

三秋北地雪皑皑，万里南翔渡海来。欲随石燕沉湘水，
试逐铜乌绕帝台。帝台银阙距金塘，中间鹈鹭已成行。
先过上苑传书信，暂下中州戏稻粱。虞人负缴来相及，
齐客虚弓忽见伤。毛翎频顿飞无力，羽翮摧颓君不识。
唯有庄周解爱鸣，复道郊哥重奇色。惆怅惊思悲未已，
裴回自怜中罔极。传闻有鸟集朝阳，讵胜仙鹄迓帝乡。
云间海上应鸣舞，远得鵞弦犹独抚。金龟全写中牟印，
玉鹄当变莱芜釜。愿君弄影凤凰池，时忆笼中摧折羽。

卷 41_33 【行路难】

卢照邻

君不见长安城北渭桥边，枯木横槎卧古田。
昔日含红复含紫，常时留雾亦留烟。春景春风花似雪，
香车玉輿恒阗咽。若个游人不竞攀，若个娼家不来折。
娼家宝袜蛟龙帔，公子银鞍千万骑。黄莺一一向花娇，
青鸟双双将子戏。千尺长条百尺枝，月桂星榆相蔽亏。
珊瑚叶上鸳鸯鸟，凤凰巢里雏鵲儿。巢倾枝折凤归去，
条枯叶落任风吹。一朝零落无人问，万古摧残君讵知。
人生贵贱无终始，倏忽须臾难久恃。谁家能驻西山日，
谁家能堰东流水。汉家陵树满秦川，行来行去尽哀怜。
自昔公卿二千石，咸拟荣华一万年。不见朱唇将白貌，
唯闻素棘与黄泉。金貂有时换美酒，玉麈但摇莫计钱。
寄言坐客神仙署，一生一死交情处。苍龙阙下君不来，
白鹤山前我应去。云间海上邈难期，赤心会合在何时。
但愿尧年一百万，长作巢由也不辞。

卷 41_34 【长安古意】

卢照邻

长安大道连狭斜，青牛白马七香车。玉辇纵横过主第，
金鞭络绎向侯家。龙衔宝盖承朝日，凤吐流苏带晚霞。

百丈游丝争绕树，一群娇鸟共啼花。啼花戏蝶千门侧，
碧树银台万种色。复道交窗作合欢，双阙连甍垂凤翼。
梁家画阁天中起，汉帝金茎云外直。楼前相望不相知，
陌上相逢讵相识。借问吹箫向紫烟，曾经学舞度芳年。
得成比目何辞死，愿作鸳鸯不羡仙。比目鸳鸯真可羨，
双去双来君不见。生憎帐额绣孤鸾，好取门帘帖双燕。
双燕双飞绕画梁，罗纬翠被郁金香。片片行云著蝉鬓，
纤纤初月上鸦黄。鸦黄粉白车中出，含娇含态情非一。
妖童宝马铁连钱，娼妇盘龙金屈膝。御史府中乌夜啼，
廷尉门前雀欲栖。隐隐朱城临玉道，遥遥翠幰没金堤。
挟弹飞鹰杜陵北，探丸借客渭桥西。俱邀侠客芙蓉剑，
共宿娼家桃李蹊。娼家日暮紫罗裙，清歌一啜口氛氲。
北堂夜夜人如月，南陌朝朝骑似云。南陌北堂连北里，
五剧三条控三市。弱柳青槐拂地垂，佳气红尘暗天起。
汉代金吾千骑来，翡翠屠苏鹦鹉杯。罗襦宝带为君解，
燕歌赵舞为君开。别有豪华称将相，转日回天不相让。
意气由来排灌夫，专权判不容萧相。专权意气本豪雄，
青虬紫燕坐春风。自言歌舞长千载，自谓骄奢凌五公。
节物风光不相待，桑田碧海须臾改。昔时金阶白玉堂，
即今唯见青松在。寂寂寥寥扬子居，年年岁岁一床书。
独有南山桂花发，飞来飞去袭人裾。

卷 41_35 【明月引】

卢照邻

洞庭波起兮鸿雁翔，风瑟瑟兮野苍苍。

浮云卷霭，明月流光。荆南兮赵北，碣石兮潇湘。
澄清规于万里，照离思于千行。横桂枝于西第，
绕菱花于北堂。高楼思妇，飞盖君王。
文姬绝域，侍子他乡。见胡鞍之似练，知汉剑之如霜。
试登高而骋目，莫不变而回肠。

卷 41_36 【狱中学骚体】

卢照邻

夫何秋夜之无情兮，皎晶悠悠而太长。
圜户杳其幽邃兮，愁人披此严霜。
见河汉之西落，闻鸿雁之南翔。
山有桂兮桂有芳，心思君兮君不将。
忧与忧兮相积，欢与欢兮两忘。
风袅袅兮木纷纷，凋绿叶兮吹白云。
寸步千里兮不相闻，思公子兮日将曛。
林已暮兮鸟群飞，重门掩兮人径稀。
万族皆有所托兮，蹇独淹留而不归。

卷 41_37 【怀仙引】

卢照邻

若有人兮山之曲，驾青虬兮乘白鹿，往从之游愿心足。
披涧户，访岩轩，石濂潺湲横石径，松萝幂幂掩松门。

下空蒙而无鸟，上巉岩而有猿。怀飞阁，度飞梁。
休余马于幽谷，挂余冠于夕阳。曲复曲兮烟庄邃，
行复行兮天路长。修途杳其未半，飞雨忽以茫茫。
山块轧，磴连蹇。攀旧壁而无据，溯泥溪而不前。
向无情之白日，窃有恨于皇天。回行遵故道，
通川遍流潦。回首望群峰，白云正溶溶。
珠为阙兮玉为楼，青云盖兮紫霜裘。
天长地久时相忆，千龄万代一来游。

卷 41_39 【七日登乐游故墓】

卢照邻

四序周缙籥，三正纪璇耀。绿野变初黄，暘山开晓眺。
中天擢露掌，匝地分星徼。汉寝眷遗灵，秦江想余吊。
蚁泛青田酌，莺歌紫芝调。柳色摇岁华，冰文荡春照。
远迹谢群动，高情符众妙。兰游澹未归，倾光下岩窈。

卷 41_40 【释疾文三歌】

卢照邻

岁将暮兮欢不再，时已晚兮忧来多。东郊绝此麒麟笔，
西山秘此凤凰柯。死去死去今如此，生兮生兮奈汝何。

岁去忧来兮东流水，地久天长兮人共死。
明镜羞窥兮向十年，骏马停驱兮几千里。
麟兮凤兮，自古吞恨无已。

茨山有薇兮颍水有漪，夷为柏兮秋有实。
叔为柳兮春向飞。倏尔而笑，泛沧浪兮不归。

第四十二卷

卷 42_1【酬杨比部员外暮宿琴堂朝跻书阁率尔见赠之作
(一作王维诗)】

卢照邻

闲拂檐尘看，鸣琴候月弹。桃源迷汉姓，松径有秦官。
空谷归人少，青山背日寒。羨君栖隐处，遥望在云端。

卷 42_2【刘生】

卢照邻

刘生气不平，抱剑欲专征。报恩为豪侠，死难在横行。
翠羽装刀鞘，黄金饰马铃。但令一顾重，不吝百身轻。

卷 42_3【陇头水】

卢照邻

陇阪高无极，征人一望乡。关河别去水，沙寨断归肠。

马系千年树，旌悬九月霜。从来共呜咽，皆是为勤王。

卷 42_4 【巫山高】

卢照邻

巫山望不极，望望下朝氛。莫辨啼猿树，徒看神女云。
惊涛乱水脉，骤雨暗峰文。沾裳即此地，况复远思君。

卷 42_5 【芳树】

卢照邻

芳树本多奇，年华复在斯。结翠成新幄，开江满故枝。
风归花历乱，日度影参差。容色朝朝落，思君君不知。

卷 42_6 【雨雪曲】

卢照邻

虏骑三秋入，关云万里平。雪似胡沙暗，冰如汉月明。
高阙银为阙，长城玉作城。节旄零落尽，天子不知名。

卷 42_7 【昭君怨】

卢照邻

合殿恩中绝，交河使渐稀。肝肠辞玉辇，形影向金微。
汉地草应绿，胡庭沙正飞。愿逐三秋雁，年年一度归。

卷 42_8 【折杨柳】

卢照邻

倡楼启曙扉，杨柳正依依。莺啼知岁隔，条变识春归。
露叶凝愁黛，风花乱舞衣。攀折聊将寄，军中音信稀。

卷 42_9 【十五夜观灯】

卢照邻

锦里开芳宴，兰缸艳早年。缛彩遥分地，繁光远缀天。
接汉疑星落，依楼似月悬。别有千金笑，来映九枝前。

卷 42_10【入秦川界】

卢照邻

陇阪长无极，苍山望不穷。石径萦疑断，回流映似空。
花开绿野雾，莺啭紫岩风。春芳勿遽尽，留赏故人同。

卷 42_11【文翁讲堂】

卢照邻

锦里淹中馆，岷山稷下亭。空梁无燕雀，古壁有丹青。
槐落犹疑市，苔深不辨铭。良哉二千石，江汉表遗灵。

卷 42_12【相如琴台】

卢照邻

闻有雍容地，千年无四邻。园院风烟古，池台松桧春。
云疑作赋客，月似听琴人。寂寂啼莺处，空伤游子神。

卷 42_13【石镜寺】

卢照邻

古墓芙蓉塔，神铭松柏烟。鸾沉仙镜底，花没梵轮前。
铢衣千古佛，宝月两重圆。隐隐香台夜，钟声彻九天。

卷 42_14【辛法司宅观妓】

卢照邻

南国佳人至，北堂罗荐开。长裙随凤管，促柱送鸾杯。
云光身后落，雪态掌中回。到愁金谷晚，不怪玉山颓。

卷 42_15【春晚山庄率题二首】

卢照邻

顾步三春晚，田园四望通。游丝横惹树，戏蝶乱依丛。
竹懒偏宜水，花狂不待风。唯馀诗酒意，当了一生中。

田家无四邻，独坐一园春。莺啼非选树，鱼戏不惊纶。
山水弹琴尽，风花酌酒频。年华已可乐，高兴复留人。

卷 42_16【江中望月】

卢照邻

江水向涔阳，澄澄写月光。镜圆珠溜彻，弦满箭波长。
沉钩摇兔影，浮桂动丹芳。延照相思夕，千里共沾裳。

卷 42_17【元日述怀（一作明月引）】

卢照邻

筮仕无中秩，归耕有外臣。人歌小岁酒，花舞大唐春。
草色迷三径，风光动四邻。愿得长如此，年年物候新。

卷 42_18【益州城西张超亭观妓】

卢照邻

落日明歌席，行云逐舞人。江前飞暮雨，梁上下轻尘。
冶服看疑画，妆楼望似春。高车勿遽返，长袖欲相亲。

卷 42_19【还京赠别】

卢照邻

风月清江夜，山水白云朝。万里同为客，三秋契不凋。
戏鳧分断岸，归骑别高标。一去仙桥道，还望锦城遥。

卷 42_20【至陈仓晓晴望京邑】

卢照邻

拂曙驱飞传，初晴带晓凉。雾敛长安树，云归仙帝乡。
涧流漂素沫，岩景霭朱光。今朝好风色，延瞰极天庄。

卷 42_21【晚渡滹沱敬赠魏大】

卢照邻

津谷朝行远，冰川夕望曛。霞明深浅浪，风卷去来云。
澄波泛月影，激浪聚沙文。谁忍仙舟上，携手独思君。

卷 42_22 【和吴侍御被使燕然】

卢照邻

春归龙塞北，骑指雁门垂。胡笳折杨柳，汉使采燕支。
戍城聊一望，花雪几参差。关山有新曲，应向笛中吹。

卷 42_23 【七夕泛舟二首】

卢照邻

汀葭肃徂暑，江树起初凉。水疑通织室，舟似泛仙潢。
连桡渡急响，鸣棹下浮光。日晚菱歌唱，风烟满夕阳。

凤杼秋期至，凫舟野望开。微吟翠塘侧，延想白云隈。
石似支机罢，槎疑犯宿来。天潢殊漫漫，日暮独悠哉。

卷 42_24 【西使兼送孟学士南游】

卢照邻

地道巴陵北，天山弱水东。相看万馀里，共倚一征蓬。
零雨悲王粲，清尊别孔融。裴回闻夜鹤，怅望待秋鸿。
骨肉胡秦外，风尘关塞中。唯馀剑锋在，耿耿气成虹。

卷 42_25 【送郑司仓入蜀】

卢照邻

离人丹水北，游客锦城东。别意还无已，离忧自不穷。
陇云朝结阵，江月夜临空。关塞疲征马，霜氛落早鸿。
潘年三十外，蜀道五千中。送君秋水曲，酌酒对清风。

卷 42_26 【绵州官池赠别同赋湾字】

卢照邻

輶轩遵上国，仙佩下灵关。尊酒方无地，联绁喜暂攀。
离言欲赠策，高辨正连环。野径浮云断，荒池春草斑。
残花落古树，度鸟入澄湾。欲叙他乡别，幽谷有绵蛮。

卷 42_27 【还赴蜀中贻示京邑游好】

卢照邻

簪宿花初满，章台柳向飞。如何正此日，还望昔多违。
怅别风期阻，将乖云会稀。敛衽辞丹阙，悬旗陟翠微。
野禽喧戍鼓，春草变征衣。回顾长安道，关山起夕霏。

卷 42_28【初夏日幽庄】

卢照邻

闻有高踪客，耿介坐幽庄。林壑人事少，风烟鸟路长。
瀑水含秋气，垂藤引夏凉。苗深全覆陇，荷上半侵塘。
钓渚青鳬没，村田白鹭翔。知君振奇藻，还嗣海隅芳。

卷 42_29【山庄休沐（一作和夏日山庄）】

卢照邻

兰署乘闲日，蓬扉狎遁栖。龙柯疏玉井，凤叶下金堤。
川光摇水箭，山气上云梯。亭幽闻唳鹤，窗晓听鸣鸡。
玉轸临风奏，琼浆映月携。田家自有乐，谁肯谢青溪。

卷 42_30【山林休日田家】

卢照邻

归休乘暇日，饁稼返秋场。径草疏王彗，岩枝落帝桑。
耕田虞讼寝，凿井汉机忘。戎葵朝委露，齐枣夜含霜。
南涧泉初冽，东篱菊正芳。还思北窗下，高卧偃羲皇。

卷 42_31【宴梓州南亭得池字】

卢照邻

二条开胜迹，大隐叶冲规。亭阁分危岫，楼台绕曲池。
长薄秋烟起，飞梁古蔓垂。水鸟翻荷叶，山虫咬桂枝。
游人惜将晚，公子爱忘疲。愿得回三舍，琴尊长若斯。

卷 42_32【山行寄刘李二参军】

卢照邻

万里烟尘客，三春桃李时。事去纷无限，愁来不自持。
狂歌欲叹凤，失路反占龟。草碍人行缓，花繁鸟度迟。
彼美参卿事，留连求友诗。安知倦游子，两鬓渐如丝。

卷 42_33【首春贻京邑文士】

卢照邻

寂寂罢将迎，门无车马声。横琴答山水，披卷阅公卿。
忽闻岁云晏，倚仗出檐楹。寒辞杨柳陌，春满凤凰城。
梅花扶院吐，兰叶绕阶生。览镜改容色，藏书留姓名。
时来不假问，生死任交情。

卷 42_34【赠许左丞从驾万年宫】

卢照邻

闻道上之回，诏跸下蓬莱。中枢移北斗，左辖去南台。
黄山闻凤笛，清跸侍龙媒。曳日朱旗卷，参云金障开。
朝参五城柳，夕宴柏梁杯。汉时光如月，秦祠听似雷。
寂寂芸香阁，离思独悠哉。

卷 42_35【晚渡渭桥寄示京邑游好】

卢照邻

我行背城阙，驱马独悠悠。寥落百年事，裴回万里忧。
途遥日向夕，时晚鬓将秋。滔滔俯东逝，耿耿泣西浮。
长虹掩钓浦，落雁下星洲。草变黄山曲，花飞清渭流。
进水惊愁鹭，腾沙起狎鸥。一赴清泥道，空思玄灞游。

卷 42_36【羁卧山中】

卢照邻

卧壑迷时代，行歌任死生。红颜意气尽，白璧故交轻。
涧户无人迹，山窗听鸟声。春色缘岩上，寒光入溜平。

雪尽松帷暗，云开石路明。夜伴饥鼯宿，朝随驯雉行。
度溪犹忆处，寻洞不知名。紫书常日阅，丹药几年成。
扣钟鸣天鼓，烧香厌地精。倘遇浮丘鹤，飘飘凌太清。

卷 42_37【酬张少府柬之】

卢照邻

昔余与夫子，相遇汉川阴。珠浦龙犹卧，檀溪马正沉。
价重瑶山曲，词惊丹凤林。十年睽赏慰，万里隔招寻。
毫翰风期阻，荆衡云路深。鹏飞俱望昔，蠖屈共悲今。
谁谓青衣道，还叹白头吟。地接神仙涧，江连云雨岑。
飞泉如散玉，落日似悬金。重以瑶华赠，空怀舞咏心。

卷 42_38【过东山谷口】

卢照邻

不知名利险，辛苦滞皇州。始觉飞尘倦，归来事绿畴。
桃源迷处所，桂树可淹留。迹异人间俗，禽同海上鸥。
古苔依井被，新乳傍崖流。野老堪成鹤，山神或化鸠。
泉鸣碧涧底，花落紫岩幽。日暮餐龟壳，开寒御鹿裘。
不辨秦将汉，宁知春与秋。多谢青溪客，去去赤松游。

卷 42_39 【送幽州陈参军赴任寄呈乡曲父老】

卢照邻

蓟北三千里，关西二十年。冯唐犹在汉，乐毅不归燕。
人同黄鹤远，乡共白云连。郭隗池台处，昭王尊酒前。
故人当已老，旧壑几成田。红颜如昨日，衰鬓似秋天。
西蜀桥应毁，东周石尚全。灞池水犹绿，榆关月早圆。
塞云初上雁，庭树欲销蝉。送君之旧国，挥泪独潸然。

卷 42_40 【哭金部韦郎中】

卢照邻

金曹初受拜，玉地始含香。翻同五日尹，遽见一星亡。
贺客犹扶路，哀人遂上堂。歌筵长寂寂，哭位自苍苍。
岁时宾径断，朝暮雀罗张。书留魏主阙，魂掩汉家床。
徒令永平帝，千载罢撞郎。

卷 42_41 【哭明堂裴主簿】

卢照邻

缔欢三十载，通家数百年。潘杨称代穆，秦晋忝姻连。

风云洛阳道，花月茂陵田。相悲共相乐，交骑复交筵。
始谓调金鼎，如何掩玉泉。黄公酒炉处，青眼竹林前。
故琴无复雪，新树但生烟。遽痛兰襟断，徒今宝剑悬。
客散同秋叶，人亡似夜川。送君一长恸，松台路几千。

卷 42_42 【同崔录事哭郑员外】

卢照邻

文学秋天远，郎官星位尊。伊人表时彦，飞誉满司存。
楚席光文雅，瑶山侍讨论。凤词凌汉阁，龟辩罩周园。
已陪东岳驾，将逝北溟鲲。如何万化尽，空叹九飞魂。
白马西京驿，青松北海门。夜台无晓箭，朝奠有虚尊。
一代儒风没，千年陇雾昏。梁山送夫子，湘水吊王孙。
仆本多悲泪，沾裳不待猿。闻君绝弦曲，吞恨更无言。

卷 42_43 【登玉清】

卢照邻

绝顶横临日，孤峰半倚天。裴回拜真老，万里见风烟。

卷 42_44 【曲池荷】

卢照邻

浮香绕曲岸，圆影覆华池。常恐秋风早，飘零君不知。

卷 42_45 【浴浪鸟】

卢照邻

独舞依磐石，群飞动轻浪。奋迅碧沙前，长怀白云上。

卷 42_46 【临阶竹】

卢照邻

封霜连锦砌，防露拂瑶阶。聊将仪凤质，暂与俗人谐。

卷 42_47 【含风蝉】

卢照邻

高情临爽月，急响送秋风。独有危冠意，还将衰鬓同。

卷 42_48【葭川独泛】

卢照邻

倚棹春江上，横舟石岸前。山暝行人断，迢迢独泛仙。

卷 42_49【送二兄入蜀】

卢照邻

关山客子路，花柳帝王城。此中一分手，相顾怜无声。

卷 42_50【宿玄武二首】

卢照邻

方池开晓色，圆月下秋阴。已乘千里兴，还抚一弦琴。

庭摇北风柳，院绕南溟禽。累宿恩方重，穷秋叹不深。

卷 42_51【九陇津集】

卢照邻

落落树阴紫，澄澄水华碧。复有翻飞禽，裴回疑曳舄。

卷 42_52【游昌化山精舍】

卢照邻

宝地乘峰出，香台接汉高。稍觉真途近，方知人事劳。

卷 42_53【登封大酺歌四首】

卢照邻

明君封禅日重光，天子垂衣历数长。
九州四海常无事，万岁千秋乐未央。

日观仙云随风辇，天门瑞雪照龙衣。
繁弦绮席方终夜，妙舞清歌欢未归。

翠凤逶迤登介丘，仙鹤裴回天上游。
借问乾封何所乐，人皆寿命得千秋。

千年圣主应昌期，万国淳风王化基。
请比上古无为代，何如今日太平时。

卷 42_54【九月九日登玄武山】

卢照邻

九月九日眺山川，归心归望积风烟。
他乡共酌金花酒，万里同悲鸿雁天。

第四十三卷

卷 43_1 【少年行】

李百药

少年飞翠盖，上路勒金镳。始酌文君酒，新吹弄玉箫。
少年不欢乐，何以尽芳朝。千金笑里面，一搦掌中腰。
挂纓岂惮宿，落珥不胜娇。寄语少年子，无辞归路遥。

卷 43_2 【渡汉江】

李百药

东流既瀾瀾，南纪信滔滔。水激沉碑岸，波骇弄珠皋。
含星映浅石，浮盖下奔涛。溜阔霞光近，川长晓气高。
檣乌转轻翼，戏鸟落风毛。客心既多绪，长歌且代劳。

卷 43_3【秋晚登古城】

李百药

日落征途远，怅然临古城。颓墉寒雀集，荒堞晚乌惊。
萧森灌木上，迢递孤烟生。霞景焕余照，露气澄晚清。
秋风转摇落，此志安可平。

卷 43_4【途中述怀】

李百药

伯喈迁塞北，亭伯之辽东。伊余何为客，独守云台中。
途遥已日暮，时泰道斯穷。拔心悲岸草，半死落岩桐。
目送衡阳雁，情伤江上枫。福兮良所伏，今也信难通。
丈夫自有志，宁伤官不公。

卷 43_5【郢城怀古】

李百药

客心悲暮序，登墉塘瞰平陆。林泽窅芊绵，山川郁重复。
王公资设险，名都拒江隩。方城次北门，溟海穷南服。
长策挫吴豕，雄图竞周鹿。万乘重沮漳，九鼎轻伊谷。

大搜云梦掩，壮观章华筑。人世更盛衰，吉凶良倚伏。
遽见邻交断，仍睹贤臣逐。南风忽不竞，西师日侵蹙。
运圯属驰驱，时屯恣敲朴。莫救夷陵火，无复秦庭哭。
鄢郢遂丘墟，风尘俄惨黻。狐兔时游践，霜露日沾沐。
钓渚故池平，神台层宇覆。阵云埋夏首，穷阴惨荒谷。
怅矣舟壑迁，悲哉年祀倏。虽异三春望，终伤千里目。

卷 43_6【晚渡江津】

李百药

寂寂江山晚，苍苍原野暮。秋气怀易悲，长波淼难溯。
索索风叶下，离离早鸿度。丘壑列夕阴，葭菼凝寒雾。
日落亭皋远，独此怀旧慕。

卷 43_7【王师渡汉水经襄阳】

李百药

导漾疏源远，归海会流长。延波接荆梦，通望迤沮漳。
高岸沉碑影，曲渚丽珠光。云昏翠岛没，水广素涛扬。
阅川已多叹，遐睎几增伤。临溪犹驻马，望岷欲沾裳。
乔木下寒叶，亭林落晓霜。山公不可遇，谁与访高阳。

卷 43_8 【谒汉高庙】

李百药

纂尧灵命启，灭楚馀闰终。飞名膺帝篆，沈迹韞神功。
瑞气朝浮碣，祥符夜告丰。抑扬驾人杰，叱咤掩时雄。
缔构三灵改，经纶五纬同。干戈革宇内，声教尽寰中。
运谢年逾远，魂归道未穷。树碑留故邑，抗殿表祠宫。
沐兰祈泗上，谒帝动深衷。英威肃如在，文物杳成空。
竹皮聚寒径，粉社落霜丛。萧索阴云晚，长川起大风。

卷 43_9 【登叶县故城谒沈诸梁庙】

李百药

总辔临秋原，登城望寒日。烟霞共掩映，林野俱萧瑟。
楚塞郁不穷，吴山高渐出。客行殊未已，沐澡期终吉。
椒桂奠芳樽，风云下虚室。馆宇肃而静，神心康且逸。
伊我非真龙，勿惊疲朽质。

卷 43_10 【安德山池宴集（安德，杨师道封号）】

李百药

朝宰论思暇，高宴临方塘。云飞凤台管，风动令君香。

细草开金埒，流霞泛羽觞。虹桥分水态，镜石引菱光。
上才同振藻，小技谬连章。怀音自兰室，徐步返山庄。

卷 43_11【和许侍郎游昆明池】

李百药

神池望不极，沧波接远天。仪星似河汉，落景类虞泉。
年深平馆宇，道泰偃戈船。差池下鳧雁，掩映生云烟。
浪花开已合，风文直且连。税马金堤外，横舟石岸前。
羽觞倾绿蚁，飞日落红鲜。积水浮深智，明珠曜雅篇。
大鲸方远击，沉灰独未然。知君啸俦侣，短翮徒联翩。

卷 43_12【赋得魏都】

李百药

炎运精华歇，清都宝命开。帝里三方盛，王庭万国来。
玄武疏遥磴，金凤上层台。乍进仙童乐，时倾避暑杯。
南馆招奇士，西园引上才。还惜刘公干，疲病清漳隈。

卷 43_13【赋礼记】

李百药

玉帛资王会，郊丘叶圣情。重广开环堵，至道轶金籛。
盘薄依厚地，遥裔腾太清。方悦升中礼，足以慰馀生。

卷 43_14【奉和正日临朝应诏】

李百药

化历昭唐典，承天顺夏正。百灵警朝禁，三辰扬旆旌。
充庭富礼乐，高宴齿簪缨。献寿符万岁，移风韵九成。

卷 43_15【妾薄命】

李百药

团扇秋风起，长门夜月明。羞闻拊背入，恨说舞腰轻。
太常先已醉，刘君恒带醒。横陈每虚设，吉梦竟何成。

卷 43_16 【火凤词二首】

李百药

歌声扇后出，妆影镜中轻。未能令掩笑，何处欲障声。
知音自不惑，得念是分明。莫见双嚬敛，疑人含笑情。

佳人靓晚妆，清唱动兰房。影出含风扇，声飞照日梁。
娇颦眉际敛，逸韵口中香。自有横陈会，应怜秋夜长。

卷 43_17 【奉和初春出游应令】

李百药

鸣笳出望苑，飞盖下芝田。水光浮落照，霞彩淡轻烟。
柳色迎三月，梅花隔二年。日斜归骑动，馀兴满山川。

卷 43_18 【寄杨公】

李百药

公子盛西京，光华早著名。分庭接游士，虚馆待时英。
高阁浮香出，长廊宝钏鸣。面花无隔笑，歌扇不障声。

卷 43_19【戏赠潘徐城门迎两新妇】

李百药

秦晋积旧匹，潘徐有世亲。三星宿已会，四德婉而嫔。
云光鬓里薄，月影扇中新。年华与妆面，共作一芳春。

卷 43_20【送别】

李百药

眷言一杯酒，凄怆起离忧。夜花飘露气，暗水急还流。
雁行遥上月，虫声迥映秋。明日河梁上，谁与论仙舟。

卷 43_21【雨后】

李百药

晚来风景丽，晴初物色华。薄云向空尽，轻虹逐望斜。
后窗临岸竹，前阶枕浦沙。寂寥无与晤，尊酒论风花。

卷 43_22 【文德皇后挽歌】

李百药

裴回两仪殿，怅望九成台。玉辇终辞宴，瑶筐遂不开。
野旷阴风积，川长思鸟来。寒山寂已暮，虞殡有馀哀。

卷 43_23 【咏蝉】

李百药

清心自饮露，哀响乍吟风。未上华冠侧，先惊翳叶中。

卷 43_24 【咏萤火示情人】

李百药

窗里怜灯暗，阶前畏月明。不辞逢露湿，只为重宵行。

卷 43_25 【春眺】

李百药

疲疴荷拙患，沦蹶合幽襟。栖息在何处，丘中鸣素琴。

卷 43_26【句】

李百药

今日持团扇，非是为秋风。（赋得班婕妤见《诗式》）

第四十四卷

卷 44_1【奉和太子纳妃太平公主出降】

刘祎之

梦梓光青陞，秣桃蔼紫宫。德优宸念远，礼备国姻崇。
万户声明发，三条骑吹通。香轮送重景，彩旆引仙虹。

卷 44_2【奉和别越王】

刘祎之

周屏辞金殿，梁骖整玉珂。管声依折柳，琴韵动流波。
鹤盖分阴促，龙轩别念多。延襟小山路，还起大风歌。

卷 44_3【酬郑沁州】

刘祎之

麒麟阁一代良，熊轩千里躅。缉图昭国典，按部留宸瞩。

匪厌承明庐，伫兼司隶局。芸书暂辍载，竹使方临俗。
节变风绪高，秋深露华溽。寒山敛轻霭，霁野澄初旭。
已切长年悲，谁堪岐路促。遥林征马迅，别馆嘶骖跼。
雅赠响琤金，索居睽倚玉。凄断离鸿引，劳歌思足曲。

卷 44_4 【孝敬皇帝挽歌】

刘祎之

戒奢虚厩辂，锡号纪鸿名。地叶苍梧野，途经紫聚城。
重照掩寒色，晨飙断曙声。一随仙骥远，霜雪愁阴生。

卷 44_5 【九成宫秋初应诏】

刘祎之

帝圃疏金阙，仙台驻玉銮。野分鸣鹳岫，路接宝鸡坛。
林树千霜积，山宫四序寒。蝉急知秋早，莺疏觉夏阑。
怡神紫气外，凝睇白云端。舜海词波发，空惊游圣难。

卷 44_6 【奉和别鲁王】

李敬玄

绿车旋楚服，丹跸伫秦川。珠皋转归骑，金岸引行旃。

一朝限原隰，千里间风烟。莺喧上林谷，鳧响御沟泉。
断云移鲁盖，离歌动舜弦。别念凝神宸，崇恩洽玳筵。
顾惟惭叩寂，徒自仰钧天。

卷 44_7 【奉和别越王】

李敬玄

飞盖回兰坂，宸襟伫柏梁。别馆分泾渭，归路指衡漳。
关山通曙色，林籞遍春光。帝念紆千里，词波照五潢。

卷 44_8 【奉和别越王】

张大安

盛藩资右戚，连萼重皇情。离襟怆睢苑，分途指邺城。
丽日开芳甸，佳气积神京。何时骖驾入，还见谒承明。

卷 44_9 【奉和太子纳妃太平公主出降】

元万顷

象辂初乘雁，璇宫早结褵。离元应春夕，帝子降秋期。
鸣珮合清响，冠玉丽秾姿。和声跻凤掖，交影步鸾墀。

卷 44_10【奉和春日池台】

元万顷

日影飞花殿，风文积草池。凤楼通夜敞，虬辇望春移。

卷 44_11【奉和春日二首（前首一作上官仪诗）】

元万顷

花轻蕊乱仙人杏，叶密莺喧帝女桑。
飞云阁上春应至，明月楼中夜未央。

凤辇迎风乘紫阁，鸾车避日转彤闱。
中堂促管淹春望，后殿清歌开夜扉。

卷 44_12【奉和太子纳妃太平公主出降】

郭正一

桂宫初服冕，兰掖早升筵。礼盛亲迎晋，声芬出降齐。
金龟开瑞钮，宝翟上仙袿。转扇承宵月，扬旌照夕蜺。

卷 44_13【奉和太子纳妃太平公主出降三首】

胡元范

帝子威仪绝，储妃礼度优。叠鼓陪仙观，凝笳翼画輶。
郁郁神香满，奕奕彩云浮。排空列锦罽，腾欢溢皇州。

金闺未息火，玉树钟天爱。月路饰还装，星津动归佩。
紫极流宸渥，清规伫慈诲。恩波洽九流，光辉轶千载。

列席诏亲贤，式宴坐神仙。圣文飞圣笔，天乐奏钧天。
曲池涵瑞景，文字孕祥烟。小臣同百兽，率舞悦尧年。

卷 44_14【奉和太子纳妃太平公主出降】

任希古

帝子升青陛，王姬降紫宸。星光移杂珮，月彩荐重轮。
龙旌翻地杪，凤管飏天滨。槐阴浮浅濑，葆吹翼轻尘。

卷 44_15【和东观群贤七夕临泛昆明池】

任希古

秋风始摇落，秋水正澄鲜。飞眺牵牛渚，激赏镂鲸川。

岸珠沦晓魄，池灰敛曙烟。泛查分写汉，仪星别构天。
云光波处动，日影浪中悬。惊鸿絺蒲弋，游鲤入庄筌。
萍叶疑江上，菱花似镜前。长林代轻幄，细草即芳筵。
文峰开翠潏，笔海控清涟。不挹兰樽圣，空仰桂舟仙。

卷 44_16【和左仆射燕公春日端居述怀】

任希古

丰野光三杰，妣庭赞五臣。绵绵歌美誉，丝竹咏芳尘。
圣历开环象，昌年降甫申。高门非舍筑，华构岂垂纶。
凤邸抟霄翰，龙池跃海鳞。玉鼎升黄阁，金章谒紫宸。
礼闱通政本，文昌总国均。调风振薄俗，清教叙彝伦。
星回应缇管，日御警寅宾。叶上曾槐变，花发小堂春。
思挂五都冕，言访北山巾。赫赫容台上，千祀耀平津。

卷 44_17【和长孙秘监伏日苦热】

任希古

玉署三时晓，金羁五日归。北林开逸径，东阁敞闲扉。
池镜分天色，云峰减日辉。游鳞映荷聚，惊翰绕林飞。
披襟扬子宅，舒啸仰重闱。

卷 44_18【和李公七夕】

任希古

落日照高牖，凉风起庭树。悠悠天宇平，昭昭月华度。
开轩卷绡幕，延首睇云路。层汉有灵妃，仙居无与晤。
履化悲流易，临川怨迟暮。昔从九春徂，方此三秋遇。
瑶驾越星河，羽盖凝珠露。便妍耀井色，窈窕凌波步。
始阅故人新，俄见新人故。掩泪收机石，衔啼褰纨素。
惆怅何伤已，裴回劳永慕。无由西北归，空自东南顾。

卷 44_19【和长孙秘监七夕】

任希古

二秋叶神媛，七夕望仙妃。影照河阳妓，色丽平津闱。
鹊桥波里出，龙车霄外飞。露泫低珠佩，云移荐锦衣。
更深黄月落，夜久靑星稀。空接灵台下，方慙辨支机。

卷 44_20【奉和太子纳妃太平公主出降三首】

裴守真

瑜珮升青殿，秣华降紫微。还如桃李发，更似凤凰飞。

金屋真离象，瑶台起婺徽。彩纓纷碧坐，缟羽泛榆衣。

云路移彤辇，天津转明镜。仙珠照乘归，宝月重轮映。
望园嘉宴洽，主第欢娱盛。丝竹扬帝熏，簪裾奉宸庆。

丛云霭晓光，湛露晞朝阳。天文天景丽，睿藻睿词芳。
玉庭散秋色，银宫生夕凉。太平超邃古，万寿乐无疆。

卷 44_21 【奉和圣制过温汤】

杨思玄

丰城观汉迹，温谷幸秦馀。地接幽王垒，涂分郑国渠。
风威肃文卫，日彩镜雕舆。远岫凝氛重，寒丛对影疏。
回瞻汉章阙，佳气满宸居。

卷 44_22 【奉和别鲁王】

杨思玄

元王诗传博，文后宠灵优。鹤盖动宸眷，龙章送远游。
函关疏别道，灞岸引行舟。北林分苑树，东流溢御沟。
鸟声含羽碎，骑影曳花浮。圣泽九垓普，天文七曜周。
方图献雅乐，簪带奉鸣球。

卷 44_23 【奉和圣制过温汤】

王德真

握图开万宇，属圣启千年。骊阜疏缇骑，惊鸿映彩旃。
玉霜鸣凤野，金阵藻龙川。祥烟聚危岫，德水溢飞泉。
停舆兴睿览，还举大风篇。

卷 44_24 【奉和圣制过温汤】

郑义真

洛川方驻跸，丰野暂停銮。汤泉恒独涌，温谷岂知寒。
漏鼓依岩畔，相风出树端。岭烟遥聚草，山月迥临鞍。
日用诚多幸，天文遂仰观。

卷 44_25 【奉和展礼岱宗途经濮济】

萧楚材

拂汉星旗转，分霄日羽明。将追会阜迹，更勒岱宗铭。
林戈咽济岸，兽鼓震河庭。叶箭凌寒矫，乌弓望晓惊。
已降汾水作，仍深迎渭情。

卷 44_26 【奉和展礼岱宗涂经濮济】

薛克构

龙图冠胥陆，凤驾指云亭。非烟泛济浦，绿字启河汀。
画裳晨应月，文戟曙分星。四田巡揖礼，三驱道契经。
行欣奉万岁，窃抃偶千龄。

卷 44_27 【日暮望泾水】

徐玢

导源径陇阪，属汭贯赢都。下濂波常急，回圻溜亦纡。
毒流秦卒毙，泥粪汉田腴。独有迷津客，怀归轸暮途。

卷 44_28 【赠韩思彦】

贺遂亮

意气百年内，平生一寸心。欲交天下士，未面已虚襟。
君子重名义，直道冠衣簪。风云行可托，怀抱自然深。
落霞静霜景，坠叶下风林。若上南登岸，希访北山岑。

卷 44_29 【酬贺遂亮】

韩思彦

古人一言重，尝谓百年轻。今投欢会面，顾盼尽平生。
簪裾非所托，琴酒冀相并。累日同游处，通宵唉素诚。
霜飘知柳脆，雪冒觉松贞。愿言何所道，幸得岁寒名。

卷 44_30 【自御史左授山阳丞】

魏求己

朝升照日槛，夕次下乌台。风竿一眇邈，月树几裴回。
翼向高标敛，声随下调哀。怀燕首自白，非是为年催。

卷 44_31 【赠右台监察邓茂迁左台殿中】

刘怀一

惟昔参多士，无双仰异才。鹰鹯同效逐，鹓鹭忝游陪。
入仕光三命，迁荣历二台。隔墙钦素躅，对问限清埃。
紫署春光早，兰闱曙色催。谁言夕鸟至，空想邓林隈。

第四十五卷

卷 45_1【湘川新曲二首】

杜易简

昭潭深无底，橘洲浅而浮。本欲凌波去，翻为目成留。
愿君稍弭楫，无令贱妾羞。

二八相招携，采菱渡前溪。弱腕随桡起，纤腰向舸低。
自解看花笑，憎闻染竹啼。

卷 45_2【落成会咏一首】

陈元光

泉潮天万里，一镇屹天中。筮宅龙钟地，承恩燕翼宫。
环堂巍岳秀，带砺大江雄。轮奂云霄望，晶华日月通。
凌烟乔木茂，献宝介圭崇。昆俊歌常棣，民和教即戎。
盘庚迁美土，陶侃效兼庸。设醴延张老，开轩礼吕蒙。
无孤南国仰，庶补圣皇功。

卷 45_3【示珣】

陈元光

恩衔枫陛渥，策向桂渊弘。载笔沿儒习，持弓缵祖风。
祛灾剿猛虎，溥德翊飞龙。日阅书开士，星言驾劝农。
勤劳思命重，戏谑逐时空。百粤雾纷满，诸戎泽普通。
愿言加壮努，勿坐鬓霜蓬。

卷 45_4【太母魏氏半径题石】

陈元光

乔岳标仙迹，玄扃妥寿姬。乌号非岭海，鹤仰向京师。
系牒公侯裔，悬弧将相儿。清贞蜚简籍，规范肃门楣。
万里提兵路，三年报母慈。剑埋龙守壤，石卧虎司碑。
忧阍情犹结，祥回禩届期。竹符忠介凜，桐杖孝思凄。
许史岫嶙峋，曹侯感旧诗。鸿濛山暝启，骏彩德昭垂。
华表瑶池冥，清漳玉树枝。昭题盟岳渎，展墓庆重熙。

卷 45_5【和陈元光平潮寇诗】

许天正

抱磴从天上，驱车返岭东。气昂无丑虏，策妙诎群雄。

飞絮随风散，余氛向日镞。长戈收百甲，聚骑破千重。
落剑惟戎首，游绳系胁从。四野无坚壁，群生未化融。
龙湖膏泽下，早晚遍枯穷。

卷 45_6 【咏牛应制】

许圉师

逸足还同骥，奇毛自偶麟。欲知花迹远，云影入天津。

卷 45_7 【答户部员外贺遂涉戏赠】

赵谦光

锦帐随情设，金炉任意熏。惟愁员外署，不应列星文。

卷 45_8 【送苏尚书赴益州】

郑惟忠

离忧将岁尽，归望逐春来。庭花如有意，留艳待人开。

卷 45_9 【咏燕】

张鷟

变石身犹重，衔泥力尚微。从来赴甲第，两起一双飞。

卷 45_10 【岭外守岁（一作李德裕诗）】

李福业

冬去更筹尽，春随斗柄回。寒暄一夜隔，客鬓两年催。

卷 45_11 【奉和进船洛水应制（一作孙逖诗）】

薛沅惑

禁园纡睿览，仙棹叶宸游。洛北风花树，江南彩画舟。
荣生兰蕙草，春入凤凰楼。兴尽离宫暮，烟光起夕流。

卷 45_12 【奉和九月九日应制】

贺正

商飙凝素籥，玄览贲黄图。晓霜惊断雁，晨吹结栖乌。

寒花低岸菊，凉叶下庭梧。泽宫申旧典，相圃叶前模。
玉砌分雕戟，金沟转镂衢。带星飞夏箭，映月上轩弧。
庆展簪裾洽，恩融雨露濡。天文发丹篆，宝思掩玄珠。
承欢徒抃舞，负弛窃忘躯。

第四十六卷

卷 46_1【奉和圣制夏日游石淙山】

狄仁杰

宸晖降望金舆转，仙路峥嵘碧涧幽。羽仗遥临鸾鹤驾，
帷宫直坐凤麟洲。飞泉洒液恒疑雨，密树含凉镇似秋。
老臣预陪悬圃宴，馀年方共赤松游。

卷 46_2【修书院学士奉敕宴梁王宅】

魏元忠

大君敦宴赏，万乘下梁园。酒助闲平乐，人沾雨露恩。
荣光开帐殿，佳气满旌门。愿陪南岳寿，长奉北辰樽。

卷 46_3【银潢宫侍宴应制】

魏元忠

别殿秋云上，离宫夏景移。寒风生玉树，凉气下瑶池。

堑花仍吐叶，岩木尚抽枝。愿奉南山寿，千秋长若斯。

卷 46_4【折杨柳】

韦承庆

万里边城地，三春杨柳节。叶似镜中眉，花如关外雪。
征人远乡思，倡妇高楼别。不忍掷年华，含情寄攀折。

卷 46_5【寒食应制】

韦承庆

凤城春色晚，龙禁早晖通。旧火收槐燧，馀寒入桂宫。
莺啼正隐叶，鸡斗始开笼。蔼蔼瑶山满，仙歌始乐风。

卷 46_6【凌朝浮江旅思（一作马周诗）】

韦承庆

天晴上初日，春水送孤舟。山远疑无树，潮平似不流。
岸花开且落，江鸟没还浮。羁望伤千里，长歌遣四愁。

卷 46_7【直中书省】

韦承庆

清切凤皇池，扶疏鸡树枝。唯应集鸾鹭，何为宿羁雌。
大造乾坤辟，深恩雨露垂。昆蚩皆含养，驽骀亦驱驰。
木偶翻为用，芝泥忽滥窥。九思空自勉，五字本无施。
徒喜逢千载，何阶答二仪。萤光向日尽，蚊力负山疲。
禁宇庭除阔，闲宵钟箭移。暗花临户发，残月下帘欹。
白发随年改，丹心为主披。命将时共泰，言与行俱危。
寄谢巢由客，尧年正在斯。

卷 46_8【南行别弟】

韦承庆

澹澹长江水，悠悠远客情。落花相与恨，到地一无声。

卷 46_9【南中咏雁诗（一作于季子诗，题作南行别弟）】

韦承庆

万里人南去，三春雁北飞。不知何岁月，得与尔同归。

卷 46_10【江楼】

韦承庆

独酌芳春酒，登楼已半曛。谁惊一行雁，冲断过江云。

卷 46_11【凝碧池侍宴看竞渡应制】

李怀远

上苑清銮路，高居重豫游。前对芙蓉沼，傍临杜若洲。
地如玄扈望，波似洞庭秋。列筵飞翠斝，分曹戏鹢舟。
湍高棹影没，岸近榜歌遒。舞曲依鸾殿，箫声下凤楼。
忽闻天上乐，疑逐海查流。

卷 46_12【奉和九月九日登慈恩寺浮图应制】

崔日用

紫宸欢每洽，绀殿法初隆。菊泛延龄酒，兰吹解愠风。
咸英调正乐，香梵遍秋空。临幸浮天瑞，重阳日再中。

卷 46_13【奉和圣制送张说巡边】

崔日用

轩相推风后，周官重夏卿。庙谋能允迪，韬略又纵横。
吉日四黄马，宣王六月兵。拟清鸡臣塞，先指朔方城。
列将怀威抚，匈奴畏盛名。去当推毂送，来伫出郊迎。
绝漠蓬将断，华筵槿正荣。壮心看舞剑，别绪应悬旌。
睿锡承优旨，乾文复龙行。暂劳期永逸，赫矣振天声。

卷 46_14【奉和立春游苑迎春应制】

崔日用

乘时迎气正璇衡，灞浐烟氛向晚清。剪绮裁红妙春色，
宫梅殿柳识天情。瑶筐彩燕先呈端，金缕晨鸡未学鸣。
圣泽阳和宜宴乐，年年捧日向东城。

卷 46_15【奉和圣制春日幸望春宫应制】

崔日用

东郊风物正熏馨，素浐凫鹭戏绿汀。凤阁斜通平乐观，
龙旂直逼望春亭。光风摇动兰英紫，淑气依迟柳色青。

渭浦明晨修禊事，群公倾贺水心铭。

卷 46_16【奉和人日重宴大明宫恩赐彩缕人胜应制】

崔日用

新年宴乐坐东朝，钟鼓铿锵大乐调。金屋瑶筐开宝胜，
花笺彩笔颂春椒。曲池苔色冰前液，上苑梅香雪里娇。
宸极此时飞圣藻，微臣窃抃预闻韶。

卷 46_17【奉和圣制龙池篇】

崔日用

龙兴白水汉兴符，圣主时乘运斗枢。岸上菁茸五花树，
波中的皪千金珠。操环昔闻迎夏启，发匣先来瑞有虞。
风色云光随隐见，赤云神化象江湖。

卷 46_37【夜宴安乐公主宅】

崔日用

银烛金屏坐碧堂，只言河汉动神光。
主家盛时欢不极，才子能歌夜未央。

卷 46_38 【钱唐永昌】

崔日用

洛阳桴鼓今不鸣，朝野咸推重太平。
冬至冰霜俱怨别，春来花鸟若为情。

卷 46_39 【奉和送金城公主适西蕃】

崔日用

圣后经纶远，谋臣计画多。受降追汉策，筑馆计戎和。
俗化乌孙垒，春生积石河。六龙今出饯，双鹤愿为歌。

卷 46_40 【句】

崔日用

彼名流兮左氏癖，意玄远兮冠今夕。（《赠武平一》）

卷 46_41【奉和人日清晖阁宴群臣遇雪应制】

宗楚客

窈窕神仙阁，参差云汉间。九重中叶启，七日早春还。
太液天为水，蓬莱雪作山。今朝上林树，无处不堪攀。

卷 46_42【安乐公主移入新宅侍宴应制】

宗楚客

星桥他日创，仙榜此时开。马向铺钱埽，箫闻弄玉台。
人同卫叔美，客似长卿才。借问游天汉，谁能取石回。

卷 46_43【正月晦日侍宴浐水应制赋得长字】

宗楚客

御辇出明光，乘流泛羽觞。珠胎随月减，玉漏与年长。
寒尽梅犹白，风迟柳未黄。日斜旌骑转，休气满林塘。

卷 46_44 【奉和幸上阳宫侍宴应制】

宗楚客

紫庭金凤阙，丹禁玉鸡川。似立蓬瀛上，疑游昆阆前。
鸟将歌合转，花共锦争鲜。湛露飞尧酒，熏风入舜弦。
水光摇落日，树色带晴烟。向夕回雕辇，佳气满岩泉。

卷 46_45 【奉和幸安乐公主山庄应制】

宗楚客

玉楼银榜枕严城，翠盖红旗列禁营。日映层岩图画色，
风摇杂树管弦声。水边重阁含飞动，云里孤峰类削成。
幸睹八龙游阆苑，无劳万里访蓬瀛。

卷 46_46 【奉和圣制喜雪应制】

宗楚客

飘飘瑞雪下山川，散漫轻飞集九埏。似絮还飞垂柳陌，
如花更绕落梅前。影随明月团纨扇，声将流水杂鸣弦。
共荷神功万庾积，终朝圣寿百千年。

卷 46_47【句】

宗楚客

竹町罗千卫，兰茝降两宫。（《海录碎事》）

七萃銮舆动，千年瑞检开。彩旗临凤阙，翠幕绕龟津。

卷 46_48【奉和九日幸临渭亭登高应制得晖字】

苏瑰

重阳早露晞，睿赏瞰秋矶。菊气先熏酒，萸香更袭衣。
清切丝桐会，纵横文雅飞。恩深答效浅，留醉奉宸晖。

卷 46_49【兴庆池侍宴应制】

苏瑰

金阙平明宿雾收，瑶池式宴俯清流。瑞凤飞来随帝辇，
祥鱼出戏跃王舟。帷齐绿树当筵密，盖转绡荷接岸浮。
如临窃比微臣惧，若济叨陪圣主游。

第四十七卷

卷 47_1 【奉和圣制烛龙斋祭】

张九龄

上帝临下，鉴亦有光。孰云阴骘，惟圣克彰。六月徂暑，
四郊愆阳。我后其勤，告于坛场。精意允溢，群灵鼓舞。
蔚兮朝云，沛然时雨。雨我原田，亦既有年。烛龙煌煌，
明宗报祀。于以助之，天人帝子。闻诗有训，国风兹始。

卷 47_2 【奉和圣制喜雨】

张九龄

艰我稼穡，载育载亨。随物应之，曷圣与灵。谓我何凭，
惟德之馨。谁云天远，以诚必至。太清无云，羲和顿辔。
于斯烝人，瞻彼非觐。阴冥倏忽，沛泽咸洎。何以致之。
我后之感。无皋无隰，黍稷黯黯。无卉无木，敷芬黪黪。
黄龙勿来，鸣鸟不思。人和年丰，皇心则怡。岂与周宣，
云汉徒诗。

卷 47_3【南郊文武出入舒和之乐】

张九龄

祝史辞正，人神庆叶。福以德昭，享以诚接。
六变云备，百礼斯浹。祀事孔明，祚流万叶。

卷 47_4【奉和圣制幸晋阳宫】

张九龄

隋季失天策，万方罹凶残。皇祖称义旗，三灵皆获安。
圣期将申锡，王业成艰难。盗移未改命，历在终履端。
彼汾惟帝乡，雄都信郁盘。一月朔巡狩，群后陪清銮。
霸迹在沛庭，旧仪睹汉官。唐风思何深，舜典敷更宽。
户蒙粉榆复，邑争牛酒欢。缅惟翦商后，岂独微禹叹。
三后既在天，万年斯不刊。尊祖实我皇，天文皆仰观。

卷 47_5【奉和圣制次成皋先圣擒建德之所】

张九龄

天命诚有集，王业初惟艰。翦商自文祖，夷项在兹山。
地识斩蛇处，河临饮马间。威加昔运往，泽流今圣还。

尊祖颂先烈，赓歌安用攀。绍成即我后，封岱出天关。

卷 47_6【奉和圣制赐诸州刺史以题座右】

张九龄

圣人合天德，洪覆在元元。每劳苍生念，不以黄屋尊。
兴化俟群辟，择贤守列藩。得人此为盛，咨岳今复存。
降鉴引君道，殷勤启政门。容光无不照，有象必为言。
成宪知所奉，致理归其根。肃肃稟玄猷，煌煌戒朱轩。
岂徒任遇重，兼尔宴锡繁。载闻励臣节，持答明主恩。

卷 47_7【奉和圣制送十道采访使及朝集使】

张九龄

三年一上计，万国趋河洛。课最力已陈，赏延恩复博。
垂衣深共理，改瑟其咸若。首路回竹符，分镳扬木铎。
戒程有攸往，诏饯无淹泊。昭晰动天文，殷勤在人瘼。
持久望兹念，克终期所托。行矣当自强，春耕庶秋获。

卷 47_8 【奉和圣制谒玄元皇帝庙斋】

张九龄

兴运昔有感，建祠北山巅。云雷初缔构，日月今悠然。
紫气尚蓊郁，玄元如在焉。迨兹事追远，轮奂复增鲜。
洞府香林处，斋坛清汉边。吾君乃尊祖，夙驾此留连。
乐动人神会，钟成律度圆。笙歌下鸾鹤，芝朮萃灵仙。
曾是福黎庶，岂唯味虚玄。赓歌徒有作，微薄谢昭宣。

卷 47_9 【巫山高】

张九龄

巫山与天近，烟景长青荧。此中楚王梦，梦得神女灵。
神女去已久，云雨空冥冥。唯有巴猿啸，哀音不可听。

卷 47_10 【和黄门卢监望秦始皇陵】

张九龄

秦帝始求仙，骊山何遽卜。中年既无效，兹地所宜复。
徒役如雷奔，珍怪亦云蓄。黔首无寄命，赭衣相追逐。
人怨神亦怒，身死宗遂覆。土崩失天下，龙斗入函谷。

国为项籍屠，君同华元戮。始掘既由楚，终焚乃因牧。
上宰议扬贤，中阿感桓速。一闻过秦论，载怀空杼轴。

卷 47_11【酬周判官巡至始兴会改秘书少监见贻之作兼
呈耿广州】

张九龄

惟昔迁乐土，迨今已重世。阴庆荷先德，素风惭后裔。
唯益梓桑恭，岂稟山川丽。于时初自勉，揆己无兼济。
瘠土资劳力，良书启蒙蔽。一探石室文，再擢金门第。
既起南宫草，复掌西掖制。过举及小人，便蕃在中岁。
亚司河海秩，转牧江湖濫。勿谓符竹轻，但觉涓尘细。
一麾尚云忝，十驾宜求税。心息已如灰，迹牵且为赘。
忽捧天书委，将革海隅弊。朝闻循诚节，夕饮蒙瘴疠。
义疾耻无勇，盗憎攻亦锐。葵藿是倾心，豺狼何反噬。
履险甘所受，劳贤恣相曳。揽辔但荒服，循陔便私第。
嘉庆始获申，恩华复相继。无庸我先举，同事君犹滞。
当推奉使绩，且结拜亲契。更延怀安旨，曾是虑危际。
善谋虽若兹，至理焉可替。所仗有神道，况承明主惠。

卷 47_12【和吏部李侍郎见示秋夜望月忆诸侍郎之什...
因命仆继作】

张九龄

清秋发高兴，凉月复闲宵。光逐露华满，情因水镜摇。
同时亦所见，异路无相招。美景向空尽，欢言随事销。
忽听金华作，诚如玉律调。南宫尚为后，东观何其辽。
名数虽云隔，风期幸未遥。今来重馀论，怀此更终朝。

卷 47_13【登南岳事毕谒司马道士】

张九龄

将命祈灵岳，回策诣真士。绝迹寻一径，异香闻数里。
分庭八桂树，肃容两童子。入室希把袖，登床愿启齿。
诱我弃智诀，迨兹长生理。吸精反自然，炼药求不死。
斯言眇霄汉，顾余婴纷滓。相去九牛毛，惭叹欢知何已。

卷 47_14【九月九日登龙山】

张九龄

郡庭常窘束，凉野求昭旷。楚客凛秋时，桓公旧台上。

清明风日好，历落江山望。极远何萧条，中留坐惆怅。
东弥夏首阔，西拒荆门壮。夷险虽异时，古今岂殊状。
先贤杳不接，故老犹可访。投吊伤昔人，挥斤感前匠。
自为本疏散，未始忘幽尚。际会非有欲，往来是无妄。
为邦复多幸，去国殊迁放。且泛篱下菊，还聆郢中唱。
灌园亦何为，於陵乃逃相。

卷 47_15【登郡城南楼】

张九龄

闭阁幸无事，登楼聊永日。云霞千里开，洲渚万形出。
澹澹澄江漫，飞飞度鸟疾。邑人半舳舻，津树多枫橘。
感别时已屡，凭眺情非一。远怀不我同，孤兴与谁悉。
平生本单绪，邂逅承优秩。谬忝为邦寄，多惭理人术。
弩铅虽自勉，仓廩素非实。陈力倘无效，谢病从芝朮。

卷 47_16【岁初巡属县，登高安南楼言怀】

张九龄

山城本孤峻，凭高结层轩。江气偏宜早，林英粲已繁。
馀滋含宿霁，众妍在朝暾。拂衣释簿领，伏槛遗纷喧。
深俯东溪澳，远延南山樊。归云纳前岭，去鸟投遥村。
目尽有馀意，心恻不可谖。謁来彭蠡泽，载经敷浅原。

春及但生思，时哉无与言。不才叨过举，唯力酬明恩。
美化犹寂蔑，迅节徒飞奔。虽无成立效，庶以去思论。
行复徇孤迹，亦云吾道存。

卷 47_17【秋晚登楼望南江入始兴郡路】

张九龄

潦收沙衍出，霜降天宇晶。伏槛一长眺，津途多远情。
思来江山外，望尽烟云生。滔滔不自辨，役役且何成。
我来飒衰鬓，孰云飘华缨。枵马苦踈踈，笼禽念遐征。
岁阴向晚晚，日夕空屏营。物生贵得性，身累由近名。
内顾觉今是，追叹何时平。

卷 47_18【登古阳云台】

张九龄

庭树日衰飒，风霜未云已。驾言遣忧思，乘兴求相似。
楚国兹故都，兰台有馀址。传闻襄王世，仍立巫山祀。
方此全盛时，岂无婣娟子。色荒神女至，魂荡宫观启。
蔓草今如积，朝云为谁起。

卷 47_19 【与生公寻幽居处】

张九龄

同方久厌俗，相与事遐讨。及此云山去，窅然岩径好。
疑入武陵源，如逢汉阴老。清谐欣有得，幽闲歎盈抱。
我本玉阶侍，偶访金仙道。兹焉求卜筑，所过皆神造。
岁晚林始敷，日晏崖方杲。不种缘岭竹，岂植临潭草。
即途可淹留，随日成黼藻。期为静者说，曾是终焉保。
今为简书畏，只令归思浩。

卷 47_20 【与生公游石窟山】

张九龄

探秘孰云远，忘怀复尔同。日寻高深意，宛是神仙中。
跻险构灵室，诡制非人功。潜洞黝无底，殊庭忽似梦。
岂如武安凿，自若茅山通。造物良有寄，嬉游乃愜衷。
犹希咽玉液，从此升云空。咄咄共携手，冷然且驭风。

卷 47_21 【郡舍南有园畦杂树聊以永日】

张九龄

为郡久无补，越乡空复深。苟能秉素节，安用叨华簪。

却步园畦里，追吾野逸心。形骸拘俗吏，光景赖闲林。
内讼诚知止，外言犹匪忱。成蹊谢李径，卫足感葵阴。
荣达岂不伟，孤生非所任。江城何寂历，秋树亦萧森。
下有北流水，上有南飞禽。我愿从归翼，无然坐自沉。

卷 47_22 【临泛东湖（时任洪州）】

张九龄

郡庭日休暇，湖曲邀胜践。乐职在中和，灵心挹上善。
乘流坐清旷，举目眺悠缅。林与西山重，云因北风卷。
晶明画不逮，阴影镜无辨。晚秀复芬敷，秋光更遥衍。
万族纷可佳，一游岂能展。羁孤忝邦收，顾己非时选。
梁公世不容，长孺心亦褊。永念出笼攀，常思退疲蹇。
岁徂风露严，日恐兰苕剪。佳辰不可得，良会何其鲜。
罢兴还江城，闭关聊自遣。

卷 47_23 【始兴南山下有林泉，尝卜居焉，荆州卧病有怀此地】

张九龄

出处各有在，何者为陆沉。幸无迫贱事，聊可祛迷襟。
世路少夷坦，孟门未岖嶔。多惭入火术，常惕履冰心。
一跌不自保，万全焉可寻。行行念归路，眇眇惜光阴。

浮生如过隙，先达已吾箴。敢忘丘山施，亦云年病侵。
力衰在所养，时谢良不任。但忆旧栖息，愿言遂窥临。
云间日孤秀，山下面清深。萝鸞自为幄，风泉何必琴。
归此老吾老，还当日千金。

卷 47_24【晨坐斋中偶而成咏】

张九龄

寒露洁秋空，遥山纷在瞩。孤顶乍修耸，微云复相续。
人兹赏地偏，鸟亦爱林旭。结念凭幽远，抚躬曷羁束。
仰霄谢逸翰，临路嗟疲足。徂岁方暌携，归心亟踟躅。
休闲倘有素，岂负南山曲。

卷 47_25【咏史】

张九龄

大德始无颇，中智是所是。居然已不一，况乃务相诡。
小道致泥难，巧言因萋毁。穰侯或见迟，苏生得阴揣。
轻既长沙傅，重亦边郡徙。势倾不幸然，迹在胡宁尔。
沧溟所为大，江汉日来委。沔水虽复清，鱼鳖岂游此。
贤哉有小白，仇中有管氏。若人不世生，悠悠多如彼。

卷 47_26 【龙门旬宴得月字韵】

张九龄

恩华逐芳岁，形胜兼韶月。中席傍鱼潭，前山倚龙阙。
花迎妙妓至，鸟避仙舟发。宴赏良在兹，再来情不歇。

卷 47_27 【骊山下逍遥公旧居游集】

张九龄

君子体清尚，归处有兼资。虽然经济日，无忘幽栖时。
卜居旧何所，休浣尝来兹。岑寂罕人至，幽深获我思。
松涧聆遗风，兰林览馀滋。往事诚已矣，道存犹可追。
遗子后黄金，作歌先紫芝。明德有自来，奕世皆秉彝。
岂与礪溪老，崛起周太师。我心希硕人，逮此问元龟。
怊怅既怀远，沉吟亦省私。已云宠禄过，况在华发衰。
轩盖有迷复，丘壑无磷缁。感物重所怀，何但止足斯。

卷 47_28 【杂诗五首】

张九龄

孤桐亦胡为，百尺傍无枝。疏阴不自覆，修干欲何施。

高冈地复迴，弱植风屡吹。凡鸟已相噪，凤凰安得知。
萝茑必有托，风霜不能落。酷在兰将蕙，甘从葵与藿。
运命虽为宰，寒暑自回薄。悠悠天地间，委顺无不乐。

良辰不可遇，心赏更蹉跎。终日块然坐，有时劳者歌。
庭前揽芳蕙，江上托微波。路远无能达，忧情空复多。

湘水吊灵妃，斑竹为情绪。汉水访游女，解佩欲谁与。
同心不可见，异路空延伫。浦上青枫林，津傍白沙渚。
行吟至落日，坐望只愁予。神物亦岂孤，佳期竟何许。

木直几自寇，石坚亦他攻。何言为用薄，而与火膏同。
物类有固然，谁能取径通。纤纤良田草，靡靡唯从风。
日夜沐甘泽，春秋等芳丛。生性苟不夭，香臭谁为中。
道家贵至柔，儒生何固穷。终始行一意，无乃过愚公。

卷 47_29【感遇十二首】

张九龄

兰叶春葳蕤，桂华秋皎洁。欣欣此生意，自尔为佳节。
谁知林栖者，闻风坐相悦。草木有本心，何求美人折。

幽林归独卧，滞虑洗孤清。持此谢高鸟，因之传远情。
日夕怀空意，人谁感至精。飞沉理自隔，何所慰吾诚。
鱼游乐深池，鸟栖欲高枝。嗟尔蜉蝣羽，薨薨亦何为。

有生岂不化，所感奚若斯。神理日微灭，吾心安得知。
浩叹杨朱子，徒然泣路岐。
孤鸿海上来，池潢不敢顾。侧见双翠鸟，巢在三珠树。
矫矫珍木巅，得无金丸惧。美服患人指，高明逼神恶。
今我游冥冥，弋者何所慕。

吴越数千里，梦寐今夕见。形骸非我亲，衾枕即乡县。
化蝶犹不识，川鱼安可羨。海上有仙山，归期觉神变。

西日下山隐，北风乘夕流。燕雀感昏旦，檐楹呼匹俦。
鸿鹄虽自远，哀音非所求。贵人弃疵贱，下士尝殷忧。
众情累外物，恕己忘内修。感叹长如此，使我心悠悠。

江南有丹橘，经冬犹绿林。岂伊地气暖，自有岁寒心。
可以荐嘉客，奈何阻重深。运命唯所遇，循环不可寻。
徒言树桃李，此木岂无阴。

永日徒离忧，临风怀蹇修。美人何处所，孤客空悠悠。
青鸟跂不至，朱鳖谁云浮。夜分起踯躅，时逝曷淹留。

抱影吟中夜，谁闻此叹息。美人适异方，庭树含幽色。
白云愁不见，沧海飞无翼。凤凰一朝来，竹花斯可食。

汉上有游女，求思安可得。袖中一札书，欲寄双飞翼。
冥冥愁不见，耿耿徒缄忆。紫兰秀空蹊，皓露夺幽色。
馨香岁欲晚，感叹情何极。白云在南山，日暮长太息。

我有异乡忆，宛在云溶溶。凭此目不覩，要之心所钟。
但欲附高鸟，安敢攀飞龙。至精无感遇，悲惋填心胸。
归来扣寂寞，人愿天岂从。

闭门迹群化，凭林结所思。啸叹此寒木，畴昔乃芳蕤。
朝阳凤安在，日暮蝉独悲。浩思极中夜，深嗟欲待谁。
所怀诚已矣，既往不可追。鼎食非吾事，云仙尝我期。
胡越方杳杳，车马何迟迟。天壤一何异，幽嘿卧帘帷。

卷 47_30 【江上遇疾风】

张九龄

疾风江上起，鼓怒扬烟埃。白昼晦如夕，洪涛声若雷。
投林鸟铍羽，入浦鱼曝鳃。瓦飞屋且发，帆快檣已摧。
不知天地气，何为此喧豗。

卷 47_31 【南阳道中作】

张九龄

登郢属岁阴，及宛懵所适。复闻东汉主，遣此南都迹。
佳气蔼厥初，霸图纷在昔。兹邦称贵近，与世尝薰赫。
遭遇感风云，变衰空草泽。不识邓公树，犹传阴后石。
驱马历闾閭，荆榛翳阡陌。事去物无象，感来心不悵。

怀古对穷秋，兴言伤远客。眇默遵岐路，辛勤弊行役。
云雁号相呼，林麋走自索。顾忆徇书剑，未尝安枕席。
岂暇墨突黔，空持辽豕白。迷复期非远，归欤赏农隙。

卷 47_32【湘中作】

张九龄

湘流绕南岳，绝目转青青。怀禄未能已，瞻途屡所经。
烟屿宜春望，林猿莫夜听。永路日多绪，孤舟天复冥。
浮没从此去，嗟嗟劳我形。

卷 47_33【彭蠡湖上】

张九龄

沿涉经大湖，湖流多行洑。决晨趋北渚，逗浦已西日。
所适虽淹旷，中流且闲逸。瑰诡良复多，感见乃非一。
庐山直阳浒，孤石当阴术。一水云际飞，数峰湖心出。
象类何交纠，形言岂深悉。且知皆自然，高下无相恤。

卷 47_34 【入庐山仰望瀑布水】

张九龄

绝顶有悬泉，喧喧出烟杪。不知几时岁，但见无昏晓。
闪闪青崖落，鲜鲜白日皎。洒流湿行云，溅沫惊飞鸟。
雷吼何喷薄，箭驰入窈窕。昔闻山下蒙，今乃林峦表。
物情有诡激，坤元曷纷矫。默然置此去，变化谁能了。

卷 47_35 【出为豫章郡途次庐山东岩下】

张九龄

兹山镇何所，及在澄湖阴。下有蛟螭伏，上与虹蜺寻。
灵仙未始旷，窟宅何其深。双阙出云峙，三宫入烟沉。
攀崖犹昔境，种杏非旧林。想像终古迹，惆怅独往心。
纷吾婴世网，数载忝朝簪。孤恨自靡托，量力况不任。
多谢周身防，常恐横议侵。岂匪鹓鸿列，惕如泉壑临。
迨兹刺江郡，来此涤尘襟。有趣逢樵客，忘怀狎野禽。
栖闲义未果，用拙欢在今。愿言答休命，归事丘中琴。

卷 47_36 【巡属县道中作】

张九龄

春令夙所奉，驾言遵此行。途中却郡掾，林下招村氓。
至邑无纷剧，来人但欢迎。岂伊念邦政，尔实在时清。
短才滥符竹，弱岁起柴荆。再入江村道，永怀山薮情。
矧逢阳节献，默听时禽鸣。迹与素心别，感从幽思盈。
流芳日不待，夙志蹇无成。知命且何欲，所图唯退耕。
华簪极身泰，衰鬓惭木荣。苟得不可遂，吾其谢世婴。

卷 47_37 【夏日奉使南海在道中作】

张九龄

缅然万里路，赫曦三伏时。飞走逃深林，流烁恐生疵。
行李岂无苦，而我方自怡。肃事诚在公，拜庆遂及私。
展力惭浅效，街恩感深慈。且欲汤火蹈，况无鬼神欺。
朝发高山阿，夕济长江湄。秋瘴宁我毒，夏水胡不夷。
信知道存者，但问心所之。吕梁有出入，乃觉非虚词。

卷 47_38 【巡按自漓水南行】

张九龄

理棹虽云远，饮冰宁有惜。况乃佳山川，怡然傲潭石。
奇峰岌前转，茂树隈中积。猿鸟声自呼，风泉气相激。
目因诡容逆，心与清晖涤。纷吾谬执简，行郡将移檄。
即事聊独欢，素怀岂兼适。悠悠咏靡监，庶以穷日夕。

卷 47_39 【使还都湘东作】

张九龄

仓庚昨归候，阳鸟今去时。感物遽如此，劳生安可思。
养真无上格，图进岂前期。清节往来苦，壮容离别衰。
盛明非不遇，弱操自云私。孤楫清川泊，征衣寒露滋。
风朝津树落，日夕岭猿悲。牵役而无悔，坐愁只自怡。
当须报恩已，终尔谢尘缁。

卷 47_40 【冬中至玉泉山寺，属穷阴冰闭崖谷无色，及仲春行县复往焉，故有此作】

张九龄

灵境信幽绝，芳时重暄妍。再来及兹胜，一遇非无缘。

万木柔可结，千花敷欲然。松间鸣好鸟，竹下流清泉。
石壁开精舍，金光照法筵。真空本自寂，假有聊相宣。
复此灰心者，仍追巢顶禅。简书虽有畏，身世亦相捐。

卷 47_41【郢城西北有大古冢数十，观其封域多是楚时诸王，而年代久远不复可识，唯直西有放樊妃冢，因后人为植松柏，故行路尽知之】

张九龄

蘋藻生南涧，蕙兰秀中林。嘉名有所在，芳气无幽深。
楚子初逞志，樊妃尝献箴。能令更择士，非直罢从禽。
旧国皆湮灭，先王亦莫寻。唯传贤媛陇，犹结后人心。
牢落山川意，萧疏松柏阴。破墙时直上，荒径或斜侵。
惠问终不绝，风流独至今。千春思窈窕，黄鸟复哀音。

卷 47_42【荆州作二首】

张九龄

先达志其大，求息不约文。士伸在知己，已况仕于君。
微诚夙所尚，细故不足云。时来忽易失，事往良难分。
顾念凡近姿，焉欲殊常勋。亦以行则是，岂必素有闻。
千虑且犹失，万绪何其纷。进士苟非党，免相安得群。
众口金可铄，孤心丝共焚。意忠仗朋信，语勇同败军。

古剑徒有气，幽兰只自薰。高秩向所忝，于义如浮云。

千载一遭遇，往贤所至难。问余奚为者，无阶忽上抟。
明圣不世出，翼亮非苟安。崇高自有配，孤陋何足干。
遇恩一时来，窃位三岁寒。谁谓诚不尽，知穷力亦殫。
虽至负乘寇，初无挟术钻。浩荡出江湖，翻覆如波澜。
心伤不材树，自念独飞翰。徇义在匹夫，报恩犹一餐。
况乃山海泽，效无毫发端。内讼已惭沮，积毁今摧残。
胡为复惕息，伤鸟畏虚弹。

卷 47_43【在郡秋怀二首】

张九龄

秋风入前林，萧瑟鸣高枝。寂寞游子思，寤叹何人知。
宦成名不立，志存岁已驰。五十而无闻，古人深所疵。
平生去外饰，直道如不羁。未得操割效，忽复寒暑移。
物情自古然，身退毁亦随。悠悠沧江渚，望望白云涯。
露下霜且降，泽中草离披。兰艾若不分，安用馨香为。

庭芜生白露，岁候感遐心。策蹇惭远途，巢枝思故林。
小人恐致寇，终日如临深。鱼鸟好自逸，池笼安所钦。
挂冠东都门，采颡南山岑。议道诚愧昔，览分还愜今。
恍然忧成老，空尔白头吟。

卷 47_44【忝官二十年尽在内职，及为郡尝积恋，因赋诗焉】

张九龄

江流去朝宗，昼夜兹不舍。仲尼在川上，子牟存阙下。
圣达有由然，孰是无心者。一郡苟能化，百城岂云寡。
爱礼谁为羊，恋主吾犹马。感初时不载，思奋翼无假。
闲宇常自闭，沉心何用写。揽衣步前庭，登陴临旷野。
白水生迢递，清风寄潇洒。愿言采芳泽，终朝不盈把。

卷 47_45【二弟宰邑南海，见群雁南飞，因成咏以寄】

张九龄

鸿雁自北来，嗷嗷度烟景。常怀稻粱惠，岂惮江山永。
小大每相从，羽毛当自整。双凫侣晨泛，独鹤参宵警。
为我更南飞，因书至梅岭。

卷 47_46【将发还乡示诸弟】

张九龄

岁阳亦颓止，林意日萧瑟。云胡当此时，缅迈复为客。

至爱孰能舍，名义来相迫。负德良不贲，输诚靡所惜。
一木逢厦构，纤尘愿山益。无力主君恩，宁利客卿璧。
去去荣归养，恍然叹行役。

卷 47_47【叙怀二首】

张九龄

弱岁读群史，抗迹追古人。被褐有怀玉，佩印从负薪。
志合岂兄弟，道行无贱贫。孤根亦何赖，感激此为邻。

晚节从卑秩，岐路良非一。既闻持两端，复见挟三术。
木瓜诚有报，玉楮论无实。已矣直躬者，平生壮图失。
去去勿重陈，归来茹芝朮。

卷 47_48【题画山水障】

张九龄

心累犹不尽，果为物外牵。偶因耳目好，复假丹青妍。
尝抱野间意，而迫区中缘。尘事固已矣，秉意终不迁。
良工适我愿，妙墨挥岩泉。变化合群有，高深侔自然。
置陈北堂上，仿像南山前。静无户庭出，行已兹地偏。
萱草忧可树，合欢忿益蠲。所因本微物，况乃凭幽筌。
言象会自泯，意色聊自宣。对玩有佳趣，使我心渺绵。

卷 47_49【奉和圣制瑞雪篇】

张九龄

万年春，三朝日，上御明台旅庭实。初瑞雪兮霏微，
俄同云兮蒙密。此时骚切阴风生，先过金殿有馀清。
信宿婵娟飞雪度，能使玉人俱掩。皓皓楼前月初白，
纷纷陌上尘皆素。昨讶骄阳积数旬，始知和气待迎新。
匪惟在人利，曾是扶天意。天意岂云遥，雪下不崇朝。
皇情玩无，雪委方盈尺。草树纷早荣，京坻宛先积。
君恩诚谓何，岁稔复人和。预数斯箱庆，应如此雪多。
朝冕旒兮载悦，想笞笠兮农节。倚瑶琴兮或歌，
续薰风兮瑞雪。福浸昌，应尤盛，瑞雪年年常感圣。
愿以柏梁作，长为柳花咏。

卷 47_50【奉和圣制温泉歌】

张九龄

有时神物待圣人，去后汤还冷，来时树亦春。
今兹十月自东归，羽旆逶迤上翠微。温谷葱葱佳气色，
离宫奕奕叶光辉。临渭川，近天邑，浴日温泉复在兹，
群仙洞府那相及。吾君利物心，玄泽浸苍黔。
渐渍神汤无疾苦，薰歌一曲感人深。

卷 47_51 【南郊太尉酌献武舞作凯安之乐】

张九龄

馨香惟后德，明命光天保。肃祀崇圣灵，陈信表黄道。
玉戚初蹈厉，金匏既静好。介福何穰穰，精诚格穹昊。

第四十八卷

卷 48_1 【奉和圣制经孔子旧宅】

张九龄

孔门太山下，不见登封时。徒有先王法，今为明主思。
恩加万乘幸，礼致一牢祠。旧宅千年外，光华空在兹。

卷 48_2 【奉和圣制次琼岳韵】

张九龄

山祗亦望幸，云雨见灵心。岳馆逢朝霁，关门解宿阴。
咸京天上近，情渭日边临。我武因冬狩，何言是即禽。

卷 48_3 【奉和圣制送李尚书入蜀】

张九龄

眷言感忠义，何有间山川。徇节今如此，离情空复然。

皇心在勤恤，德泽委昭宣。周月成功后，明年或劳还。

卷 48_4【奉和圣制初出洛城】

张九龄

东土淹龙驾，西人望翠华。山川祇询物，宫观岂为家。
十月回星斗，千官捧日车。洛阳无怨思，巡幸更非赊。

卷 48_5【奉和圣制途次陕州作】

张九龄

驰道当河陕，陈诗问国风。川原三晋别，襟带两京同。
后殿函关尽，前旌阙塞通。行看洛阳陌，光景丽天中。

卷 48_6【敕赐宁王池宴】

张九龄

贤王有池馆，明主赐春游。淑气林间发，恩光水上浮。
徒惭和鼎地，终谢巨川舟。皇泽空如此，轻生莫可酬。

卷 48_7【天津桥东旬宴得歌字韵】

张九龄

清洛象天河，东流形胜多。朝来逢宴喜，春尽却妍和。
泉鲋欢时跃，林莺醉里歌。赐恩频若此，为乐奈人何。

卷 48_8【上阳水窗旬宴得移字韵】

张九龄

河汉非应到，汀洲忽在斯。仍逢帝乐下，如逐海槎窥。
春赏时将换，皇恩岁不移。今朝游宴所，莫比天泉池。

卷 48_9【折杨柳】

张九龄

纤纤折杨柳，持此寄情人。一枝何足贵，怜是故园春。
迟景那能久，芳菲不及新。更愁征戍客，容鬓老边尘。

卷 48_10 【剪彩】

张九龄

姹女矜容色，为花不让春。既争芳意早，谁待物华真。
叶作参差发，枝从点缀新。自然无限态，长在艳阳晨。

卷 48_11 【和崔黄门寓直夜听蝉之作】

张九龄

蝉嘶玉树枝，向夕惠风吹。幸入连宵听，应缘饮露知。
思深秋欲近，声静夜相宜。不是黄金饰，清香徒尔为。

卷 48_12 【和姚令公从幸温汤喜雪】

张九龄

万乘飞黄马，千金狐白裘。正逢银霰积，如向玉京游。
瑞色铺驰道，花文拂彩旒。还闻吉甫颂，不共郢歌俦。

卷 48_13【立春日晨起对积雪】

张九龄

忽对林亭雪，瑶华处处开。今年迎气始，昨夜伴春回。
玉润窗前竹，花繁院里梅。东郊斋祭所，应见五神来。

卷 48_14【三月三日申王园亭宴集】

张九龄

稽亭追往事，睢苑胜前闻。飞阁凌芳树，华池落彩云。
藉草人留酌，衔花鸟赴群。向来同赏处，惟恨碧林曛。

卷 48_15【三月三日登龙山】

张九龄

伊川与灞津，今日祓除人。岂似龙山上，还同湘水滨。
衰颜忧更老，淑景望非春。楔饮岂吾事，聊将偶俗尘。

卷 48_16 【和王司马折梅寄京邑昆弟】

张九龄

离别念同嬉，芬荣欲共持。独攀南国树，遥寄北风时。
林惜迎春早，花愁去日迟。还闻折梅处，更有棣华诗。

卷 48_17 【晚霁登王六东阁】

张九龄

试上江楼望，初逢山雨晴。连空青嶂合，向晚白云生。
彼美要殊观，萧条见远情。情来不可极，日暮水流清。

卷 48_18 【苏侍郎紫薇庭各赋一物得芍药】

张九龄

仙禁生红药，微芳不自持。幸因清切地，还遇艳阳时。
名见桐君箴，香闻郑国诗。孤根若可用，非直爱华滋。

卷 48_19【和黄门卢侍御咏竹】

张九龄

清切紫庭垂，葳蕤防露枝。色无玄月变，声有惠风吹。
高节人相重，虚心世所知。凤凰佳可食，一去一来仪。

卷 48_20【和韦尚书答梓州兄南亭宴集】

张九龄

棠棣闻馀兴，乌衣有旧游。门前杜城陌，池上曲江流。
暇日尝繁会，清风咏阻修。始知西峙岳，同气此相求。

卷 48_21【答陈拾遗赠竹簪】

张九龄

与君尝此志，因物复知心。遗我龙钟节，非无玳瑁簪。
幽素宜相重，雕华岂所任。为君安首饰，怀此代兼金。

卷 48_22 【赠澧阳韦明府】

张九龄

君有百炼刃，堪断七重犀。谁开太阿匣，持割武城鸡。
竟与尚书佩，遥应天子提。何时遇操宰，当使玉如泥。

卷 48_23 【在洪州答綦毋学士】

张九龄

旬雨不愆期，由来自若时。尔无言郡政，吾岂欲天欺。
常念涓尘益，惟欢草树滋。课成非所拟，人望在东菑。

卷 48_24 【酬王六霁后书怀见示】

张九龄

云雨俱行罢，江天已洞开。炎氛霁后灭，边绪望中来。
作骥君垂耳，为鱼我曝鳃。更怜湘水赋，还是洛阳才。

卷 48_25 【酬王六寒朝见诒】

张九龄

贾生流寓日，扬子寂寥时。在物多相背，唯君独见思。
渔为江上曲，雪作郢中词。忽枉兼金讯，长怀伐木诗。

卷 48_26 【林亭咏】

张九龄

穿筑非求丽，幽闲欲寄情。偶怀因壤石，真意在蓬瀛。
苔益山文古，池添竹气清。从兹果萧散，无事亦无营。

卷 48_27 【晨出郡舍林下】

张九龄

晨兴步北林，萧散一开襟。复见林上月，娟娟犹未沉。
片云自孤远，丛筱亦清深。无事由来贵，方知物外心。

卷 48_28【园中时蔬尽皆锄理，唯秋兰数本委而不顾，彼虽一物，有足悲者，遂赋二章】

张九龄

场藿已成岁，园葵亦向阳。兰时独不偶，露节渐无芳。
旨异菁为蓄，甘非蔗有浆。人多利一饱，谁复惜馨香。

幸得不锄去，孤苗守旧根。无心羨旨蓄，岂欲近名园。
遇赏宁充佩，为生莫碍门。幽林芳意在，非是为人论。

卷 48_29【林亭寓言】

张九龄

林居逢岁晏，遇物使情多。蘅茝不时与，芬荣奈汝何。
更怜篱下菊，无如松上萝。因依自有命，非是隔阳和。

卷 48_30【送使广州】

张九龄

家在湘源住，君今海峤行。经过正中道，相送倍为情。
心逐书邮去，形随世网婴。因声谢远别，缘义不缘名。

卷 48_31【送姚评事入蜀各赋一物得卜肆】

张九龄

蜀严化已久，沉冥空所思。尝闻卖卜处，犹忆下帘时。
驱传应经此，怀贤倘问之。归来说往事，历历偶心期。

卷 48_32【送窦校书见钱得云中辨江树】

张九龄

江水天连色，无涯净野氛。微明岸傍树，凌乱渚前云。
举棹形徐转，登舻意渐分。渺茫从此去，空复惜离群。

卷 48_33【钱王司马入计同用洲字】

张九龄

元僚行上计，举钱出林丘。忽望题舆远，空思解榻游。
别筵铺柳岸，征棹倚芦洲。独叹湘江水，朝宗向北流。

卷 48_34 【东湖临泛饯王司马】

张九龄

南土秋虽半，东湖草未黄。聊乘风日好，来泛芰荷香。
兰棹无劳速，菱歌不厌长。忽怀京洛去，难与共清光。

卷 48_35 【饯济阴梁明府各探一物得荷叶】

张九龄

荷叶生幽渚，芳华信在兹。朝朝空此地，采采欲因谁。
但恐星霜改，还将蒲稗衰。怀君美人别，聊以赠心期。

卷 48_36 【饯陈学士还江南同用征字】

张九龄

荷蓀旋江澳，衔杯饯霸陵。别前林鸟息，归处海烟凝。
风土乡情接，云山客念凭。圣朝岩穴选，应待鹤书征。

卷 48_37【通化门外送别】

张九龄

屡别容华改，长愁意绪微。义将私爱隔，情与故人归。
薄宦无时赏，劳生有事机。离魂今夕梦，先绕旧林飞。

卷 48_38【送杨道士往天台】

张九龄

鬼谷还成道，天台去学仙。行应松子化，留与世人传。
此地烟波远，何时羽驾旋。当须一把袂，城郭共依然。

卷 48_39【送杨府李功曹】

张九龄

平生属良友，结绶望光辉。何知人事拙，相与宦情非。
别路穿林尽，征帆际海归。居然已多意，况复两乡违。

卷 48_40 【送宛句赵少府】

张九龄

解巾行作吏，尊酒谢离居。修竹含清景，华池澹碧虚。
地将幽兴惬，人与旧游疏。林下纷相送，多逢长者车。

卷 48_41 【送韦城李少府】

张九龄

送客南昌尉，离亭西候春。野花看欲尽，林鸟听犹新。
别酒青门路，归轩白马津。相知无远近，万里尚为邻。

卷 48_42 【送苏主簿赴偃师】

张九龄

我与文雄别，胡然邑吏归。贤人安下位，鸷鸟欲卑飞。
激节轻华冕，移官殉彩衣。羨君行乐处，从此拜庭闱。

卷 48_43【送广州周判官】

张九龄

海郡雄蛮落，津亭壮越台。城隅百雉映，水曲万家开。
里树桄榔出，时禽翡翠来。观风犹未尽，早晚使车回。

卷 48_44【郡江南上别孙侍御】

张九龄

云嶂天涯尽，川途海县穷。何言此地僻，忽与故人同。
身负邦君弩，情纾御史骢。王程不我驻，离思逐秋风。

卷 48_45【道逢北使题赠京邑亲知】

张九龄

征骖稍靡靡，去国方迟迟。路绕南登岸，情摇北上旗。
故人怜别日，旅雁逐归时。岁晏无芳草，将何寄所思。

卷 48_46 【江上使风呈裴宣州耀卿】

张九龄

江路与天连，风帆何淼然。遥林浪出没，孤舫鸟联翩。
常爱千钧重，深思万事捐。报恩非徇禄，还逐贾人船。

卷 48_47 【溪行寄王震】

张九龄

山气朝来爽，溪流日向清。远心何处惬，闲棹此中行。
丛桂林间待，群鸥水上迎。徒然适我愿，幽独为谁情。

卷 48_48 【自豫章南还江上作】

张九龄

归去南江水，磷磷见底清。转逢空阔处，聊洗滞留情。
浦树遥如待，江鸥近若迎。津途别有趣，况乃濯吾缨。

卷 48_49【将至岳阳有怀赵二】

张九龄

湘岸多深林，青冥昼结阴。独无谢客赏，况复贾生心。
草色虽云发，天光或未临。江潭非所遇，为尔白头吟。

卷 48_50【使还湘水】

张九龄

归舟宛何处，正值楚江平。夕逗烟村宿，朝缘浦树行。
于役已弥岁，言旋今愜情。乡郊尚千里，流目夏云生。

卷 48_51【初发道中寄远】

张九龄

日夜乡山远，秋风复此时。旧闻胡马思，今听楚猿悲。
念别朝昏苦，怀归岁月迟。壮图空不息，常恐发如丝。

卷 48_52 【自湘水南行】

张九龄

落日催行舫，逶迤洲渚间。虽云有物役，乘此更休闲。
暝色生前浦，清晖发近山。中流澹容与，唯爱鸟飞还。

卷 48_53 【初入湘中有喜】

张九龄

征鞍穷郢路，归棹入湘流。望鸟唯贪疾，闻猿亦罢愁。
两边枫作岸，数处橘为洲。却记从来意，翻疑梦里游。

卷 48_54 【耒阳溪夜行】

张九龄

乘夕棹归舟，缘源路转幽。月明看岭树，风静听溪流。
岚气船间入，霜华衣上浮。猿声虽此夜，不是别家愁。

卷 48_55 【江上】

张九龄

长林何缭绕，远水复悠悠。尽日馀无见，为心那不愁。
忆将亲爱别，行为主恩酬。感激空如此，芳时屡已遒。

卷 48_56 【自彭蠡湖初入江】

张九龄

江岫殊空阔，云烟处处浮。上来群噪鸟，中去独行舟。
牢落谁相顾，逶迤日自愁。更将心问影，于役复何求。

卷 48_57 【赴使泂峡】

张九龄

溪路日幽深，寒空入两谿。霜清百丈水，风落万重林。
夕鸟联归翼，秋猿断去心。别离多远思，况乃岁方阴。

卷 48_58【湖口望庐山瀑布泉】

张九龄

万丈洪泉落，迢迢半紫氛。奔飞流杂树，洒落出重云。
日照虹蜺似，天清风雨闻。灵山多秀色，空水共氤氲。

卷 48_59【浈阳峡】

张九龄

行舟傍越岑，窈窕越溪深。水暗先秋冷，山晴当昼阴。
重林间五色，对壁耸千寻。惜此生遐远，谁知造化心。

卷 48_60【使至广州】

张九龄

昔年尝不调，兹地亦遘回。本谓双鳧少，何知驷马来。
人非汉使橐，郡是越王台。去去虽殊事，山川长在哉。

卷 48_61 【春江晚景】

张九龄

江林多秀发，云日复相鲜。征路那逢此，春心益渺然。
兴来祇自得，佳气莫能传。薄暮津亭下，馀花满客船。

卷 48_62 【与王六履震广州津亭晓望】

张九龄

明发临前渚，寒来净远空。水纹天上碧，日气海边红。
景物纷为异，人情赖此同。乘槎自有适，非欲破长风。

卷 48_63 【初发曲江溪中】

张九龄

溪流清且深，松石复阴临。正尔可嘉处，胡为无赏心。
我由不忍别，物亦有缘侵。自匪常行迈，谁能知此音。

卷 48_64 【旅宿淮阳亭口号（一作宋之问诗）】

张九龄

日暮荒亭上，悠悠旅思多。故乡临桂水，今夜渺星河。
暗草霜华发，空亭雁影过。兴来谁与晤，劳者自为歌。

卷 48_65 【望月怀远】

张九龄

海上生明月，天涯共此时。情人怨遥夜，竟夕起相思。
灭烛怜光满，披衣觉露滋。不堪盈手赠，还寝梦佳期。

卷 48_66 【秋夕望月】

张九龄

清迥江城月，流光万里同。所思如梦里，相望在庭中。
皎洁青苔露，萧条黄叶风。含情不得语，频使桂华同。

卷 48_67 【咏燕】

张九龄

海燕何微眇，乘春亦暂来。岂知泥滓贱，祇见玉堂开。
绣户时双入，华轩日几回。无心与物竞，鹰隼莫相猜。

卷 48_68 【故刑部李尚书荆谷山集会】

张九龄

尝闻继老聃，身退道弥耽。结宇倚青壁，疏泉喷碧潭。
苔石随人古，烟花寄酒酣。山光纷向夕，归兴杜城南。

卷 48_69 【戏题春意】

张九龄

一作江南守，江林三四春。相鸣不及鸟，相乐喜关人。
日守朱丝直，年催华发新。淮阳只有卧，持此度芳辰。

卷 48_70 【庭梅咏】

张九龄

芳意何能早，孤荣亦自危。更怜花蒂弱，不受岁寒移。
朝雪那相妒，阴风已屡吹。馨香虽尚尔，飘荡复谁知。

卷 48_71 【听筝】

张九龄

端居正无绪，那复发秦筝。纤指传新意，繁弦起怨情。

卷 48_72 【初秋忆金均两弟】

张九龄

江渚秋风至，他乡离别心。孤云愁自远，一叶感何深。
忧喜尝同域，飞鸣忽异林。青山西北望，堪作白头吟。

卷 48_73 【秋怀】

张九龄

感惜芳时换，谁知客思悬。忆随鸿向暖，愁学马思边。
留滞机还息，纷拏网自牵。东南起归望，何处是江天。

卷 48_74 【故刑部李尚书挽词三首】

张九龄

仙宗出赵北，相业起山东。明德尝为林，嘉谋屡作忠。
论经白虎殿，献赋甘泉宫。与善今何在，苍生望已空。
宿昔三台践，荣华驷马归。印从青琐拜，翰入紫宸挥。
题剑恩方重，藏舟事已非。龙门不可望，感激涕沾衣。

永叹常山宝，沉埋京兆阡。同盟会五月，华表记千年。
渺漫野中草，微茫空里烟。共悲人事绝，唯对杜陵田。

卷 48_75 【故徐州刺史赠吏部侍郎苏公挽歌词三首】

张九龄

韦玄方继相，荀爽复齐名。在贵兼天爵，能贤出世卿。

学闻金马诏，神见玉人清。藏壑今如此，为山遂不成。

相如只谢病，子敬忽云亡。岂悟瑶台雪，分雕玉树行。
清规留草议，故事在封章。本谓山公启，而今殁始扬。

返葬长安陌，秋风箫鼓悲。奈何相送者，不是平生时。
寒影催年急，哀歌助晚迟。宁知建旌罢，丹旌向京师。

卷 48_76【故荥阳君苏氏挽歌词三首】

张九龄

门绪公侯列，嫔风诗礼行。松萝方有寄，桃李忽无成。
剑去双龙别，雏哀九凤鸣。何言峰山树，还似半心生。

永叹芳魂断，行看草露滋。二宗荣盛日，千古别离时。
竟罢生刍赠，空留画扇悲。容车候晓发，何岁是归期。

缟服纷相送，玄扃翳不开。更悲泉火灭，徒见柳车回。
旧室容衣奠，新茔拱树栽。唯应月照簾，潘岳此时哀。

卷 48_77【眉州康司马挽歌词】

张九龄

家受专门学，人称入室贤。刘桢徒有气，管辂独无年。

谪去长沙国，魂归京兆阡。从兹匣中剑，埋没罢冲天。

卷 48_78【奉和圣制早发三乡山行】

张九龄

羽卫森森西向秦，山川历历在清晨。晴云稍卷寒岩树，
宿雨能销御路尘。圣德由来合天道，灵符即此应时巡。
遣贤一一皆羈致，犹欲高深访隐沦。

卷 48_79【奉和圣制龙池篇】

张九龄

天启神龙生碧泉，泉水灵源浸迤延。飞龙已向珠潭出，
积水仍将银汉连。岸傍花柳看胜画，浦上楼台问是仙。
我后元符从此得，方为万岁寿图川。

第四十九卷

卷 49_1 【奉和圣制南郊礼毕酺宴】

张九龄

配天昭圣业，率土庆辉光。春发三条路，酺开百戏场。
流恩均庶品，纵观聚康庄。妙舞来平乐，新声出建章。
分曹日抱戴，赴节凤归昌。幸奏承云乐，同晞湛露阳。
气和皆有感，泽厚自无疆。饱德君臣醉，连歌奉柏梁。

卷 49_2 【奉和圣制早渡蒲津关】

张九龄

魏武中流处，轩皇问道回。长堤春树发，高掌曙云开。
龙负王舟渡，人占仙气来。河津会日月，天仗役风雷。
东顾重关尽，西驰万国陪。还闻股肱郡，元首咏康哉。

卷 49_3 【奉和圣制同二相南出雀鼠谷】

张九龄

设险诸侯地，承平圣主巡。东君朝二月，南旆拥三辰。
寒出重关尽，年随行漏新。瑞云丛捧日，芳树曲迎春。
舞咏先驰道，恩华及从臣。汾川花鸟意，并奉属车尘。

卷 49_4 【奉和圣制经河上公庙】

张九龄

昔者河边叟，谁知隐与仙。姓名终不识，章句此空传。
迹为坐忘晦，言犹强著诠。精灵竟何所，祠宇独依然。
道在纡眷眷，风行动睿篇。从兹化天下，清净复何先。

卷 49_5 【奉和圣制送尚书燕国公赴朔方】

张九龄

宗臣事有征，庙算在休兵。天与三台座，人当万里城。
朔南方偃革，河右暂扬旌。宠锡从仙禁，光华出汉京。
山川勤远略，原隰轸皇情。为奏薰琴唱，仍题宝剑名。
闻风六郡伏，计日五戎平。山甫归应疾，留侯功复成。

歌钟旋可望，衽席岂难行。四牡何时入，吾君忆履声。

卷 49_6【奉和圣制途经华山】

张九龄

万乘华山下，千岩云汉中。灵居虽窅密，睿览忽玄同。
日月临高掌，神仙仰大风。攒峰势岌岌，翊辇气雄雄。
揆物知幽赞，铭勋表圣衷。会应陪玉检，来此告成功。

卷 49_7【奉和圣制早登太行山率尔言志】

张九龄

孟月摄提贞，乘时我后征。晨严九折度，暮戒六军行。
日御驰中道，风师卷太清。戈鋌林表出，组练雪间明。
动植希皇豫，高深奉睿情。陪游七圣列，望幸百神迎。
气色烟犹喜，恩光草尚荣。之罘称万岁，今此复同声。

卷 49_8【奉和圣制登封礼毕洛城酺宴】

张九龄

大君毕能事，端扆乐成功。运与千龄合，欢将万国同。

汉酺歌圣酒，韶乐舞薰风。河洛荣光遍，云烟喜气通。
春华顿觉早，天泽倍知崇。草木毕沾被，犹言不在躬。

卷 49_9 【恩赐乐游园宴应制】

张九龄

宝筵延厚命，供帐序群公。形胜宜春接，威仪建礼同。
睎阳人似露，解愠物从风。朝庆千龄始，年华二月中。
辉光遍草木，和气发丝桐。岁岁无为化，宁知乐九功。

卷 49_10 【奉和圣制过王濬墓】

张九龄

汉王思钜鹿，晋将在弘农。入蜀举长算，平吴成大功。
与浑虽不协，归皓实为雄。孤绩沦千载，流名感圣衷。
万乘度荒陇，一顾凛生风。古节犹不弃，今人争效忠。

卷 49_11 【奉和吏部崔尚书雨后大明朝堂望南山】

张九龄

迢递终南顶，朝朝阊阖前。揭来青绮外，高在翠微先。

双凤蹇为阙，群龙俨若仙。还知到玄圃，更是谒甘泉。
夜雨尘初灭，秋空月正悬。诡容纷入望，霁色宛成妍。
东极华阴践，西弥嶓冢连。奔峰出岭外，瀑水落云边。
汉帝宫将苑，商君陌与阡。林华铺近甸，烟霭绕晴川。
既庶仁斯及，分忧政已宣。山公启事罢，吉甫颂声传。
济济金门步，洋洋玉树篇。徒歌虽有属，清越岂同年。

卷 49_12【和崔尚书喜雨】

张九龄

积阳虽有晦，经月未为灾。上念人天重，先祈云汉回。
仁心及草木，号令起风雷。照烂阴霞止，交纷瑞雨来。
三辰破黍稷，四达屏氛埃。池溜因添满，林芳为洒开。
听中声滴沥，望处影徘徊。惠泽成丰岁，昌言发上才。
无论验石鼓，不是御云台。直颂皇恩浹，崇朝遍九垓。

卷 49_13【和许给事中直夜简诸公】

张九龄

未央钟漏晚，仙宇蔼沉沉。武卫千庐合，严扃万户深。
左掖知天近，南窗见月临。树摇金掌露，庭徙玉楼阴。
他日闻更直，中宵属所钦。声华大国宝，夙夜近臣心。
逸兴乘高阁，雄飞在禁林。宁思窃抃者，情发为知音。

卷 49_14 【和苏侍郎小园夕霁寄诸弟】

张九龄

清风阊阖至，轩盖承明归。云月爱秋景，林堂开夜扉。
何言兼济日，尚与宴私违。兴逐蒹葭变，文因棠棣飞。
人伦用忠孝，帝德已光辉。赠弟今为贵，方知陆氏微。

卷 49_15 【酬宋使君见赠之作】

张九龄

时来不自意，宿昔谬枢衡。翊圣负明主，妨贤愧友生。
罢归犹右职，待罪尚南荆。政有留棠旧，风因继组成。
高轩问疾苦，烝庶荷仁明。衰废时所薄，只言僚故情。

卷 49_16 【酬宋使君见诒】

张九龄

陟邻初稟训，献策幸逢时。朝列且云忝，君恩复若兹。
庭闱际海曲，轺传荷天慈。顾己欢乌鸟，闻君泣素丝。
才明应主召，福善岂神欺。但愿白心在，终然涅不淄。

卷 49_17【酬通事舍人寓直见示篇中兼起居陆舍人景献】

张九龄

轩掖殊清秘，才华固在斯。兴因膏泽洒，情与惠风吹。
所美应人誉，何私亦我仪。同声感乔木，比翼谢长离。
价以陆生减，贤惭鲍叔知。薄游尝独愧，芳讯乃兼施。
此夜金闺籍，伊人琼树枝。飞鸣复何远，相顾幸媿媿。

卷 49_18【与袁补阙寻蔡拾遗，会此公出行，后蔡有五韵诗见赠，以此篇答焉】

张九龄

辙迹陈家巷，诗书孟子邻。偶来乘兴者，不值草玄人。
契是忘年合，情非累日申。闻君还薄暮，见眷及兹辰。
赠我如琼玖，将何报所亲。

卷 49_19【酬赵二侍御使西军赠两省旧僚之作】

张九龄

石室先鸣者，金门待制同。操刀尝愿割，持斧竟称雄。
应敌兵初起，缘边虏欲空。使车经陇月，征旆绕河风。

忽枉兼金讯，非徒秣马功。气清蒲海曲，声满柏台中。
顾己尘华省，欣君震远戎。明时独匪报，尝欲退微躬。

卷 49_20 【武司功初有幽庭春暄见贻夏首获见以诗报焉】

张九龄

芳月尽离居，幽怀重起予。虽言春事晚，尚想物华初。
迟日皦方照，高斋澹复虚。笋成林向密，花落树应疏。
赠鲤情无间，求莺思有馀。暄妍不相待，含叹欲焉如。

卷 49_21 【酬王履震游园林见贻】

张九龄

宅生惟海县，素业守郊园。中览霸王说，上徼明主恩。
一行罢兰径，数载历金门。既负潘生拙，俄从周任言。
逶迤恋轩陛，萧散反丘樊。旧径稀人迹，前池耗水痕。
并看芳树老，唯觉敝庐存。自我栖幽谷，逢君翳覆盆。
孟轲应有命，贾谊得无冤。江上行伤远，林间偶避喧。
地偏人事绝，时霁鸟声繁。独善心俱闭，穷居道共尊。
乐因南涧藻，忧岂北堂萱。幽意加投漆，新诗重赠轩。
平生徇知己，穷达与君论。

卷 49_22 【饒王尚书出边】

张九龄

汉相推人杰，殷宗伐鬼方。还闻出将重，坐见即戎良。
上策应为豫，中权且用光。令申兵气倍，威懾虏魂亡。
树比公孙大，城如道济长。夏云登陇首，秋露泫辽阳。
武德舒宸眷，文思饒乐章。感恩身既许，激节胆犹尝。
祖帐倾朝列，军麾驻道傍。诗人何所咏，尚父欲鹰扬。

卷 49_23 【送赵都护赴安西】

张九龄

将相有更践，简心良独难。远图尝画地，超拜乃登坛。
戎即昆山序，车同渤海单。义无中国费，情必远人安。
他日文兼武，而今栗且宽。自然来月窟，何用刺楼兰。
南至三冬晚，西驰万里寒。封侯自有处，征马去啾啾。

卷 49_24 【奉使自蓝田玉山南行】

张九龄

征骖入云壑，始忆步金门。通籍微躯幸，归途明主恩。
匪唯徇行役，兼得慰晨昏。是节暑云炽，纷吾心所尊。

海县且悠缅，山邮日骏奔。徒知恶器事，未暇息阴论。
峽武经陈迹，衡湘指故园。水闻南涧险，烟望北林繁。
远霭千岩合，幽声百籁喧。阴泉夏犹冻，阳景昼方暾。
懿此高深极，徒令梦想存。盛明期有报，长往复奚言。

卷 49_25 【贺给事尝诣蔡起居郊馆有诗因命同作】

张九龄

记言闻直史，筑室面层阿。岂不承明入，终云幽意多。
沉冥高士致，休浣故人过。前岭游氛灭，中林芳气和。
兹辰阻佳趣，望美独如何。

卷 49_26 【南山下旧居闲放】

张九龄

祗役已云久，乘闲返服初。块然屏尘事，幽独坐林间。
清旷前山远，纷喧此地疏。乔木凌青霭，修篁媚绿渠。
耳和绣翼鸟，目畅锦鳞鱼。寂寞心还间，飘飘体自虚。
兴来命旨酒，临罢阅仙书。但乐多幽意，宁知有毁誉。
尚想争名者，谁云要路居。都忘下流叹，倾夺竟何如。

卷 49_27 【高斋闲望言怀】

张九龄

高斋复晴景，延眺属清秋。风物动归思，烟林生远愁。
纷吾自穷海，薄宦此中州。取路无高足，随波适下流。
岁华空冉冉，心曲且悠悠。坐惜芳时歇，胡然久滞留。

卷 49_28 【别乡人南还】

张九龄

橘柚南中暖，桑榆北地阴。何言荣落异，因见别离心。
吾亦江乡子，思归梦寐深。闻君去水宿，结思渺云林。
牵缀从浮事，迟回谢所钦。东南行舫远，秋浦念猿吟。

卷 49_29 【初发江陵有怀】

张九龄

极望涔阳浦，江天渺不分。扁舟从此去，鸥鸟自为群。
他日怀真赏，中年负俗纷。适来果微尚，倏尔会斯文。
复想金闺籍，何如梦渚云。我行多胜寄，浩思独氛氲。

卷 49_30 【同綦毋学士月夜闻雁】

张九龄

栖宿岂无意，飞飞更远寻。长途未及半，中夜有遗音。
月思关山笛，风号流水琴。空声两相应，幽感一何深。
避缴归南浦，离群叫北林。联翩俱不定，怜尔越乡心。

卷 49_31 【登总持寺阁】

张九龄

香阁起崔嵬，高高沙版开。攀跻千仞上，纷诡万形来。
草间商君陌，云重汉后台。山从函谷断，川向斗城回。
林里春容变，天边客思催。登临信为美，怀远独悠哉。

卷 49_32 【晚憩王少府东阁】

张九龄

披轩肆流览，云壑见深重。空水秋弥净，林烟晚更浓。
坐隅分洞府，檐际列群峰。窈窕生幽意，参差多异容。
还惭大隐迹，空想列仙踪。赖此升攀处，萧条得所从。

卷 49_33【登城楼望西山作】

张九龄

城楼枕南浦，日夕顾西山。宛宛鸾鹤处，高高烟雾间。
仙井今犹在，洪厓久不还。金编莫我授，羽驾亦难攀。
檐际千峰出，云中一鸟闲。纵观穷水国，游思遍人寰。
勿复尘埃事，归来且闭关。

卷 49_34【祠紫盖山经玉泉山寺】

张九龄

指途跻楚望，策马傍荆岑。稍稍松篁入，泠泠涧谷深。
观奇逐幽映，历险忘岖嶔。上界投佛影，中天扬梵音。
焚香忤在昔，礼足誓来今。灵异若有对，神仙真可寻。
高僧闻逝者，远俗是初心。藓驳经行处，猿啼燕坐林。
归真已寂灭，留迹岂湮沉。法地自兹广，何云千万金。

卷 49_35【洪州西山祈雨，是日辄应，因赋诗言事】

张九龄

兹山蕴灵异，走望良有归。丘祷虽已久，氓心难重违。

迟明申藻荐，先夕旅岩扉。独宿云峰下，萧条人吏稀。
我来不外适，幽抱自中微。静入风泉奏，凉生松栝围。
穷年滞远想，寸晷阅清晖。虚美怅无属，素情缄所依。
诡随嫌弱操，羁束谢贞肥。义济亦吾道，诚存为物祈。
灵心倏已应，甘液幸而飞。闭阁且无责，随车安敢希。
多惭德不感，知复是耶非。

卷 49_36 【经江宁览旧迹至玄武湖】

张九龄

南国更数世，北湖方十洲。天清华林苑，日晏景阳楼。
果下回仙骑，津傍驻彩旒。鳧鹭喧凤管，荷芰斗龙舟。
七子陪诗赋，千人和棹讴。应言在镐乐，不让横汾秋。
风俗因纾慢，江山成易由。驹王信不武，孙叔是无谋。
佳气日将歇，霸功谁与修。桑田东海变，麋鹿姑苏游。
否运争三国，康时劣九州。山虽幕府在，馆岂豫章留。
水淀还相阅，菱歌亦故遒。雄图不足问，唯想事风流。

卷 49_37 【登襄阳岷山】

张九龄

昔年亟攀践，征马复来过。信若山川旧，谁如岁月何。
蜀相吟安在，羊公碣已磨。令图犹寂寞，嘉会亦蹉跎。

宛宛樊城岸，悠悠汉水波。逶迤春日远，感寄客情多。
地本原林秀，朝来烟景和。同心不同赏，留叹此岩阿。

卷 49_38【登荆州城楼】

张九龄

天宇何其旷，江城坐自拘。层楼百馀尺，迢递在西隅。
暇日时登眺，荒郊临故都。累累见陈迹，寂寂想雄图。
古往山川在，今来郡邑殊。北疆虽入郑，东距岂防吴。
几代传荆国，当时敌陕郢。上流空有处，中土复何虞。
枕席夷三峡，关梁豁五湖。承平无异境，守隘莫论夫。
自罢金门籍，来参竹使符。端居向林藪，微尚在桑榆。
直似王陵憨，非如宁武愚。今兹对南浦，乘雁与双凫。

卷 49_39【登乐游原春望书怀】

张九龄

城隅有乐游，表里见皇州。策马既长远，云山亦悠悠。
万壑清光满，千门喜气浮。花间直城路，草际曲江流。
凭眺兹为美，离居方独愁。已惊玄发换，空度绿萸柔。
奋翼笼中鸟，归心海上鸥。既伤日月逝，且欲桑榆收。
豹变焉能及，莺鸣非可求。愿言从所好，初服返林丘。

卷 49_40 【候使登石头驿楼作】

张九龄

山槛凭南望，川途眇北流。远林天翠合，前浦日华浮。
万井缘津渚，千艘咽渡头。渔商多末事，耕稼少良畴。
自守陈蕃榻，尝登王粲楼。徒然骋目处，岂是获心游。
向迹虽愚谷，求名异盗丘。息阴芳木所，空复越乡忧。

卷 49_41 【登临沮楼】

张九龄

高深不可厌，巡属复来过。本与众山绝，况兹韶景和。
危楼入水倒，飞槛向空摩。杂树缘青壁，棹枝挂绿萝。
潭清能彻底，鱼乐好跳波。有象言虽具，无端思转多。
同怀不在此，孤赏欲如何。

卷 49_42 【陪王司马登薛公道遥台】

张九龄

尝闻薛公泪，非直雍门琴。窜逐留遗迹，悲凉见此心。
府中因暇豫，江上幸招寻。人事已成古，风流独至今。

闲情多感叹，清景暂登临。无复甘棠在，空馀蔓草深。
晴光送远目，胜气入幽襟。水去朝沧海，春来换碧林。
赋怀湘浦吊，碑想汉川沉。曾是陪游日，徒为梁父吟。

卷 49_43 【尝与大理丞袁公，太府丞田公偶诣一所，林沼尤胜，因并坐其次相得甚欢，遂赋诗焉，以咏其事】

张九龄

方驾与吾友，同怀不异寻。偶逢池竹处，便会江湖心。
夏近林方密，春馀水更深。清华两辉映，闲步亦窥临。
蘋藻复佳色，凫鹭亦好音。韶芳媚洲渚，蕙气袭衣襟。
萧散皆为乐，裴回从所钦。谓予成夙志，岁晚共抽簪。

卷 49_44 【与弟游家园】

张九龄

定省荣君赐，来归是昼游。林鸟飞旧里，园果让新秋。
枝长南庭树，池临北涧流。星霜屡尔别，兰麝为谁幽。
善积家方庆，恩深国未酬。栖栖将义动，安得久情留。

卷 49_45 【郡内闲斋】

张九龄

郡阁昼常掩，庭芜日复滋。檐风落鸟毳，窗叶挂虫丝。
拙病宦情少，羁闲秋气悲。理人无异绩，为郡但经时。
唯有江湖意，沉冥空在兹。

卷 49_46 【城南隅山池，春中田袁二公盛称其美，夏首获赏
果，会夙言故有此咏】

张九龄

忆昨闻佳境，驾言寻昔踪。非惟初物变，亦与旧游睽。
幽渚为君说，清晨即我携。途深独睥睨，历险共攀跻。
林笋苞青箨，津杨委绿蕖。荷香初出浦，草色复缘堤。
乐处将鸥狎，谭端用马齐。且言临海郡，兼话武陵溪。
异壤风烟绝，空山岩径迷。如何际朝野，从此待金闺。

卷 49_47 【西江夜行】

张九龄

遥夜人何在，澄潭月里行。悠悠天宇旷，切切故乡情。

外物寂无扰，中流澹自清。念归林叶换，愁坐露华生。
犹有汀洲鹤，宵分乍一鸣。

卷 49_48【南还湘水言怀】

张九龄

拙宦今何有，劳歌念不成。十年乖夙志，一别悔前行。
归去田园老，倘来轩冕轻。江间稻正熟，林里桂初荣。
鱼意思在藻，鹿心怀食苹。时哉苟不达，取乐遂吾情。

卷 49_49【商洛山行怀古】

张九龄

园绮值秦末，嘉遁此山阿。陈迹向千古，荒途始一过。
硕人久沦谢，乔木自森罗。故事昔尝览，遗风今岂讹。
泌泉空活活，樵叟独皤皤。是处清晖满，从中幽兴多。
长怀赤松意，复忆紫芝歌。避世辞轩冕，逢时解薜萝。
盛明今在运，吾道竟如何。

卷 49_50【南还以诗代书赠京师旧僚】

张九龄

薄宦晨昏阙，尊尊义取斯。穷愁年貌改，寂历尔胡为。
不谄词多忤，无容礼益卑。微生尚何有，远迹固其宜。
思扰梁山曲，情遥越鸟枝。故园从海上，良友邈天涯。
云雨叹一别，川原劳载驰。上惭伯乐顾，中负叔牙知。
去国诚寥落，经途弊险巇。岁逢霜雪苦，林属蕙兰萎。
欲赠幽芳歇，行悲旧赏移。一从关作限，两见月成规。
苒苒穷年籥，行行尽路岐。征鞍税北渚，归帆指南垂。
树晚犹葱蒨，江寒尚渺瀰。土风从楚别，山水入湘奇。
石濑相奔触，烟林更蔽亏。层崖夹洞浦，轻舸泛澄漪。
松筱行皆傍，禽鱼动辄随。惜哉边地隔，不与故人窥。
畴昔陪鹓鹭，朝阳振羽仪。来音虽寂寞，接景每逶迤。
朝罢冥尘事，宾来话酒卮。邀欢逐芳草，结兴选华池。
及此风成叹，何时雾可披。自怜无用者，谁念有情离。
望美音容阔，怀贤梦想疲。因声达霄汉，持拙守东陂。

卷 49_51【初发道中赠王司马兼寄诸公】

张九龄

昔岁尝陈力，中年退屏居。承颜方弄鸟，放性或观鱼。
曾是安疵拙，诚非议卷舒。林园事益简，烟月赏恒馀。

不意栖愚谷，无阶奉诏书。湛恩均大造，弱植愧空虚。
肃命趋仙阙，侨装抚传车。念行开祖帐，怜别降题舆。
谁谓风期许，叨延礼数殊。义沾投分末，情及解携初。
追饯扶江介，光辉烛里闾。子云应寂寞，公叔为吹嘘。
景物春来异，音容日向疏。川原行稍稳，钟鼓听犹徐。
林隔王公举，云迷班氏庐。恋亲唯委咽，思德更踌躇。
徇义当由此，怀安乃阙如。愿酬明主惠，行矣岂徒欤。

卷 49_52 【自始兴溪夜上赴岭】

张九龄

尝蓄名山意，兹为世网牵。征途屡及此，初服已非然。
日落青岩际，溪行绿筱边。去舟乘月后，归鸟息人前。
数曲迷幽嶂，连圻触暗泉。深林风绪结，遥夜客情悬。
非梗胡为泛，无膏亦自煎。不知于役者，相乐在何年。

卷 49_53 【当涂界寄裴宣州】

张九龄

故人宣城守，亦在江南偏。如何分虎竹，相与间山川。
章绶胡为者，形骸非自然。含情津渡阔，倚望脰空延。
远近闻佳政，平生仰大贤。推心徒有属，会面良无缘。
目夕遵前渚，江村投暮烟。念行祇意默，怀远岂言宣。

委曲风波事，难为尺素传。

卷 49_54【郡中每晨兴辄见群鹤东飞，至暮又行列而返，唳云路甚和乐焉，予愧独处江城，常目送此，意有所羨，遂赋以诗】

张九龄

云间有数鹤，抚翼意无违。晓日东田去，烟霄北渚归。
欢呼良自适，罗列好相依。远集长江静，高翔众鸟稀。
岂烦仙子驭，何畏野人机。却念乘轩者，拘留不得飞。

卷 49_55【和裴侍中承恩拜扫旋辔途中有怀，寄州县官僚乡国亲故（后缺）】

张九龄

嵩岳神惟降，汾川鼎气雄。生才作霖雨，继代有清通。
天下称贤相，朝端挹至公。自家来佐国，移孝入为忠。
霜露多前感，丘园想旧风。扈巡过晋北，问俗到河东。
便道恩华降，还乡礼教崇。野尊延故老，朝服见儿童。

卷 49_56 【和姚令公哭李尚书义】

张九龄

贵贱虽殊等，平生窃下风。云泥势已绝，山海纳还通。
忽叹登龙者，翻将吊鹤同。琴诗犹可托，剑履独成空。
畴昔尝论礼，兴言每匪躬。人思崔琰议，朝掩祭遵公。
作善神何酷，依仁命不融。天文虚北斗，人事罢南宫。
上宰既伤旧，下流弥感衷。无恩报国土，徒欲问玄穹。

卷 49_57 【奉和圣制经函谷关作】

张九龄

函谷虽云险，黄河已复清。圣心无所隔，空此置关城。

卷 49_58 【奉和圣制度潼关口号】

张九龄

嶙嶙故城垒，荒凉空戍楼。在德不在险，方知王道休。

卷 49_59 【答太常靳博士见赠一绝】

张九龄

上苑春先入，中园花尽开。唯馀幽径草，尚待日光催。

卷 49_60 【登荆州城望江二首】

张九龄

滔滔大江水，天地相终始。经阅几世人，复叹谁家子。

东望何悠悠，西来昼夜流。岁月既如此，为心那不愁。

卷 49_61 【赋得自君之出矣】

张九龄

自君之出矣，不复理残机。思君如满月，夜夜减清辉。

卷 49_62 【答陆澧】

张九龄

松叶堪为酒，春来酿几多。不辞山路远，踏雪也相过。

第五十卷

卷 50_1【奉和上元酺宴应诏】

杨炯

甲乙遇灾年，周隋送上弦。妖星六丈出，沴气七重悬。
赤县空无主，苍生欲问天。龟龙开宝命，云火昭灵庆。
万物睹真人，千秋逢圣政。祖宗玄泽远，文武休光盛。
大号域中平，皇威天下惊。参辰昭文物，宇宙浹声名。
汉后三章令，周王五伐兵。匈奴穷地角，本自远正朔。
骄子起天街，由来亏礼乐。一衣扫风雨，再战夷屯剥。
清明日月旦，萧索烟云涣。寒暑既平分，阴阳复贞观。
惟神谐妙物，乃圣符幽赞。下武发祯祥，平阶属会昌。
金泥封日观，璧水匝明堂。业盛勋华德，兴包天地皇。
孝思义罔极，易礼光前式。天焕三辰辉，灵书五云色。
敬时穷发敛，卜代盈千亿。五纬聚华轩，重光入望园。
公卿论至道，天子拜昌言。雷解初开出，星空即便元。
瑶台凉景荐，银阙秋阴遍。百戏骋鱼龙，千门壮宫殿。
深仁洽蛮徼，恺乐周寰县。宣室召群臣，明庭礼百神。
仰德还符日，沾恩更似春。襄城非牧竖，楚国有巴人。

卷 50_2 【广溪峡】

杨炯

广溪三峡首，旷望兼川陆。山路绕羊肠，江城镇鱼腹。
乔林百丈偃，飞水千寻瀑。惊浪回高天，盘涡转深谷。
汉氏昔云季，中原争逐鹿。天下有英雄，襄阳有龙伏。
常山集军旅，永安兴版筑。池台忽已倾，邦家遽沦覆。
庸才若刘禅，忠佐为心腹。设险犹可存，当无贾生哭。

卷 50_3 【巫峡】

杨炯

三峡七百里，唯言巫峡长。重岩窅不极，叠嶂凌苍苍。
绝壁横天险，莓苔烂锦章。入夜分明见，无风波浪狂。
忠信吾所蹈，泛舟亦何伤。可以涉砥柱，可以浮吕梁。
美人今何在，灵芝徒有芳。山空夜猿啸，征客泪沾裳。

卷 50_4 【西陵峡】

杨炯

绝壁耸万仞，长波射千里。盘薄荆之门，滔滔南国纪。

楚都昔全盛，高丘烜望祀。秦兵一旦侵，夷陵火潜起。
四维不复设，关塞良难恃。洞庭且忽焉，孟门终已矣。
自古天地辟，流为峡中水。行旅相赠言，风涛无极已。
及余践斯地，瑰奇信为美。江山若有灵，千载伸知己。

卷 50_5 【从军行】

杨炯

烽火照西京，心中自不平。牙璋辞凤阙，铁骑绕龙城。
雪暗凋旗画，风多杂鼓声。宁为百夫长，胜作一书生。

卷 50_6 【刘生】

杨炯

卿家本六郡，年长入三秦。白璧酬知己，黄金谢主人。
剑锋生赤电，马足起红尘。日暮歌钟发，喧喧动四邻。

卷 50_7 【骢马】

杨炯

骢马铁连钱，长安侠少年。帝畿平若水，官路直如弦。

夜玉妆车轴，秋金铸马鞭。风霜但自保，穷达任皇天。

卷 50_8【出塞】

杨炯

塞外欲纷纭，雌雄犹未分。明堂占气色，华盖辨星文。
二月河魁将，三千太乙军。丈夫皆有志，会见立功勋。

卷 50_9【有所思】

杨炯

贱妾留南楚，征夫向北燕。三秋方一日，少别比千年。
不掩嚙红缕，无论数绿钱。相思明月夜，迢递白云天。

卷 50_10【梅花落】

杨炯

窗外一株梅，寒花五出开。影随朝日远，香逐便风来。
泣对铜钩障，愁看玉镜台。行人断消息，春恨几裴回。

卷 50_11【折杨柳】

杨炯

边地遥无极，征人去不还。秋容凋翠羽，别泪损红颜。
望断流星驿，心驰明月关。藁砧何处有，杨柳自堪攀。

卷 50_12【紫骝马】

杨炯

侠客重周游，金鞭控紫骝。蛇弓白羽箭，鹤辔赤茸鞦。
发迹来南海，长鸣向北州。匈奴今未灭，画地取封侯。

卷 50_13【战城南】

杨炯

塞北途辽远，城南战苦辛。幡旗如鸟翼，甲冑似鱼鳞。
冻水寒伤马，悲风愁杀人。寸心明白日，千里暗黄尘。

卷 50_14 【送临津房少府】

杨炯

岐路三秋别，江津万里长。烟霞驻征盖，弦奏促飞觞。
阶树含斜日，池风泛早凉。赠言未终竟，流涕忽沾裳。

卷 50_15 【送丰城王少府】

杨炯

愁结乱如麻，长天照落霞。离亭隐乔树，沟水浸平沙。
左尉才何屈，东关望渐赊。行看转牛斗，持此报张华。

卷 50_16 【送郑州周司空】

杨炯

汉国临清渭，京城枕浊河。居人下珠泪，宾御促骊歌。
望极关山远，秋深烟雾多。唯馀三五夕，明月暂经过。

卷 50_17【送梓州周司功】

杨炯

御沟一相送，征马屡盘桓。言笑方无日，离忧独未宽。
举杯聊劝酒，破涕暂为欢。别后风清夜，思君蜀路难。

卷 50_18【送杨处士反初卜居曲江】

杨炯

雁门归去远，垂老脱袈裟。萧寺休为客，曹溪便寄家。
绿琪千岁树，黄槿四时花。别怨应无限，门前桂水斜。

卷 50_19【途中】

杨炯

悠悠辞鼎邑，去去指金墉。途路盈千里，山川亘百重。
风行常有地，云出本多峰。郁郁园中柳，亭亭山上松。
客心殊不乐，乡泪独无从。

卷 50_20 【送刘校书从军】

杨炯

天将下三宫，星门召五戎。坐谋资庙略，飞檄伫文雄。
赤土流星剑，乌号明月弓。秋阴生蜀道，杀气绕湟中。
风雨何年别，琴尊此日同。离亭不可望，沟水自西东。

卷 50_21 【游废观】

杨炯

青幃倚丹田，荒凉数百年。独知小山桂，尚识大罗天。
药败金炉火，苔昏玉女泉。岁时无壁画，朝夕有阶烟。
花柳三春节，江山四望悬。悠然出尘网，从此狎神仙。

卷 50_22 【和石侍御山庄】

杨炯

烟霞非俗宇，岩壑只幽居。水浸何曾吠，荒郊不复锄。
影浓山树密，香浅泽花疏。阔堑防斜径，平堤夹小渠。
莲房若个实，竹节几重虚。萧然隔城市，酌醴焚枯鱼。

卷 50_23【送李庶子致仕还洛】

杨炯

此地倾城日，由来供帐华。亭逢李广骑，门接邵平瓜。
原野烟氛匝，关河游望赊。白云断岩岫，绿草覆江沙。
诏赐扶阳宅，人荣御史车。灞池一相送，流涕向烟霞。

卷 50_24【早行】

杨炯

敞朗东方彻，阑干北斗斜。地气俄成雾，天云渐作霞。
河流才辨马，岩路不容车。阡陌经三岁，闾阎对五家。
露文沾细草，风影转高花。日月从来惜，关山犹自赊。

卷 50_25【和崔司空伤姬人】

杨炯

昔时南浦别，鹤怨宝琴弦。今日东方至，鸾销珠镜前。
水流衔砌咽，月影向窗悬。妆匣凄馀粉，熏炉灭旧烟。
晚庭摧玉树，寒帐委金莲。佳人不再得，云日几千年。

卷 50_26 【和骞右丞省中暮望】

杨炯

故事闲台阁，仙门蔼已深。旧章窥复道，云幌肃重阴。
玄律葭灰变，青阳斗柄临。年光摇树色，春气绕兰心。
风响高窗度，流痕曲岸侵。天门总枢辖，人镜辨衣簪。
日暮南宫静，瑶华振雅音。

卷 50_27 【和酬虢州李司法】

杨炯

唇齿标形胜，关河壮邑居。寒山抵方伯，秋水面鸿胪。
君子从游宦，忘情任卷舒。风霜下刀笔，轩盖拥门闾。
平野芸黄遍，长洲鸿雁初。菊花宜泛酒，浦叶好裁书。
昔我芝兰契，悠然云雨疏。非君重千里，谁肯惠双鱼。

卷 50_28 【和郑讷校内省眺瞩思乡怀友】

杨炯

铜门初下辟，石馆始沉研。游雾千金字，飞云五色笺。
楼台横紫极，城阙俯青田。暄入瑶房里，春回玉宇前。

霞文埋落照，风物澹归烟。翰墨三馀隙，关山四望悬。
颓峰睥眦羽，流水旷鸣弦。虽欣承白雪，终恨隔青天。

卷 50_29【和旻上人伤果禅师】

杨炯

净业初中日，浮生大小年。无人本无我，非后亦非前。
箫鼓旁喧地，龙蛇直映天。法门摧栋宇，觉海破舟船。
书镇秦王饷，经文宋国传。声华周百亿，风烈被三千。
芜没青园寺，荒凉紫陌田。德音殊未远，拱木已生烟。

卷 50_30【和刘侍郎入隆唐观】

杨炯

福地阴阳合，仙都日月开。山川临四险，城树隐三台。
伏槛排云出，飞轩绕涧回。参差凌倒影，潇洒轶浮埃。
百果珠为实，群峰锦作苔。悬萝暗疑雾，瀑布响成雷。
方士烧丹液，真人泛玉杯。还如问桃水，更似得蓬莱。
汉帝求仙日，相如作赋才。自然金石奏，何必上天台。

卷 50_31【和辅先入昊天观星瞻】

杨炯

遁甲爻皇里，星占太乙宫。天门开奕奕，佳气郁葱葱。
碧落三乾外，黄图四海中。邑居环若水，城阙抵新丰。
玉槛昆仑侧，金枢地轴东。上真朝北斗，元始咏南风。
汉君祠五帝，淮王礼八公。道书编竹简，灵液灌梧桐。
草茂琼阶绿，花繁宝树红。石楼纷似画，地镜淼如空。
桑海年应积，桃源路不穷。黄轩若有问，三月住崆峒。

卷 50_32【和刘长史答十九兄】

杨炯

帝尧平百姓，高祖宅三秦。子弟分河岳，衣冠动缙绅。
盛名恒不陨，历代几相因。街巷涂山曲，门闾洛水滨。
五龙金作友，一子玉为人。宝剑丰城气，明珠魏国珍。
风标自落落，文质且彬彬。共许刁元亮，同推周伯仁。
石城俯天阙，钟阜对江津。骥足方遐骋，狼心独未驯。
鼓鼙鸣九域，风火集重闉。城势馀三板，兵威乏四邻。
居然混玉石，直置保松筠。耿介酬天子，危言数贼臣。
钟仪琴未奏，苏武节犹新。受禄宁辞死，扬名不顾身。
精诚动天地，忠义感明神。怪鸟俄垂翼，修蛇竟暴鳞。
来朝拜休命，述职下梁岷。善政驰金马，嘉声绕玉轮。

三荆忽有赠，四海更相亲。宫徵谐鸣石，光辉掩烛银。
山川遥满目，零露坐沾巾。友爱光天下，恩波浹后尘。
懦夫仰高节，下里继阳春。

卷 50_33【夜送赵纵】

杨炯

赵氏连城璧，由来天下传。送君还旧府，明月满前川。

第五十一卷

卷 51_1【息夫人】

宋之问

可怜楚破息，肠断息夫人。仍为泉下骨，不作楚王嫔。
楚王宠莫盛，息君情更亲。情亲怨生别，一朝俱杀身。

卷 51_2【初到陆浑山庄】

宋之问

授衣感穷节，策马凌伊关。归齐逸人趣，日觉秋琴闲。
寒露衰北阜，夕阳破东山。浩歌步榛樾，栖鸟随我还。

卷 51_3【夜饮东亭】

宋之问

春泉鸣大壑，皓月吐层岑。岑壑景色佳，慰我远游心。

暗芳足幽气，惊栖多众音。高兴南山曲，长谣横素琴。

卷 51_4【芳树（一作沈佺期诗）】

宋之问

何地早芳菲，宛在长门殿。夭桃色若绶，秣李光如练。
啼鸟弄花疏，游蜂饮香遍。叹息春风起，飘零君不见。

卷 51_5【送赵六贞固】

宋之问

目断南浦云，心醉东郊柳。怨别此何时，春芳来已久。
与君共时物，尽此盈樽酒。始愿今不从，春风恋携手。

卷 51_6【题张老松树】

宋之问

岁晚东岩下，周顾何凄恻。日落西山阴，众草起寒色。
中有乔松树，使我长叹息。百尺无寸枝，一生自孤直。

卷 51_7【别之望后独宿蓝田山庄】

宋之问

鵲鴒有旧曲，调苦不成歌。自叹兄弟少，常嗟离别多。
尔寻北京路，予卧南山阿。泉晚更幽咽，云秋尚嵯峨。
药栏听蝉噪，书幌见禽过。愁至愿甘寝，其如乡梦何。

卷 51_8【浣纱篇赠陆上人】

宋之问

越女颜如花，越王闻浣纱。国微不自宠，献作吴宫娃。
山藪半潜匿，苕萝更蒙遮。一行霸句践，再笑倾夫差。
艳色夺人目，黼纈亦相夸。一朝还旧都，靓妆寻若耶。
鸟惊入松网，鱼畏沉荷花。始觉冶容妄，方悟群心邪。
钦子秉幽意，世人共称嗟。愿言托君怀，倘类蓬生麻。
家住雷门曲，高阁凌飞霞。淋漓翠羽帐，旖旎采云车。
春风艳楚舞，秋月缠胡笳。自昔专娇爱，袭玩唯矜奢。
达本知空寂，弃彼犹泥沙。永割偏执性，自长薰修芽。
携妾不障道，来止妾西家。

卷 51_9【雨从箕山来】

宋之问

雨从箕山来，倏与飘风度。晴明西峰日，绿缙南溪树。
此时客精庐，幸蒙真僧顾。深入清净理，妙断往来趣。
意得两契如，言尽共忘喻。观花寂不动，闻鸟悬可悟。
向夕闻天香，淹留不能去。

卷 51_10【初至崖口】

宋之问

崖口众山断，嶽崱耸天壁。气冲落日红，影入春潭碧。
锦绩织苔藓，丹青画松石。水禽泛容与，岩花飞的砾。
微路从此深，我来限于役。惆怅情未已，群峰暗将夕。

卷 51_11【自湘源至潭州衡山县】

宋之问

浮湘沿迅湍，逗浦凝远盼。渐见江势阔，行嗟水流漫。
赤岸杂云霞，绿竹缘溪涧。向背群山转，应接良景晏。
沓障连夜猿，平沙覆阳雁。纷吾望阙客，归桡速已惯。

中道方溯洄，迟念自兹撰。赖欣衡阳美，持以蠲忧患。

卷 51_12【入崖口五渡寄李适】

宋之问

抱琴登绝壑，伐木溯清川。路极意谓尽，势回趣转绵。
人远草木秀，山深云景鲜。余负海峤情，自昔微尚然。
弥旷十馀载，今来宛仍前。未窥仙源极，独进野人船。
时攀乳窦憩，屡薄天窗眠。夜弦响松月，朝楫弄苔泉。
因冥象外理，永谢区中缘。碧潭可遗老，丹砂堪学仙。
莫使驰光暮，空令归鹤怜。

卷 51_13【洞庭湖】

宋之问

地尽天水合，朝及洞庭湖。初日当中涌，莫辨东西隅。
晶耀目何在，滢荧心欲无。灵光宴海若，游气耿天吴。
张乐轩皇至，征苗夏禹徂。楚臣悲落叶，尧女泣苍梧。
野积九江润，山通五岳图。风恬鱼自跃，云夕雁相呼。
独此临泛漾，浩将人代殊。永言洗氛浊，卒岁为清娱。
要使功成退，徒劳越大夫。

卷 51_14 【景龙四年春祠海】

宋之问

肃事祠春渚，宵斋洗蒙虑。鸡鸣见日出，鹭下惊涛鹭。
地阔八荒近，天回百川澍。筵端接空曲，目外唯雰雾。
暖气物象来，周游晦明互。致牲匪玄享，禋涤期灵煦。
的的波际禽，沄沄岛间树。安期今何在，方丈蔑寻路。
仙事与世隔，冥搜徒已屡。四明背群山，遗老莫辨处。
抚中良自慨，弱龄忝恩遇。三入文史林，两拜神仙署。
虽叹出关远，始知临海趣。赏来空自多，理胜孰能喻。
留楫竟何待，徙倚忽云暮。

卷 51_15 【温泉庄卧病寄杨七炯】

宋之问

移疾卧兹岭，寥寥倦幽独。赖有嵩丘山，高枕长在目。
兹山栖灵异，朝夜翳云族。是日濛雨晴，返景入岩谷。
幂幂涧畔草，青青山下木。此意方无穷，环顾怅林麓。
伊洛何悠漫，川原信重复。夏馀鸟兽蕃，秋末禾黍熟。
秉愿守樊圃，归闲欣艺牧。惜无载酒人，徒把凉泉掬。

卷 51_16 【答田征君（一作敬答田征君游岩）】

宋之问

家临清溪水，溪水绕盘石。绿萝四面垂，褭褭百馀尺。
风泉度丝管，苔藓铺茵席。传闻颍阳人，霞外漱灵液。
忽枉岩中翰，吟望朝复夕。何当遂远游，物色候逋客。

卷 51_17 【自衡阳至韶州谒能禅师】

宋之问

谪居窜炎壑，孤帆淼不系。别家万里馀，流目三春际。
猿啼山馆晓，虹饮江皋霁。湘岸竹泉幽，衡峰石困闭。
岭嶂穷攀越，风涛极沿济。吾师在韶阳，欣此得躬诣。
洗虑宾空寂，焚香结精誓。愿以有漏躯，聿薰无生慧。
物用益冲旷，心源日闲细。伊我获此途，游道回晚计。
宗师信舍法，摛落文史艺。坐禅罗浮中，寻异穷海裔。
何辞御魑魅，自可乘炎疠。回首望旧乡，云林浩亏蔽。
不作离别苦，归期多年岁。

卷 51_18 【见南山夕阳召监师不至】

宋之问

夕阳黯晴碧，山翠互明灭。此中意无限，要与开士说。
徒郁仲举思，讵回道林辙。孤兴欲待谁，待此湖上月。

卷 51_19 【游法华寺】

宋之问

薄游京都日，遥羨稽山名。分刺江海郡，谒来征素情。
松露洗心眷，象筵敷念诚。薄云界青嶂，皎日霁朱甍。
苔涧深不测，竹房闲且清。感真六象见，垂兆二鸟鸣。
古今信灵迹，中州莫与京。林巘永栖业，岂伊佐一生。
浮悟虽已久，事试去来成。观念幸相续，庶几最后明。

卷 51_20 【宿云门寺】

宋之问

云门若邪里，泛鹢路才通。夤缘绿筱岸，遂得青莲宫。
天香众壑满，夜梵前山空。漾漾潭际月，飏飏杉上风。
兹焉多嘉遁，数子今莫同。凤归慨处士，鹿化闻仙公。

樵路郑州北，举井阿岩东。永夜岂云寐，曙华忽葱茏。
谷鸟啭尚涩，源桃惊未红。再来期春暮，当造林端穷。
庶几踪谢客，开山投剡中。

卷 51_21 【春湖古意】

宋之问

院梅发向尺，园鸟复成曲。落日游南湖，果掷颜如玉。
含情不得语，转盼知所属。惆怅未可归，宁关须采掇。

卷 51_22 【游陆浑南山自歇马岭到枫香林以诗代书答李舍人
適】

宋之问

晨登歇马岭，遥望伏牛山。孤出群峰首，熊熊元气间。
太和亦崔嵬，石扇横闪倏。细岑互攒倚，浮巘竞奔蹙。
白云遥入怀，青霭近可掬。徒寻灵异迹，周顾惬心目。
晨拂鸟路行，暮投人烟宿。粳稻远弥秀，栗芋秋新熟。
石髓非一岩，药苗乃万族。间关踏云雨，缭绕缘水木。
西见商山芝，南到楚乡竹。楚竹幽且深，半杂枫香林。
浩歌清潭曲，寄尔桃源心。

卷 51_23 【早发大庾岭】

宋之问

晨跻大庾险，驿鞍驰复息。雾露昼未开，浩途不可测。
嶮起华夷界，信为造化力。歇鞍问徒旅，乡关在西北。
出门怨别家，登岭恨辞国。自惟勩忠孝，斯罪懵所得。
皇明颇照洗，廷议日纷惑。兄弟远沦居，妻子成异域。
羽翮伤已毁，童幼怜未识。踌蹰恋北顾，亭午晞霁色。
春暖阴梅花，瘴回阳鸟翼。含沙缘涧聚，吻草依林植。
适蛮悲疾首，怀巩泪沾臆。感谢鹈鹭朝，勤修魑魅职。
生还倘非远，誓拟酬恩德。

卷 51_24 【自洪府舟行直书其事】

宋之问

仲春辞国门，畏途横万里。越淮乘楚嶂，造江泛吴汜。
严程无休隙，日夜涉风水。昔闻垂堂言，将诫千金子。
问余何奇剥，迁窜极炎鄙。揆己道德馀，幼闻虚白旨。
贵身贱外物，抗迹远尘轨。朝游伊水湄，夕卧箕山趾。
妙年拙自晦，皎洁弄文史。谬辱紫泥书，挥翰青云里。
事往每增伤，宠来常誓止。铭骨怀报称，逆鳞让金紫。
安位衅潜构，退耕祸犹起。栖岩实吾策，触藩诚内耻。
济济同时人，台庭鸣剑履。愚以卑自卫，兀坐去沉滓。

迨兹理已极，窃位申知己。群议负宿心，获戾光华始。
黄金忽销铄，素业坐沦毁。浩叹诬平生，何独恋粉梓。
浦树浮郁郁，皋兰覆靡靡。百越去魂断，九疑望心死。
未尽匡阜游，远欣罗浮美。周旋本师训，佩服无生理。
异国多灵仙，幽探忘年纪。敝庐嵩山下，空谷茂兰芷。
悠悠南溟远，采掇长已矣。

卷 51_25 【下桂江县黎壁】

宋之问

放溜觊前渚，连山分上干。江回云壁转，天小雾峰攒。
吼沫跳急浪，合流环峻滩。欹离出漩划，缭绕避涡盘。
舟子怯桂水，最言斯路难。吾生抱忠信，吟啸自安闲。
旦别已千岁，夜愁劳万端。企予见夜月，委曲破林峦。
潭旷竹烟尽，洲香橘露团。岂傲夙所好，对之与俱欢。
思君罢琴酌，泣此夜漫漫。

卷 51_26 【奉使嵩山途经缙岭】

宋之问

侵星发洛城，城中歌吹声。毕景至缙岭，岭上烟霞生。
草树饶野意，山川多古情。大隐德所薄，归来可退耕。

卷 51_27 【伤王七秘书监寄呈扬州陆长史通简府僚广陵以广好事】

宋之问

王氏贵先宗，衡门栖道风。传心晤有物，秉化游无穷。
学奥九流异，机玄三语同。书乃墨场绝，文称词伯雄。
白屋藩魏主，苍生期谢公。一祗贤良诏。遂谒承明宫。
补袞望奚塞，尊儒位未充。罢官七门里，归老一丘中。
尝忝长者辙，微言私谓通。我行会稽郡，路出广陵东。
物在人已矣，都疑淮海空。

卷 51_28 【使至嵩山寻杜四不遇，慨然复伤田洗马韩观主，因以题壁赠杜侯杜四】

宋之问

洛桥瞻太室，期子在云烟。归来不相见，孤赏弄寒泉。
与君阔松石，于兹二十年。田公谢昭世，韩子秘幽埏。
忆昔同携手，山栖接二贤。笙歌入玄地，诗酒坐寥天。
旧友悉零落，罢琴私自怜。逝者非药误，餐霞意可全。
为余理还策，相与事灵仙。

卷 51_29 【玩郡斋海榴】

宋之问

泽国韶气早，开帘延霁天。野禽宵未啖，山蜚昼仍眠。
目兹海榴发，列映岩楹前。熠燿御风静，葳蕤含景鲜。
清晨绿堪佩，亭午丹欲然。昔忝金闺籍，尝见玉池莲。
未若宗族地，更逢荣耀全。南金虽自贵，贺赏讵能迁。
抚躬万里绝，岂染一朝妍。徒缘滞遐郡，常是惜流年。
越俗鄙章甫，扪心空自怜。

卷 51_30 【长安路（一作沈佺期诗）】

宋之问

秦地平如掌，层城出云汉。楼阁九衢春，车马千门旦。
绿柳开复合，红尘聚还散。日晚斗鸡场，经过狭斜看。

卷 51_31 【折杨柳（一作沈佺期诗）】

宋之问

玉树朝日映，罗帐春风吹。拭泪攀杨柳，长条宛地垂。
白花飞历乱，黄鸟思参差。妾自肝肠断，傍人那得知。

卷 51_32【有所思（一作沈佺期诗）】

宋之问

君子事行役，再空芳岁期。美人旷遥伫，万里浮云思。
园桃绽红艳，效叶柔绿滋。坐看长夏晚，秋月生罗帷。

卷 51_33【军中人日登高赠房明府】

宋之问

幽郊昨夜阴风断，顿觉朝来阳吹暖。泾水桥南柳欲黄，
杜陵城北花应满。长安昨夜寄春衣，短翮登兹一望归。
闻道凯旋乘骑入，看君走马见芳菲。

卷 51_34【寒食还陆浑别业】

宋之问

洛阳城里花如雪，陆浑山中今始发。旦别河桥杨柳风，
夕卧伊川桃李月。伊川桃李正芳新，寒食山中酒复春。
野老不知尧舜力，酣歌一曲太平人。

卷 51_35【寒食江州满塘驿】

宋之问

去年上巳洛桥边，今年寒食庐山曲。遥怜巩树花应满，
复见吴洲草新绿。吴洲春草兰杜芳，感物思归怀故乡。
驿骑明朝宿何处，猿声今夜断君肠。

卷 51_36【至端州驿，见杜五审言沈三佺期阎五朝隐王二无
竞题壁，慨然成咏】

宋之问

逐臣北地承严谴，谓到南中每相见。岂意南中岐路多，
千山万水分乡县。云摇雨散各翻飞，海阔天长音信稀。
处处山川同瘴疠，自怜能得几人归。

卷 51_37【绿竹引】

宋之问

青溪绿潭潭水侧，修竹婵娟同一色。徒生仙实凤不游，
老死空山人讵识。妙年秉愿逃俗纷，归卧嵩丘弄白云。
含情傲睨慰心目，何可一日无此君。

卷 51_38【明河篇】

宋之问

八月凉风天气晶，万里无云河汉明。昏见南楼清且浅，
晓落西山纵复横。洛阳城阙天中起，长河夜夜千门里。
复道连甍共蔽亏，画堂琼户特相宜。云母帐前初泛滥，
水精帘外转逶迤。倬彼昭回如练白，复出东城接南陌。
南陌征人去不归，谁家今夜捣寒衣。鸳鸯机上疏萤度，
乌鹊桥边一雁飞。雁飞萤度愁难歇，坐见明河渐微没。
已能舒卷任浮云，不惜光辉让流月。明河可望不可亲，
愿得乘槎一问津。更将织女支机石，还访成都卖卜人。

卷 51_39【龙门应制】

宋之问

宿雨霏氛埃，流云度城阙。河堤柳新翠，苑树花先发。
洛阳花柳此时浓，山水楼台映几重。群公拂雾朝翔凤，
天子乘春幸凿龙。凿龙近出王城外，羽从琳琅拥轩盖。
云罕才临御水桥，天衣已入香山会。山壁崭岩断复连，
清流澄澈俯伊川。雁塔遥遥绿波上，星龕奕奕翠微边。
层峦旧长千寻木，远壑初飞百丈泉，彩仗蜺旌绕香阁。
下辇登高望河洛。东城宫阙拟昭回，南阳沟塍殊绮错。
林下天香七宝台，山中春酒万年杯，微风一起祥花落，

仙乐初鸣瑞鸟来。鸟来花落纷无已，称觴献寿烟霞里。
歌舞淹留景欲斜，石关犹驻五云车。鸟旗翼翼留芳草，
龙骑駉駉映晚花。千乘万骑銮舆出，水静山空严警蹕。
郊外喧喧引看人，倾都南望属车尘。鼙声引颺闻黄道，
佳气周回入紫宸。先王定鼎山河固，宝命乘周万物新。
吾皇不事瑶池乐，时雨来观农扈春。

卷 51_40 【初宿淮口】

宋之问

孤舟汴河水，去国情无已。晚泊投楚乡，明月清淮里。
汴河东泻路穷兹，洛阳西顾日增悲。夜闻楚歌思欲断，
况值淮南木落时。

卷 51_41 【王子乔】

宋之问

王子乔，爱神仙，七月七日上宾天。白虎摇瑟凤吹笙，
乘骑云气吸日精。吸日精，长不归，遗庙今在而人非。
空望山头草，草露湿人衣。

卷 51_42【放白鹇篇】

宋之问

故人赠我绿绮琴，兼致白鹇鸟。琴是峯山桐，鸟出吴溪中。
我心松石清霞里，弄此幽弦不能已。我心河海白云垂，
怜此珍禽空自知。著书晚下麒麟阁，幼稚骄痴候门乐。
乃言物性不可违，白鹇愁慕刷毛衣。玉徽闭匣留为念，
六翮开笼任尔飞。

卷 51_43【桂州三月三日（一作桂阳三日述怀）】

宋之问

代业京华里，远投魑魅乡。登高望不极，云海四茫茫。
伊昔承休盼，曾为人所羨。两朝赐颜色，二纪陪欢宴。
昆明御宿侍龙媒，伊阙天泉复几回。西夏黄河水心剑，
东周清洛羽觞杯。苑中落花扫还合，河畔垂杨拨不开。
千春万寿多行乐，柏梁和歌攀睿作。赐金分帛奉恩辉，
风举云摇入紫微。晨趋北阙鸣珂至，夜出南宫把烛归。
载笔儒林多岁月，褰被文昌佐吴越。越中山海高且深，
兴来无处不登临。永和九年刺海郡，暮春三月醉山阴。
愚谓嬉游长似昔，不言流寓欵成今。始安繁华旧风俗，
帐饮倾城沸江曲。主人丝管清且悲，客子肝肠断还续。

荔浦蘅皋万里馀，洛阳音信绝能疏。故园今日应愁思，
曲水何能更祓除。逐伴谁怜合浦叶，思归岂食桂江鱼。
不求汉使金囊赠，愿得佳人锦字书。

卷 51_44 【下山歌】

宋之问

下嵩山兮多所思，携佳人兮步迟迟。
松间明月长如此，君再游兮复何时。

卷 51_45 【冬宵引赠司马承祯】

宋之问

河有冰兮山有雪，北户墜兮行人绝。独坐山中兮对松月，
怀美人兮屡盈缺。明月的的寒潭中，青松幽幽吟劲风。
此情不向俗人说，爱而不见恨无穷。

卷 51_46 【高山引】

宋之问

攀云窈窕兮上跻悬峰，长路浩浩兮此去何从。

水一曲兮肠一曲，山一重兮悲一重。松楸邈已远，
友于何日逢。况满室兮童稚，攒众虑于心胸。
天高难诉兮远负明德，却望咸京兮挥涕龙钟。

卷 51_47【嵩山天门歌】

宋之问

登天门兮坐盘石之嶙峋，前澼澼兮未半，下漠漠兮无垠。
纷窈窕兮岩倚披以鹏翅，洞胶葛兮峰棱层以龙鳞。
松移岫转，左变而右易。风生云起，出鬼而入神。
吾亦不知其灵怪如此，愿游杳冥兮见羽人。
重曰，天门兮穹崇，回合兮攒丛，松万接兮柱日，
石千寻兮倚空。晚阴兮足风，夕阳兮赭红。
试一望兮夺魄，况众妙之无穷。

卷 51_48【有所思（一作刘希夷诗，题云代悲白头翁）】

宋之问

洛阳城东桃李花，飞来飞去落谁家。幽闺女儿惜颜色，
坐见落花长叹息。今年花落颜色改，明年花开复谁在。
已见松柏摧为薪，更闻桑田变成海。古人无复洛城东，
今人还对落花风。年年岁岁花相似，岁岁年年人不同。
寄言全盛红颜子，须怜半死白头翁。此翁白头真可怜，

伊昔红颜美少年。公子王孙芳树下，清歌妙舞落花前。
光禄池台交锦绣，将军楼阁画神仙。一朝卧病无相识，
三春行乐在谁边。婉转蛾眉能几时，须臾鹤发乱如丝。
但看古来歌舞地，唯有黄昏鸟雀飞。

第五十二卷

卷 52_1【奉和立春日侍宴内出剪彩花应制】

宋之问

金阁妆新杏，琼筵弄绮梅。人间都未识，天上忽先开。
蝶绕香丝住，蜂怜艳粉回。今年春色早，应为剪刀催。

卷 52_2【春日芙蓉园侍宴应制】

宋之问

芙蓉秦地沼，卢橘汉家园。谷转斜盘径，川回曲抱原。
风来花自舞，春入鸟能言。侍宴瑶池夕，归途笳吹繁。

卷 52_3【夏日仙萼亭应制】

宋之问

高岭逼星河，乘舆此日过。野含时雨润，山杂夏云多。

睿藻光岩穴，宸襟洽薜萝。悠然小天下，归路满笙歌。

卷 52_4【奉和九月九日登慈恩寺浮屠应制】

宋之问

凤刹侵云半，虹旌倚日边。散花多宝塔，张乐布金田。
时菊芳仙酝，秋兰动睿篇。香街稍欲晚，清跸扈归天。

卷 52_5【奉和九日幸临渭亭登高应制得欢字】

宋之问

令节三秋晚，重阳九日欢。仙杯还泛菊，宝馔且调兰。
御气云霄近，乘高宇宙宽。今朝万寿引，宜向曲中弹。

卷 52_6【奉和圣制闰九月九日登庄严总持二寺阁】

宋之问

闰月再重阳，仙輿历宝坊。帝歌云稍白，御酒菊犹黄。
风铎喧行漏，天花拂舞行。豫游多景福，梵宇日生光。

卷 52_7 【麟趾殿侍宴应制】

宋之问

北阙层城峻，西宫复道悬。乘舆历万户，置酒望三川。
花柳含丹日，山河入绮筵。欲知陪赏处，空外有飞烟。

卷 52_8 【上阳宫侍宴应制得林字】

宋之问

广乐张前殿，重裘感圣心。砌萸霜月尽，庭树雪云深。
旧渥骖宸御，慈恩忝翰林。微臣一何幸，再得听瑶琴。

卷 52_9 【幸少林寺应制】

宋之问

绀宇横天室，回銮指帝休。曙阴迎日尽，春气抱岩流。
空乐繁行漏，香烟薄彩旒。玉膏从此泛，仙驭接浮丘。

卷 52_10 【幸岳寺应制】

宋之问

暂幸珠筵地，俱怜石濑清。泛流张翠幕，拂迥挂红旗。
雅曲龙调管，芳樽蚁泛觥。陪欢玉座晚，复得听金声。

卷 52_11 【扈从登封途中作】

宋之问

帐殿郁崔嵬，仙游实壮哉。晓云连幕卷，夜火杂星回。
谷暗千旗出，山鸣万乘来。扈从良可赋，终乏掞天才。

卷 52_12 【扈从登封告成颂】

宋之问

复道开行殿，钩陈列禁兵。和风吹鼓角，佳气动旗旌。
后骑回天苑，前山入御营。万方俱下拜，相与乐升平。

卷 52_13【松山岭应制】

宋之问

翼翼高旌转，锵锵凤辇飞。尘销清跸路，云湿从臣衣。
白羽摇丹壑，天营逼翠微。芳声耀今古，四海警宸威。

卷 52_14【缙山庙】

宋之问

王子宾仙去，飘飘笙鹤飞。徒闻沧海变，不见白云归。
天路何其远，人间此会稀。空歌日云暮，霜月渐微微。

卷 52_15【奉和梁王宴龙泓应教得微字】

宋之问

水府沦幽壑，星轺下紫微。鸟惊司仆驭，花落侍臣衣。
芳树摇春晚，晴云绕座飞。淮王正留客，不醉莫言归。

卷 52_16【寿阳王花烛图（一作沈佺期诗）】

宋之问

仙媛乘龙日，天孙捧雁来。可怜桃李树，更绕凤凰台。
烛照香车入，花临宝扇开。莫令银箭晓，为尽合欢杯。

卷 52_17【江南曲】

宋之问

妾住越城南，离居不自堪。采花惊曙鸟，摘叶喂春蚕。
懒结茱萸带，愁安玳瑁簪。待君消瘦尽，日暮碧江潭。

卷 52_18【牛女（一作沈佺期诗）】

宋之问

粉席秋期缓，针楼别怨多。奔龙争渡月，飞鹊乱填河。
失喜先临镜，含羞未解罗。谁能留夜色，来夕倍还梭。

卷 52_19【冬夜寓直麟阁（一作王维诗）】

宋之问

直事披三省，重关闭七门。广庭怜雪净，深屋喜炉温。
月幌花虚馥，风窗竹暗喧。东山白云意，兹夕寄琴尊。

卷 52_20【登禅定寺阁（一作登总持寺阁）】

宋之问

梵宇出三天，登临望八川。开襟坐霄汉，挥手拂云烟。
函谷青山外，昆池落日边。东京杨柳陌，少别已经年。

卷 52_21【陆浑山庄】

宋之问

归来物外情，负杖阅岩耕。源水看花入，幽林采药行。
野人相问姓，山鸟自呼名。去去独吾乐，无然愧此生。

卷 52_22 【蓝田山庄】

宋之问

宦游非吏隐，心事好幽偏。考室先依地，为农且用天。
辋川朝伐木，蓝水暮浇田。独与秦山老，相欢春酒前。

卷 52_23 【春日山家（一作春泉洗药）】

宋之问

今日游何处，春泉洗药归。悠然紫芝曲，昼掩白云扉。
鱼乐偏寻藻，人闲屡采薇。丘中无俗事，身世两相违。

卷 52_24 【春日宴宋主簿山亭得寒字】

宋之问

公子正邀欢，林亭春未兰。攀岩践苔易，迷路出花难。
窗覆垂杨暖，阶侵瀑水寒。帝城归路直，留兴接鹓鸾。

卷 52_25 【江亭晚望】

宋之问

浩渺浸云根，烟岚出远村。鸟归沙有迹，帆过浪无痕。
望水知柔性，看山欲断魂。纵情犹未已，回马欲黄昏。

卷 52_26 【秋晚游普耀寺】

宋之问

薄暮曲江头，仁祠暂可留。山形无隐霁，野色遍呈秋。
荷覆香泉密，藤缘宝树幽。平生厌尘事，过此忽悠悠。

卷 52_27 【答李司户夔】

宋之问

远方来下客，輶轩摄使臣。弄琴宜在夜，倾酒贵逢春。
驷马留孤馆，双鱼赠故人。明朝散云雨，遥仰德为邻。

卷 52_28【寄天台司马道士】

宋之问

卧来生白发，览镜忽成丝。远愧餐霞子，童颜且自持。
旧游惜疏旷，微尚日磷缁。不寄西山药，何由东海期。

卷 52_29【使往天平军马约与陈子昂新乡为期，及还而不相遇】

宋之问

入卫期之子，吁嗟不少留。情人去何处，淇水日悠悠。
恒碣青云断，衡漳白露秋。知君心许国，不是爱封侯。

卷 52_30【过函谷关】

宋之问

二百四十载，海内何纷纷。六国兵同合，七雄势未分。
从成拒秦帝，策决问苏君。鸡鸣将狗盗，论德不论勋。

卷 52_31【送朔方何侍郎】

宋之问

闻道云中使，乘骢往复还。河兵守阳月，塞虏失阴山。
拜职尝随骠，铭功不让班。旋闻受降日，歌舞入萧关。

卷 52_32【送田道士使蜀投龙】

宋之问

风驭忽泠然，云台路几千。蜀门峰势断，巴字水形连。
人隔壶中地，龙游洞里天。赠言回驭日，图画彼山川。

卷 52_33【送许州宋司马赴任】

宋之问

颍郡水东流，荀陈兄弟游。偏伤兹日远，独向聚星州。
河润在明德，人康非外求。当闻力为政，遥慰我心愁。

卷 52_34 【送赵司马赴蜀州】

宋之问

钱子西南望，烟绵剑道微。桥寒金雁落，林曙碧鸡飞。
职拜輿方远，仙成履会归。定知和氏璧，遥掩玉轮辉。

卷 52_35 【送永昌萧赞府】

宋之问

柳变曲江头，送君函谷游。弄琴宽别意，酌醴醉春愁。
恋本亦何极，赠言微所求。莫令金谷水，不入故园流。

卷 52_36 【送李侍御】

宋之问

行李恋庭闱，乘轺振彩衣。南登指吴服，北走出秦畿。
去国夏云断，还乡秋雁飞。旋闻郡计入，更有使臣归。

卷 52_37 【饯湖州薛司马】

宋之问

别驾促严程，离筵多故情。交深季作友，义重伯为兄。
镇静移吴俗，风流在汉京。会看陈仲举，从此拜公卿。

卷 52_38 【送杜审言】

宋之问

卧病人事绝，嗟君万里行。河桥不相送，江树远含情。
别路追孙楚，维舟吊屈平。可惜龙泉剑，流落在丰城。

卷 52_39 【送武进郑明府】

宋之问

弦歌试宰日，城阙赏心违。北谢苍龙去，南随黄鹄飞。
夏云海中出，吴山江上微。甞遥岂云远，从此庆缙衣。

卷 52_40 【送姚侍御出使江东】

宋之问

帝忧河朔郡，南发海陵仓。坐叹青春别，逶迤碧水长。
饮冰朝受命，衣锦昼还乡。为问东山桂，无人何自芳。

卷 52_41 【留别之望舍弟】

宋之问

同气有三人，分飞在此晨。西驰巴岭徼，东去洛阳滨。
强饮离前酒，终伤别后神。谁怜散花萼，独赴日南春。

卷 52_42 【汉江宴别】

宋之问

汉广不分天，舟移杳若仙。秋虹映晚日，江鹤弄晴烟。
积水浮冠盖，遥风逐管弦。嬉游不可极，留恨此山川。

卷 52_43 【初发荆府赠长史】

宋之问

□□□□□，□□□□□。仍随五马谪，载与两禽奔。
明主无由见，群公莫与言。幸君逢圣日，何惜理虞翻。

卷 52_44 【晚泊湘江】

宋之问

五岭恓惶客，三湘憔悴颜。况复秋雨霁，表里见衡山。
路逐鹏南转，心依雁北还。唯馀望乡泪，更染竹成斑。

卷 52_45 【过蛮洞】

宋之问

越岭千重合，蛮溪十里斜。竹迷樵子径，萍匝钓人家。
林暗交枫叶，园香覆橘花。谁怜在荒外，孤赏足云霞。

卷 52_46 【经梧州】

宋之问

南国无霜霰，连年见物华。青林暗换叶，红蕊续开花。
春去闻山鸟，秋来见海槎。流芳虽可悦，会自泣长沙。

卷 52_47 【渡吴江别王长史】

宋之问

倚棹望兹川，销魂独黯然。乡连江北树，云断日南天。
剑别龙初没，书成雁不传。离舟意无限，催渡复催年。

卷 52_48 【泛镜湖南溪】

宋之问

乘兴入幽栖，舟行日向低。岩花候冬发，谷鸟作春啼。
沓嶂开天小，丛篁夹路迷。犹闻可怜处，更在若邪溪。

卷 52_49【途中寒食题黄梅临江驿寄崔融】

宋之问

马上逢寒食，愁中属暮春。可怜江浦望，不见洛阳人。
北极怀明主，南溟作逐臣。故园肠断处，日夜柳条新。

卷 52_50【游韶州广界寺】

宋之问

影殿临丹壑，香台隐翠霞。巢飞衔象鸟，砌蹋雨空花。
宝铎摇初霁，金池映晚沙。莫愁归路远，门外有三车。

卷 52_51【宿清远峡山寺】

宋之问

香岫悬金刹，飞泉届石门。空山唯习静，中夜寂无喧。
说法初闻鸟，看心欲定猿。寥寥隔尘市，何异武陵源。

卷 52_52 【题大庾岭北驿】

宋之问

阳月南飞雁，传闻至此回。我行殊未已，何日复归来。
江静潮初落，林昏瘴不开。明朝望乡处，应见陇头梅。

卷 52_53 【度大庾岭】

宋之问

度岭方辞国，停轺一望家。魂随南翥鸟，泪尽北枝花。
山雨初含霁，江云欲变霞。但令归有日，不敢恨长沙。

卷 52_54 【端州别袁侍郎】

宋之问

合浦途未极，端溪行暂临。泪来空泣脸，愁至不知心。
客醉山月静，猿啼江树深。明朝共分手，之子爱千金。

卷 52_55【过史正议宅】

宋之问

旧交此零落，雨泣访遗尘。剑几传好事，池台伤故人。
国香兰已歇，里树橘犹新。不见吴中隐，空馀江海滨。

卷 52_56【梁宣王挽词三首】

宋之问

贵藩尧母族，外戚汉家亲。业重兴王际，功高复辟辰。
爱贤唯报国，乐善不防身。今日衣冠送，空伤置醴人。

金精何日闭，玉匣此时开。东望连吾子，南瞻近帝台。
地形龟食报，坟土燕衔来。可叹虞歌夕，纷纷骑吹回。

像设千年在，平生万事违。彩旌翻葆吹，圭鬯奠灵衣。
垄日寒无影，郊云冻不飞。君王留此地，驷马欲何归。

卷 52_57【鲁忠王挽词三首】

宋之问

同盟会五月，归葬出三条。日惨咸阳树，天寒渭水桥。

稍看朱鹭转，尚识紫骝骄。寂寂泉台恨，从兹罢玉箫。

邦家锡宠光，存没贵忠良。遂裂山河地，追尊父子王。
人悲槐里月，马踏槿原霜。别向天京北，悠悠此路长。

树羽迎朝日，撞钟望早霞。故人悲宿草，中使惨晨笳。
气有冲天剑，星无犯斗槎。唯馀孔公宅，长接鲁王家。

卷 52_58 【范阳王挽词二首】

宋之问

贤相称邦杰，清流举代推。公才掩诸夏，文体变当时。
宾吊翻成鹤，人亡惜喻龟。洛阳今纸贵，犹写太冲词。

赠秩徽章洽，求书秘草成。客随朝露尽，人逐夜舟惊。
蒿里衣冠送，松门印绶迎。谁知杨伯起，今日重哀荣。

卷 52_59 【故赵王属赠黄门侍郎上官公挽词二首】

宋之问

韦门旌旧德，班氏业前书。谪去因丞相，归来为婕妤。
周原乌相冢，越岭雁随车。冥漠辞昭代，空怜赋子虚。

绿车随帝子，青琐翊宸机。昔枉朝歌骑，今虚夕拜闱。
柳河凄挽曲，薤露湿灵衣。一厝穷泉闭，双鸾遂不飞。

卷 52_60 【药】

宋之问

有卉秘神仙，君臣有礼焉。忻当苦口喻，不畏入肠偏。
扁鹊功成日，神农定品年。丹成如可待，鸡犬自闻天。

卷 52_61 【奉和九日登慈恩寺浮图应制】

宋之问

瑞塔千寻起，仙輿九日来。萸房陈宝席，菊蕊散花台。
御气鹏霄近，升高凤野开。天歌将梵乐，空里共裴回。

卷 52_62 【送沙门泓景道俊玄奘还荆州应制】

宋之问

三乘归净域，万骑饯通庄。就日离亭近，弥天别路长。
荆南旋杖钵，渭北限津梁。何日纡真果，还来入帝乡。

卷 52_63【春日芙蓉园侍宴应制】

宋之问

年光竹里遍，春色杏间遥。烟气笼青阁，流文荡画桥。
飞花随蝶舞，艳曲伴莺娇。今日陪欢豫，还疑陟紫霄。

卷 52_64【咏笛】

宋之问

羌笛写龙声，长吟入夜清。关山孤月下，来向陇头鸣。
逐吹梅花落，含春柳色惊。行观向子赋，坐忆旧邻情。

卷 52_65【咏钟】

宋之问

既接南邻磬，还随北里笙。平陵通曙响，长乐警宵声。
秋至含霜动，春归应律鸣。岂惟恒待扣，金簴有馀清。

卷 52_66【花落（一作沈佺期诗。题云梅花落）】

宋之问

铁骑几时回，金闺怨早梅。雪寒花已落，风暖叶还开。
夕逐新春管，香迎小岁杯。盛时何足贵，书里报轮台。

卷 52_67【旅宿淮阳亭口号】

宋之问

日暮风亭上，悠悠旅思多。故乡临桂水，今夜渺星河。
暗草霜华发，空亭雁影过。兴来谁与语，劳者自为歌。

卷 52_68【内题赋得巫山雨（一作沈佺期诗。题云巫山高）】

宋之问

神女向高唐，巫山下夕阳。裴回作行雨，婉恋逐荆王。
电影江前落，雷声峡外长。霁云无处所，台馆晓苍苍。

卷 52_69【王昭君（一作沈佺期诗）】

宋之问

非君惜鸾殿，非妾妒娥眉。薄命由骄虏，无情是画师。
嫁来胡地日，不并汉宫时。辛苦无聊赖，何堪上马辞。

卷 52_70【铜雀台（一作沈佺期诗）】

宋之问

昔年分鼎地，今日望陵台。一旦雄图尽，千秋遗令开。
绮罗君不见，歌舞妾空来。恩共漳河水，东流无重回。

卷 52_71【巫山高（一作沈佺期诗）】

宋之问

巫山峰十二，环合象昭回。俯听琵琶峡，平看云雨台。
古槎天外落，瀑水日边来。何忍猿啼夜，荆王枕席开。

卷 52_72 【望月有怀（一作康庭芝诗，一作沈佺期诗）】

宋之问

天使下西楼，含光万里秋。台前似挂镜，帘外如悬钩。
张尹将眉学，班姬取扇俦。佳期应借问，为报大刀头。

卷 52_73 【驾出长安（一作王昌龄诗）】

宋之问

圣德超千古，皇风扇九围。天回万象出，驾动六龙飞。
淑气来黄道，祥云覆紫微。太平多扈从，文物有光辉。

卷 52_74 【饯中书侍郎来济（一作太宗诗）】

宋之问

暧暧去尘昏灞岸，飞飞轻盖指河梁。云峰衣结千重叶，
雪岫花开几树妆。深悲黄鹤孤舟远，独对青山别路长。
却将分手沾襟泪，还用持添离席觞。

卷 52_75【奉和春初幸太平公主南庄应制】

宋之问

青门路接凤凰台，素浣宸游龙骑来。
涧草自迎香辇合，岩花应待御筵开。
文移北斗成天象，酒递南山作寿杯。
此日侍臣将石去，共欢明主赐金回。

卷 52_76【三阳宫侍宴应制得幽字】

宋之问

离宫秘苑胜瀛洲，别有仙人洞壑幽。
岩边树色含风冷，石上泉声带雨秋。
鸟向歌筵来度曲，云依帐殿结为楼。
微臣昔忝方明御，今日还陪八骏游。

第五十三卷

卷 53_1【奉和晦日幸昆明池应制】

宋之问

春豫灵池会，沧波帐殿开。舟凌石鲸度，棹拂斗牛回。
节晦萸全落，春迟柳暗催。象溟看浴景，烧劫辨沉灰。
镐饮周文乐，汾歌汉武才。不愁明月尽，自有夜珠来。

卷 53_2【奉和幸大荐福寺】

宋之问

香刹中天起，宸游满路辉。乘龙太子去，驾象法王归。
殿饰金人影，窗摇玉女扉。稍迷新草木，遍识旧庭闱。
水入禅心定，云从宝思飞。欲知皇劫远，初拂六铢衣。

卷 53_3【奉和幸三会寺应制】

宋之问

六飞回玉辇，双树谒金仙。瑞鸟呈书字，神龙吐浴泉。
净心遥证果，睿想独超禅。塔涌香花地，山围日月天。
梵音迎漏彻，空乐倚云悬。今日登仁寿，长看法镜圆。

卷 53_4【奉和荐福寺应制】

宋之问

梵筵光圣邸，游豫览宏规。不改灵光殿，因开功德池。
莲生新步叶，桂长昔攀枝。涌塔庭中见，飞楼海上移。
闻韶三月幸，观象七星危。欲识龙归处，朝朝云气随。

卷 53_5【奉和幸神皋亭应制】

宋之问

清跸喧黄道，乘舆降紫宸。霜戈凝晓日，云管发阳春。
台古全疑汉，林馀半识秦。宴酣诗布泽，节改令行仁。
昔恃山河险，今依道德淳。多惭献嘉颂，空累属车尘。

卷 53_6 【奉和幸长安故城未央宫应制】

宋之问

汉王未息战，萧相乃营宫。壮丽一朝尽，威灵千载空。
皇明怅前迹，置酒宴群公。寒轻彩仗外，春发幔城中。
乐思回斜日，歌词继大风。今朝天子贵，不假叔孙通。

卷 53_7 【奉和幸韦嗣立山庄侍宴应制（一作李义诗）】

宋之问

枢掖调梅暇，林园艺槿初。入朝荣剑履，退食偶琴书。
地隐东岩室，天回北斗车。旌门临窈窕，辇道属扶疏。
云罕明丹壑，霜笳彻紫虚。水疑投石处，溪似钓璜馀。
帝泽颁卮酒，人欢颂里闾。一承黄竹咏，长奉白茅居。

卷 53_8 【扈从登封告成颂应制】

宋之问

御路回中岳，天营接下都。百灵无后至，万国竞前驱。
文卫严清跸，幽仙读宝符。贝花明汉果，芝草入尧厨。
济济衣冠会，喧喧夷夏俱。宗祧仰神理，刊木望川途。

抚己贫非病，时来本不愚。愿陪丹凤辇，率舞白云衢。

卷 53_9【宴安乐公主宅得空字】

宋之问

英藩筑外馆，爱主出王宫。宾至星槎落，仙来月宇空。
玳梁翻贺燕，金埒倚晴虹。箫奏秦台里，书开鲁壁中。
短歌能驻日，艳舞欲娇风。闻有淹留处，山阿满桂丛。

卷 53_10【春日郑协律山亭陪宴饯郑卿同用楼字】

宋之问

潘园枕郊郭，爱客坐相求。尊酒东城外，骅骝南陌头。
池平分洛水，林缺见嵩丘。暗竹侵山径，垂杨拂妓楼。
彩云歌处断，迟日舞前留。此地何年别，兰芳空自幽。

卷 53_11【和姚给事寓直之作】

宋之问

清论满朝阳，高才拜夕郎。还从避马路，来接珥貂行。
宠就黄扉日，威回白简霜。柏台迁鸟茂，兰署得人芳。

禁静钟初彻，更疏漏渐长。晓河低武库，流火度文昌。
寓直恩徽重，乘秋藻翰扬。暗投空欲报，下调不成章。

卷 53_12【和库部李员外秋夜寓直之作】

宋之问

相庭贻庆远，才子拜郎初。起草徯仙阁，焚香卧直庐。
更深河欲断，节劲柳偏疏。气耿凌云笔，心摇待漏车。
叨荣厕俦侣，省己恧空虚。徒斐阳春和，难参丽曲馀。

卷 53_13【酬李丹徒见赠之作】

宋之问

镇吴称奥里，试剧仰通才。近挹人披雾，遥闻境震雷。
一朝逢解榻，累日共衔杯。连辔登山尽，浮舟望海回。
以予惭拙宦，期子遇良媒。赠曲南凫断，征途北雁催。
更怜江上月，还入镜中开。

卷 53_14【使过襄阳登凤林寺阁】

宋之问

香阁临清汉，丹梯隐翠微。林篁天际密，人世谷中违。

苔石衔仙洞，莲舟泊钓矶。山云浮栋起，江雨入庭飞。
信美虽南国，严程限北归。幽寻不可再，留步惜芳菲。

卷 53_15【宋公宅送宁谏议】

宋之问

宋公爰创宅，庾氏更诛茅。间出人三秀，平临楚四郊。
汉臣来绛节，荆牧动金铙。尊溢宜城酒，笙裁曲沃匏。
露荷秋变节，风柳夕鸣梢。一散阳台雨，方随越鸟巢。

卷 53_16【送合宫苏明府颢】

宋之问

铉府诞英规，公才天下知。谓乘羔雁族，继入凤凰池。
赤县求人隐，青门起路岐。翟回车少别，凫化舄遥驰。
神哭周南境，童歌渭北垂。贤哉苟奉倩，袞职伫来仪。

卷 53_17【送杨六望赴金水】

宋之问

借问梁山道，嶽岑几万重。遥州刀作字，绝壁剑为峰。

惜别路穷此，留欢意不从。忧来生白发，时晚爱青松。
勿以西南远，夷歌寝盛容。台阶有高位，宁复久临邛。

卷 53_18【下桂江龙目滩】

宋之问

停午出滩险，轻舟容易前。峰攒入云树，崖喷落江泉。
巨石潜山怪，深篁隐洞仙。鸟游溪寂寂，猿啸岭娟娟。
挥袂日凡几，我行途已千。暝投苍梧郡，愁枕白云眠。

卷 53_19【入泷州江】

宋之问

孤舟泛盈盈，江流日纵横。夜杂蛟螭寝，晨披瘴疠行。
潭蒸水沫起，山热火云生。猿躩时能啸，鸢飞莫敢鸣。
海穷南徼尽，乡远北魂惊。泣向文身国，悲看凿齿氓。
地偏多育蛊，风恶好相鲸。余本岩栖客，悠哉慕玉京。
厚恩尝愿答，薄宦不祈成。违隐乖求志，披荒为近名。
镜愁玄发改，心负紫芝荣。运启中兴历，时逢外域清。
只应保忠信，延促付神明。

卷 53_20 【始安秋日】

宋之问

桂林风景异，秋似洛阳春。晚霁江天好，分明愁杀人。

卷云山𪩺𪩺，碎石水磷磷。世业事黄老，妙年孤隐沦。
归欤卧沧海，何物贵吾身。

卷 53_21 【桂州黄潭舜祠】

宋之问

虞世巡百越，相传葬九疑。精灵游此地，祠树日光辉。
裡祭忽群望，丹青图二妃。神来兽率舞，仙去凤还飞。
日暝山气落，江空潭靄微。帝乡三万里，乘彼白云归。

卷 53_22 【登粤王台】

宋之问

江上粤王台，登高望几回。南溟天外合，北户日边开。
地湿烟尝起，山晴雨半来。冬花采卢橘，夏果摘杨梅。

迹类虞翻枉，人非贾谊才。归心不可见，白发重相催。

卷 53_23【早发始兴江口至虚氏村作】

宋之问

候晓逾闽峤，乘春望越台。宿云鹏际落，残月蚌中开。
薜荔摇青气，桄榔翳碧苔。桂香多露裊，石响细泉回。
抱叶玄猿啸，衔花翡翠来。南中虽可悦，北思日悠哉。
鬢发俄成素，丹心已作灰。何当首归路，行剪故园莱。

卷 53_24【发藤州】

宋之问

朝夕苦遄征，孤魂长自惊。泛舟依雁渚，投馆听猿鸣。
石发缘溪蔓，林衣扫地轻。云峰刻不似，苔藓画难成。
露裊千花气，泉和万籁声。攀幽红处歇，跻险绿中行。
恋切芝兰砌，悲缠松柏茔。丹心江北死，白发岭南生。
魑魅天边国，穷愁海上城。劳歌意无限，今日为谁明。

卷 53_25【游称心寺】

宋之问

释事怀三隐，清襟谒四禅。江鸣潮未落，林晓日初悬。
宝叶交香雨，金沙吐细泉。望谐舟客趣，思发海人烟。
顾枥仍留马，乘杯久弃船。未忧龟负岳，且识鸟耘田。
理契都无象，心冥不寄筌。安期庶可揖，天地得齐年。

卷 53_26【游法华寺】

宋之问

高岫拟耆闾，真乘引妙车。空中结楼殿，意表出云霞。
后果缠三足，前因感六牙。宴林薰宝树，水溜滴金沙。
寒谷梅犹浅，温庭橘未华。台香红药乱，塔影绿篁遮。
果渐轮王族，缘超梵帝家。晨行踏忍草，夜诵得灵花。
江郡将何匹，天都亦未加。朝来沿泛所，应是逐仙槎。

卷 53_27【夜渡吴松江怀古】

宋之问

宿帆震泽口，晓渡松江滨。棹发鱼龙气，舟冲鸿雁群。

寒潮顿觉满，暗浦稍将分。气出海生日，光清湖起云。
水乡尽天卫，叹息为吴君。谋士伏剑死，至今悲所闻。

卷 53_28【谒禹庙】

宋之问

夏王乘四载，兹地发金符。峻命终不易，报功畴敢渝。
先驱总昌会，后至伏灵诛。玉帛空天下，衣冠照海隅。
旋闻厌黄屋，更道出苍梧。林表祠转茂，山阿井讷枯。
舟迁龙负壑，田变鸟芸芜。旧物森如在，天威肃未殊。
玄夷届瑶席，玉女侍清都。奕奕扃闱邃，轩轩仗卫趋。
气青连曙海，云白洗春湖。猿啸有时答，禽言常自呼。
灵歆异蒸糈，至乐匪笙竽。茅殿今文袭，梅梁古制无。
运遥日崇丽，业盛答昭苏。伊昔力云尽，而今功尚敷。
揆材非美箭，精享愧生刍。郡职昧为理，邦空宁自诬。
下车霰已积，摄事露行濡。人隐冀多祐，曷唯沾薄躯。

卷 53_29【游禹穴回出若邪】

宋之问

禹穴今朝到，邪溪此路通。著书闻太史，炼药有仙翁。
鹤往笼犹挂，龙飞剑已空。石帆摇海上，天镜落湖中。
水低寒云白，山边坠叶红。归舟何虑晚，日暮使樵风。

卷 53_30 【灵隐寺】

宋之问

鹫岭郁岩峩，龙宫锁寂寥。楼观沧海日，门对浙江潮。
桂子月中落，天香云外飘。扪萝登塔远，刳木取泉遥。
霜薄花更发，冰轻叶未凋。夙龄尚遐异，搜对涤烦嚣。
待入天台路，看余度石桥。

卷 53_31 【游云门寺】

宋之问

维舟探静域，作礼事尊经。投迹一萧散，为心自杳冥。
龕依大禹穴，楼倚少微星。沓嶂围兰若，回溪抱竹庭。
觉花涂砌白，甘露洗山青。雁塔鸞金地，虹桥转翠屏。
人天宵现景，神鬼昼潜形。理胜常虚寂，缘空自感灵。
入禅从鸽绕，说法有龙听。劫累终期灭，尘躬且未宁。
摇摇不安寐，待月咏岩扃。

卷 53_32 【早发韶州】

宋之问

炎徼行应尽，回瞻乡路遥。珠厓天外郡，铜柱海南标。

日夜清明少，春冬雾雨饶。身经大火热，颜入瘴江消。
触影含沙怒，逢人女草摇。露浓看菌湿，风颭觉船飘。
直御魑将魅，宁论鹄与鸱。虞翻思报国，许靖愿归朝。
绿树秦京道，青云洛水桥。故园长在目，魂去不须招。

卷 53_33【早入清远峡（一作下桂江龙目滩）】

宋之问

传闻峡山好，旭日棹前沂。雨色摇丹嶂，泉声聒翠微。
两岩天作带，万壑树披衣。秋菊迎霜序，春藤碍日辉。
翳潭花似织，缘岭竹成围。寂历环沙浦，葱茏转石圻。
露馀江未热，风落瘴初稀。猿饮排虚上，禽惊掠水飞。
榜童夷唱合，樵女越吟归。良候斯为美，边愁自有违。
谁言望乡国，流涕失芳菲。

卷 53_34【发端州初入西江】

宋之问

问我将何去，清晨溯越溪。翠微悬宿雨，丹壑饮晴霓。
树影捎云密，藤阴覆水低。潮回出浦驶，洲转望乡迷。
人意长怀北，江行日向西。破颜看鹊喜，拭泪听猿啼。
骨肉初分爱，亲朋忽解携。路遥魂欲断，身辱理能齐。
畴日三山意，于兹万绪睽。金陵有仙馆，即事寻丹梯。

卷 53_35 【渡汉江】

宋之问

岭外音书断，经冬复历春。近乡情更怯，不敢问来人。

卷 53_36 【嵩山夜还】

宋之问

家住嵩山下，好采旧山薇。自省游泉石，何曾不夜归。

卷 53_37 【湖中别鉴上人】

宋之问

愿与道林近，在意逍遥篇。自有灵佳寺，何用沃洲禅。

卷 53_38 【题鉴上人房二首】

宋之问

落花双树积，芳草一庭春。玩之堪兴异，何必见幽人。

晚入应真理，经行尚未回。房中无俗物，林下有青苔。

卷 53_39 【答田征君】

宋之问

山游杳何处，迟回伊洛间。归寝忽成梦，宛在嵩丘山。

卷 53_40 【伤曹娘二首】

宋之问

凤飞楼伎绝，鸾死镜台空。独怜脂粉气，犹著舞衣中。

河伯怜娇态，冯夷要姝妓。寄言游戏人，莫弄黄河水。

卷 53_41 【河阳（一作伤曹娘）】

宋之问

昔日河阳县，氛氲香气多。曹娘娇态尽，春树不堪过。

卷 53_42【燕巢军幕】

宋之问

非关怜翠幕，不是厌朱楼。故来呈燕颌，报道欲封侯。

卷 53_43【苑中遇雪应制】

宋之问

紫禁仙舆诩旦来，青旂遥倚望春台。
不知庭霰今朝落，疑是林花昨夜开。

卷 53_44【送司马道士游天台】

宋之问

羽客笙歌此地违，离筵数处白云飞。
蓬莱阙下长相忆，桐柏山头去不归。

卷 53_45 【登逍遥楼】

宋之问

逍遥楼上望乡关，绿水泓澄云雾间。
北去衡阳二千里，无因雁足系书还。

卷 53_46 【奉和春日玩雪应制】

宋之问

北阙彤云掩曙霞，东风吹雪舞山家。
琼章定少千人和，银树长芳六出花。

卷 53_47 【伤曹娘二首】

宋之问

可怜冥漠去何之，独立丰茸无见期。
君看水上芙蓉色，恰似生前歌舞时。

前溪妙舞今应尽，子夜新歌遂不传。
无复绮罗娇白日，直将珠玉闭黄泉。

卷 53_48【郡宅中斋】

宋之问

郡宅枕层岭，春湖绕芳甸。云薨出万家，卧览皆已遍。
渔商汗成雨，廨邑明若练。越俗镜中行，夏祠云表见。
兹都信盘郁，英远常栖眄。王子事黄老，独乐恣游衍。
谢公念苍生，同忧感推荐。灵越多秀士，运阔无由面。
神理翳青山，风流满黄卷。揆予谬承奖，自昔从纓弁。
瑶水执仙羁，金闺负时选。晨趋博望苑，夜直明光殿。
一朝罢台阁，万里违乡县。风土足慰心，况悦年芳变。
淮廩伫滋实，沂歌非所羨。讼寝归四明，龄颓亲九转。
微尚本江海，少留岂交战。唯馀后凋色，窃比东南箭。

卷 53_49【称心寺】

宋之问

步陟招提宫，北极山海观。千岩递萦绕，万壑殊悠漫。
乔木转夕阳，文轩划清涣。泄云多表里，惊潮每昏旦。
问予金门客，何事沧洲畔。谬以三署资，来刺百城半。
人隐尚未弭，岁华岂兼玩。东山桂枝芳，明发坐盈叹。

卷 53_50 【新年作】

宋之问

乡心新岁切，天畔独潸然。老至居人下，春归在客先。
岭猿同旦暮，江柳共风烟。已似长沙傅，从今又几年。

卷 53_51 【剪彩】

宋之问

驻想持金错，居然作管灰。绮罗纤手制，桃李向春开。
拾藻蜂初泊，衔花鸟未回。不言将巧笑，翻逐美人来。

卷 53_52 【七夕】

宋之问

传道仙星媛，年年会水隅。停梭借蟋蟀，留巧付蜘蛛。
去昼从云请，归轮伫日输。莫言相见阔，天上日应殊。

卷 53_53 【桂州陪王都督晦日宴逍遥楼】

宋之问

晦节高楼望，山川一半春。意随萸叶尽，愁共柳条新。
投刺登龙日，开怀纳鸟晨。兀然心似醉，不觉有吾身。

卷 53_54 【和赵员外桂阳桥遇佳人】

宋之问

江雨朝飞浥细尘，阳桥花柳不胜春。金鞍白马来从赵，
玉面红妆本姓秦。妒女犹怜镜中发，侍儿堪感路傍人。
荡舟为乐非吾事，自叹空闺梦寐频。

卷 53_55 【函谷关】

宋之问

至人□□识仙风，瑞霭丹光远郁葱。灵迹才辞周柱下，
祥氛已入函关中。不从紫气台端候，何得青华观里逢。
欲访乘牛求宝箓，愿随鹤驾遍瑶空。

卷 53_56【咏省壁画鹤】

宋之问

粉壁图仙鹤，昂藏真气多。鸢飞竟不去，当是恋恩波。

卷 53_57【广州朱长史座观妓】

宋之问

歌舞须连夜，神仙莫放归。参差随暮雨，前路湿人衣。

卷 53_58【谒二妃庙】

宋之问

还以金屋贵，留兹宝席尊。江鳧啸风雨，山鬼泣朝昏。

卷 53_59【赠严侍御】

宋之问

受脤清边服，乘骢历塞尘。当闻汉雪耻，羞共虏和亲。

卷 53_60【在荆州重赴岭南】

宋之问

梦泽三秋日，苍梧一片云。还将鹓鹭羽，重入鹓鹭群。

卷 53_61【则天皇后挽歌】

宋之问

象物行周礼，衣冠集汉都。谁怜事虞舜，下里泣苍梧。

卷 53_62【邓国太夫人挽歌】

宋之问

鸾死铅妆歇，人亡锦字空。悲端若能减，渭水亦应穷。

卷 53_63【杨将军挽歌】

宋之问

亭寒照苦月，陇暗积愁云。今日山门树，何处有将军。

第五十四卷

卷 54_1【塞垣行（一作崔融诗）】

崔湜

疾风卷溟海，万里扬砂砾。仰望不见天，昏昏竟朝夕。
是时军两进，东拒复西敌。蔽山张旗鼓，间道潜锋镝。
精骑突晓围，奇兵袭暗壁。十月边塞寒，四山沍阴积。
雨雪雁南飞，风尘景西迫。昔我事讨论，未尝怠经籍。
一朝弃笔砚，十年操矛戟。岂要黄河誓，须勒燕然石。
可嗟牧羊臣，海上久为客。

卷 54_2【送梁卿王郎中使东蕃吊册】

崔湜

梁侯上卿秀，王子中台杰。赠册绶九夷，旌旗下双阙。
西堂礼乐送，南陌轩车别。征路入海云，行舟溯江月。
兹邦久钦化，历载归朝谒。皇心谅所嘉，寄尔宣风烈。

卷 54_3【饯唐州高使君赴任】

崔湜

芳春桃李时，京都物华好。为岳岂不贵，所悲涉远道。
远道不可思，宿昔梦见之。赠君双佩刀，日夕视来期。

卷 54_4【冀北春望（一作崔液诗）】

崔湜

回首览燕赵，春生两河间。旷然万里馀，际海不见山。
雨歇青林润，烟空绿野闲。问乡何处所，目送白云还。

卷 54_5【景龙二年，余自门下平章事削阶授江州员外司马，
寻拜襄州刺史。春日赴襄阳途中言志】

崔湜

余本燕赵人，秉心愚且直。群籍备所见，孤贞每自飭。
徇禄期代耕，受任亦量力。幸逢休明时，朝野两荐推。
一朝趋金门，十载奉瑶墀。入掌迁固笔，出参枚马词。
吏部既三践，中书亦五期。进无负鼎说，退惭补衮诗。
常恐婴悔吝，不得少酬私。嗷嗷路傍子，纳谤纷无已。

上动明主疑，下貶大臣耻。毫发顾无累，冰壶邈自持。
天道何期平，幽冤终见明。始佐庐陵郡，寻牧襄阳城。
彤帟荷新宠，朱戟蒙旧荣。力薄惭任重，恩深知命轻。
饬徒留前路，行子悲且慕。犹闻长乐钟，尚辨青门树。
慈亲不忍诀，昆弟默相顾。去去勿重陈，川长日云暮。

卷 54_6【大漠行（一作胡皓诗）】

崔湜

单于犯蓟壖，骠骑略萧边。南山木叶飞下地，
北海蓬根乱上天。科斗连营太原道，鱼丽合阵武威川。
三军遥倚仗，万里相驰逐。旌旆悠悠静瀚源，
鼙鼓喧喧动卢谷。穷徼上幽陵，吁嗟倦寝兴。
马蹄冻溜石，胡毳暖生冰。云沙泱泱天光闭，
河塞阴沉海色凝。崆峒异国谁能托，萧索边心常不乐。
近见行人畏白龙，遥闻公主愁黄鹤。阳春半，岐路间，
瑶台苑，玉门关。百花芳树红将歇，二月兰皋绿未还。
阵云不散鱼龙水，雨雪犹飞鸿雁山。山嶂连绵不可极，
路远辛勤梦颜色。北堂萱草不寄来，东园桃李长相忆。
汉将纷纭攻战盈，胡寇萧条幽朔清。韩君拜节偏知远，
郑吉驱旌坐见迎。火绝烟沉右西极，谷静山空左北平。
但使将军能百战，不须天子筑长城。

卷 54_7 【奉和登骊山高顶寓目应制】

崔湜

名山何壮哉，玄览一徘徊。御路穿林转，旌门倚石开。
烟霞肘后发，河塞掌中来。不学蓬壶远，经年犹未回。

卷 54_8 【侍宴长宁公主东庄应制】

崔湜

沁园东郭外，鸾驾一游盘。水榭宜时陟，山楼向晚看。
席临天女贵，杯接近臣欢。圣藻悬宸象，微臣窃仰观。

卷 54_9 【奉和送金城公主适西蕃应制】

崔湜

怀戎前策备，降女旧因修。箫鼓辞家怨，旌旗出塞愁。
尚孩中念切，方远御慈留。顾乏谋臣用，仍劳圣主忧。

卷 54_10【幸白鹿观应制（一作郑愔诗）】

崔湜

御旗探紫箬，仙仗辟丹丘。捧药芝童下，焚香桂女留。
鸾歌无岁月，鹤语记春秋。臣朔真何幸，常陪汉武游。

卷 54_11【幸梨园亭观打球应制（一作梨园亭子侍宴应制）】

崔湜

年光陌上发，香辇禁中游。草绿鸳鸯殿，花明翡翠楼。
宝杯承露酌，仙管杂风流。今日陪欢豫，皇恩不可酬。

卷 54_12【慈恩寺九日应制】

崔湜

帝里重阳节，香园万乘来。却邪萸结佩，献寿菊传杯。
塔类承天涌，门疑待佛开。睿词悬日月，长得仰昭回。

卷 54_13【折杨柳】

崔湜

二月风光半，三边戍不还。年华妾自惜，杨柳为君攀。
落絮萦衫袖，垂条拂髻鬟。那堪音信断，流涕望阳关。

卷 54_14【边愁】

崔湜

九月蓬根断，三边草叶腓。风尘马变色，霜雪剑生衣。
客思愁阴晚，边书驿骑归。殷勤凤楼上，还袂及春晖。

卷 54_15【婕妤怨】

崔湜

不分君恩断，新妆视镜中。容华尚春日，娇爱已秋风。
枕席临窗晓，帷屏向月空。年年后庭树，荣落在深宫。

卷 54_16 【酬杜麟台春思】

崔湜

春还上林苑，花满洛阳城。鸳衾夜凝思，龙镜晓含情。
忆梦残灯落，离魂暗马惊。可怜朝与暮，楼上独盈盈。

卷 54_17 【寄天台司马先生】

崔湜

闻有三元客，祈仙九转成。人间白云返，天上赤龙迎。
尚惜金芝晚，仍攀琪树荣。何年缑岭上，一谢洛阳城。

卷 54_18 【唐都尉山池】

崔湜

曲渚颺轻舟，前溪钓晚流。雁翻蒲叶起，鱼拨荇花游。
金子悬湘柚，珠房折海榴。幽寻惜未已，清月半西楼。

卷 54_19【江楼夕望】

崔湜

试陟江楼望，悠悠去国情。楚山霞外断，汉水月中平。
公子留遗邑，夫人有旧城。苍苍烟雾里，何处是咸京。

卷 54_20【襄城即事（一作江楼有怀）】

崔湜

子牟怀魏阙，元凯滞襄城。冠盖仍为里，沙台尚识名。
山光晴后绿，江色晚来清。为问东流水，何时到玉京。

卷 54_21【秦州薛都督挽词】

崔湜

十里绛山幽，千年汾水流。碑传门客见，剑是故人留。
陇树烟含夕，山门月照秋。古来钟鼎盛，共尽一蒿丘。

卷 54_22 【奉和春日幸望春宫（一作立春内出彩花应制）】

崔湜

澹荡春光满晓空，逍遥御辇入离宫。山河眺望云天外，
台榭参差烟雾中。庭际花飞锦绣合，枝间鸟啭管弦同。
即此欢娱齐镐宴，唯应率舞乐薰风。

卷 54_23 【奉和幸韦嗣立山庄侍宴应制】

崔湜

丞相登前府，尚书启旧林。式閤明主睿，荣族圣嫔心。
川狭旌门抵，岩高蔽帐临。闲窗凭柳暗，小径入松深。
云卷千峰色，泉和万籁吟。兰迎天女佩，竹碍侍臣簪。
宸翰三光烛，朝荣四海钦。还嗟绝机叟，白首汉川阴。

卷 54_24 【同李员外春闺】

崔湜

落日啼连夜，孤灯坐彻明。卷帘双燕入，披幌百花惊。
陇上寒应晚，闺中织未成。管弦愁不意，梳洗懒无情。
去岁闻西伐，今年送北征。容颜离别尽，流恨满长城。

卷 54_25【襄阳早秋寄岑侍郎】

崔湜

江城秋气早，旭旦坐南闱。落叶惊衰鬓，清霜换旅衣。
时来矜早达，事往觉前非。体道徒推理，防身终昧微。
故人金华省，肃穆秉天机。谁念江汉广，蹉跎心事违。

卷 54_26【赠苏少府赴任江南余时还京】

崔湜

丈夫不叹别，达士自安卑。揽泣固无趣，衔杯空尔为。
流云春窈窕，去水暮逶迤。行舟忽东泛，归骑亦西驰。
秦地多芳草，江潭有桂枝。谁言阻遐阔，所贵在相知。

卷 54_27【登总持寺阁】

崔湜

宿雨清龙界，晨晖满凤城。升攀重阁迥，凭览四郊明。
井邑周秦地，山河今古情。纡馀一水合，寥落五陵平。
处处风烟起，欣欣草木荣。故人不可见，冠盖满东京。

卷 54_28【早春边城怀归】

崔湜

大漠羽书飞，长城未解围。山川凌玉嶂，旌节下金微。
路向南庭远，书因北雁稀。乡关摇别思，风雪散戎衣。
岁尽仍为客，春还尚未归。明年征骑返，歌舞及芳菲。

卷 54_29【至桃林塞作】

崔湜

去国未千里，离家已再旬。丹心恒恋阙，白首更辞亲。
怀璧常贻训，捐金讷得邻。抱冤非忤物，罹谤岂由人。
不滥辞终辨，无瑕理竟伸。黻还中省旧，符与外台新。
塞上同迁客，江潭异逐臣。泪垂非属岷，肠断固由秦。
岁月行遒尽，山川难重陈。始知亭伯去，还是拙谋身。

卷 54_30【襄阳作】

崔湜

庙堂初解印，郡邸忽腰章。按节巡河右，鸣驺入汉阳。
城临南岷出，树绕北津长。好学风犹扇，夸才俗未忘。

江山跨七泽，烟雨接三湘。蛟浦菱荷净，渔舟橘柚香。
醉中求习氏，梦里忆襄王。宅坏仍思凤，碑存更忆羊。
下车惭政美，闭阁幸时康。多谢南征术，于今尚不亡。

卷 54_31【喜入长安】

崔湜

云日能催晓，风光不惜年。赖逢征客尽，归在落花前。

卷 54_32【奉和幸韦嗣立山庄应制】

崔湜

竹径桃源本出尘，松轩茅栋别惊新。
御辔何须林下驻，山公不是俗中人。

卷 54_33【踏歌词二首】

崔液

彩女迎金屋，仙姬出画堂。鸳鸯裁锦袖，翡翠贴花黄。
歌响舞分行，艳色动流光。

庭际花微落，楼前汉已横。金台催夜尽，罗袖佛寒轻。
乐笑畅欢情，未半著天明。

卷 54_34 【代春闺】

崔液

江南日暖鸿始来，柳条初碧叶半开。玉关遥遥戍未回，
金闺日夕生绿苔。寂寂春花烟色暮，檐燕双双落花度。
青楼明镜昼无光，红帐罗衣徒自香。妾恨十年长独守，
君情万里在渔阳。

卷 54_35 【上元夜六首（一作夜游诗）】

崔液

玉漏银壶且莫催，铁关金锁彻明开。
谁家见月能闲坐，何处闻灯不看来。

神灯佛火百轮张，刻像图形七宝装。
影里如闻金口说，空中似散玉毫光。

今年春色胜常年，此夜风光最可怜。
鹄鹊楼前新月满，凤凰台上宝灯燃。

金勒银鞍控紫骝，玉轮珠幘驾青牛。
骅骝始散东城曲，倏忽还来南陌头。

公子王孙意气骄，不论相识也相邀。
最怜长袖风前弱，更赏新弦暗里调。

星移汉转月将微，露洒烟飘灯渐稀。
犹惜路傍歌舞处，踟蹰相顾不能归。

卷 54_36 【冀北春望（一作崔湜诗）】

崔液

回首览燕赵，春生两河间。旷然馀万里，际海不见山。
雨歇青林润，烟空绿野闲。问乡无处所，目送白云关

卷 54_37 【拟古神女宛转歌二首（一作郎大家诗）】

崔液

风已清，月朗琴复明。掩抑悲千态，殷勤是一声。
歌宛转，宛转和更长。愿为双鸿鹄，比翼共翱翔。

日已暮，长檐鸟应度。此时望君君不来，
此时思君君不顾。歌宛转，宛转那能异栖宿。

愿为形与影，出入恒相逐。

卷 54_38 【望韩公堆】

崔涤

韩公堆上望秦川，渺渺关山西接连。
孤客一身千里外，未知归日是何年。

第五十五卷

卷 55_1【倬彼我系】

王勃

倬彼我系，出自有周。分疆锡社，派别支流。
居卫仕宋，臣嬴相刘。乃武乃文，或公或侯。

晋历崩坼，衣冠扰弊。粤自太原，播徂江澨。
礼丧贤隐，时屯道闭。王室如毁，生人多殒。

伊我有器，思逢其主。自东施西，择木开宇。
田彼河曲，家乎汾浦。天未厌乱，吾将谁辅。

伊我祖德，思济九埏。不常厥所，于兹五迁。
欲及时也，夫岂愿焉。其位虽屈，其言则传。

爰述帝制，大搜王道。曰天曰人，是祖是考。
礼乐咸苦，诗书具草。贻厥孙谋，永为家宝。

伊余小子，信惭明哲。彼网有条，彼车有辙。
思屏人事，克终前烈。于嗟代网，卒余来继。

来继伊何，谓余曰仕。我瞻先达，三十方起。
夫岂不怀，高山仰止。愿言毓德，啜菽饮水。

有鸟反哺，其声嗷嗷。言念旧德，忧心忉忉。
今我不养，岁月其滔。黽俯从役，岂敢告劳。

从役伊何，薄求卑位。告劳伊何，来参卿事。
名存实爽，负信愆义。静言遐思，中心是愧。

卷 55_2【上巳浮江宴韵得址字】

王勃

披观玉京路，驻赏金台址。逸兴怀九仙，良辰倾四美。
松吟白云际，桂馥青溪里。别有江海心，日暮情何已。

卷 55_3【春日宴乐游园赋韵得接字】

王勃

帝里寒光尽，神皋春望浹。梅郊落晚英，柳甸惊初叶。
流水抽奇弄，崩云洒芳牒。清尊湛不空，暂喜平生接。

卷 55_4 【山亭夜宴】

王勃

桂宇幽襟积，山亭凉夜永。森沉野径寒，肃穆岩扉静。
竹晦南汀色，荷翻北潭影。清兴殊未阑，林端照初景。

卷 55_5 【咏风】

王勃

肃肃凉景生，加我林壑清。驱烟寻涧户，卷雾出山楹。
去来固无迹，动息如有情。日落山水静，为君起松声。

卷 55_6 【怀仙】

王勃

鹤岑有奇径，麟洲富仙家。紫泉漱珠液，玄岩列丹葩。
常希披尘网，眇然登云车。鸾情极霄汉，凤想疲烟霞。
道存蓬瀛近，意惬朝市赊。无为坐惆怅，虚此江上华。

卷 55_7【忽梦游仙】

王勃

仆本江上客，牵迹在方内。寤寐霄汉间，居然有灵对。
翕尔登霞首，依然躋云背。电策驱龙光，烟途俨鸾态。
乘月披金帔，连星解琼珮。浮识俄易归，真游邈难再。
寥廓沉遐想，周遑奉遗诲。流俗非我乡，何当释尘昧。

卷 55_8【杂曲】

王勃

智琼神女，来访文君。蛾眉始约，罗袖初薰。
歌齐曲韵，舞乱行纷。若向阳台荐枕，何啻得胜朝云。

卷 55_9【秋夜长】

王勃

秋夜长，殊未央，月明白露澄清光，层城绮阁遥相望。
遥相望，川无梁，北风受节南雁翔，崇兰委质时菊芳。
鸣环曳履出长廊，为君秋夜捣衣裳。
纤罗对凤凰，丹绮双鸳鸯，调砧乱杵思自伤。
思自伤，征夫万里戍他乡。鹤关音信断，龙门道路长。

君在天一方，寒衣徒自香。

卷 55_10 【采莲曲（乐府作采莲归）】

王勃

采莲归，绿水芙蓉衣。秋风起浪凫雁飞。
桂棹兰桡下长浦，罗裙玉腕轻摇橹。叶屿花潭极望平，
江讴越吹相思苦。相思苦，佳期不可驻。
塞外征夫犹未还，江南采莲今已暮。今已暮，采莲花。
渠今那必尽娼家。官道城南把桑叶，何如江上采莲花。
莲花复莲花，花叶何稠叠。叶翠本羞眉，花红强如颊。
佳人不在兹，怅望别离时。牵花怜共蒂，折藕爱连丝。
故情无处所，新物从华滋。不惜西津交佩解，
还羞北海雁书迟。采莲歌有节，采莲夜未歇。
正逢浩荡江上风，又值裴回江上月。裴回莲浦夜相逢，
吴姬越女何丰茸。共问寒江千里外，征客关山路几重。

卷 55_11 【临高台】

王勃

临高台，高台迢递绝浮埃。瑶轩绮构何崔嵬，
鸾歌凤吹清且哀。俯瞰长安道，萋萋御沟草。
斜对甘泉路，苍苍茂陵树。高台四望同，

帝乡佳气郁葱葱。紫阁丹楼纷照耀，璧房锦殿相玲珑。
东弥长乐观，西指未央宫。赤城映朝日，绿树摇春风。
旗亭百隧开新市，甲第千甍分戚里。朱轮翠盖不胜春，
叠榭层楹相对起。复有青楼大道中，绣户文窗雕绮栊。
锦衾夜不襞，罗帷昼未空。歌屏朝掩翠，妆镜晚窥红。
为君安宝髻，蛾眉罢花丛。尘间狭路黯将暮，
云间月色明如素。鸳鸯池上两两飞，凤凰楼下双双度。
物色正如此，佳期那不顾。银鞍绣毂盛繁华，
可怜今夜宿娼家。娼家少妇不须颦，东园桃李片时春。
君看旧日高台处，柏梁铜雀生黄尘。

卷 55_12【滕王阁】

王勃

滕王高阁临江渚，珮玉鸣鸾罢歌舞。书栋朝飞南浦云，
珠帘暮卷西山雨。闲云潭影日悠悠，物换星移几度秋。
阁中帝子今何在，槛外长江空自流。

卷 55_13【江南弄】

王勃

江南弄，巫山连楚梦，行雨行云几相送。
瑶轩金谷上春时，玉童仙女无见期。紫露香烟渺难托，

· 全唐诗 ·

清风明月遥相思。遥相思，草徒绿，为听双飞凤凰曲。

第五十六卷

卷 56_1【圣泉宴】

王勃

披襟乘石磴，列籍俯春泉。兰气熏山酌，松声韵野弦。
影飘垂叶外，香度落花前。兴洽林塘晚，重岩起夕烟。

卷 56_2【寻道观】

王勃

芝廬光分野，蓬阙盛规模。碧坛清桂闕，丹洞肃松枢。
玉笈三山记，金箱五岳图。苍虬不可得，空望白云衢。

卷 56_3【散关晨度】

王勃

关山凌旦开，石路无尘埃。白马高谭去，青牛真气来。

重门临巨壑，连拣起崇隈。即今扬策度，非是弃繻回。

卷 56_4【别薛华】

王勃

送送多穷路，遑遑独问津。悲凉千里道，凄断百年身。
心事同漂泊，生涯共苦辛。无论去与住，俱是梦中人。

卷 56_5【重别薛华】

王勃

明月沉珠浦，风飘濯锦川。楼台临绝岸，洲渚亘长天。
旅泊成千里，柏遑共百年。穷途唯有泪，还望独潸然。

卷 56_6【游梵宇三觉寺】

王勃

杏阁披青磴，雕台控紫岑。叶齐山路狭，花积野坛深。
萝幌栖禅影，松门听梵音。遽忻陪妙躅，延赏涤烦襟。

卷 56_7 【麻平晚行】

王勃

百年怀土望，千里倦游情。高低寻戍道，远近听泉声。
漳叶才分色，山花不辨名。羁心何处尽，风急暮猿清。

卷 56_8 【送卢主簿】

王勃

穷途非所恨，虚室自相依。城阙居年满，琴尊俗事稀。
开襟方未已，分袂忽多违。东岩富松竹，岁暮幸同归。

卷 56_9 【饯韦兵曹】

王勃

征骖临野次，别袂惨江垂。川霁浮烟敛，山明落照移。
鹰风凋晚叶，蝉露泣秋枝。亭皋分远望，延想间天涯。

卷 56_10 【白下驿饯唐少府】

王勃

下驿穷交日，昌亭旅食年。相知何用早，怀抱即依然。
浦楼低晚照，乡路隔风烟。去去如何道，长安在日边。

卷 56_11 【杜少府之任蜀州】

王勃

城阙辅三秦，风烟望五津。与君离别意，同是宦游人。
海内存知己，天涯若比邻。无为在岐路，儿女共沾巾。

卷 56_12 【仲春郊外】

王勃

东园垂柳径，西堰落花津。物色连三月，风光绝四邻。
鸟飞村觉曙，鱼戏水知春。初晴山院里，何处染嚣尘。

卷 56_13【郊兴】

王勃

空园歌独酌，春日赋亲居。泽兰侵小径，河柳覆长渠。
雨去花光湿，风归叶影疏。山人不惜醉，唯畏绿尊虚。

卷 56_14【郊园即事】

王勃

烟霞春旦赏，松竹故年心。断山疑画障，悬溜泻鸣琴。
草遍南亭合，花开北院深。闲居饶酒赋，随兴欲抽簪。

卷 56_15【观佛迹寺】

王勃

莲座神容俨，松崖圣趾馀。年长金迹浅，地久石文疏。
颓华临曲磴，倾影赴前除。共嗟陵谷远，俄视化城虚。

卷 56_16 【山居晚眺赠王道士】

王勃

金坛疏俗宇，玉洞侣仙群。花枝栖晚露，峰叶度晴云。
斜照移山影，回沙拥籀文。琴尊方待兴，竹树已迎曛。

卷 56_17 【八仙径】

王勃

柰园欣八正，松岩访九仙。援萝窥雾术，攀林俯云烟。
代北鸾骖至，辽西鹤骑旋。终希脱尘网，连翼下芝田。

卷 56_18 【春日还郊】

王勃

闲情兼嘿语，携杖赴岩泉。草绿萋新带，榆青缀古钱。
鱼床侵岸水，鸟路入山烟。还题平子赋，花树满春田。

卷 56_19【对酒春园作】

王勃

投簪下山阁，携酒对河梁。陕水牵长镜，高花送断香。
繁莺歌似曲，疏蝶舞成行。自然催一醉，非但阅年光。

卷 56_20【观内怀仙】

王勃

玉架残书隐，金坛旧迹迷。牵花寻紫涧，步叶下清溪。
琼浆犹类乳，石髓尚如泥。自能成羽翼，何必仰云梯。

卷 56_21【秋日别王长史】

王勃

别路馀千里，深恩重百年。正悲西候日，更动北梁篇。
野色笼寒雾，山光敛暮烟。终知难再奉，怀德自潸然。

卷 56_22 【上巳浮江宴韵得遥字】

王勃

上巳年光促，中川兴绪遥。绿齐山叶满，红泄片花销。
泉声喧后涧，虹影照前桥。遽悲春望远，江路积波潮。

卷 56_23 【长柳】

王勃

晨征犯烟磴，夕憩在云关。晚风清近壑，新月照澄湾。
郊童樵唱返，津叟钓歌还。客行无与晤，赖此释愁颜。

卷 56_24 【铜雀妓二首】

王勃

金凤邻铜雀，漳河望邺城。君王无处所，台榭若平生。
舞席纷何就，歌梁俨未倾。西陵松檟冷，谁见绮罗情。

妾本深宫妓，层城闭九重。君王欢爱尽，歌舞为谁容。
锦衾不复襞，罗衣谁再缝。高台西北望，流涕向青松。

卷 56_25 【羈游餞別】

王勃

客心悬陇路，游子倦江干。槿丰朝砌静，筱密夜窗寒。
琴声销别恨，风景驻离欢。宁觉山川远，悠悠旅思难。

卷 56_26 【易阳早发】

王勃

饬装侵晓月，奔策候残星。危阁寻丹障，回梁属翠屏。
云间迷树影，雾里失峰形。复此凉飙至，空山飞夜萤。

卷 56_27 【焦岸早行和陆四】

王勃

侵星违旅馆，乘月戒征俦。复嶂迷晴色，虚岩辨暗流。
猿吟山漏晓，萤散野风秋。故人渺何际，乡关云雾浮。

卷 56_28 【深湾夜宿】

王勃

津涂临巨壑，村宇架危岑。堰绝滩声隐，风交树影深。
江童暮理楫，山女夜调砧。此时故乡远，宁知游子心。

卷 56_29 【伤裴录事丧子】

王勃

兰阶霜候早，松露窈台深。魄散珠胎没，芳销玉树沉。
露文晞宿草，烟照惨平林。芝焚空叹息，流恨满簏金。

卷 56_30 【泥溪】

王勃

弭棹凌奔壑，低鞭蹑峻岐。江涛出岸险，峰磴入云危。
溜急船文乱，岩斜骑影移。水烟笼翠渚，山照落丹崖。
风生蘋浦叶，露泣竹潭枝。泛水虽云美，劳歌谁复知。

卷 56_31【三月曲水宴得烟字】

王勃

彭泽官初去，河阳赋始传。田园归旧国，诗酒间长筵。
列室窥丹洞，分楼瞰紫烟。萦回亘津渡，出没控郊鄷。
凤琴调上客，龙辔俨群仙。松石偏宜古，藤萝不记年。
重檐交密树，复磴拥危泉。抗石睨南岭，乘沙眇北川。
傅岩来筑处，磻溪入钓前。日斜真趣远，幽思梦凉蝉。

卷 56_32【秋日仙游观赠道士（一作骆宾王诗）】

王勃

石图分帝宇，银牒洞灵宫。回丹萦岫空，复翠上岩栊。
雾浓金灶静，云暗玉坛空。野花常捧露，山叶自吟风。
林泉明月在，诗酒故人同。待余逢石髓，从尔命飞鸿。

卷 56_33【晚留凤州】

王勃

宝鸡辞旧役，仙凤历遗墟。去此近城阙，青山明月初。

卷 56_34 【羈春】

王勃

客心千里倦，春事一朝归。还伤北园里，重见落花飞。

卷 56_35 【林塘怀友】

王勃

芳屏画春草，仙杼织朝霞。何如山水路，对面即飞花。

卷 56_36 【山扉夜坐】

王勃

抱琴开野室，携酒对情人。林塘花月下，别似一家春。

卷 56_37 【春庄】

王勃

山中兰叶径，城外李桃园。岂知人事静，不觉鸟声喧。

卷 56_38 【春游】

王勃

客念纷无极，春泪倍成行。今朝花树下，不觉恋年光。

卷 56_39 【春园】

王勃

山泉两处晚，花柳一园春。还持千日醉，共作百年人。

卷 56_40 【林泉独饮】

王勃

丘壑经涂赏，花柳遇时春。相逢今不醉，物色自轻人。

卷 56_41 【登城春望】

王勃

物外山川近，晴初景霭新。芳郊花柳遍，何处不宜春。

卷 56_42 【他乡叙兴】

王勃

缀叶归烟晚，乘花落照春。边城琴酒处，俱是越乡人。

卷 56_43 【夜兴】

王勃

野烟含夕渚，山月照秋林。还将中散兴，来偶步兵琴。

卷 56_44 【临江二首】

王勃

泛泛东流水，飞飞北上尘。归骖将别棹，俱是倦游人。

去骖嘶别路，归棹隐寒洲。江皋木叶下，应想故城秋。

卷 56_45【江亭夜月送别二首】

王勃

江送巴南水，山横塞北云。津亭秋月夜，谁见泣离群。

乱烟笼碧砌，飞月向南端。寂寂离亭掩，江山此夜寒。

卷 56_46【别人四首】

王勃

久客逢馀闰，他乡别故人。自然堪下泪，谁忍望征尘。

江上风烟积，山幽云雾多。送君南浦外，还望将如何。

桂轺虽不驻，兰筵幸未开。林塘风月赏，还待故人来。

霜华净天末，雾色笼江际。客子常畏人，何为久留滞。

卷 56_47【赠李十四四首】

王勃

野客思茅宇，山人爱竹林。琴尊唯待处，风月自相寻。

小径偏宜草，空庭不厌花。平生诗与酒，自得会仙家。
乱竹开三径，飞花满四邻。从来扬子宅，别有尚玄人。
风筵调桂轸，月径引藤杯。直当花院里，书斋望晓开。

卷 56_48 【早春野望】

王勃

江旷春潮白，山长晓岫青。他乡临睨极，花柳映边亭。

卷 56_49 【山中】

王勃

长江悲已滞，万里念将归。况属高风晚，山山黄叶飞。

卷 56_50 【冬郊行望】

王勃

桂密岩花白，梨疏树叶红。江皋寒望尽，归念断征篷。

卷 56_51【寒夜思友三首】

王勃

久别侵怀抱，他乡变容色。月下调鸣琴，相思此何极。
云间征思断，月下归愁切。鸿雁西南飞，如何故人别。
朝朝翠山下，夜夜苍江曲。复此遥相思，清尊湛芳绿。

卷 56_52【始平晚息】

王勃

观阙长安近，江山蜀路赊。客行朝复夕，无处是乡家。

卷 56_53【扶风昼届离京浸远】

王勃

帝里金茎去，扶风石柱来。山川殊未已，行路方悠哉。

卷 56_54【普安建阴题壁】

王勃

江汉深无极，梁岷不可攀。山川云雾里，游子几时还。

卷 56_55【九日】

王勃

九日重阳节，开门有菊花。不知来送酒，若个是陶家。

卷 56_56【秋江送别二首】

王勃

早是他乡值早秋，江亭明月带江流。
已觉逝川伤别念，复看津树隐离舟。

归舟归骑俨成行，江南江北互相望。
谁谓波澜才一水，已觉山川是两乡。

卷 56_57【蜀中九日】

王勃

九月九日望乡台，他席他乡送客杯。
人情已厌南中苦，鸿雁那从北地来。

卷 56_58【寒夜怀友杂体二首】

王勃

北山烟雾始茫茫，南津霜月正苍苍。
秋深客思纷无已，复值征鸿中夜起。
复閤重楼向浦开，秋风明月度江来。
故人故情怀故宴，相望相思不相见。

卷 56_59【落花落（以下诗集不载）】

王勃

落花落，落花纷纷漠漠。绿叶青跗映丹萼，
与君裴回上金阁。影拂妆阶玳瑁筵，香飘舞馆茱萸幕。
落花飞，撩乱入中帷。落花春正满，春人归不归。
落花度，氛氲绕高树。落花春已繁，春人春不顾。

绮阁青台静且闲，罗袂红巾复往还。盛年不再得，
高枝难重攀。试复旦游落花里，暮宿落花间。
与君落花院，台上起双鬟。

卷 56_60【九日怀封元寂】

王勃

九日郊原望，平野遍霜威。兰气添新酌，花香染别衣。
九秋良会少，千里故人稀。今日龙山外，当忆雁书归。

卷 56_61【出境游山二首】

王勃

源水终无路，山阿若有人。驱羊先动石，走兔欲投巾。
洞晚秋泉冷，岩朝古树新。峰斜连鸟翅，磴叠上鱼鳞。
化鹤千龄早，元龟六代春。浮云今可驾，沧海自成尘。

振翩凌霜吹，正月伫天浔。回镳凌翠壑，飞轸控青岑。
岩深灵灶没，涧毁石渠沉。宫阙云间近，江山物外临。
玉坛栖暮夜，珠洞结秋阴。萧萧离俗影，扰扰望乡心。
谁意山游好，屡伤人事侵。

卷 56_62【河阳桥代窦郎中佳人答杨中舍】

王勃

披风听鸟长河路，临津织女遥相妒。
判知秋夕带啼还，那及春朝携手度。

卷 56_63【晦日宴高氏林亭同用华字】

王勣

上序披林馆，中京视物华。竹窗低露叶，梅径起风花。
景落春台雾，池侵旧渚沙。绮筵歌吹晚，幕雨泛香车。

第五十七卷

卷 57_1【奉教追赴九成宫途中口号】

李峤

委质承仙翰，祗命遄遥策。事偶从梁游，人非背淮客。
长驱历川阜，迴眺穷原泽。郁郁桑柘繁，油油禾黍积。
雨馀林气静，日下山光夕。未攀丛桂岩，犹倦飘蓬承。
行当奉麾盖，慰此劳行役。

卷 57_2【秋山望月酬李骑曹】

李峤

愁客坐山隈，怀抱自悠哉。况复高秋夕，明月正裴回。
亭亭出迥岫，皎皎映层台。色带银河满，光含玉露开。
淡云笼影度，虚晕抱轮回。谷邃凉阴静，山空夜响哀。
寒催数雁过，风送一萤来。独轸离居恨，遥想故人怀。

卷 57_3 【和同府李祭酒休沐田居】

李峤

列位簪纓序，隱居林野躅。徇物爽全直，栖真昧均俗。
若人兼吏隱，率性夷榮辱。地藉朱邱基，家在青山足。
暫弭西園蓋，言事東皋粟。築室俯澗濱，開扉面岩曲。
庭幽引夕霧，檐迴通晨旭。迎秋谷黍黃，含露園葵綠。
勝情狎蘭杜，雅韻鏘金玉。伊我懷丘園，愿心从所欲。

卷 57_4 【扈从还洛呈侍从群官】

李峤

四海帝王家，兩都周漢室。觀風昔來幸，御氣今旋跸。
雷奮六合開，天行萬乘出。玄冥奉時駕，白拒參戎律。
後隊咽笳簫，前驅嚴罕畢。輝光射東井，禁令橫西秩。
帳殿別陽秋，旌門臨甲乙。將交洛城雨，稍遠長安日。
邛笏云外來，咸秦霧中失。孟冬霜霰下，是月農功畢。
天道向歸餘，皇情美陰鷺。行存名岳禮，遞問高年疾。
祝鳥既開羅，調人更張瑟。登原采諏誦，俯谷求才術。
邑罕懸磬貧，山無挂瓢逸。施恩浹寰宇，展義該文質。
德澤盛軒游，哀矜深禹恤。申歌地廬駭，獻壽衢尊溢。
瑞色抱氤氲，寒光變蕭颯。宗枝旦爽輔，侍从王劉匹。
并輯蛟龍書，同簪鳳凰筆。陶甄荷吹萬，頌漢歸明一。

欢与道路长，顾随谈笑密。叨承廊庙选，谬齿夔龙弼。
喜构大厦成，惭非栋隆吉。

卷 57_5【奉使筑朔方六州城率尔而作】

李峤

奉诏受边服，总徒筑朔方。驱彼犬羊族，正此戎夏疆。
子来多悦豫，王事宁怠遑。三旬无愆期，百雉郁相望。
雄视沙漠垂，有截北海阳。二庭已顿颡，五岭尽来王。
驱车登崇墉，顾眄凌大荒。千里何萧条，草木自悲凉。
凭轼讯古今，慨焉感兴亡。汉障缘河远，秦城入海长。
顾无庙堂策，贻此中夏殃。道隐前业衰，运开今化昌。
制为百王式，举合千载防。马牛被路隅，锋镝销战场。
岂不怀贤劳，所图在永康。王事何为者，称代陈颂章。

卷 57_6【早发古竹馆】

李峤

合沓岩嶂深，朦胧烟雾晓。荒阡下樵客，野猿惊山鸟。
开门听潺湲，入径寻窈窕。栖鹜抱寒木，流萤飞暗筱。
早霞稍霏霏，残月犹皎皎。行看远星稀，渐觉游氛少。
我行抚轺传，兼得傍林沼。贪玩水石奇，不知川路渺。
徒怜野心旷，讵恻浮年小。方解宠辱情，永托累尘表。

卷 57_7【安辑岭表事平罢归】

李峤

云端想京县，帝乡如可见。天涯望越台，海路几悠哉。
六月飞鹏去，三年瑞雉来。境遥铜柱出，山险石门开。
自我违瀍洛，瞻途屡挥霍。朝朝寒露多，夜夜征衣薄。
白简承朝宪，朱方抚夷落。既弘天覆广，且谕皇恩博。
皇恩溢外区，憬俗咏来苏。声朔臣天子，坛场拜老夫。
绛宫韬将略，黄石寝兵符。返旆收龙虎，空营集鸟乌。
日落澄氛霭，凭高视襟带。东瓯抗於越，南斗临吴会。
春色绕边陲，飞花出荒外。卉服纷如积，长川思游客。
风生丹桂晚，云起苍梧夕。去舳舫清江，归轩趋紫陌。
衣裳会百蛮，琛赆委重关。不学金刀使，空持宝剑还。

卷 57_8【鹧鸪（一作韦应物诗）】

李峤

可怜鹧鸪飞，飞向树南枝。南枝日照暖，北枝霜露滋。
露滋不堪栖，使我常夜啼。愿逢云中鹤，衔我向寥廓。
愿作城上乌，一年生九雏。何不旧巢住，枝弱不得去。
何意道苦辛，客子常畏人。

卷 57_9【清明日龙门游泛】

李峤

晴晓国门通，都门蔼将发。纷纷洛阳道，南望伊川阙。
衍漾乘和风，清明送芬月。林窥二山动，水见千龛越。
罗袂冒杨丝，香桡犯苔发。群心行乐未，唯恐流芳歇。

卷 57_10【云】

李峤

大梁白云起，氛氲殊未歇。锦文触石来，盖影凌天发。
烟煴万年树，掩映三秋月。会入大风歌，从龙赴圆阙。

卷 57_11【拟古东飞伯劳西飞燕（一本作东飞伯劳歌）】

李峤

传书青鸟迎箫凤，巫岭荆台数通梦。谁家窈窕住园楼，
五马千金照陌头。罗裙玉珮当轩出，点翠施红竞春日。
佳人二八盛舞歌，羞将百万呈双蛾。庭前芳树朝夕改，
空驻妍华欲谁待。

卷 57_12【宝剑篇】

李峤

吴山开，越溪涸，三金合冶成宝铎。淬绿水，鉴红云，
五彩焰起光氛氲。背上铭为万年字，胸前点作七星文。
龟甲参差白虹色，辘轳宛转黄金饰。骇犀中断宁方利，
骏马群骍未拟直。风霜凜凜匣上清，精气遥遥斗间明。
避灾朝穿晋帝屋，逃乱夜入楚王城。一朝运偶逢大仙，
虎吼龙鸣腾上天。东皇提升紫微座，西皇佩上赤城田。
承平久息干戈事，侥幸得充文武备。除灾避患宜君王，
益寿延龄后天地。

卷 57_13【汾阴行】

李峤

君不见昔日西京全盛时，汾阴后土亲祭祠。
斋宫宿寝设储供，撞钟鸣鼓树羽旂。汉家五叶才且雄，
宾延万灵朝九戎。柏梁赋诗高宴罢，诏书法驾幸河东。
河东太守亲扫除，奉迎至尊导銮舆。五营夹道列容卫，
三河纵观空里闾。回旌驻蹕降灵场，焚香奠醑邀百祥。
金鼎发色正焜煌，灵祇炜烨摅景光。埋玉陈牲礼神毕，
举麾上马乘舆出。彼汾这曲嘉可游，木兰为楫桂为舟。
棹歌微吟彩鹢浮，箫鼓哀鸣白云秋。欢娱宴洽赐群后，

家家复除户牛酒。声明动天乐无有，千秋万岁南山寿。
自从天子向秦关，玉辇金车不复还。珠帘羽扇长寂寞，
鼎湖龙髯安可攀。千龄人事一朝空，四海为家此路穷。
豪雄意气今何在，坛场宫馆尽蒿蓬。路逢故老长叹息，
世事回环不可测。昔时青楼对歌舞，今日黄埃聚荆棘。
山川满目泪沾衣，富贵荣华能几时。不见只今汾水上，
唯有年年秋雁飞。

第五十八卷

卷 58_1【中宗降诞日长宁公主满月侍宴应制】

李峤

神龙见像日，仙凤养雏年。大火乘天正，明珠对月圆。
作新金篦里，歌奏玉筐前。今日宜孙庆，还参祝寿篇。

卷 58_2【奉和送金城公主适西蕃应制】

李峤

汉帝抚戎臣，丝言命锦轮。还将弄机女，远嫁织皮人。
曲怨关山月，妆消道路尘。所嗟秣李树，空对小榆春。

卷 58_3【侍宴长宁公主东庄应制】

李峤

别业临青甸，鸣鸾降紫霄。长筵鹓鹭集，仙管凤皇调。

树接南山近，烟含北渚遥。承恩咸已醉，恋赏未还镳。

卷 58_4【立春日侍宴内殿出剪彩花应制】

李峤

早闻年欲至，剪彩学芳辰。缀绿奇能似，裁红巧逼真。
花从篋里发，叶向手中春。不与时光竞，何名天上人。

卷 58_5【奉和人日清晖阁宴群臣遇雪应制】

李峤

三阳偏胜节，七日最灵辰。行庆传芳蚁，升高缀彩人。
阶前蓂候月，楼上雪惊春。今日衔天造，还疑上汉津。

卷 58_6【奉和春日游苑喜雨应制】

李峤

仙跸九成台，香筵万寿杯。一旬初降雨，二月早闻雷。
叶向朝隤密，花含宿润开。幸承天泽豫，无使日光催。

卷 58_7【春日侍宴幸芙蓉园应制】

李峤

年光竹里遍，春色杏间遥。烟气笼青阁，流文荡画桥。
飞花随蝶舞，艳曲伴莺娇。今日陪欢豫，还疑陟紫霄。

卷 58_8【甘露殿侍宴应制】

李峤

月宇临丹地，云窗网碧纱。御筵陈桂醕，天酒酌榴花。
水向浮桥直，城连禁苑斜。承恩恣欢赏，归路满烟霞。

卷 58_9【奉和七夕两仪殿会宴应制】

李峤

灵匹三秋会，仙期七夕过。查来人泛海，桥渡鹊填河。
帝缕升银阁，天机罢玉梭。谁言七襄咏，重入五弦歌。

卷 58_10【奉和九月九日登兹恩寺浮图应制】

李峤

瑞塔千寻起，仙舆九日来。萸房陈宝席，菊蕊散花台。
御气鹏霄近，升高凤野开。天歌将梵乐，空里共裴回。

卷 58_11【闰九月九日幸总持寺登浮图应制】

李峤

闰节开重九，真游下大千。花寒仍荐菊，座晚更披莲。
刹凤回雕辇，帆虹间彩旃。还将西梵曲，助入南薰弦。

卷 58_12【奉和骊山高顶寓目应制】

李峤

步辇陟山巅，山高入紫烟。忠臣还捧日，圣后欲扞天。
迥识平陵树，低看华岳莲。帝乡应不远，空见白云悬。

卷 58_13【游禁苑陪幸临渭亭遇雪应制】

李峤

同云接野烟，飞雪暗长天。拂树添梅色，过楼助粉妍。
光含班女扇，韵入楚王弦。六出迎仙藻，千箱答瑞年。

卷 58_14【幸白鹿观应制】

李峤

驻蹕三天路，回旃万仞谿。真庭群帝飨，洞府百灵栖。
玉酒仙垆酿，金方暗壁题。伫看青鸟入，还陟紫云梯。

卷 58_15【送沙门弘景道俊玄奘还荆州应制（一作宋之问诗）】

李峤

三乘归净域，万骑饯通庄。就日离亭近，弥天别路长。
荆南旋杖钵，渭北限津梁。何日纡真果，还来入帝乡。

卷 58_16【酬杜五弟晴朝独坐见赠】

李峤

平明坐虚馆，旷望几悠哉。宿雾分空尽，朝光度隙来。
影低藤架密，香动药阑开。未展山阳会，空留池上杯。

卷 58_17【同赋山居七夕】

李峤

明月青山夜，高天白露秋。花庭开粉席，云岫敞针楼。
石类支机影，池似泛槎流。暂惊河女鹊，终狎野人鸥。

卷 58_18【送崔主簿赴沧州】

李峤

紫陌追随日，青门相见时。宦游从此去，离别几年期。
芳桂尊中酒，幽兰下调词。他乡有明月，千里照相思。

卷 58_19【寒食清明日早赴王门率成】

李峤

游客趋梁邸，朝光入楚台。槐烟乘晓散，榆火应春开。
日带晴虹上，花随早蝶来。雄风乘令节，馀吹拂轻灰。

卷 58_20【和周记室从驾晓发合璧宫】

李峤

濯龙春苑曙，翠凤晓旗舒。野色开烟后，山光澹月馀。
风长笳咽咽，川迴骑行疏。珠履陪仙驾，金声振属车。

卷 58_21【和杜侍御太清台宿真旦有怀】

李峤

貂冠朝彩振，乌署晓光分。欲啸迁乔侣，先飞掷地文。
庭虚麦雨润，林静蕙风薰。嵇驾终难仰，梁鸯且自群。

卷 58_22 【和杜学士江南初霁羁怀】

李峤

大江开宿雨，征棹下春流。雾卷晴山出，风恬晚浪收。
岸花明水树，川鸟乱沙洲。羁眺伤千里，劳歌动四愁。

卷 58_23 【晚景怅然简二三子】

李峤

楚客秋悲动，梁台夕望赊。梧桐稍下叶，山桂欲开花。
气引迎寒露，光收向晚霞。长歌白水曲，空对绿池毕。

卷 58_24 【送李邕（一作送李安邑）】

李峤

落日荒郊外，风景正凄凄。离人席上起，征马路傍嘶。
别酒倾壶赠，行书掩泪题。殷勤御沟水，从此各东西。

卷 58_25 【又送别】

李峤

岐路方为客，芳尊暂解颜。人随转蓬去，春伴落梅还。
白云度汾水，黄河绕晋关。离心不可问，宿昔鬓成斑。

卷 58_26 【饯骆四二首】

李峤

平生何以乐，斗酒夜相逢。曲中惊别绪，醉里失愁容。
星月悬秋汉，风霜入曙钟。明日临沟水，青山几万重。

甲第驱车入，良宵秉烛游。人追竹林会，酒献菊花秋。
霜吹飘无已，星河漫不流。重嗟欢赏地，翻召别离忧。

卷 58_27 【春日游苑喜雨应诏】

李峤

园楼春正归，入苑弄芳菲。密雨迎仙步，低云拂御衣。
危花沾易落，度鸟湿难飞。膏泽登千庾，欢情遍九围。

卷 58_28【九日应制得欢字】

李峤

令节三秋晚，重阳九日欢。仙杯还泛菊，宝馔且调兰。
御气云霄近，乘高宇宙宽。今朝万寿引，宜向曲中弹。

卷 58_29【二月奉教作】

李峤

柳陌莺初啭，梅梁燕始归。和风泛紫若，柔露濯青薇。
日艳临花影，霞翻入浪晖。乘春重游豫，淹赏玩芳菲。

卷 58_30【三月奉教作】

李峤

银井桐花发，金堂草色齐。韶光爱日宇，淑气满风蹊。
蝶影将花乱，虹文向水低。芳春随意晚，佳赏日无睽。

卷 58_31【四月奉教作】

李峤

暄籥三春谢，炎钟九夏初。润浮梅雨夕，凉散麦风馀。
叶暗庭帏满，花残院锦疏。胜情多赏托，尊酒狎林筵。

卷 58_32【五月奉教作】

李峤

绿树炎氛满，朱楼夏景长。池含冻雨气，山映火云光。
果院新樱熟，花庭曙槿芳。欲逃三伏暑，还泛十旬觴。

卷 58_33【六月奉教作】

李峤

养日暂裴回，畏景尚悠哉。避暑移琴席，追凉□□□。
竹风依扇动，桂酒溢壶开。劳饵□飞雪，自可□□□。

卷 58_34 【八月奉教作】

李峤

春叶秋风起，苍葭晓露团。鹤鸣初警候，雁上欲凌寒。
月镜如开匣，云缨似缀冠。清尊对旻序，高宴有馀欢。

卷 58_35 【九月奉教作】

李峤

曲池朝下雁，幽砌夕吟蛩。叶径兰芳尽，花潭菊气浓。
寒催四序律，霜度九秋钟。还当明月夜，飞盖远相从。

卷 58_36 【十月奉教作】

李峤

白藏初送节，玄律始迎冬。林枯黄叶尽，水耗绿池空。
霜待临庭月，寒随入牖风。别有欢娱地，歌舞应丝桐。

卷 58_37【十一月奉教作】

李峤

凝阴结暮序，严气肃长飏。霜犯狐裘夕，寒侵兽火朝。
冰深遥架浦，雪冻近封条。平原已从猎，日暮整还镳。

卷 58_38【十二月奉教作】

李峤

玉烛年行尽，铜史漏犹长。池冷凝宵冻，庭寒积曙霜。
兰心未动色，梅馆欲含芳。裴回临岁晚，顾步伫春光。

卷 58_39【和曲典设扈从东郊忆弟使往安西，冬至日恨不得同申拜庆】

李峤

玉关方叱驭，桂苑正陪輿。桓岭嗟分翼，姜川限馈鱼。
雪花含□晚，云叶带荆舒。重此西流咏，弥伤南至初。

卷 58_40 【马武骑挽歌二首】

李峤

五日皆休沐，三泉独不归。池台金阙是，尊酒玳筵非。
巷静游禽入，门闲过客稀。唯馀昔年凤，尚绕故楼飞。

昔下天津馆，尝过帝子家。夜倾金屋酒，春舞玉台花。
试马依红埭，吹箫弄紫霞。谁言东郭路，翻枉北门车。

卷 58_41 【武三思挽歌】

李峤

玉匣金为缕，银钩石作铭。短歌伤薤曲，长暮泣松扃。
事往昏朝雾，人亡折夜星。忠贤良可惜，图画入丹青。

卷 58_42 【天官崔侍郎夫人吴氏挽歌】

李峤

宠服当年盛，芳魂此地穷。剑飞龙匣在，人去鹊巢空。
簟怆孤生竹，琴哀半死桐。唯当青史上，千载仰嫔风。

第五十九卷

卷 59_1【日】

李峤

旦出扶桑路，遥升若木枝。云间五色满，霞际九光披。
东陆苍龙驾，南郊赤羽驰。倾心比葵藿，朝夕奉光曦。

卷 59_2【月】

李峤

桂满三五夕，蓂开二八时。清辉飞鹊鉴，新影学蛾眉。
皎洁临疏牖，玲珑鉴薄帷。愿言从爱客，清夜幸同嬉。

卷 59_3【星】

李峤

蜀郡灵槎转，丰城宝剑新。将军临北塞，天子入西秦。

未作三台辅，宁为五老臣。今宵颖川曲，谁识聚贤人。

卷 59_4【风】

李峤

落日生蘋末，摇扬遍远林。带花疑凤舞，向竹似龙吟。
月动临秋扇，松清入夜琴。若至兰台下，还拂楚王襟。

卷 59_5【云】

李峤

英英大梁国，郁郁秘书台。碧落从龙起，青山触石来。
官名光邃古，盖影耿轻埃。飞感高歌发，威加四海回。

卷 59_6【烟】

李峤

瑞气凌青阁，空濛上翠微。迥浮双阙路，遥拂九仙衣。
桑柘迎寒色，松篁暗晚晖。还当紫霄上，时接彩鸾飞。

卷 59_7 【露】

李峤

滴沥明花苑，葳蕤泫竹丛。玉垂丹棘上，珠湛绿荷中。
夜警千年鹤，朝零七月风。愿凝仙掌内，长奉未央宫。

卷 59_8 【雾】

李峤

曹公迷楚泽，汉帝出平城。涿鹿妖氛静，丹山霁色明。
类烟飞稍重，方雨散还轻。倘入非熊兆，宁思玄豹情。

卷 59_9 【雨】

李峤

西北云肤起，东南雨足来。灵童出海见，神女向台回。
斜影风前合，圆文水上开。十旬无破块，九土信康哉。

卷 59_10【雪】

李峤

瑞雪惊千里，同云暗九霄。地疑明月夜，山似白云朝。
逐舞花光动，临歌扇影飘。大周天阙路，今日海神朝。

卷 59_11【山】

李峤

地镇标神秀，峨眉上翠氛。泉飞一道带，峰出半天云。
古壁丹青色，新花绮绣纹。已开封禅所，希谒圣明君。

卷 59_12【石】

李峤

宗子维城固，将军饮羽威。岩花鉴里发，云叶锦中飞。
入宋星初陨，过湘燕早归。倘因持补极，宁复想支机。

卷 59_13【原】

李峤

玉粲销忧日，江淹起恨年。带川遥绮错，分隰迥阡眠。
□□横周甸，莓苔阙晋田。方知急难响，长在脊令篇。

卷 59_14【野】

李峤

凤出秦郊迥，鹑飞楚塞空。苍梧云影去，涿鹿雾光通。
草暗少原绿，花明入蜀红。谁言版筑士，犹处傅岩中。

卷 59_15【田】

李峤

贡禹怀书日，张衡作赋辰。杏花开凤辇，萑叶布龙鳞。
瑞麦两岐秀，嘉禾同颖新。宁知帝王力，击壤自安贫。

卷 59_16 【道】

李峤

铜驼分巩洛，剑阁低临邛。紫微三千里，青楼十二重。
玉关尘似雪，金穴马如龙。今日中衢上，尧尊更可逢。

卷 59_17 【海】

李峤

习坎疏丹壑，朝宗合紫微。三山巨鳌涌，万里大鹏飞。
楼写春云色，珠含明月辉。会因添雾露，方逐众川归。

卷 59_18 【江】

李峤

日夕三江望，灵潮万里回。霞津锦浪云，月浦练花开。
湍似黄牛去，涛从白马来。英灵已杰出，谁识卿云才。

卷 59_19【河】

李峤

源出昆仑中，长波接汉空。桃花来马颊，竹箭入龙宫。
德水千年变，荣光五色通。若披兰叶检，□□□□□。

卷 59_20【洛】

李峤

九洛韶光媚，三川物候新。花明丹凤浦，日映玉鸡津。
元礼期仙客，陈王睹丽人。神龟方锡瑞，绿字重来臻。

卷 59_21【城】

李峤

四塞称天府，三河建洛都。飞云霭层阙，白日丽南隅。
独下仙人凤，群惊御史乌。何辞一万里，边徼捍匈奴。

卷 59_22【门】

李峤

奕奕彤闱下，煌煌紫禁隈。阿房万户列，阊阖九重开。
疏广遗荣去，于公待驷来。讵知金马侧，方朔有奇才。

卷 59_23【市】

李峤

闐闐开三市，旗亭起百寻。渐离初击筑，司马正弹琴。
细柳龙鳞映，长槐兔月阴。徒知观卫玉，讵肯挂秦巾。

卷 59_24【井】

李峤

玉辇谈仙客，铜台赏魏君。蜀都宵映火，杞国旦生云。
向日莲花净，含风李树薰。已开千里国，还聚五星文。

卷 59_25【宅】

李峤

寂寞蓬蒿径，喧喧湫隘庐。屡逢长者辙，时引故人车。
孟母迁邻罢，将军辞第初。谁怜草玄处，独对一床书。

卷 59_26【池】

李峤

彩棹浮太液，清觞醉习家。诗情对明月，云曲拂流霞。
烟散龙形净，波含凤影斜。安仁动秋兴，鱼鸟思空赊。

卷 59_27【楼】

李峤

百尺重城际，千寻大道隈。汉宫井干起，吴国落星开。
笛怨绿珠去，箫随弄玉来。销忧聊暇日，谁识仲宣才。

卷 59_28【桥】

李峤

乌鹊填应满，黄公去不归。势疑虹始见，形似雁初飞。
妙应七星制，高分半月辉。秦王空构石，仙岛远难依。

卷 59_29【经】

李峤

汉室鸿儒盛，邹堂大义明。五千道德阐，三百礼仪成。
青紫方拾芥，黄金徒满籝。谁知怀逸辩，重席冠群英。

卷 59_30【史】

李峤

马记天官设，班图地里新。善谈方亹亹，青简见彬彬。
方朔初闻汉，荆轲昔向秦。正辞堪载笔，终冀作良臣。

卷 59_31【诗】

李峤

都尉仙凫远，梁王驷马来。扇中纨素制，机上锦纹回。
天子三章传，陈王七步才。缁衣久擅美，祖德信悠哉。

卷 59_32【赋】

李峤

布义孙卿子，登高楚屈平。铜台初下笔，乐观正飞缨。
乍有凌云势，时闻掷地声。造端长体物，无复大夫名。

卷 59_33【书】

李峤

削简龙文见，临池鸟迹舒。河图八卦出，洛范九畴初。
垂露春光满，崩云骨气馀。请君看入木，一寸乃非虚。

卷 59_34 【檄】

李峤

羽檄本宣明，由来□木声。联翩至汉国，迢递入燕营。
毛义持书去，张仪韞璧行。曹风虽觉愈，陈草始知名。

卷 59_35 【纸】

李峤

妙迹蔡侯施，芳名左伯驰。云飞锦绮落，花发缥红披。
舒卷随幽显，廉方合轨仪。莫惊反掌字，当取葛洪规。

卷 59_36 【笔】

李峤

握管门庭侧，含毫山水隈。霜辉简上发，锦字梦中开。
鹦鹉摛文至，麒麟绝句来。何当遇良史，左右振奇才。

卷 59_37 【砚】

李峤

左思裁赋日，王充作论年。光随锦文发，形带石岩圆。
积润循毫思，开池小学前。君苗徒见蕪，谁咏士衡篇。

卷 59_38 【墨】

李峤

长安分石炭，上党结松心。绕画蝇初落，含滋绶更深。
悲丝光易染，叠素彩还沉。别有张芝学，书池幸见临。

卷 59_39 【剑】

李峤

我有昆吾剑，求趋夫子庭。白虹时切玉，紫气夜干星。
铎上芙蓉动，匣中霜雪明。倚天持报国，画地取雄名。

卷 59_40【刀】

李峤

列辟鸣鸾至，惟良佩犊旋。带环疑写月，引鉴似含泉。
入梦华梁上，含锋彩笔前。莫惊一百炼，特拟定三边。

卷 59_41【箭】

李峤

汉甸初收羽，燕城忽解围。影随流水急，光带落星飞。
夏列三成范，尧沉九日辉。断蛟云梦泽，希为识忘归。

卷 59_42【弹】

李峤

侠客持苏合，佳游满帝乡。避丸深可诮，求炙遂难忘。
金迸疑星落，珠沉似月光。谁知少孺子，将此见吴王。

卷 59_43【弩】

李峤

挺质本轩皇，申威振远方。机张惊雉雉，玉彩耀星芒。
高鸟行应尽，清猿坐见伤。苏秦六百步，持此说韩王。

卷 59_44【旗】

李峤

桂影承宵月，虹辉接曙云。纵横齐八阵，舒卷引三军。
日薄蛟龙影，风翻鸟隼文。谁知怀勇志，蟠地几缤纷。

卷 59_45【旌】

李峤

告善康庄侧，求贤市肆中。拥麾分彩雉，持节曳丹虹。
影丽天山雪，光摇朔寒风。方知美周政，抗旆赋车攻。

卷 59_46【戈】

李峤

富父舂喉日，殷辛漂杵年。晓霜含白刃，落影驻雕鋌。
夕摎金门侧，朝提玉塞前。愿随龙影度，横□阵云边。

卷 59_47【鼓】

李峤

舜日谐鼗响，尧年韵土声。向楼疑吹击，震谷似雷惊。
仙鹤排门起，灵鼉带水鸣。乐云行已奏，礼曰翼相成。

卷 59_48【弓】

李峤

桃文称辟恶，桑质表初生。宛转雕鞬际，依稀半月明。
遥弯落雁影，虚引怯猿声。徒切乌号思，攀龙遂不成。

卷 59_49【琴】

李峤

名士竹林隈，鸣琴宝匣开。风前中散至，月下步兵来。
淮海多为室，梁岷旧作台。子期如可听，山水响馀哀。

卷 59_50【瑟】

李峤

伏羲初制法，素女昔传名。流水嘉鱼跃，丛台舞凤惊。
嘉宾饮未极，君子娱俱并。倘入丘之户，应知由也情。

卷 59_51【琵琶】

李峤

朱丝闻岱谷，铄质本多端。半月分弦出，丛花拂面安。
将军曾制曲，司马屡陪观。本是胡中乐，希君马上弹。

卷 59_52 【箏】

李峤

蒙恬芳轨设，游楚妙弹开。新曲帐中发，清音指下来。
钿装模六律，柱列配三才。莫听西秦奏，箏箏有剩哀。

卷 59_53 【钟（一作宋之问诗）】

李峤

既接南邻磬，还随北里笙。平陵通曙响，长乐警宵声。
秋至含霜动，春归应律鸣。欲知常待扣，金虚有馀清。

卷 59_54 【箫】

李峤

虞舜调清管，王褒赋雅音。参差横凤翼，搜索动人心。
□□□□□，□□□□□。□□□□□，□□□□□。

卷 59_55 【笛】

李峤

羌笛写龙声，长吟入夜清。关山孤月下，来向陇头鸣。
逐吹梅花落，含春柳色惊。行观向子赋，坐忆旧邻情。

卷 59_56 【笙】

李峤

悬匏曲沃上，孤筱汶阳隈。形写歌鸾翼，声随舞凤哀。
欢娱分北里，纯孝即南陔。今日虞音奏，跼跼鸟兽来。

卷 59_57 【歌】

李峤

汉帝临汾水，周仙去洛滨。郢中吟白雪，梁上绕飞尘。
响发行云驻，声随子夜新。愿君听扣角，当自识贤臣。

卷 59_58【舞】

李峤

妙伎游金谷，佳人满石城。霞衣席上转，花岫雪前朝。
仪凤谐清曲，回鸾应雅声。非君一愿重，谁赏素腰轻。

第六十卷

卷 60_1【珠】

李峤

灿烂金舆侧，玲珑玉殿隈。昆池明月满，合浦夜光回。
彩逐灵蛇转，形随舞凤来。甘泉宫起罢，花媚望风台。

卷 60_2【玉】

李峤

映石先过魏，连城欲向秦。洛阳陪胜友，燕赵类佳人。
方水晴虹媚，常山瑞马新。徒为卞和识，不遇楚王珍。

卷 60_3【金】

李峤

南楚标前贡，西秦识旧城。祭天封汉岭，掷地警孙声。

向日披沙净，含风振铎鸣。方同杨伯起，独有四知名。

卷 60_4【银】

李峤

思妇屏辉掩，游人烛影长。玉壶初下箭，桐井共安床。
色带长河色，光浮满月光。灵山有珍瓮，仙阙荐君王。

卷 60_5【钱】

李峤

汉日五铢建，姬年九府流。天龙带泉宝，地马列金沟。
赵壹囊初乏，何曾箸欲收。金门应入论，玉井冀来求。

卷 60_6【锦】

李峤

汉使巾车远，河阳步障陈。云浮仙石日，霞满蜀江春。
机迴回文巧，绅兼束发新。若逢楚王贵，不作夜行人。

卷 60_7【罗】

李峤

妙舞随裙动，行歌入扇清。莲花依帐发，秋月鉴帷明。
云薄衣初卷，蝉飞翼转轻。若珍三代服，同擅绮紈名。

卷 60_8【绫】

李峤

金缕通秦国，为裘指魏君。落花遥写雾，飞鹤近图云。
马眼冰凌影，竹根雪霰文。何当画秦女，烟际坐氤氲。

卷 60_9【素】

李峤

□□□□女，纤腰洛浦妃。□□远方望，雁足上林飞。
妙夺蛟绡色，光腾月扇辉。非君下路去，谁赏故人机。

卷 60_10【布】

李峤

御绩创羲黄，缙冠表素王。瀑飞临碧海，火浣擅炎方。
孙被登三相，刘衣阐四方。伫因舂斗粟，来晓棣华芳。

卷 60_11【舟】

李峤

征棹三江暮，连樯万里回。相乌风际转，画鹢浪前开。
羽客乘霞至，仙人弄月来。何当同传说，特展巨川材。

卷 60_12【车】

李峤

天子驭金根，蒲轮辟四门。五神趋雪至，双毂似雷奔。
丹凤栖金辖，非熊载宝轩。无阶忝虚左，珠乘奉王言。

卷 60_13【床】

李峤

传闻有象床，畴昔献君王。玳瑁千金起，珊瑚七宝妆。
桂筵含柏馥，兰席拂沉香。愿奉罗帷夜，长乘秋月光。

卷 60_14【席】

李峤

辟席承宣父，重筵揖戴公。桂香浮半月，兰气袭回风。
舞拂丹霞上，歌清白雪中。伫将文绮色，舒卷帝王宫。

卷 60_15【帷】

李峤

久闭先生户，高褰太守车。罗将翡翠合，锦逐凤皇舒。
明月弹琴夜，清风入幌初。方知决胜策，黄石受兵书。

卷 60_16【帘】

李峤

清风时入燕，紫殿几含秋。暧暧笼铃阁，纤纤上玉钩。
窗中翡翠动，户外水精浮。巧作盘龙势，长迎飞燕游。

卷 60_17【屏】

李峤

洞彻琉璃蔽，威纆屈膝回。锦中云母列，霞上织成开。
山水含春动，神仙倒景来。修身兼竭节，谁识作铭才。

卷 60_18【被】

李峤

桂友寻东阁，兰交聚北堂。象筵分锦绣，罗荐合鸳鸯。
光逸偷眠稳，王章泣恨长。孔怀欣共寝，棣萼几含芳。

卷 60_19【鉴】

李峤

明鉴掩尘埃，含情照魏台。日中乌鹊至，花里凤凰来。
玉彩疑冰彻，金辉似月开。方知乐彦辅，自有鉴人才。

卷 60_20【扇】

李峤

翟羽旧传名，蒲葵价不轻。花芳不满面，罗薄诟障声。
御热含风细，临秋带月明。同心如可赠，持表合欢情。

卷 60_21【烛】

李峤

兔月清光隐，龙盘画烛新。三星花入夜，四序玉调晨。
浮炷依罗幌，吹香匝绮茵。若逢燕国相，持用举贤人。

卷 60_22 【酒】

李峤

孔坐洽良俦，陈筵几献酬。临风竹叶满，湛月桂香浮。
每接高阳宴，长陪河朔游。会从玄石饮，云雨出圆丘。

卷 60_23 【兰】

李峤

虚室重招寻，忘言契断金。英浮汉家酒，雪俪楚王琴。
广殿轻香发，高台远吹吟。河汾应擢秀，谁肯访山阴。

卷 60_24 【菊】

李峤

玉律三秋暮，金精九日开。荣舒洛媛浦，香泛野人怀。
霾靡寒潭侧，丰茸晓岸隈。黄花今日晚，无复白衣来。

卷 60_25 【竹】

李峤

高簌楚江濱，婵娟合曙氛。白花搖鳳影，青節動龍文。
葉掃東南日，枝捎西北云。誰知湘水上，流淚獨思君。

卷 60_26 【藤】

李峤

吐吐依松磴，舒苗長石台。神農嘗藥罷，質子寄書來。
色映蒲萄架，花分竹葉杯。金堤不見識，玉潤幾重開。

卷 60_27 【萱】

李峤

屣步尋芳草，忘憂自結叢。黃英開養性，綠葉正依籠。
色湛仙人露，香傳少女風。還依北堂下，曹植動文雄。

卷 60_28【茅】

李峤

楚甸供王日，衡阳入贡年。麇包青野外，鸱啸绮楹前。
尧帝成茨罢，殷汤祭雨旋。方期大君锡，不惧小巫捐。

卷 60_29【荷】

李峤

新溜满澄陂，圆荷影若规。风来香气远，日落盖阴移。
鱼戏排缃叶，龟浮见绿池。魏朝难接采，楚服但同披。

卷 60_30【萍】

李峤

二月虹初见，三春蚁正浮。青蘋含吹转，紫蒂带波流。
屡逐明神荐，常随旅客游。既能甜似蜜，还绕楚王舟。

卷 60_31【菱】

李峤

钜野韶光暮，东平春溜通。影摇江浦月，香引棹歌风。
日色翻池上，潭花发镜中。五湖多赏乐，千里望难穷。

卷 60_32【瓜】

李峤

欲识东陵味，青门五色瓜。龙蹄远珠履，女臂动金花。
六子方呈瑞，三仙实可嘉。终朝奉絺绤，谒帝伫非赊。

卷 60_33【松】

李峤

郁郁高岩表，森森幽涧陲。鹤栖君子树，风拂大夫枝。
百尺条阴合，千年盖影披。岁寒终不改，劲节幸君知。

卷 60_34 【桂】

李峤

未植银宫里，宁移玉殿幽。枝生无限月，花满自然秋。
侠客条为马，仙人叶作舟。愿君期道术，攀折可淹留。

卷 60_35 【槐】

李峤

暮律移寒火，春宫长旧栽。叶生驰道侧，花落凤庭隈。
烈士怀忠触，鸿儒访业来。何当赤墀下，疏干拟三台。

卷 60_36 【柳】

李峤

杨柳郁氤氲，金堤总翠氛。庭前花类雪，楼际叶如云。
列宿分龙影，芳池写凤文。短箫何以奏，攀折为思君。

卷 60_37【桐】

李峤

孤秀峰阳岑，亭亭出众林。春光杂凤影，秋月弄圭阴。
高映龙门迥，双依玉井深。不因将入爨，谁谓作鸣琴。

卷 60_38【桃】

李峤

独有成蹊处，秾华发井傍。山风凝笑脸，朝露泫啼妆。
隐士颜应改，仙人路渐长。还欣上林苑，千岁奉君王。

卷 60_39【李】

李峤

潘岳闲居日，王戎戏陌辰。蝶游芳径馥，莺啭弱枝新。
叶暗青房晚，花明玉井春。方知有灵干，特用表真人。

卷 60_40 【梨】

李峤

擅美玄光侧，传芳瀚海中。凤文疏象郁，花影丽新丰。
色对瑶池紫，甘依大谷红。若令逢汉主，还冀识张公。

卷 60_41 【梅】

李峤

大庾敛寒光，南枝独早芳。雪含朝暝色，风引去来香。
妆面回青镜，歌尘起画梁。若能遥止渴，何暇泛琼浆。

卷 60_42 【橘】

李峤

万里盘根植，千秋布叶繁。既荣潘子赋，方重陆生言。
玉花含霜动，金衣逐吹翻。愿辞湘水曲，长茂上林园。

卷 60_43 【凤】

李峤

有鸟居丹穴，其名曰凤凰。九苞应灵瑞，五色成文章。
屡向秦楼侧，频过洛水阳。鸣岐今日见，阿阁伫来翔。

卷 60_44 【鹤】

李峤

黄鹤远联翩，从鸾下紫烟。翱翔一万里，来去几千年。
已憩青田侧，时游丹禁前。莫言空警露，犹冀一闻天。

卷 60_45 【乌】

李峤

日路朝飞急，霜台夕影寒。联翩依月树，迢递绕风竿。
白首何年改，青琴此夜弹。灵台如可托，千里向长安。

卷 60_46 【鹊】

李峤

不分荆山抵，甘从石印飞。危巢畏风急，绕树觉星稀。
喜逐行人至，愁随织女归。倘游明镜里，朝夕动光辉。

卷 60_47 【雁】

李峤

春晖满朔方，归雁发衡阳。望月惊弦影，排云结阵行。
往还倦南北，朝夕苦风霜。寄语能鸣侣，相随入帝乡。

卷 60_48 【鳧】

李峤

飒沓睢阳渚，浮游汉水隈。钱飞出井见，鹤引入琴哀。
李陵赋诗罢，王乔曳舄来。何当归太液，翱集动成雷。

卷 60_49【莺】

李峤

芳树杂花红，群莺乱晓空。声分折杨吹，娇韵落梅风。
写啭清弦里，迁乔暗木中。友生若可冀，幽谷响还通。

卷 60_50【雉】

李峤

白雉振朝声，飞来表太平。楚郊疑凤出，陈宝若鸡鸣。
童子怀仁至，中郎作赋成。冀君看饮啄，耿介独含情。

卷 60_51【燕】

李峤

天女伺辰至，玄衣澹碧空。差池沐时雨，颉颃舞春风。
相贺雕阑侧，双飞翠幕中。勿惊留爪去，犹冀误吴宫。

卷 60_52 【雀】

李峤

大厦初成日，嘉宾集杏梁。衔书表周瑞，入幕应王祥。
暮宿江城里，朝游涟水傍。愿齐鸿鹄至，希逐凤凰翔。

卷 60_53 【龙】

李峤

衔烛耀幽都，含章拟凤雏。西秦饮渭水，东洛荐河图。
带火移星陆，升云出鼎湖。希逢圣人步，庭阙正晨趋。

卷 60_54 【麟】

李峤

汉祀应祥开，鲁郊西狩回。奇音中钟吕，成角喻英才。
画像临仙阁，藏书入帝台。若惊能吐浦，为待凤凰来。

卷 60_55【象】

李峤

郁林开郡毕，维扬作贡初。万推方演梦，惠子正焚书。
执燧奔吴战，量舟入魏墟。六牙行致远，千叶奉高居。

卷 60_56【马】

李峤

天马本来东，嘶惊御史骢。苍龙遥逐日，紫燕迥追风。
明月来鞍上，浮云落盖中。得随穆天子，何假唐成公。

卷 60_57【牛】

李峤

齐歌初入相，燕阵早横功。欲向桃林下，先过梓树下。
在吴频喘月，奔梦屡惊风。不用五丁士，如何九折通。

卷 60_58【豹】

李峤

车法肇宗周，麟文阐大猷。还将君子变，来蕴太公筹。
委质超羊鞞，飞名列虎侯。若令逢雨露，长隐南山幽。

卷 60_59【熊】

李峤

导洛宜阳右，乘春别馆前。昭仪忠汉日，太傅翊周年。
列射三侯满，兴师七步旋。莫言舒紫褥，犹异饮清泉。

卷 60_60【鹿】

李峤

涿鹿闻中冀，秦原辟帝畿。柰花开旧苑，萍叶蔼前诗。
道士乘仙日，先生折角时。方怀丈夫志，抗首别心期。

卷 60_61【羊】

李峤

绝饮惩浇俗，行驱梦逸材。仙人拥石去，童子驭车来。
夜玉含星动，晨毡映雪开。莫言鸿渐力，长牧上林隈。

卷 60_62【兔】

李峤

上蔡应初击，平风远不稀。目随槐叶长，形逐桂条飞。
汉月澄秋色，梁园映雪辉。唯当感纯孝，郛郭引兵威。

第六十一卷

卷 61_1 【人日侍宴大明宫恩赐彩缕人胜应制】

李峤

凤城景色已含韶，人日风光倍觉饶。
桂吐半轮迎此夜，蓂开七叶应今朝。
鱼猜水冻行犹涩，莺喜春熙弄欲娇。
愧奉登高摇彩翰，欣逢御气上丹霄。

卷 61_2 【奉和初春幸太平公主南庄应制（景龙三年二月十一日）】

李峤

主家山第接云开，天上春游动地来。
羽骑参差花外转，霓旌摇曳日边回。
还将石榴调琴曲，更取峰霞入酒杯。
鸾辂已辞乌鹊渚，箫声犹绕凤凰台。

卷 61_3【太平公主山亭侍宴应制（景龙三年八月十三日）】

李峤

黄金瑞榜绛河隈，白玉仙舆紫禁来。碧树青岑云外耸，
朱楼画阁水中开。龙舟下瞰蛟人室，羽节高临凤女台。
遽惜欢娱歌吹晚，挥戈更却曜灵回。

卷 61_4【奉和拜洛应制】

李峤

七萃銮舆动，千年瑞检开。文如龟负出，图似凤衔来。
殷荐三神享，明禋万国陪。周旗黄鸟集，汉幄紫云回。
日暮钩陈转，清歌上帝台。

卷 61_5【奉和幸大荐福寺应制（寺即中宗旧宅）】

李峤

雁沼开香域，鹦林降彩旂。还窥图凤宇，更坐跃龙川。
桂舆朝群辟，兰宫列四禅。半空银阁断，分砌宝绳连。
甘雨苏焦泽，慈云动沛篇。独惭贤作砺，空喜福成田。

卷 61_6 【奉和幸长安故城未央宫应制】

李峤

旧宫贤相筑，新苑圣君来。运改城隍变，年深栋宇摧。
后池无复水，前殿久成灰。莫辨祈风观，空传承露杯。
宸心千载合，睿律九韵开。今日联章处，犹疑上柏台。

卷 61_7 【奉和幸望春宫送朔方总管张仁亶】

李峤

玉塞征骄子，金符命老臣。三军张武旆，万乘饯行轮。
猛气凌玄朔，崇恩降紫宸。投醪还结士，辞第本忘身。
露下鹰初击，风高雁欲宾。方销塞北徼，还靖漠南尘。

卷 61_8 【奉和幸三会寺应制】

李峤

故台苍颉里，新邑紫泉居。岁在开金寺，时来降玉舆。
龙形虽近刹，鸟迹尚留书。竹是蒸青外，池仍点墨馀。
天文光圣草，宝思合真如。谬奉千龄日，欣陪十地初。

卷 61_9【奉和天枢成宴夷夏群僚应制】

李峤

辙迹光西崦，勋庸纪北燕。何如万方会，颂德九门前。
灼灼临黄道，迢迢入紫烟。仙盘正下露，高柱欲承天。
山类丛云起，珠疑大火悬。声流尘作劫，业固海成田。
帝泽倾尧酒，宸歌掩舜弦。欣逢下生日，还睹上皇年。

卷 61_10【皇帝上礼抚事述怀】

李峤

配极辉光远，承天顾托隆。负图济多难，脱履归成功。
圣道昭永锡，邕言让在躬。还推万方重，咸仰四门聪。
恭已忘自逸，因人体至公。垂旒沧海晏，解网法星空。
云散天五色，春还日再中。称觴合纓弁，率舞应丝桐。
凯乐深居镐，传歌盛饮丰。小臣滥簪笔，无以颂唐风。

卷 61_11【奉和幸韦嗣立山庄侍宴应制】

李峤

南洛师臣契，东岩王佐居。幽情遗绂冕，宸眷属樵渔。

制下峒山跸，恩回灞水舆。松门驻旌盖，薛幄引簪裾。
石磴平黄陆，烟楼半紫虚。云霞仙路近，琴酒俗尘疏。
乔木千龄外，悬泉百丈馀。崖深经炼药，穴古旧藏书。
树宿抟风鸟，池潜纵壑鱼。宁知天子贵，尚忆武侯庐。

卷 61_12【倡妇行】

李峤

十年倡家妇，三秋边地人。红妆楼上歇，白发陇头新。
夜夜风霜苦，年年征戍频。山西长落日，塞北久无春。
团扇辞恩宠，回文赠苦辛。胡兵屡攻战，汉使绝和亲。
消息如瓶井，沉浮似路尘。空馀千里月，照妾两眉颦。

卷 61_13【饯薛大夫护边】

李峤

荒隅时未通，副相下临戎。授律星芒动，分兵月晕空。
犀皮拥青囊，象齿饰雕弓。决胜三河勇，长驱六郡雄。
登山窥代北，屈指计辽东。伫见燕然上，抽毫颂武功。

卷 61_14 【和杜学士旅次淮口阻风】

李峤

夕吹生寒浦，清淮上暝潮。迎风欲举棹，触浪反停桡。
淼漫烟波阔，参差林岸遥。日沉丹气敛，天敞白云销。
水雁衔芦叶，沙鸥隐荻苗。客行殊未已，川路几迢迢。

卷 61_15 【送光禄刘主簿之洛】

李峤

函谷双崤右，伊川二陕东。仙舟宵将隔，芳辇暂云同。
朋席馀欢尽，文房旧侣空。他乡千里月，岐路九秋风。
背枥嘶班马，分洲叫断鸿。别后青山外，相望白云中。

卷 61_16 【送骆奉礼从军】

李峤

玉塞边烽举，金坛庙略申。羽书资锐笔，戎幕引英宾。
剑动三军气，衣飘万里尘。琴尊留别赏，风景惜离晨。
笛梅含晚吹，营柳带馀春。希君勒石返，歌舞入城闉。

卷 61_17【王屋山第之侧杂构小亭，暇日与群公同游】

李峤

桂亭依绝巘，兰榭俯回溪。绮栋鱼鳞出，雕甍凤羽栖。
引泉聊涨沼，凿磴且通蹊。席上山花落，帘前野树低。
弋林开曙景，钓渚发晴霓。狎水惊梁雁，临风听楚鸡。
复看题柳叶，弥喜荫桐圭。

卷 61_18【奉和杜员外扈从教阅】

李峤

杪冬岩杀气，穷纪送颓光。薄狩三农隙，大阅五戎场。
菜田初起烧，兰野正开防。夹岸虹旗转，分朋兽罟张。
燕弧带晓月，吴剑动秋霜。原启前禽路，山萦后骑行。
云区坠日羽，星苑毙天狼。礼振军容肃，威宣武节扬。
神心体殷祝，灵兆叶姬祥。幸陪仙驾末，欣采翰林芳。

卷 61_19【军师凯旋自邕州顺流舟中】

李峤

鸣鞞入嶂口，泛舸历川湄。尚想江陵阵，犹疑下濑师。

岸回帆影疾，风逆鼓声迟。萍叶沾兰桨，林花拂桂旗。
弓鸣苍隼落，剑动白猿悲。芳树吟羌管，幽篁入楚词。
全军多胜策，无战在明时。寄谢山东妙，长缨徒自欺。

卷 61_20【夏晚九成宫呈同僚】

李峤

碣馆分襄野，平台架射峰。英藩信炜烨，胜地本从容。
林引梧庭凤，泉归竹沼龙。小轩恒共处，长坂属相从。
野席兰琴奏，山台桂酒醺。一枰移昼景，六著尽宵钟。
枚藻清词律，邹谈耀辩锋。结欢良有裕，联采愧无庸。
暂悦丘中赏，还希物外踪。风烟远近至，鱼鸟去来逢。
月润横千丈，云崖列万重。树红山果熟，崖绿水苔浓。
愿以西园柳，长间北岩松。

卷 61_21【田假限疾不获还庄，载想田园兼思亲友，率成短韵用写长怀赠杜幽素】

李峤

游宦劳牵网，风尘久化衣。迹驰东苑路，望阻北岩扉。
及此承休告，聊将狎遁肥。十旬俄委疾，三径且殊归。
茂陵窅难即，灵台暂可依。疲痾旅城寺，延想属郊畿。
夕梦园林是，晨瞻邑里非。绿畴良已稔，清濠旷不追。

野花何处落，山月几秋辉。彼美符商政，优游绝汉机。
高情物累遣，逸气烟霞飞。乐道方无闷，怀贤独有违。
尊虚旧园酒，琴静故人徽。夏沼莲初发，秋田麦稍稀。
何当携手去，岁暮采芳菲。

卷 61_22 【刘侍读见和山邸十篇重申此赠】

李峤

神岳瑶池圃，仙宫玉树林。乘时警天御，清暑涤宸襟。
梁驾陪玄赏，淄庭掩翠岑。对岩龙岫出，分壑雁池深。
檐迥松萝映，窗高石镜临。落泉奔涧响，惊吹助猿吟。
野气迷凉燠，山花杂古今。英藩盛宾侣，胜景想招寻。
践径披兰叶，攀崖引桂阴。穆生时泛醴，邹子或调琴。
雉翳分场合，鱼钩向浦沉。朝游极斜景，夕宴待横参。
顾己惭铅锷，叨名齿珎簪。斩依朱邸馆，还畅白云心。
丘壑信多美，烟霞得所钦。寓言摅宿志，窃吹简知音。
奖价逾珍石，酬文重振金。方从仁智所，携手濯清浔。

卷 61_23 【晚秋喜雨】

李峤

积阳躔首夏，隆旱届徂秋。炎威振皇服，歊景暴神州。
气涤朝川郎，光澄夕照浮。草木委林甸，禾黍悴原畴。

国惧流金匱，人深悬磬忧。紫宸竞履薄，丹宸念推沟。
望肃坛场祀，冤申囹圄囚。御车迁玉殿，荐菲撤琼羞。
济窘邦储发，蠲穷井赋优。服闲云骥屏，冗术土龙修。
睿感通三极，天诚贯六幽。夏祈良未拟，商祷讵为俦。
穴蚁祗符应，山蛇毒影收。腾云八际满，飞雨四溟周。
聚霭笼仙阙，连霏绕画楼。旱陂仍积水，涸沼更通流。
晚穗萎还结，寒苗瘁复抽。九农欢岁阜，万宇庆时休。
野洽如坻咏，途喧击壤讴。幸闻东李道，欣奉北场游。

卷 61_24 【中秋月二首】

李峤

盈缺青冥外，东风万古吹。何人种丹桂，不长出轮枝。
圆魄上寒空，皆言四海同。安知千里外，不有雨兼风。

卷 61_25 【侍宴桃花园咏桃花应制】

李峤

岁去无言忽憔悴，时来含笑吐氛氲。
不能拥路迷仙客，故欲开蹊待圣君。

卷 61_26 【奉和圣制幸韦嗣立山庄应制】

李峤

万骑千官拥帝车，八龙三马访仙家。
凤凰原上开青壁，鹦鹉杯中弄紫霞。

卷 61_27 【游苑遇雪应制】

李峤

散漫祥云逐圣回，飘飘瑞雪绕天来。
不能落后争飞絮，故欲迎前赛早梅。

卷 61_28 【送司马先生】

李峤

蓬阁桃源两处分，人间海上不相闻。
一朝琴里悲黄鹤，何日山头望白云。

卷 61_29【风】

李峤

解落三秋叶，能开二月花。过江千尺浪，入竹万竿斜。

卷 61_30【上清晖阁遇雪】

李峤

千钟圣酒御筵披，六出祥英乱绕枝。
即此神仙对琼圃，何须辙迹向瑶池。

卷 61_31【石淙】

李峤

羽盖龙旗下绝冥，兰除薜幄坐云扃。鸟和百籁疑调管，
花发千岩似画屏。金灶浮烟朝漠漠，石床寒水夜泠泠。
自然碧洞窥仙境，何必丹丘是福庭。

第六十二卷

卷 62_1【南海乱石山作】

杜审言

涨海积稽天，群山高巖地。相传称乱石，图典失其事。
悬危悉可惊，大小都不类。乍将云岛极，还与星河次。
上耸忽如飞，下临仍欲坠。朝暾赭丹紫，夜魄炯青翠。
穹崇雾雨蓄，幽隐灵仙闕。万寻挂鹤巢，千丈垂猿臂。
昔去景风涉，今来姑洗至。观此得咏歌，长时想精异。

卷 62_2【送和西蕃使】

杜审言

使出凤凰池，京师阳春晚。圣朝尚边策，诏谕兵戈偃。
拜手明光殿，摇心上林苑。种落逾青羌，关山度赤坂。
疆场及无事，雅歌而餐饭。宁独锡和戎，更当封定远。

卷 62_3【蓬莱三殿侍宴奉敕咏终南山应制】

杜审言

北斗挂城边，南山倚殿前。云标金阙迥，树杪玉堂悬。
半岭通佳气，中峰绕瑞烟。小臣持献寿，长此戴尧天。

卷 62_4【望春亭侍游应诏】

杜审言

帝出明光殿，天临太液池。尧樽随步辇，舜乐绕行麾。
万寿祯祥献，三春景物滋。小臣同酌海，歌颂答无为。

卷 62_5【宿羽亭侍宴应制】

杜审言

步辇千门出，离宫二月开。风光新柳报，宴赏落花催。
碧水摇空阁，青山绕吹台。圣情留晚兴，歌管送馀怀。

卷 62_6【岁夜安乐公主满月侍宴应制】

杜审言

戚里生昌胤，天杯宴重臣。画楼初满月，香殿早迎春。
睿作尧君宝，孙谋梁国珍。明朝元会日，万寿乐章陈。

卷 62_7【奉和七夕侍宴两仪殿应制】

杜审言

一年衔别怨，七夕始言归。敛泪开星靥，微步动云衣。
天回兔欲落，河旷鹊停飞。那堪尽此夜，复往弄残机。

卷 62_8【大酺（永昌元年）】

杜审言

圣后乘乾日，皇明御历辰。紫宫初启坐，苍璧正临春。
雷雨垂膏泽，金钱赠下人。诏酺欢赏遍，交泰睹惟新。

卷 62_9【赋得妾薄命】

杜审言

草绿长门掩，苔青永巷幽。宠移新爱夺，泪落故情留。
啼鸟惊残梦，飞花搅独愁。自怜春色罢，团扇复迎秋。

卷 62_10【和韦承庆过义阳公主山池五首】

杜审言

野兴城中发，朝英物外求。情悬朱绂望，契动赤泉游。
海燕巢书阁，山鸡舞画楼。雨馀清晚夏，共坐北岩幽。

径转危峰逼，桥回缺岸妨。玉泉移酒味，石髓换粳香。
绾雾青丝弱，牵风紫蔓长。犹言宴乐少，别向后池塘。

携琴绕碧沙，摇笔弄青霞。杜若幽庭草，芙蓉曲沼花。
宴游成野客，形胜得仙家。往往留仙步，登攀日易斜。

攒石当轩倚，悬泉度牖飞。鹿麕冲妓席，鹤子曳童衣。
园果尝难遍，池莲摘未稀。卷帘唯待月，应在醉中归。

赏玩期他日，高深爱此时。池分八水背，峰作九山疑。
地静鱼偏逸，人闲鸟欲欺。青溪留别兴，更与白云期。

卷 62_11【和晋陵陆丞早春游望（一作韦应物诗）】

杜审言

独有宦游人，偏惊物候新。云霞出海曙，梅柳渡江春。
淑气催黄鸟，晴光转绿蘋。忽闻歌古调，归思欲沾巾。

卷 62_12【秋夜宴临津郑明府宅】

杜审言

行止皆无地，招寻独有君。酒中堪累月，身外即浮云。
露白宵钟彻，风清晓漏闻。坐携馀兴往，还似未离群。

卷 62_13【和康五庭芝望月有怀】

杜审言

明月高秋迥，愁人独夜看。暂将弓并曲，翻与扇俱团。
雾濯清辉苦，风飘素影寒。罗衣一此鉴，顿使别离难。

卷 62_14 【登襄阳城】

杜审言

旅客三秋至，层城四望开。楚山横地出，汉水接天回。
冠盖非新里，章华即旧台。习池风景异，归路满尘埃。

卷 62_15 【旅寓安南】

杜审言

交趾殊风候，寒迟暖复催。仲冬山果熟，正月野花开。
积雨生昏雾，轻霜下震雷。故乡逾万里，客思倍从来。

卷 62_16 【春日怀归】

杜审言

心是伤归望，春归异往年。河山鉴魏阙，桑梓忆秦川。
花杂芳园鸟，风和绿野烟。更怀欢赏地，车马洛桥边。

卷 62_17【代张侍御伤美人】

杜审言

二八泉扉掩，帷屏宠爱空。泪痕消夜烛，愁绪乱春风。
巧笑人疑在，新妆曲未终。应怜脂粉气，留著舞衣中。

卷 62_18【送高郎中北使】

杜审言

北狄愿和亲，东京发使臣。马衔边地雪，衣染异方尘。
岁月催行旅，恩荣变苦辛。歌钟期重锡，拜手落花春。

卷 62_19【都尉山亭】

杜审言

紫藤萦葛藟，绿刺冒蔷薇。下钓看鱼跃，探巢畏鸟飞。
叶疏荷已晚，枝亚果新肥。胜迹都无限，只应伴月归。

卷 62_20 【夏日过郑七山斋】

杜审言

共有樽中好，言寻谷口来。薜萝山径入，荷芰水亭开。
日气含残雨，云阴送晚雷。洛阳钟鼓至，车马系迟回。

卷 62_21 【送崔融】

杜审言

君王行出将，书记远从征。祖帐连河阙，军麾动洛城。
旌旗朝朔气，笳吹夜边声。坐觉烟尘扫，秋风古北平。

卷 62_22 【经行岚州】

杜审言

北地春光晚，边城气候寒。往来花不发，新旧雪仍残。
水作琴中听，山疑画里看。自惊牵远役，艰难促征鞍。

卷 62_23 【重九日宴江阴】

杜审言

蟋蟀期归晚，茱萸节候新。降霜青女月，送酒白衣人。
高兴要长寿，卑栖隔近臣。龙沙即此地，旧俗坐为邻。

卷 62_24 【除夜有怀】

杜审言

故节当歌守，新年把烛迎。冬氛恋虬箭，春色候鸡鸣。
兴尽闻壶覆，宵阑见斗横。还将万亿寿，更谒九重城。

卷 62_25 【晦日宴游】

杜审言

日晦随萸英，春情著杏花。解绅宜就水，张幕会连沙。
歌管风轻度，池台日半斜。更看金谷骑，争向石崇家。

卷 62_26 【七夕】

杜审言

白露含明月，青霞断绛河。天街七襄转，阁道二神过。
袿服锵环珮，香筵拂绮罗。年年今夜尽，机杼别情多。

卷 62_27 【守岁侍宴应制】

杜审言

季冬除夜接新年，帝子王孙捧御筵。宫阙星河低拂树，
殿廷灯烛上薰天。弹弦奏节梅风入，对局探钩柏酒传。
欲向正元歌万寿，暂留欢赏寄春前。

卷 62_28 【大酺】

杜审言

昆陵震泽九州通，士女欢娱万国同。伐鼓撞钟惊海上，
新妆袿服照江东。梅花落处疑残雪，柳叶开时任好风。
火德云官逢道泰，天长地久属年丰。

卷 62_29 【春日京中有怀】

杜审言

今年游寓独游秦，愁思看春不当春。上林苑里花徒发，
细柳营前叶漫新。公子南桥应尽兴，将军西第几留宾。
寄语洛城风日道，明年春色倍还人。

卷 62_30 【扈从出长安应制】

杜审言

分野都畿列，时乘六御均。京师旧西幸，洛道此东巡。
文物驱三统，声名走百神。龙旗萦漏夕，凤辇拂钩陈。
抚迹地灵台，游情皇鉴新。山追散马日，水忆钓鱼人。
禹食传中使，尧樽遍下臣。省方称国阜，问道识风淳。
岁晚天行吉，年丰景从亲。欢娱包历代，宇宙忽疑春。

卷 62_31 【春日江津游望】

杜审言

旅客摇边思，春江弄晚晴。烟销垂柳弱，雾卷落花轻。
飞棹乘空下，回流向日平。鸟啼移几处，蝶舞乱相迎。

忽叹人皆浊，堤防水至清。谷王常不让，深可戒中盈。

卷 62_32 【泛舟送郑卿入京】

杜审言

帝坐蓬莱殿，恩追社稷臣。长安遥向日，宗伯正乘春。
相宅开基地，倾都送别人。行舟萦绿水，列戟满红尘。
酒助欢娱洽，风催景气新。此时光乃命，谁为惜无津。

卷 62_33 【度石门山】

杜审言

石门千仞断，进水落遥空。道束悬崖半，桥欹绝涧中。
仰攀人屡息，直下骑才通。泥拥奔蛇径，云埋伏兽丛。
星躔牛斗北，地脉象牙东。开塞随行变，高深触望同。
江声连骤雨，日气抱残虹。未改朱明律，先含白露风。
坚贞深不惮，险涩谅难穷。有异登临赏，徒为造化功。

卷 62_34 【赠崔融二十韵】

杜审言

十年俱薄宦，万里各他方。云天断书札，风土异炎凉。

太息幽兰紫，劳歌奇树黄。日疑怀叔度，夜似忆真长。
北使从江表，东归在洛阳。相逢慰畴昔，相对叙存亡。
草深穷巷毁，竹尽故园荒。雅节君弥固，衰颜余自伤。
人事盈虚改，交游宠辱妨。雀罗争去翟，鹤氅竞寻王。
思极欢娱至，朋情讵可忘。琴樽横宴席，岩谷卧词场。
连骑追佳赏，城中及路傍。三川宿雨霁，四月晚花芳。
复此开悬榻，宁唯入后堂。兴酣鸛鹄舞，言洽凤凰翔。
高选俄迁职，严程已饬装。抚躬衔道义，携手恋辉光。
玉振先推美，金铭旧所防。忽嗟离别易，行役共时康。

卷 62_35 【赠苏味道】

杜审言

北地寒应苦，南庭戍未归。边声乱羌笛，朔气卷戎衣。
雨雪关山暗，风霜草木稀。胡兵战欲尽，虏骑猎犹肥。
雁塞何时入，龙城几度围。据鞍雄剑动，插笔羽书飞。
輿驾还京邑，朋游满帝畿。方期来献凯，歌舞共春辉。

卷 62_36 【和李大夫嗣真奉使存抚河东】

杜审言

六位乾坤动，三微历数迁。讴歌移火德，图谶在金天。
子月开阶统，房星受命年。祯符龙马出，宝篆凤凰传。

地即交风雨，都仍卜涧瀍。明堂唯御极，清庙乃尊先。
不宰神功运，无为大象悬。八荒平物土，四海接人烟。
已属群生泰，犹言至道偏。玺书傍问俗，旌节近推贤。
秩比司空位，官临御史员。雄词执刀笔，直谏罢楼船。
国有大臣器，朝加小会筵。将行备礼乐，送别仰神仙。
城阙周京转，关河陕服连。稍观汾水曲，俄指绛台前。
姑射聊长望，平阳遂宛然。舜耕馀草木，禹凿旧山川。
昔出诸侯上，无何霸业全。中军归战敌，外府绝兵权。
隐隐帝乡远，瞻瞻肃命虔。西河偃风俗，东壁挂星躔。
井邑粉榆社，陵园松柏田。荣光晴掩代，佳气晓侵燕。
雨霏鸿私涤，风行睿旨宣。茆嫠访疾苦，屠钓采贞坚。
人乐逢刑措，时康洽赏延。赐逾秦氏级，恩倍汉家钱。
拥传咸翘首，称觞竞比肩。拜迎弥道路，舞咏溢郊鄷。
杀气西衡白，穷阴北暝玄。飞霜遥渡海，残月迥临边。
缅邈朝廷问，周流朔塞旋。兴来探马策，俊发抱龙泉。
学总八千卷，文倾三百篇。澄清得使者，作颂有人焉。
莫以崇班阁，而云胜托捐。伟材何磊落，陋质几翩跹。
江海宁为让，巴渝转自牵。一闻歌圣道，助曲荷陶甄。

卷 62_37 【赠苏馆书记】

杜审言

知君书记本翩翩，为许从戎赴朔边。
红粉楼中应计日，燕支山下莫经年。

卷 62_38【渡湘江】

杜审言

迟日园林悲昔游，今春花鸟作边愁。
独怜京国人南窜，不似湘江水北流。

卷 62_39【戏赠赵使君美人】

杜审言

红粉青娥映楚云，桃花马上石榴裙。
罗敷独向东方去，谩学他家作使君。

第六十三卷

卷 63_1【三妇艳】

董思恭

大妇裁纨素，中妇弄明珰。小妇多姿态，登楼红粉妆。
丈人且安坐，初日渐流光。

卷 63_2【感怀】

董思恭

野郊怆新别，河桥非旧饯。惨日映峰沉，愁云随盖转。
哀笳时断续，悲旌乍舒卷。望望情何极，浪浪泪空泫。
无复昔时人，芳春共谁遣。

卷 63_3【守岁二首（此二首一作太宗诗，后题作《除夜》。）】

董思恭

暮景斜芳殿，年华丽绮宫。寒辞去冬雪，暖带入春风。

阶馥舒梅素，盘花卷烛红。共欢新故岁，迎送一宵中。

岁阴穷暮纪，献节启新芳。冬尽今宵促，年开明日长。
冰销出镜水，梅散入风香。对此欢终宴，倾壶待曙光。

卷 63_4【昭君怨二首（前首一作董初诗）】

董思恭

新年犹尚小，那堪远聘秦。裾衫沾马汗，眉黛染胡尘。
举眼无相识，路逢皆异人。唯有梅将李，犹带故乡春。

琵琶马上弹，行路曲中难。汉月正南远，燕山直北寒。
髻鬟风拂乱，眉黛雪沾残。斟酌红颜改，徒劳握镜看。

卷 63_5【咏日】

董思恭

沧海十枝晖，悬圃重轮庆。舜华发晨楹，菱彩翻朝镜。
忽遇惊风飘，自有浮云映。更也人皆仰，无待挥戈正。

卷 63_6【咏月】

董思恭

北堂未安寝，西园聊骋望。玉户照罗帏，珠轩明绮障。
别客长安道，思妇高楼上。所愿君莫违，清风时可访。

卷 63_7【咏星】

董思恭

历历东井舍，昭昭右掖垣。云际龙文出，池中鸟色翻。
流辉下月路，坠影入河源。方知颍川集，别有太丘门。

卷 63_8【咏风】

董思恭

萧萧度闾阖，习习下庭闱。花蝶自飘舞，兰蕙生光辉。
相乌正举翼，退鹢已惊飞。方从列子御，更逐浮云归。

卷 63_9 【咏云】

董思恭

帝乡白云起，飞盖上天衢。带月绮罗映，从风枝叶敷。
参差过层阁，倏忽下苍梧。因风望既远，安得久踟蹰。

卷 63_10 【咏雪】

董思恭

天山飞雪度，言是浇花朝。惜哉不我与，萧索从风飘。
鲜洁凌纨素，纷糅下枝条。良时竟何在，坐见容华销。

卷 63_11 【咏露】

董思恭

夜色凝仙掌，晨甘下帝庭。不觉九秋至，远向三危零。
芦渚花初白，葵园叶尚清。晞阳一洒惠，方愿益沧溟。

卷 63_12【咏雾】

董思恭

苍山寂已暮，翠观黯将沉。终南晨豹隐，巫峡夜猿吟。
天寒气不歇，景晦色方深。待访公超市，将予赴华阴。

卷 63_13【咏虹（一作虹蜺）】

董思恭

春暮萍生早，日落雨飞馀。横彩分长汉，倒色媚清渠。
梁前朝影出，桥上晚光舒。愿逐旌旗转，飘飘侍直庐。

卷 63_14【咏桃（一作太宗诗）】

董思恭

禁苑春光丽，花蹊几树装。缀条深浅色，点露参差光。
向日分千笑，迎风共一香。如何仙岭侧，独秀隐遥芳。

卷 63_15【咏李（一作太宗诗）】

董思恭

盘根植瀛渚，交干横倚天。舒华光四海，卷叶荫山川。

卷 63_16【咏弓（一作太宗诗）】

董思恭

上弦明月半，激箭流星远。落雁带书惊，啼猿映枝转。

卷 63_17【咏琵琶（一作太宗诗）】

董思恭

半月无双影，金花有四时。摧藏千里态，掩抑几重悲。
促节萦红袖，清音满翠帷。驶弹风响急，缓曲钏声迟。
空馀关陇恨，因此代相思。

卷 63_18【经庐岳回望江州想洛川有作】

刘允济

龟山帝始营，龙门禹初凿。出入经变化，俯仰凭寥廓。
未若兹山功，连延并巫霍。东北疏艮象，西南距坤络。
宏阜自郁盘，高标复回薄。势入柴桑渚，阴开彭蠡壑。
九江查无际，七泽纷相错。云雨散吴会，风波腾鄢郢。
迹随造化久，利与乾坤博。肸蚨精气通，纷纶潜怪作。
石渠忽见践，金房安可托。地入天子都，岩有仙人药。
二门几迢递，三宫何倏爚。咫尺穷杳冥，跬步皆恬漠。
仙才惊羽翰，幽居静龙蠖。明牧振雄词，棣华殊灼灼。
盛叶匡西夏，深谋赞禹亳。黄云覆鼎飞，绛气横川跃。
佐历符贤运，人期茂天爵。礼乐富垂髫，诗书成舞勺。
清辉靖岩电，利器腾霜锷。游圣挹衢尊，邻畿恭木铎。
岩仞包武侯，波澜控文若。旋闻刈薪楚，遽睹升葵藿。
稷契序揆图，良平公辅略。重地资出守，英藩谅求瘼。
豫章观伟材，江州访灵嶠。阳岫晓氛氲，阴崖暮萧索。
潜伏屡鲸奔，雄飞更鸷搏。惊 cb 透烟霞，腾猿乱枝格。
故园有归梦，他山飞赏乐。帝乡徒可游，湟涧终旅泊。
景物观淮海，云霄望河洛。城阙紫微星，图书玄扈阁。
神功多粉绩，元气犹斟酌。丞相下南宫，将军趋北落。
横簪并附蝉，列鼎俱调鹤。四郊时迷路，五月先投龠。
池榭宣琼管，风花乱珠箔。旧游劳梦寐，新知无快乐。
天寒欲赠言，岁暮期交约。夜琴清玉柱，秋灰变缙幕。
风云动翰林，宫徵调文籥。言泉激为浪，思绪飞成缴。

千里辉珠玑，五采含丹臆。钟鼓旋惊鷄，瑾瑜俄抵鹊。
窃价惭庸怠，叨声逾寂寞。长望限南溟，居然翳东郭。

卷 63_19【咏琴】

刘允济

昔在龙门侧，谁想凤鸣时。雕琢今为器，宫商不自持。
巴人缓疏节，楚客弄繁丝。欲作高张引，翻成下调悲。

卷 63_20【怨情】

刘允济

玉关芳信断，兰闺锦字新。愁来好自抑，念切已含嚔。
虚牖风惊梦，空床月厌人。归期尚可促，勿度柳园春。

卷 63_21【见道边死人（一作刘元济诗。《统签》并入允济诗内）】

刘允济

凄凉徒见日，冥寞讵知年。魂兮不可问，应为直如弦。

卷 63_22 【九日登玄武山旅眺】

邵大震

九月九日望遥空，秋水秋天生夕风。
寒雁一向南去远，游人几度菊花丛。

卷 63_23 【军中行路难（与骆宾王同作）】

辛常伯

君不见封狐雄虺自成群，凭深负固结妖氛。
玉玺分兵征恶少，金坛授律动将军。将军拥麾宣庙略，
战士横戈静夷落。长驱一息背铜梁，直指三危登剑阁。
阁道嵒峩起戍楼，剑门遥裔俯灵丘。邛关九折无平路，
江水双源有急流。征役无期返，他乡岁华晚。
杳杳丘陵出，苍苍林薄远。途危紫盖峰，路涩青泥坂。
去去指哀牢，行行入不毛。绝壁千里险，连山四望高。
中外分区宇，夷夏殊风土。交趾枕南荒，昆弥临北户。
川原饶毒雾，谿谷多霪雨。行潦四时流，崩查千岁古。
漂梗飞蓬不暂安，扞萝引葛陟危峦。昔时闻道从军乐，
今日方知行路难。沧江绿水东流驶，炎州丹徼南中地。
南中南斗映星河，秦关秦塞阻烟波。三春边地风光少，
五月泸川瘴疠多。朝驱疲斥候，夕息倦樵歌。
向月弯繁弱，连星转太阿。重义轻生怀一顾，

东伐西征凡几度。夜夜朝朝斑鬓新，年年岁岁戎衣故。
灞城隅，滇池水，天涯望转积，地际行无已。
徒觉炎凉节物非，不知关山千万里。弃置勿重陈，
重陈多苦辛。且悦清笳梅柳曲，讵忆芳园桃李人。
绛节红旗分日羽，丹心白刃酬明主。但令一被君王知，
谁惮三边征战苦。行路难，岐路几千端。
无复归云凭短翰，空馀望日想长安。

第六十四卷

卷 64_1【奉和圣制夏日游石淙山】

姚崇

二室三涂光地险，均霜揆日处天中。石泉石镜恒留月，
山鸟山花竞逐风。周王久谢瑶池赏，汉主悬惭玉树宫。
别有祥烟伴佳气，能随轻辇共葱葱。

卷 64_2【故洛阳城侍宴应制】

姚崇

游豫停仙跸，登临对晚晴。川凫连倒影，岩鸟应虚声。
野奏风成曲，山居云作纓。今朝丘壑上，高兴小蓬瀛。

卷 64_3【春日洛阳城侍宴】

姚崇

南山开宝历，北渚对芳蹊。的历风梅度，参差露草低。

尧樽临上席，舜乐下前溪。任重由来醉，乘酣志转迷。

卷 64_4【秋夜望月】

姚崇

明月有馀鉴，羁人殊未安。桂含秋树晚，波入夜池寒。
灼灼云枝净，光光草露团。所思迷所在，长望独长叹。

卷 64_5【夜渡江（一作柳中庸诗）】

姚崇

夜渚带浮烟，苍茫晦远天。舟轻不觉动，缆急始知牵。
听草遥寻岸，闻香暗识莲。唯看孤帆影，常似客心悬。

卷 64_6【奉和圣制龙池篇】

姚崇

恭闻帝里生灵沼，应报明君鼎业新。既协翠泉光宝命，
还符白水出真人。此时舜海潜龙跃，此地尧河带马巡。
独有前池一小雁，叨承旧惠入天津。

卷 64_7 【句】

姚崇

扇掩将雏曲，钗承堕马鬟。（见《海录碎事》，
又见后张昌宗太平公主山亭侍宴诗）

卷 64_8 【奉和御制璟与张说源乾曜同日上官命宴都堂赐诗
应制】

宋璟

丞相邦之重，非贤谅不居。老臣慵且惫，何德以当诸。
厚秩先为忝，崇班复此除。太常陈礼乐，中掖降簪裾。
圣酒山河润，仙文象纬舒。冒恩怀宠锡，陈力省空虚。
郭隗惭无骏，冯谖愧有鱼。不知周勃者，荣幸定何如。

卷 64_9 【奉和圣制同二相已下群官乐游园宴】

宋璟

侍饮终酺会，承恩续胜游。戴天惟庆幸，选地即殊尤。
北向祗双阙，南临赏一丘。曲江新溜暖，上苑杂花稠。
璚璚韶弦屡，戔戔贲帛周。醉归填畛陌，荣耀接轩裘。

卷 64_10 【奉和圣制送张说巡边】

宋璟

帝道薄存兵，王师尚有征。是关司马法，爰命总戎行。
画阁崇威信，分麾盛宠荣。聚观方结轍，出祖遂倾城。
圣酒江河润，天词象纬明。德风边草偃，胜气朔云平。
宰国推良器，为军挹壮声。至和常得体，不战即亡精。
以智泉宁竭，其徐海自清。迟还庙堂坐，赠别故人情。

卷 64_11 【奉和圣制答张说扈从南出雀鼠谷】

宋璟

秦地雄西夏，并州近北胡。禹行山启路，舜在邑为都。
忽视寒暄隔，深思险易殊。四时宗伯叙，六义宰臣铺。
征作宫常应，星环日每纡。盛哉逢道合，良以致亨衢。

卷 64_12 【蒲津迎驾】

宋璟

回銮下蒲坂，飞旆指秦京。洛上黄云送，关中紫气迎。
霞朝看马色，月晓听鸡鸣。防拒连山险，长桥压水平。

省方知化洽，察俗觉时清。天下长无事，空馀襟带名。

卷 64_13【送苏尚书赴益州】

宋璟

我望风烟接，君行霰雪飞。园亭若有送，杨柳最依依。

第六十五卷

卷 65_1【初春行宫侍宴应制得天字】

苏味道

温液吐涓涓，跳波急应弦。簪裾承睿赏，花柳发韶年。
圣酒千钟洽，宸章七曜悬。微臣从此醉，还似梦钧天。

卷 65_2【单于川对雨二首】

苏味道

崇朝遘行雨，薄晚屯密云。缘阶起素沫，竟水聚圆文。
河柳低未举，山花落已芬。清尊久不荐，淹留遂待君。

飞雨欲迎旬，浮云已送春。还从濯枝后，来应洗兵辰。
气合龙祠外，声过鲸海滨。伐邢知有属，已见静边尘。

卷 65_3【正月十五夜】

苏味道

火树银花合，星桥铁锁开。暗尘随马去，明月逐人来。
游伎皆秾李，行歌尽落梅。金吾不禁夜，玉漏莫相催。

卷 65_4【咏雾】

苏味道

氤氲起洞壑，遥裔匝平畴。乍似含龙剑，还疑映蜃楼。
拂林随雨密，度径带烟浮。方谢公超步，终从彦辅游。

卷 65_5【咏虹】

苏味道

纤馀带星渚，窈窕架天浔。空因壮士见，还共美人沉。
逸照含良玉，神花藻瑞金。独留长剑彩，终负昔贤心。

卷 65_6 【咏霜】

苏味道

金祗暮律尽，玉女暝氛归。孕冷随钟彻，飘华逐剑飞。
带日浮寒影，乘风进晚威。自有贞筠质，宁将庶草腓。

卷 65_7 【咏井】

苏味道

玲珑映玉槛，澄澈泻银床。流声集孔雀，带影出羴羊。
桐落秋蛙散，桃舒春锦芳。帝力终何有，机心庶此忘。

卷 65_8 【咏石】

苏味道

济北甄神贶，河西濯锦文。声应天池雨，影触岱宗云。
燕归犹可候，羊起自成群。何当握灵髓，高枕绝嚣氛。

卷 65_9 【奉和受图温洛应制】

苏味道

绿绮膺河检，清坛俯洛滨。天旋俄制辟，孝享属严禋。
陟配光三祖，怀柔洎百神。雾开中道日，雪敛属车尘。
预奉咸英奏，长歌亿万春。

卷 65_10 【使岭南闻崔马二御史并拜台郎】

苏味道

振鹭齐飞日，迁莺远听闻。明光共待漏，清鉴各披云。
喜得廊庙举，嗟为台阁分。故林怀柏悦，新幄阻兰薰。
冠去神羊影，车迎瑞雉群。远从南斗外，遥仰列星文。

卷 65_11 【赠封御史入台】

苏味道

故事推三独，兹辰对两闱。夕鸦共鸣舞，屈草接芳菲。
盛府持清橐，殊章动绣衣。风连台阁起，霜就简书飞。
凛凛当朝色，行行满路威。惟当击隼去，复睹落雕归。

卷 65_12【始背洛城秋郊瞩目奉怀台中诸侍御】

苏味道

薄游忝霜署，直指戒冰心。荔浦方南纪，衡皋暂北临。
山晴关塞断，川暮广城阴。场圃通圭甸，沟塍碍石林。
野童来捃拾，田叟去讴吟。蟋蟀秋风起，蒹葭晚露深。
帝城犹郁郁，征传几駸駸。回忆披书地，劳歌谢所钦。

卷 65_13【九江日南济北接蕲春南与浔阳岸】

苏味道

江路一悠哉，滔滔九派来。远潭昏似雾，前浦沸成雷。
鳞介多潜育，渔商几溯洄。风摇蜀柿下，日照楚萍开。
近漱湓城曲，斜吹蠡泽隈。锡龟犹入贡，浮兽罢为灾。
津吏挥桡疾，邮童整传催。归心讵可问，为视落潮回。

卷 65_14【和武三思于天中寺寻复礼上人之作】

苏味道

藩戚三雍暇，禅居二室隈。忽闻从桂苑，移步践花台。
敏学推多艺，高谈属辩才。是非宁滞著，空有掠嫌猜。

五行幽机畅，三蕃妙键开。味同甘露洒，香似逆风来。
砌古留方石，池清辨烧灰。人寻鹤洲返，月逐虎溪回。
企躅瞻飞盖，攀游想渡杯。愿陪为善乐，从此去尘埃。

卷 65_15【嵩山石淙侍宴应制】

苏味道

雕輿藻卫拥千官，仙洞灵溪访九丹。隐暧源花迷近路，
参差岭竹扫危坛。重崖对耸霞文驳，瀑水交飞雨气寒。
天洛宸襟有馀兴，裴回周矚驻归銮。

第六十六卷

卷 66_1【古剑篇（一作宝剑篇）】

郭震

君不见昆吾铁冶飞炎烟，红光紫气俱赫然。
良工锻炼凡几年，铸得宝剑名龙泉。龙泉颜色如霜雪，
良工咨嗟叹奇绝。琉璃玉匣吐莲花，错镂金环映明月。
正逢天下无风尘，幸得周防君子身。精光黯黯青蛇色，
文章片片绿龟鳞。非直结交游侠子，亦曾亲近英雄人。
何言中路遭弃捐，零落漂沦古狱边。虽复尘埋无所用，
犹能夜夜气冲天。古

卷 66_2【塞上】

郭震

塞外虏尘飞，频年出武威。死生随玉剑，辛苦向金微。
久戍人将老，长征马不肥。仍闻酒泉郡，已合数重围。

卷 66_3 【寄刘校书】

郭震

俗吏三年何足论，每将荣辱在朝昏。才微易向风尘老，
身贱难酬知己恩。御苑残莺啼落日，黄山细雨湿归轩。
回首汉家丞相府，昨来谁得扫重门。

卷 66_4 【同徐员外除太子舍人寓直之作】

郭震

太子擅元良，宫臣命伟长。除荣辞会府，直宿总书坊。
露湿幽岩桂，风吹便坐桑。阁连云一色，池带月重光。
叶死兰无气，荷枯水不香。遥闻秋兴作，言是晋中郎。

卷 66_5 【春江曲】

郭震

江水春沉沉，上有双竹林。竹叶坏水色，郎亦坏人心。

卷 66_6 【王昭君三首】

郭震

自嫁单于国，长衔汉掖悲。容颜日憔悴，有甚画图时。
压践冰霜域，嗟为边塞人。思从漠南猎，一见汉家尘。
闻有南河信，传言杀画师。始知君念重，更肯惜峨眉。

卷 66_7 【子夜四时歌六首·春歌】

郭震

陌头杨柳枝，已被春风吹。妾心正断绝，君怀那得知。
青楼含日光，绿池起风色。赠子同心花，殷勤此何极。

卷 66_8 【子夜四时歌六首·秋歌】

郭震

邀欢空伫立，望美频回顾。何时复采菱，江中密相遇。

辟恶茱萸囊，延年菊花酒。与子结绸缪，丹心此何有。

卷 66_9【子夜四时歌六首·冬歌】

郭震

北极严气升，南至温风谢。调丝竞短歌，拂枕怜长夜。

帷横双翡翠，被卷两鸳鸯。婉态不自得，宛转君王床。

卷 66_10【二月乐游诗】

郭震

二月芳游始，开轩望晓池。绿兰日吐叶，红蕊向盈枝。
柳色行将改，君心幸莫移。阳春遽多意，唯愿两人知。

卷 66_11【十月乐游诗】

郭震

十月严阴盛，霜气下玉台。罗衣差自解，绮帐待君开。
银箭更筹缓，金炉香气来。愁仍夜未几，已使炭成灰。

卷 66_12 【萤】

郭震

秋风凜凜月依依，飞过高梧影里时。
暗处若教同众类，世间争得有人知。

卷 66_13 【蛩】

郭震

愁杀离家未达人，一声声到枕前闻。
苦吟莫向朱门里，满耳笙歌不听君。

卷 66_14 【云】

郭震

聚散虚空去复还，野人闲处倚筇看。
不知身是无根物，蔽月遮星作万端。

卷 66_15【野井】

郭震

纵无汲引味清澄，冷浸寒空月一轮。
凿处若教当要路，为君常济往来人。

卷 66_16【米囊花】

郭震

开花空道胜于草，结实何曾济得民。
却笑野田禾与黍，不闻弦管过青春。

卷 66_17【惜花】

郭震

艳拂衣襟蕊拂杯，绕枝闲共蝶徘徊。
春风满目还惆怅，半欲离披半未开。

卷 66_18【莲花】

郭震

脸腻香薰似有情，世间何物比轻盈。
湘妃雨后来池看，碧玉盘中弄水晶。

第六十七卷

卷 67_1【弘农清岩曲有磐石可坐，宋十一每拂拭待余，寄诗赠之】

田游岩

信彼称灵石，居然狎遁栖。裴回承翠嶂，斌驳带深溪。
夕阴起层岫，清景半虹霓。风来应啸阮，波动可琴嵇。
仆也颍阳客，望彼空思齐。傥见山人至，簪蒿且杖藜。

卷 67_2【和宋之问下山歌】

王无竞

日云暮兮下嵩山，路连绵兮树石间。
出谷口兮见明月，心裴回兮不能还。

卷 67_3 【北使长城】

王无竞

秦世筑长城，长城无极已。暴兵四十万，兴工九千里。
死人如乱麻，白骨相撑委。殫弊未云悟，穷毒岂知止。
胡尘未北灭，楚兵遽东起。六国复嚣嚣，两龙斗鬻鬻。
卯金竟握讖，反璧俄沦祀。仁义寝邦国，狙暴行终始。
一旦咸阳宫，翻为汉朝市。

卷 67_4 【凤台曲】

王无竞

凤台何逶迤，嬴女管参差。一旦彩云至，身去无还期。
遗曲此台上，世人多学吹。一吹一落泪，至今怜玉姿。

卷 67_5 【铜雀台】

王无竞

北登铜雀上，西望青松郭。繡帐空苍苍，陵田纷漠漠。
平生事已变，歌吹宛犹昨。长袖拂玉尘，遗情结罗幕。
妾怨在朝露，君恩岂中薄。高台奏曲终，曲终泪横落。

卷 67_6 【巫山（一作宋之问诗）】

王无竞

神女向高唐，巫山下夕阳。裴回行作雨，婉娈逐荆王。
电影江前落，雷声峡外长。朝云无处所，台馆晓苍苍。

卷 67_7 【和宋之问下山歌】

贾曾

良游晚晚兮月呈光，锦路逶迤兮山路长。
王孙不留兮岁将晏，嵩岩仙草兮为谁芳。

卷 67_8 【孝和皇帝挽歌】

贾曾

新命千龄启，鸿图累圣馀。天行应潜跃，帝出受图书。
礼若传尧旧，功疑复夏初。梦游长不返，何国是华胥。

卷 67_9 【奉和春日出苑瞩目应令】

贾曾

铜龙晓辟问安回，金辂春游博望开。渭北晴光摇草树，
终南佳气入楼台。招贤已得商山老，托乘还征邺下才。
臣在东周独留滞，忻逢睿藻日边来。

卷 67_10 【有所思】

贾曾

洛阳城东桃李花，飞来飞去落谁家。幽闺女儿爱颜色，
坐见落花长叹息。今岁花开君不待。明年花开复谁在。
故人不共洛阳东，今来空对落花风。年年岁岁花相似，
岁岁年年人不同。

卷 67_11 【祭汾阴乐章】

贾曾

蠲我渐饎，洁我膋芻。有豆孔硕，为羞既臧。
至诚无味，精意惟芳。神其醉止，欣欣乐康。

卷 67_12 【使至汴州喜逢宋之问】

李夔

阮籍蓬池上，孤韵竹林才。巨源从吏道，正拥使车来。
相逢且交臂，相命且衔杯。醉后长歌毕，馀声绕吹台。

卷 67_13 【祭汾阴乐章】

崔玄童

聿修严配，展事禋宗。祥符宝鼎，礼备黄琮。
祝词以信，明德惟聪。介兹景福，永永无穷。

卷 67_14 【祭汾阴乐章】

何鸾

乐奏云阁，礼章载虔。禋宗于地，昭假于天。
惟馨荐矣，既醉歆焉。神之降福，永永万年。

卷 67_15【祭汾阴乐章】

蒋挺

维岁之吉，维辰之良。圣君绂冕，肃事坛场。
大礼已备，大乐斯张。神其醉止，降福无疆。

第六十八卷

卷 68_1【关山月】

崔融 1

月生西海上，气逐边风壮。万里度关山，苍茫非一状。
汉兵开郡国，胡马窥亭障。夜夜闻悲笳，征人起南望。

卷 68_2【拟古】

崔融 1

饮马临浊河，浊河深不测。河水日东往，河源乃西极。
思君正如此，谁为生羽翼。日夕大川阴，云霞千里色。
所思在何处，宛在机中织。离梦当有魂，愁容定无力。
夙龄负奇志，中夜三叹息。拔剑斩长榆，弯弓射小棘。
班张固非拟，卫霍行可即。寄谢闺中人，努力加飧食。

卷 68_3【西征军行遇风】

崔融 1

北风卷尘沙，左右不相识。飒飒吹万里，昏昏同一色。
马烦莫敢进，人急未遑食。草木春更悲，天景昼相匿。
夙龄慕忠义，雅尚存孤直。览史怀浸骄，读诗叹孔棘。
及兹戎旅地，忝从书记职。兵气腾北荒，军声振西极。
坐觉威灵远，行看氛祲息。愚臣何以报，倚马申微力。

卷 68_4【塞垣行（一作崔湜诗）】

崔融 1

疾风卷溟海，万里扬沙砾。仰望不见天，昏昏竟朝夕。
是时军两进，东拒复西敌。蔽山张旗鼓，间道潜锋镝。
精骑突晓围，奇兵袭暗壁。十月边塞寒，四山沍阴积。
雨雪雁南飞，风尘景西迫。昔我事讨论，未尝怠经籍。
一朝弃笔砚，十年操矛戟。岂要黄河誓，须勒燕山石。
可嗟牧羊臣，海外久为客。

卷 68_5 【登东阳沈隐侯八咏楼】

崔融 1

旦登西北楼，楼峻石墉厚。宛生长定□，俯压三江口。
排阶衔鸟衡，交疏过牛斗。左右会稽镇，出入具区薮。
越岩森其前，浙江漫其后。此地实东阳，由来山水乡。
隐侯有遗咏，落简尚馀芳。具物昔未改，斯人今已亡。
粤余忝藩左，束发事文场。怅不见夫子，神期遥相望。

卷 68_6 【从军行】

崔融 1

穹庐杂种乱金方，武将神兵下玉堂。天子旌旗过细柳，
匈奴运数尽枯杨。关头落月横西岭，塞下凝云断北荒。
漠漠边尘飞众鸟，昏昏朔气聚群羊。依稀蜀杖迷新竹，
仿佛胡床识故桑。临海旧来闻骠骑，寻河本自有中郎。
坐看战壁为平土，近待军营作破羌。

卷 68_7 【和宋之问寒食题黄梅临江驿】

崔融 1

春分自淮北，寒食渡江南。忽见浔阳水，疑是宋家潭。

明主阍难叫，孤臣逐未堪。遥思故园陌，桃李正酣酣。

卷 68_8【留别杜审言并呈洛中旧游】

崔融 1

斑鬓今为别，红颜昨共游。年年春不待，处处酒相留。
驻马西桥上，回车南陌头。故人从此隔，风月坐悠悠。

卷 68_9【咏宝剑】

崔融 1

宝剑出昆吾，龟龙夹采珠。五精初献术，千户竞沦都。
匣气冲牛斗，山形转辘轳。欲知天下贵，持此问风胡。

卷 68_10【吴中好风景】

崔融 1

洛渚问吴潮，吴门想洛桥。夕烟杨柳岸，春水木兰桡。
城邑高楼近，星辰北斗遥。无因生羽翼，轻举托还飙。

卷 68_11【则天皇后挽歌二首】

崔融 1

宵陈虚禁夜，夕临空山阴。日月昏尺景，天地惨何心。
紫殿金铺涩，黄陵玉座深。镜奁长不启，圣主泪沾巾。

前殿临朝罢，长陵合葬归。山川不可望，文物尽成非。
阴月霾中道，轩星落太微。空馀天子孝，松上景云飞。

卷 68_12【户部尚书崔公挽歌】

崔融 1

八座图书委，三台章奏盈。举杯常有劝，曳履忽无声。
市若荆州罢，池如薛县平。空馀济南剑，天子署高名。

卷 68_13【韦长史挽词】

崔融 1

日落桑榆下，寒生松柏中。冥冥多苦雾，切切有悲风。
京兆新阡辟，扶阳甲第空。郭门从此去，荆棘渐蒙笼。

卷 68_14 【和梁王众传张光禄是王子晋后身】

崔融 1

闻有冲天客，披云下帝畿。三年上宾去，千载忽来归。
昔偶浮丘伯，今同丁令威。中郎才貌是，柱史姓名非。
祇召趋龙阙，承恩拜虎闱。丹成金鼎献，酒至玉杯挥。
天仗分旄节，朝容间羽衣。旧坛何处所，新庙坐光辉。
汉主存仙要，淮南爱道机。朝朝缙氏鹤，长向洛城飞。

卷 68_15 【哭蒋詹事俨】

崔融 1

江上有长离，从容盛羽仪。一鸣百兽舞，一举群鸟随。
应我圣明代，巢君阿阁垂。钩陈侍帷幄，环卫奉旌麾。
雅量沧海纳，完才庙廊施。养亲光孝道，事主竭忠规。
贞节既已固，殊荣良不訾。朝游云汉省，夕宴芙蓉池。
汲黯言当直，陈平智本奇。功成喜身退，时往惜年驰。
镇国山基毁，中天柱石颓。将军空有颂，刺史独留碑。
芜漫藏书壁，荒凉悬剑枝。昔余参下位，数载忝牵羈。
置榻恩逾重，迎门礼自卑。竹林常接兴，黍谷每逢吹。
逸翰金相发，清谈玉柄挥。不轻文举少，深叹子云疲。
遗爱犹如在，残编尚可窥。即今流水曲，何处俗人知。

卷 68_16 【嵩山石淙侍宴应制】

崔融 1

洞口仙岩类削成，泉香石冷昼含清。龙旗画月中天下，
凤管披云此地迎。树作帷屏阳景翳，芝如宫阙夏凉生。
今朝出豫临悬圃，明日陪游向赤城。

卷 68_17 【塞上寄内】

崔融 1

旅魂惊塞北，归望断河西。春风若可寄，暂为绕兰闺。

第六十九卷

卷 69_1【侍从途中口号应制】

阎朝隐

疵贱出山东，忠贞任土风。因敷河朔藻，得奉洛阳宫。
一顾侍御史，再顾给事中。常愿粉肌骨，特答造化功。

卷 69_2【奉和圣制夏日游石淙山】

阎朝隐

金台隐隐陵黄道，玉辇亭亭下绛雰。千种冈峦千种树，
一重岩壑一重云。花落风吹红的历，藤垂日晃绿葢葢。
五百里内贤人聚，愿陪阊阖侍天文。

卷 69_3【鹦鹉猫儿篇】

阎朝隐

霹雳引，丰隆鸣，猛兽噫气蛇吼声。鹦鹉鸟，

同资造化兮殊粹精。鸛鸛毛，翡翠翼。鸛雏延颈，
鸛鸡弄色。鸛鸛鸟，同稟阴阳兮异埏埴。彼何为兮，
隐隐振振；此何为兮，绿衣翠襟。彼何为兮，窈窕蠢蠢；
此何为兮，好貌好音。彷徨兮徜徉，似妖姬躡步兮动罗裳；
趋趋兮踟踟，若处子回眸兮登玉堂。爰有兽也，安其忍，
觜其胁，距其胸，与之放旷浪浪兮，从从容容。
钩爪锯牙也，宵行昼伏无以当。遇之兮忘味，抆击腾掷也，
朝飞暮噪无以拒，逢之兮屏气。由是言之，
贪残薄则智慧作，贪残临之兮不复攫；由是言之，
智慧周则贪残囚，智慧犯之兮不复忧。菲形陋质虽贱微，
皇王顾遇长光辉。离宫别馆临朝市，妙舞繁弦杂宫徵。
嘉喜堂前景福内，合欢殿上明光里。云母屏风文彩合，
流苏斗帐香烟起，承恩宴盼接宴喜。高视七头金骆驼，
平怀五尺铜狮子。国有君兮国有臣，君为主兮臣为宾。
朝有贤兮朝有德，贤为君兮德为饰，千年万岁兮心转忆。

卷 69_4【三日曲水侍宴应制】

阎朝隐

三月重三日，千春续万春。圣泽如东海，天文似北辰。
荷叶珠盘净，莲花宝盖新。陛下制万国，臣作水心人。

卷 69_5【奉和九日幸临渭亭，登高应制得筵字】

阎朝隐

九九侍神仙，高高坐半天。文章二曜动，气色五星连。
簪绂趋皇极，笙歌接御筵。愿因茱菊酒，相守百千年。

卷 69_6【奉和送金城公主适西蕃应制】

阎朝隐

甥舅重亲地，君臣厚义乡。还将贵公主，嫁与耨檀王。
卤簿山河暗，琵琶道路长。回瞻父母国，日出在东方。

卷 69_7【奉和立春游苑迎春应制】

阎朝隐

管籥周移寰极里，乘舆望幸斗城闉。草根未结青丝缕，
萝茑犹垂绿帟巾。鹊入巢中言改岁，燕衔书上道宜新。
愿得长绳系取日，光临天子万年春。

卷 69_8 【奉和圣制春日幸望春宫应制】

阎朝隐

句芒人面乘两龙，道是春神卫九重。彩胜年年逢七日，
酴醾岁岁满千钟。宫梅间雪祥光遍，城柳含烟淑气浓。
醉倒君前情未尽，原因歌舞自为容。主

卷 69_9 【夜宴安乐公主新宅】

阎朝隐

凤凰鸣舞乐昌年，蜡炬开花夜管弦。
半醉徐击珊瑚树，已闻钟漏晓声传。

卷 69_10 【饯唐永昌】

阎朝隐

洛阳难理若棼丝，椎破连环定不疑。
鹦鹉休言秦地乐，回头一顾一相思。

卷 69_11【明月歌】

阎朝隐

梅花雪白柳叶黄，云雾四起月苍苍。箭水泠泠刻漏长。
挥玉指，拂罗裳，为君一奏楚明光。

卷 69_12【采莲女】

阎朝隐

采莲女，采莲舟，春日春江碧水流。莲衣承玉钏，
莲刺冒银钩。薄暮敛容歌一曲，氛氲香气满汀洲。

卷 69_13【奉和登骊山应制】

阎朝隐

龙行踏绛气，天半语相闻。混沌疑初判，洪荒若始分。

卷 69_14【奉和九日幸临渭亭，登高应制得月字】

韦元旦

云物开千里，天行乘九月。丝言丹凤池，旆转苍龙阙。
灞水欢娱地，秦京游侠窟。欣承解慍词，圣酒黄花发。

卷 69_15【奉和送金城公主适西蕃应制】

韦元旦

柔远安夷俗，和亲重汉年。军容旌节送，国命锦车传。
琴曲悲千里，箫声恋九天。唯应西海月，来就掌珠圆。

卷 69_16【饯唐州高使君赴任】

韦元旦

桐柏膺新命，芝兰惜旧游。鸣皋夜鹤在，迁木早莺求。
传拥淮源路，尊空灞水流。落花纷送远，春色引离忧。

卷 69_17【早朝】

韦元旦

震维芳月季，宸极众星尊。珮玉朝三陛，鸣珂度九门。
挈壶分早漏，伏槛耀初暾。北倚苍龙阙，西临紫凤垣。
词庭草欲奏，温室树无言。鳞翰空为忝，长怀圣主恩。

卷 69_18【奉和立春游苑迎春应制】

韦元旦

灞浹长安恒近日，殷正腊月早迎新。池鱼戏叶仍含冻，
宫女裁花已作春。向苑云疑承翠幄，入林风若起青蘋。
年年斗柄东无限，愿挹琼觞寿北辰。

卷 69_19【奉和圣制春日幸望春宫应制】

韦元旦

九重楼阁半山霞，四望韶阳春未赊。侍跸妍歌临灞浹，
留觞艳舞出京华。危竿竞捧中街日，戏马争衔上苑花。
景色欢娱长若此，承恩不醉不还家。

卷 69_20 【奉和人日宴大明宫恩赐彩缕人胜应制】

韦元旦

鸾凤旌旗拂晓陈，鱼龙角牴大明辰。青韶既肇人为日，
绮胜初成日作人。圣藻凌云裁柏赋，仙歌促宴摘梅春。
垂旒一庆宜年酒，朝野俱欢荐寿新。

卷 69_21 【奉和幸安乐公主山庄应制】

韦元旦

银河南渚帝城隅，帝辇平明出九衢。刻凤蟠螭凌桂邸，
穿池叠石写蓬壶。琼箫暂下钧天乐，绮缀长悬明月珠。
仙榜承恩争既醉，方知朝野更欢娱。

卷 69_22 【兴庆池侍宴应制】

韦元旦

沧池潋汭帝城边，殊胜昆明凿汉年。夹岸旌旗疏辇道，
中流箫鼓振楼船。云峰四起迎宸幄，水树千重入御筵。
宴光已深鱼藻咏，承恩更欲奏甘泉。

卷 69_23【夜宴安乐公主宅】

韦元旦

主第新成银作榜，宾筵广宴玉为楼。
壶觞既卜仙人夜，歌舞宜停织女秋。

卷 69_24【奉和初春幸太平公主南庄应制】

邵升

沁园佳丽夺蓬瀛，翠壁红泉绕上京。二圣忽从鸾殿幸，
双仙正下凤楼迎。花含步辇空间出，树杂帷宫画里行。
无路乘槎窥汉渚，徒知访卜就君平。

卷 69_25【奉和送金城公主适西蕃应制】

唐远志

皇恩眷下人，割爱远和亲。少女风游兑，姮娥月去秦。
龙笛迎金榜，骊歌送锦轮。那堪桃李色，移向虏庭春。

第七十卷

卷 70_1【汾阴后土祠作】

李適適

昔予读旧史，遍睹汉世君。武皇实稽古，建兹百代勋。
号令垂懋典，旧经备阙文。西巡历九嶷，舳舻被江滨。
勒兵十八万，旌旗何纷纷。揭来茂陵下，英声不复闻。
我行岁方晏，极望山河分。神光终冥漠，鼎气独氛氲。
揽涕步眢上，登高见彼汾。雄图今安在，飞飞有白云。

卷 70_2【答宋十一崖口五渡见赠】

李適適

闻君访远山，跻险造幽绝。眇然青云境，观奇弥年月。
登岭亦溯溪，孤舟事沿越。嵒嶂传彩翠，崖磴互欹缺。
石林上攒丛，金涧下明灭。扪壁窥丹井，梯苔瞰乳穴。
忽枉岩中赠，对玩未尝辍。殷勤独往事，委曲炼药说。
邀余名山期，从尔泛海滢。岁晏秉宿心，斯言非徒设。

卷 70_3【饯许州宋司马赴任】

李適適

昔吾游箕山，謁来涉颍水。复有许由庙，迢迢白云里。
闻君佐繁昌，临风怅怀此。傥到平輿泉，寄谢干将里。

卷 70_4【奉和圣制九日侍宴应制得高字】

李適適

禁苑秋光入，宸游霁色高。萸房颁彩笥，菊蕊荐香醪。
后骑萦堤柳，前旌拂御桃。王枚俱得从，浅浅愧飞毫。

卷 70_5【游禁苑幸临渭亭遇雪应制】

李適適

长乐喜春归，披香瑞雪霏。花从银阁度，絮绕玉窗飞。
写曜衔天藻，呈祥拂御衣。上林纷可望，无处不光辉。

卷 70_6 【奉和九日登慈恩寺浮图应制】

李適適

凤辇乘朝霁，鹦林对晚秋。天文贝叶写，圣泽菊花浮。
塔似神功造，龕疑佛影留。幸陪清汉跸，欣奉净居游。

卷 70_7 【侍宴长宁公主东庄应制】

李適適

凤楼纤睿幸，龙舸畅宸襟。歌舞平阳第，园亭沁水林。
山花添圣酒，涧竹绕熏琴。愿奉瑶池驾，千春侍德音。

卷 70_8 【奉和送金城公主适西蕃应制】

李適適

绛河从远聘，青海赴和亲。月作临边晓，花为度陇春。
主歌悲顾鹤，帝策重安人。独有琼箫去，悠悠思锦轮。

卷 70_9【安乐公主移入新宅】

李適適

星桥他日创，仙榜此时开。马向铺钱埽，箫闻奏玉台。
人疑卫叔美，客似长卿才。借问游天使，谁能取石回。

卷 70_10【奉和幸望春宫送朔方军大总管张仁亶】

李適適

地限骄南牧，天临饒北征。解衣延宠命，横剑总威名。
豹略恭宸旨，雄文动睿情。坐观膜拜入，朝夕受降城。

卷 70_11【人日宴大明宫恩赐彩缕人胜应制】

李適適

朱城待凤韶年至，碧殿疏龙淑气来。宝帐金屏人已帖，
图花学鸟胜初裁。林香近接宜春苑，山翠遥添献寿杯。
向夕凭高风景丽，天文垂耀象昭回。

卷 70_12【奉和春日幸望春宫应制】

李適適

玉辇金舆天上来，花园四望锦屏开。轻丝半拂朱门柳，
细纈全披画阁梅。舞蝶飞行飘御席，歌莺度曲绕仙杯。
圣词今日光辉满，汉主秋风莫道才。

卷 70_13【奉和立春游苑迎春】

李適適

金舆翠辇迎嘉节，御苑仙宫待献春。淑气初衔梅色浅，
条风半拂柳墙新。天杯庆寿齐南岳，圣藻光辉动北辰。
稍觉披香歌吹近，龙骖日暮下城闉。

卷 70_14【帝幸兴庆池戏竞渡应制】

李適適

拂露金舆丹旆转，凌晨黼帐碧池开。南山倒影从云落，
北涧摇光写溜回。急桨争标排荇度，轻帆截浦触荷来。
横汾宴镐欢无极，歌舞年年圣寿杯。

卷 70_15【侍宴安乐公主庄应制】

李適適

平阳金榜凤凰楼，沁水银河鹦鹉洲。
彩仗遥临丹壑里，仙輿暂幸绿亭幽。
前池锦石莲花艳，后岭香炉桂蕊秋。
贵主称觞万年寿，还轻汉武济汾游。

卷 70_16【侍宴安乐公主新宅应制】

李適適

银河半倚凤凰台，玉酒相传鹦鹉杯。
若见君平须借问，仙槎一去几时来。

卷 70_17【饯唐永昌赴任东郡自尚书郎为令】

李適適

闻道飞凫向洛阳，翩翩矫翮度文昌。
因声寄意三花树，少室岩前几过香。

第七十一卷

卷 71_1【奉和圣制立春日侍宴内殿出剪彩花应制】

刘宪

上林宫馆好，春光独早知。剪花疑始发，刻燕似新窥。
色浓轻雪点，香浅嫩风吹。此日叨陪侍，恩荣得数枝。

卷 71_2【奉和人日清晖阁宴群臣遇雪应制】

刘宪

輿辇乘人日，登临上凤京。风寻歌曲飏，雪向舞行萦。
千官随兴合，万福与时并。承恩长若此，微贱幸升平。

卷 71_3【奉和七夕宴两仪殿应制】

刘宪

秋吹过双阙，星仙动二灵。更深移月镜，河浅度云軿。

殿上呼方朔，人间失武丁。天文兹夜里，光映紫微庭。

卷 71_4【奉和九月九日圣制登慈恩寺浮图应制】

刘宪

飞塔云霄半，清晨羽旆游。登临凭季月，有廓见中州。
御酒新寒退，天文瑞景留。辟邪将兽寿，兹日奉千秋。

卷 71_5【闰九月九日幸总持寺登浮图应制】

刘宪

重阳登闰序，上界叶时巡。驻辇天花落，开筵妓乐陈。
城端刹柱见，云表露盘新。临睨光辉满，飞文动睿神。

卷 71_6【侍宴长宁公主东庄】

刘宪

公主林亭地，清晨降玉舆。画桥飞渡水，仙阁涌临虚。
晴新看蛱蝶，夏早摘芙蕖。文酒娱游盛，忻叨侍从馀。

卷 71_7【奉和送金城公主入西蕃应制】

刘宪

外馆逾河右，行营指路岐。和新悲远嫁，忍爱泣将离。
旌旆羌风引，轩车汉月随。那堪马上曲，时向管中吹。

卷 71_8【奉和圣制登骊山高顶寓目应制】

刘宪

骊阜镇皇都，銮游眺八区。原隰旌门里，风云宸座隅。
直城如斗柄，官树似星榆。从臣词赋末，滥得上天衢。

卷 71_9【奉和幸白鹿观应制】

刘宪

玄游乘落晖，仙宇蔼霏微。石梁萦涧转，珠旒扫坛飞。
芝童荐膏液，松鹤舞骖騑。还似瑶池上，歌成周驭归。

卷 71_10【折杨柳】

刘宪

沙塞三河道，金闺二月春。碧烟杨柳色，红粉绮罗人。
露叶怜啼脸，风花思舞巾。攀持君不见，为听曲中新。

卷 71_11【奉和立春日内出彩花树应制（一作人日大明宫应制）】

刘宪

禁苑韶年此日归，东郊道上转青旂。柳色梅芳何处所，
风前雪里觅芳菲。开冰池内鱼新跃，剪彩花间燕始飞。
欲识王游布阳气，为观天藻竞春晖。

卷 71_12【奉和春日幸望春宫应制】

刘宪

暮春春色最便妍，苑里花开列御筵。商山积翠临城起，
浐水浮光共幕连。莺藏嫩叶歌相唤，蝶碍芳丛舞不前。
欢娱节物今如此，愿奉宸游亿万年。

卷 71_13【奉和幸安乐公主山庄应制】

刘宪

主家别墅帝城隈，无劳海上觅蓬莱。沓石悬流平地起，
危楼曲阁半天开。庭莎作荐舞行出，浦树相将歌棹回。
此日风光与形胜，只言作伴圣词来。

卷 71_14【兴庆池侍宴应制】

刘宪

苍龙阙下天泉池，轩驾来游箫管吹。缘堤夏筱萦不散，
冒水新荷卷复披。帐殿疑从画里出，楼船直在镜中移。
自然东海神仙处，何用西昆辙迹疲。

卷 71_15【奉和幸大荐福寺应制】

刘宪

地灵传景福，天驾俨钩陈。佳哉藩邸旧，赫矣梵宫新。
香塔鱼山下，禅堂雁水滨。珠幡映白日，镜殿写青春。
甚欢延故吏，大觉拯生人。幸承歌颂末，长奉属车尘。

卷 71_16 【奉和幸三会寺应制】

刘宪

岩峩仓史台，敞朗绀园开。戒旦壶人集，翻霜羽骑来。
下辇登三袭，褰旒望九垓。林披馆陶榜，水浸昆明灰。
网户飞花缀，幡竿度鸟回。豫游仙唱动，潇洒出尘埃。

卷 71_17 【奉和幸长安故城未央宫应制】

刘宪

汉宫千祀外，轩驾一来游。夷荡长如此，威灵不复留。
凭高睿赏发，怀古圣情周。寒向南山敛，春过北渭浮。
土功昔云盛，人英今所求。幸听熏风曲，方知霸道羞。

卷 71_18 【奉和幸礼部尚书窦希玠宅应制（一作陪幸五王宅）】

刘宪

北斗枢机任，西京肺腑亲。畴昔王门下，今兹御幸辰。
恩光山水被，圣作管弦新。绕坐熏红药，当轩暗绿筠。
摘荷才早夏，听鸟尚馀春。行漏今徒晚，风烟起观津。

卷 71_19 【奉和圣制幸望春宫送朔方大总管张仁亶】

刘宪

命将择耆年，图功胜必全。光辉万乘饯，威武二庭宣。
中衢横鼓角，旷野蔽旌旃。推食天厨至，投醪御酒传。
凉风过雁苑，杀气下鸡田。分阃恩何极，临岐动睿篇。

卷 71_20 【奉和幸韦嗣立山庄侍宴应制】

刘宪

东山有谢安，枉道降鸣銮。缇骑分初日，霓旌度晓寒。
云跸岩间下，虹桥涧底盘。幽栖俄以届，圣瞩宛馀欢。
崖悬飞溜直，岸转绿潭宽。桂华尧酒泛，松响舜琴弹。
明主恩斯极，贤臣节更殚。不才叨侍从，咏德以濡翰。

卷 71_21 【人日玩雪应制】

刘宪

胜日登临云叶起，芳风摇荡雪花飞。
呈晖幸得承金镜，飏彩还将奉玉衣。

卷 71_22 【上巳日祓禊渭滨应制】

刘宪

桃花欲落柳条长，沙头水上足风光。
此时御辇来游处，愿奉年年祓禊觞。

卷 71_23 【苑中遇雪应制】

刘宪

龙骖晓入望春宫，正逢春雪舞东风。
花光并洒天文上，寒气行消御酒中。

卷 71_24 【夜宴安乐公主新宅】

刘宪

层轩洞户旦新披，度曲飞觞夜不疲。
绮缀玲珑河色晓，珠帘隐映月华窥。

卷 71_25【奉和圣制幸韦嗣立山庄】

刘宪

非吏非隐晋尚书，一丘一壑降乘舆。
天藻缘情两曜合，山卮献寿万年馀。

卷 71_26【饯唐永昌】

刘宪

始见郎官拜洛阳，旋闻近侍发雕章。
绪言已勸期年政，绮字当生满路光。

第七十二卷

卷 72_1【晦日置酒林亭】

高正臣

正月符嘉节，三春玩物华。忘怀寄尊酒，陶性狎山家。
柳翠含烟叶，梅芳带雪花。光阴不相借，迟迟落景斜。

卷 72_2【晦日重宴】

高正臣

芳辰重游衍，乘景共追随。班荆陪旧识，倾盖得新知。
水叶分莲沼，风花落柳枝。自符河朔趣，宁羨高阳池。

卷 72_3【晦日宴高氏林亭】

崔知贤

上月河阳地，芳辰景物华。绵蛮变时鸟，照曜起春霞。
柳摇风处色，梅散日前花。淹留洛城晚，歌吹石崇家。

卷 72_4 【上元夜效小庾体】

崔知贤

今夜启城闉，结伴戏芳春。鼓声撩乱动，风光触处新。
月下多游骑，灯前饶看人。欢乐无穷已，歌舞达明晨。

卷 72_5 【三月三日宴王明府山亭（得鱼字）】

崔知贤

京洛皇居，芳禊春馀。影媚元巳，和风上除。云开翠帟，
水鹜鲜居。林渚萦映，烟霞卷舒。花飘粉蝶，藻跃文鱼。
沿波式宴，其乐只且。

卷 72_6 【三月三日宴王明府山亭（得郊字）】

席元明

日惟上巳，时享有巢。中尊引桂，芳筵藉茅。书僮囊笔，
膳夫行庖。烟霏万雉，花明四郊。沼蘋白带，山花紫苞。
同人聚饮，千载神交。

卷 72_7 【晦日宴高氏林亭】

韩仲宣

欲知行有乐，芳尊对物华。地接安仁县，园是季伦家。
柳处云疑叶，梅间雪似花。日落归途远，留兴伴烟霞。

卷 72_8 【晦日重宴】

韩仲宣

凤苑先吹晚，龙楼夕照披。陈遵已投辖，山公正坐池。
落日催金奏，飞霞送玉卮。此时陪绮席，不醉欲何为。

卷 72_9 【上元夜效小庾体】

韩仲宣

他乡月夜人，相伴看灯轮。光随九华出，影共百枝新。
歌钟盛北里，车马沸南邻。今宵何处好，惟有洛城春。

卷 72_10【三月三日宴王明府山亭（得花字）】

韩仲宣

河滨上巳，洛汭春华。碧池涵日，翠幄澄霞。沟垂细柳，
岸拥平沙。歌莺响树，舞蝶惊花。云浮宝马，水韵香车。
熟记行乐，淹留景斜。

卷 72_11【晦日宴高氏林亭】

周彦昭

胜地临鸡浦，高会偶龙池。御柳惊春色，仙筇掩月华。
门邀千里驭，杯泛九光霞。日落山亭晚，雷送七香车。

卷 72_12【晦日宴高氏林亭】

高球

温洛年光早，皇州景望华。连镳寻上路，乘兴入山家。
轻苔网危石，春水架平沙。赏极林塘暮，处处起烟霞。

卷 72_13【三月三日宴王明府山亭（得烟字）】

高球

洛城春禊，元巳芳年。季伦园里，逸少亭前。曲中举白，
谈际生玄。陆离轩盖，凄清管弦。萍疏波荡，柳弱风牵。
未淹欢趣，林溪夕烟。

卷 72_14【晦日宴高氏林亭】

弓嗣初

上序春晖丽，中园物候华。高才盛文雅，逸兴满烟霞。
参差金谷树，皎镜碧塘沙。萧散林亭晚，倒载欲还家。

卷 72_15【晦日重宴】

弓嗣初

年华蔼芳隰，春溜满新池。促赏依三友，延欢寄一卮。
鸟声随管变，花影逐风移。行乐方无极，淹留惜晚曦。

卷 72_16【三月三日宴王明府山亭（得哉字）】

高瑾

暮春元巳，春服初裁。童冠八九，于洛之隈。
河堤草变，巩树花开。逸人谈发，仙御舟来。
间关黄鸟，瀼潁丹腮。乐饮命席，优哉悠哉。

卷 72_17【晦日宴高氏林亭】

高瑾

试入山亭望，言是石崇家。二月风光起，三春桃李华。
莺吟上乔木，雁往息平沙。相看会取醉，宁知还路赊。

卷 72_18【晦日重宴】

高瑾

忽闻莺响谷，于此命相知。正开彭泽酒，来向高阳池。
柳叶风前弱，梅花影处危。赏洽林亭晚，落照下参差。

卷 72_19【上元夜效小庾体】

高瑾

初年三五夜，相知一两人。连镳出巷口，飞毂下池漘。
灯光恰似月，人面并如春。遨游终未已，相欢待日轮。

卷 72_20【晦日宴高氏林亭】

王茂时

践胜寻良会，乘春玩物华。还随张放友，来向石崇家。
止水分岩镜，闲庭枕浦沙。未极林泉赏，参差落照斜。

卷 72_21【晦日宴高氏林亭】

徐皓

绮筵乘暇景，琼醕对年华。门多金埒骑，路引璧人车。
蘋早犹藏叶，梅残正落花。蔼蔼林亭晚，馀兴促流霞。

卷 72_22

长孙正隐

晦晚属烟霞，遨游重岁华。歌钟虽戚里，林薮是山家。
细雨犹开日，深池不涨沙。淹留迷处所，岩岫几重花。

卷 72_23【上元夜效小庾体同用春字】

长孙正隐

薄晚啸游人，车马乱驱尘。月光三五夜，灯焰一重春。
烟云迷北阙，箫管识南邻。洛城终不闭，更出小平津。

卷 72_24【晦日宴高氏林亭】

高绍

啸侣入山家，临春玩物华。葛弦调绿水，桂醕酌丹霞。
岸柳开新叶，庭梅落早花。兴洽林亭晚，方还倒载车。

卷 72_25 【晦日宴高氏林亭】

郎餘令

三春休晦节，九谷泛年华。半晴馀细雨，全晚澹残霞。
尊开疏竹叶，管应落梅花。兴阑相顾起，流水送香车。

卷 72_26 【晦日宴高氏林亭】

陈嘉言

公子申敬爱，携朋玩物华。人是平阳客，地即石崇家。
水文生旧浦，风色满新花。日暮连归骑，长川照晚霞。

卷 72_27 【晦日重宴】

陈嘉言

高门引冠盖，下客抱支离。绮席珍羞满，文场翰藻摛。
萸华雕上月，柳色蔼春池。日斜归戚里，连骑勒金羈。

卷 72_28 【上元夜效小庾体】

陈嘉言

今夜可怜春，河桥多丽人。宝马金为络，香车玉作轮。
连手窥潘掾，分头看洛神。重城自不掩，出向小平津。

卷 72_29 【晦日宴高氏林亭】

周彦晖

砌萸收晦魄，津柳竞年华。既狎忘筌友，方淹投辖车。
绮筵回舞雪，琼醕泛流霞。云低上天晚，丝雨带风斜。

卷 72_30 【晦日重宴】

周彦晖

春华归柳树，俯景落萸枝。置驿铜街右，开筵玉浦陲。
林烟含障密，竹雨带珠危。兴阑巾倒戴，山公下习池。

卷 72_31【晦日宴高氏林亭】

高峤

飞观写春望，开宴坐汀沙。积溜含苔色，晴空荡日华。
歌入平阳第，舞对石崇家。莫虑能骑马，投辖自停车。

卷 72_32【晦日重宴】

高峤

驾言寻凤侣，乘欢俯雁池。班荆逢旧识，斟桂喜深知。
紫兰方出径，黄莺未啖枝。别有陶春日，青天云雾披。

卷 72_33【晦日宴高氏林亭】

刘友贤

春来日渐煦，琴酒逐年华。欲向文通径，先游武子家。
池碧新流满，岩红落照斜。兴阑情未尽，步步惜风花。

卷 72_34 【晦日宴高氏林亭】

周思钧

早春惊柳穉，初晦掩萸华。骑出平阳里，筵开卫尉家。
竹影含云密，池纹带雨斜。重惜林亭晚，上路满烟霞。

卷 72_35 【晦日重宴】

周思钧

绮筵乘晦景，高宴下阳池。濯雨梅香散，含风柳色移。
轻尘依扇落，流水入弦危。勿顾林亭晚，方欢云雾披。

第七十三卷

卷 73_1【祭汾阴乐章（寿和）】

苏颋

礼物斯具，乐章乃陈。谁其作主，皇考圣真。
对越在天，圣明佐神。窅然汾上，厚泽如春。

卷 73_2【奉和圣制行次成皋途经先圣擒建德之所感而成诗应制】

苏颋

汉东不执象，河朔方斗龙。夏灭渐宁乱，唐兴终奋庸。
皇威正赫赫，兵气何匈匈。用武三川震，归淳六代醺。
成皋睹王业，天下致人雍。即此巡于岱，曾孙受命封。

卷 73_3【奉和圣制登蒲州逍遥楼应制】

苏颋

在昔尧舜禹，遗尘成典谟。圣皇东巡狩，况乃经此都。
楼观纷迤逦，河山几萦纡。缅怀祖宗业，相继文武图。
尚德既无险，观风谅有孚。岂如汾水上，箫鼓事游娱。

卷 73_4【奉和圣制过晋阳宫应制】

苏颋

隋运与天绝，生灵厌氛昏。圣期在宁乱，士马兴太原。
立极万邦推，登庸四海尊。庆膺神武帝，业付皇曾孙。
缅慕封唐道，追惟归沛魂。诏书感先义，典礼巡旧藩。
高殿彩云合，春旗祥风翻。率西见汾水，奔北空塞垣。
款曲童儿佐，依迟故老言。里颁慈惠赏，家受复除恩。
下辇崇三教，建碑当九门。孝思敦至美，亿载奉开元。

卷 73_5【奉和姚令公温汤旧馆永怀故人卢公之作】

苏颋

树德岂孤迈，降神良并出。伟兹廊庙桢，调彼盐梅实。

正悦虞垂举，翻悲郑侨卒。同心不可忘，交臂何为失。
清路荷前幸，明时称右弼。曾联野外游，尚记帷中密。
新恸情莫遣，旧游词更述。空令还辱和，长叹知音日。

卷 73_6 【和杜主簿春日有所思】

苏颋

朝上高楼上，俯见洛阳陌。摇荡吹花风，落英纷已积。
美人不共此，芳好空所惜。揽镜尘网滋，当窗苔藓碧。
缅怀在云汉，良愿睽枕席。翻似未见时，如何久为客。

卷 73_7 【饯郢州李使君】

苏颋

楚有章华台，遥遥云梦泽。复闻拥符传，及是收图籍。
佳政在离人，能声寄侯伯。离怀朔风起，试望秋阴积。
中路凄以寒，群山霭将夕。伤心聊把袂，怊怅麒麟客。

卷 73_8 【饯唐州高使君赴任】

苏颋

永日奏文时，东风摇荡夕。浩然思乐事，翻复饯征客。

淮水春流清，楚山暮云白。勿言行路远，所贵专城伯。

卷 73_9【晓济胶川南入密界】

苏颋

饮马胶川上，傍胶南趣密。林遥飞鸟迟，云去晴山出。
落晖隐桑柘，秋原被花实。惨然游子寒，风露将萧瑟。

卷 73_10【夜发三泉即事】

苏颋

暗发三泉山，穷秋听骚屑。北林夜鸣雨，南望晓成雪。
只咏北风凉，讵知南土热。沙溪忽沸渭，石道乍明灭。
宛若银碛横，复如瑶台结。指程赋所恋，遇虞不遑歇。
重纆濡莫解，悬旌冻犹揭。下奔泥栈檣，上覩云梯设。
搏颊羸马顿，回眸惴人跌。憧憧往复还，心注思逾切。
冉冉年将病，力困衰怠竭。天彭信方隅，地势诚斗绝。
忝曳尚书履，叨兼使臣节。京坻有岁饶，亭障无边孽。
归奏丹墀左，骞能俟来哲。

卷 73_11【小园纳凉即事】

苏颋

烦暑避蒸郁，居闲习高明。长风自远来，层阁有馀清。
散洒纳凉气，萧条遗世情。奈何夸大隐，终日系尘缨。

卷 73_12【昆明池宴坐答王兵部珣三韵见示】

苏颋

画舸疾如飞，遥遥泛夕晖。石鲸吹浪隐，玉女步尘归。
独有衔恩处，明珠在钓矶。

卷 73_13【奉和圣制春台望应制】

苏颋

壮丽天之府，神明王者宅。大君乘飞龙，登彼复怀昔。
圆阙朱光焰，横山翠微积。河汧流作表，县聚开成陌。
即旧在皇家，维新具物华。云连所上居恒属，
日更时中望不斜。三月沧池摇积水，万年青树缀新花。
暴嬴国此尝图霸，霸业后仁先以诈。东破诸侯西入秦，
咸阳北阪南渭津。诗书焚爇散学士，高阁奢逾娇美人。

事往覆轳经远喻，春还按辔凭高赋。戎观爰力深惟省，
越厌陈方何足务。清吹遥遥发帝台，宸文耿耿照天回。
伯夷位事愚臣忝，喜奏声成凤鸟来。

卷 73_14 【长相思】

苏颋

君不见天津桥下东流水，南望龙门北朝市。
杨柳青青宛地垂，桃红李白花参差。花参差，柳堪结，
此时忆君心断绝。

卷 73_15 【蜀城哭台州乐安少府】

苏颋

远游躋剑阁，长想属天台。万里隔三载，此邦余重来。
音容旷不睹，梦寐殊悠哉。边郡饶藉藉，晚庭正回回。
喜传上都封，因促傍吏开。向悟海盐客，已而梁木摧。
变衣寝门外，挥涕少城隈。却记分明得，犹持委曲猜。
师儒昔训奖，仲季时童孩。服义题书篋，邀欢泛酒杯。
暂令风雨散，仍迫岁时回。其道惟正直，其人信美俛。
白头还作尉，黄绶固非才。可叹悬蛇疾，先贻问鵬灾。
故乡闭穷壤，宿草生寒茔。零落九原去，蹉跎四序催。
曩期冬赠橘，今哭夏成梅。执礼谁为赠，居常不徇财。

北登崑崙坂，东望姑苏台。天路本悬绝，江波复溯洄。
念孤心易断，追往恨艰裁。不遂卿将伯，孰云陈与雷。
吾衰亦如此，夫子复何哀。

卷 73_16【立春日侍宴内出剪彩花应制】

苏颋

晓入宜春苑，秾芳吐禁中。剪刀因裂素，妆粉为开红。
彩异惊流雪，香饶点便风。裁成识天意，万物与花同。

卷 73_17【春日芙蓉园侍宴应制】

苏颋

御道红旗出，芳园翠辇游。绕花开水殿，架竹起山楼。
荷芰轻薰幄，鱼龙出负舟。宁知穆天子，空赋白云秋。

卷 73_18【奉和圣制人日清晖阁宴群臣遇雪应制】

苏颋

楼观空烟里，初年瑞雪过。苑花齐玉树，池水作银河。
七日祥图启，千春御赏多。轻飞传彩胜，天上奉薰歌。

卷 73_19 【奉和七夕宴两仪殿应制】

苏颋

灵媛乘秋发，仙装警夜催。月光窥欲渡，河色辨应来。
机石天文写，针楼御赏开。窃观栖鸟至，疑向鹊桥回。

卷 73_20 【奉和九日幸临渭亭登高应制得时字】

苏颋

嘉会宜长日，高筵顺动时。晓光云外洗，晴色雨馀滋。
降鹤因韶德，吹花入御词。愿陪阳数节，亿万九秋期。

卷 73_21 【游禁苑幸临渭亭遇雪应制】

苏颋

平明敞帝居，霰雪下凌虚。写月含珠缀，从风薄绮疏。
年惊花絮早，春夜管弦初。已属云天外，欣承霈泽馀。

卷 73_22 【奉和送金城公主适西蕃应制】

苏颋

帝女出天津，和戎转鬲轮。川经断肠望，地与析支邻。
奏曲风嘶马，衔悲月伴人。旋知偃兵革，长是汉家亲。

卷 73_23 【奉和圣制登骊山高顶寓目应制】

苏颋

仙跸御层氛，高高积翠分。岩声中谷应，天语半空闻。
丰树连黄叶，函关入紫云。圣图恢宇县，歌赋小横汾。

卷 73_24 【幸白鹿观应制】

苏颋

碧虚清吹下，蔼蔼入仙宫。松磴攀云绝，花源接涧空。
受符邀羽使，传诀注香童。诩似闲居日，徒闻有顺风。

卷 73_25 【题寿安王主簿池馆】

苏颋

洛邑通驰道，韩郊在属城。馆将花雨映，潭与竹声清。
贤俊鸾栖棘，宾游马佩衡。愿言随狎鸟，从此濯吾缨。

卷 73_26 【扈从温泉奉和姚令公喜雪】

苏颋

清道丰人望，乘时汉主游。恩晖随霰下，庆泽与云浮。
泉暖惊银碛，花寒爱玉楼。鼎臣今有问，河伯且应留。

卷 73_27 【秋社日崇让园宴得新字】

苏颋

鸣爵三农稔，句龙百代神。运昌叨辅弼，时泰喜黎民。
树缺池光近，云开日影新。生全应有地，长愿乐交亲。

卷 73_28 【奉和魏仆射秋日还乡有怀之作】

苏颋

南宫夙拜罢，东道昼游初。饮饯倾冠盖，传呼问里闾。
树悲悬剑所，溪想钓璜馀。明发辉光至，增荣驷马车。

卷 73_29 【武担山寺】

苏颋

武檐独苍然，坟山下玉泉。鳌灵时共尽，龙女事同迁。
松柏衔哀处，幡花种福田。讵知留镜石，长与法轮圆。

卷 73_30 【饯潞州陆长史再守汾州】

苏颋

河尹政成期，为汾昔所推。不荣三入地，还美再临时。
拥传云初合，闻莺日正迟。道傍多出饯，别有吏民思。

卷 73_31 【饯荆州崔司马】

苏颋

茂礼雕龙昔，香名展骥初。水连南海涨，星拱北辰居。
稍发仙人履，将题别驾舆。明年征拜入，荆玉不藏诸。

卷 73_32 【送吏部李侍郎东归得归字】

苏颋

陌上有光辉，披云向洛畿。赏来荣扈从，别至惜分飞。
泉溜含风急，山烟带日微。茂曹今去矣，人物喜东归。

卷 73_33 【送光禄姚卿还都】

苏颋

汉室有英台，荀家宠俊才。九卿朝已入，三子暮同来。
不授纶为草，还司鼎用梅。两京王者宅，驷马日应回。

卷 73_34 【春晚送瑕丘田少府还任，因寄洛中镜上人】

苏颋

闻道还沂上，因声寄洛滨。别时花欲尽，归处酒应春。
聚散同行客，悲欢属故人。少年追乐地，遥赠一沾巾。

卷 73_35 【送贾起居奉使入洛取图书因便拜觐】

苏颋

旧国才因地，当朝史命官。遗文征阙简，还思采芳兰。
传发关门候，觴称邑里欢。早持京副入，旋伫洛书刊。

卷 73_36 【送常侍舒公归觐】

苏颋

朝闻讲艺馀，晨省拜恩初。训胄尊庠序，荣亲耀里闾。
朱丹华毂送，斑白绮筵舒。江上春流满，还应荐跃鱼。

卷 73_37 【兴州出行】

苏颋

危途晓未分，驱马傍江滨。滴滴泣花露，微微出岫云。
松梢半吐月，萝翳渐移曛。旅客肠应断，吟猿更使闻。

卷 73_38 【边秋薄暮（一作出塞）】

苏颋

海外秋鹰击，霜前旅雁归。边风思鞞鼓，落日惨旌麾。
浦暗渔舟入，川长猎骑稀。客悲逢薄暮，况乃事戎机。

卷 73_39 【晓发方骞驿】

苏颋

传置远山蹊，龙钟蹴涧泥。片阴常作雨，微照已生霓。
鬓发愁氛换，心情险路迷。方知向蜀者，偏识子规啼。

卷 73_40 【经三泉路作】

苏颋

三月松作花，春行日渐赊。竹障山鸟路，藤蔓野人家。
透石飞梁下，寻云绝磴斜。此中谁与乐，挥涕语年华。

卷 73_41 【故高安大长公主挽词】

苏颋

彤管承师训，青圭备礼容。孟孙家代宠，元女国朝封。
柔轨题贞顺，闲规赋隶雍。宁知落照尽，霜吹入悲松。

卷 73_42 【赠司徒豆卢府君挽词】

苏颋

宠赠追胡广，亲临比贺循。几闻投剑客，多会服纁人。
草闭坟将古，松阴地不春。二陵犹可望，存殁有忠臣。

卷 73_43 【故右散骑常侍舒国公褚公挽词】

苏颋

阳翟疏丰构，临平演庆源。学筵尊授几，儒服宠乘轩。
审谕留中密，开陈与上言。徂晖一不借，空有赐东园。

卷 73_44 【奉和初春幸太平公主南庄应制】

苏颋

主第山门起灞川，宸游风景入初年。凤凰楼下交天仗，
乌鹊桥头敞御筵。往往花间逢彩石，时时竹里见红泉。
今朝扈跸平阳馆，不羨乘槎云汉边。

卷 73_45 【奉和春日幸望春宫应制】

苏颋

东望望春春可怜，更逢晴日柳含烟。宫中下见南山尽，
城上平临北斗悬。细草遍承回辇处，轻花微落奉觞前。
宸游对此欢无极，鸟哢声声入管弦。

卷 73_46【人日重宴大明宫恩赐彩缕人胜应制】

苏颋

疏龙磴道切昭回，建凤旗门绕帝台。七叶仙萸依月吐，
千株御柳拂烟开。初年竞贴宜春胜，长命先浮献寿杯。
是日皇灵知窃幸，群心就捧大明来。

卷 73_47【侍宴安乐公主山庄应制】

苏颋

駉駉羽骑历城池，帝女楼台向晚披。雾洒旌旗云外出，
风回岩岫雨中移。当轩半落天河水，绕径全低月树枝。
箫鼓宸游陪宴日，和鸣双凤喜来仪。

卷 73_48【兴庆池侍宴应制】

苏颋

降鹤池前回步辇，栖鸾树杪出行宫。山光积翠遥疑逼，
水态含青近若空。直视天河垂象外，俯窥京室画图中。
皇欢未使恩波极，日暮楼船更起风。

卷 73_49【广达楼下夜侍酺宴应制】

苏颋

东岳封回宴洛京，西墉通晚会公卿。楼台绝胜宜春苑，
灯火还同不夜城。正睹人间朝市乐，忽闻天上管弦声。
酺来万舞群臣醉，喜戴千年圣主明。

卷 73_50【龙池乐章（唐享龙池乐章第七章）】

苏颋

西京凤邸跃龙泉，佳气休光镇在天。轩后雾图今已得，
秦王水剑昔常传。恩鱼不入昆明钓，瑞鹤长如太液仙。
愿侍巡游同旧里，更闻箫鼓济楼船。

卷 73_51【扈从鄠杜间奉呈刑部尚书舅崔黄门马常侍】

苏颋

翠辇红旗出帝京，长杨鄠杜昔知名。云山一一皆美，
竹树萧萧画不成。羽骑将过持袂拂，香车欲度卷帘行。
汉家曾草巡游赋，何似今来应圣明。

卷 73_52 【景龙观送裴士曹】

苏颋

昔日尝闻公主第，今时变作列仙家。池傍坐客穿丛筱，
树下游人扫落花。雨雪长疑向函谷，山泉直似到流沙。
君还洛邑分明记，此处同来阅岁华。

卷 73_53 【春晚紫微省直寄内】

苏颋

直省清华接建章，向来无事日犹长。花间燕子栖鵷鹄，
竹下鹓雏绕凤凰。内史通宵承紫诰，中人落晚爱红妆。
别离不惯无穷忆，莫误卿卿学太常。

卷 73_54 【赠彭州权别驾】

苏颋

双流脉脉锦城开，追饯年年往复回。只道歌谣迎半刺，
徒闻礼数揖中台。黄莺急啭春风尽，斑马长嘶落景催。
莫怆分飞岐路别，还当奏最掖垣来。

卷 73_55【寒食宴于中舍别驾兄弟宅】

苏颋

子推山上歌龙罢，定国门前结驷来。始睹元昆锵玉至，
旋闻季子佩刀回。晴花处处因风起，御柳条条向日开。
自有长筵欢不极，还将彩服咏南陔。

卷 73_56【九月九日望蜀台】

苏颋

蜀王望蜀旧台前，九日分明见一川。北料乡关方自此，
南辞城郭复依然。青松系马攒岩畔，黄菊留人籍道边。
自昔登临湮灭尽，独闻忠孝两能传。

第七十四卷

卷 74_1【奉和晦日幸昆明池应制】

苏颋

炎历事边陲，昆明始凿池。豫游光后圣，征战罢前规。
霁色清珍宇，年芳入锦陂。御杯兰荐叶，仙仗柳交枝。
二石分河泻，双珠代月移。微臣比翔泳，恩广自无涯。

卷 74_2【奉和圣制幸礼部尚书窦希玠宅应制】

苏颋

尚书列侯第，外戚近臣家。飞栋临青绮，回輿转翠华。
日交当户树，泉漾满池花。圆顶图嵩石，方流拥魏沙。
豫游今听履，侍从昔鸣笳。自有天文降，无劳访海槎。

卷 74_3【奉和幸韦嗣立山庄应制】

苏颋

攬金寒野霁，步玉曉山幽。帝幄期松子，臣廬訪葛侯。
百工征往夢，七聖扈來游。斗柄乘時轉，台阶捧日留。
樹重岩籟合，泉迸水光浮。石徑喧朝履，璜溪擁釣舟。
恩如犯星夜，歡擬濟河秋。不學堯年隱，空令傲許由。

卷 74_4【奉和聖制送張說上集賢學士賜宴得茲字】

蘇頲

肅肅金殿里，招賢固在茲。鏘鏘石渠內，序拜亦同時。
宴錫歡談道，文成貴說詩。用儒今作相，敦學舊為師。
下際天光近，中來帝渥滋。國朝良史載，能事日論思。

卷 74_5【奉和聖制途經華岳應制】

蘇頲

朝望蓮華岳，神心就日來。晴觀五千仞，仙掌拓山開。
受命金符叶，過祥玉瑞陪。霧披乘鹿見，云起馭龍回。
偃樹枝封雪，殘碑石冒苔。聖皇惟道契，文字勒岩隈。

卷 74_6 【奉和圣制经河上公庙应制】

苏颋

河流无日夜，河上有神仙。辇路曾经此，坛场即宛然。
下疑成洞穴，高若在空烟。善物遗方外，和光绕道边。
事因周史得，言与汉王传。喜属膺期圣，邦家业又玄。

卷 74_7 【奉和圣制答张说出雀鼠谷】

苏颋

雨施巡方罢，云从训俗回。密途汾水卫，清跸晋郊陪。
寒著山边尽，春当日下来。御祠玄鸟应，仙仗绿杨开。
作颂音传雅，观文色动台。更知西向乐，宸藻协盐梅。

卷 74_8 【奉和恩赐乐游园宴应制】

苏颋

乐游光地选，酺饮庆天从。座密千官盛，场开百戏容。
绿塍际山尽，缇幕倚云重。下上花齐发，周回柳遍浓。
夺晴纷剑履，喧听杂歌钟。日晚衔恩散，尧人并可封。

卷 74_9 【恩制尚书省僚宴昆明池同用尧字】

苏颋

露渥洒云霄，天官次斗杓。昆明四十里，空水极晴朝。
雁似衔红叶，鲸疑喷海潮。翠山来彻底，白日去回标。
泳广渔权溢，浮深妓舫摇。饱恩皆醉止，合舞共歌尧。

卷 74_10 【奉和圣制幸望春宫送朔方大总管张仁亶】

苏颋

北风吹早雁，日夕渡河飞。气冷胶应折，霜明草正腓。
老臣帷幄算，元宰庙堂机。饯饮回仙跸，临戎解御衣。
军装乘晓发，师律候春归。方伫勋庸盛，天词降紫微。

卷 74_11 【奉和圣制登太行山中言志应制】

苏颋

北山东入海，驰道上连天。顺动三光注，登临万象悬。
俯观河内邑，平指洛阳川。按蹕夷关险，张旗亘井泉。
晓岩中警柝，春事下搜田。德重周王问，歌轻汉后传。
宸游铺令典，睿思起芳年。愿以封书奏，回銮禅肃然。

卷 74_12【奉和圣制漕桥东送新除岳牧】

苏颋

宝贤不遗俊，台阁尽鹓鸾。未若调人切，其如简帝难。
上才膺出典，中旨念分官。特以专城贵，深惟列郡安。
政行思务本，风靡属胜残。有令田知急，无分狱在宽。
至言题睿札，殊渥洒仙翰。诏饒三台降，朝荣万国欢。
举杯临水发，张乐拥桥观。式伫东封会，锵锵检玉坛。

卷 74_13【奉和圣制途次旧居应制】

苏颋

潞国临淄邸，天王别驾舆。出潜离隐际，小往大来初。
东陆行春典，南阳即旧居。约川星罕驻，扶道日旂舒。
云覆连行在，风回助扫除。木行城邑望，皋落土田疏。
昔试邦兴后，今过俗僖予。示威宁校猎，崇让不陈鱼。
府吏趋宸扆，乡耆捧帝车。帐倾三饮处，闲整六飞馀。
盛业铭汾鼎，昌期应洛书。愿陪歌赋末，留比蜀相如。

卷 74_14 【奉和圣制至长春宫登楼望稼穡之作】

苏颋

帝迹奚其远，皇符之所崇。敬时尧务作，尽力禹称功。
赫赫惟元后，经营自左冯。变芜粳稻实，流恶水泉通。
国阜犹前豹，人疲讵昔熊。黄图巡沃野，清吹入离宫。
是阅京坻富，仍观都邑雄。凭轩一何绮，积溜写晴空。
礼节家安外，和平俗在中。见龙垂渭北，辞雁指河东。
睿思方居镐，宸游若饮丰。宁夸子云从，只为猎扶风。

卷 74_15 【利州北佛龕前重于去岁题处作】

苏颋

重岩载看美，分塔起层标。蜀守经涂处，巴人作礼朝。
地疑三界出，空是六尘销。卧石铺苍藓，行厓覆绿条。
岁年书有记，非为学题桥。

卷 74_16 【闲园即事寄韦侍郎】

苏颋

结庐东城下，直望江南山。青霭远相接，白云来复还。

拂筵红蕖上，开幔绿条间。物应春偏好，情忘趣转闲。
宪臣饶美度，联事惜徂颜。有酒空盈酌，高车不可攀。

卷 74_17【扈从温泉同紫微黄门群公泛渭川得齐字】

苏颋

虹旗映绿萸，春仗汉丰西。侍跸浮清渭，扬舲降紫泥。
近临钧石地，遥指钓璜溪。岸转帆飞疾，川平棹举齐。
傅舟来是用，轩驭往应迷。兴阑菱歌动，沙洲乱夕鹭。

卷 74_18【饯赵尚书摄御史大夫赴朔方军】

苏颋

劲虏欲南窥，扬兵护朔陲。赵尧宁易印，邓禹即分麾。
野饯回三杰，军谋用六奇。云边愁出塞，日下怆临岐。
拔剑行人舞，挥戈战马驰。明年麟阁上，充国画于斯。

卷 74_19【晓发兴州入陈平路】

苏颋

旌节指巴岷，年年行且巡。暮来青嶂宿，朝去绿江春。

鱼贯梁缘马，猿奔树息人。邑祠犹是汉，溪道即名陈。
旧史饶迁谪，恒情厌苦辛。宁知报恩者，天子一忠臣。

卷 74_20 【同钱阳将军兼源州都督御史中丞】

苏颋

右地接龟沙，中朝任虎牙。然明方改俗，去病不为家。
将礼登坛盛，军容出塞华。朔风摇汉鼓，边马思胡笳。
旗合无邀正，冠危有触邪。当看劳还日，及此御沟花。

卷 74_21 【扈从凤泉和崔黄门喜恩旨解严罢围之作】

苏颋

辇路岐山曲，储胥渭水湄。教成提将鼓，礼备植虞旗。
不取从畋乐，先流去杀慈。舜韶同舞日，汤祝尽飞时。
物应阳和施，人知雨露私。何如穆天子，七萃几劳师。

卷 74_22 【秋夜寓直中书呈黄门舅】

苏颋

帘栊上夜钩，清切听更筹。忽共鸡枝老，还如骑省秋。

循庭喜三入，对渚忆双游。紫绂名初拜，黄縑迹尚留。
月舒当北幌，云赋直东楼。恩渥迷天施，童蒙慰我求。
迟君台鼎节，闻义一承流。

卷 74_23【先是新昌小园期京兆尹一访，兼郎官数子，自顷沉疴，年复一年兹愿不果，率然成章】

苏颋

独好中林隐，先期上月春。闲花傍户落，喧鸟逼檐驯。
寂寞东坡叟，传呼北里人。在山琴易调，开瓮酒归醇。
伫望应三接，弥留忽几旬。不疑丹火变，空负绿条新。
斗蚁闻常日，歌龙值此辰。其如众君子，嘉会阻清尘。

卷 74_24【奉和马常侍寺中之作】

苏颋

怨暑时云谢，愆阳泽暂偏。鼎陈从祀日，钥动问刑年。
绛服龙雩寝，玄冠马使旋。作霖期传说，为旱听周宣。
河岳阴符启，星辰暗檄传。浮凉吹景气，飞动洒空烟。
飒飒将秋近，沉沉与暝连。分湍泾水石，合颖雍州田。
德施超三五，文雄赋十千。及斯何以乐，明主敬人天。

卷 74_25【慈恩寺二月半寓言】

苏颋

二月韶春半，三空霁景初。献来应有受，灭尽竟无馀。
化迹传官寺，归诚谒梵居。殿堂花覆席，观阁柳垂疏。
共命枝间鸟，长生水上鱼。问津窥彼岸，迷路得真车。
行密幽关静，谈精俗态祛。稻麻欣所遇，蓬筚怆焉如。
不驻秦京陌，还题蜀郡舆。爱离方自此，回望独踟蹰。

卷 74_26【饯泽州卢使君赴任】

苏颋

闻道降纶书，为邦建彩旗。政凭循吏往，才以贵卿除。
词赋良无敌，声华蔼有馀。荣承四岳后，请绝五天初。
关路通秦壁，城池接晋墟。撰期行子赋，分典列侯居。
别望喧追饯，离言系惨舒。平芜寒蛩乱，乔木夜蝉疏。
寥泝秋先起，推移月向诸。旧交何以赠，客至待烹鱼。

卷 74_27【陈仓别陇州司户李维深】

苏颋

京国自携手，同途欣解颐。情言正的的，春物宛迟迟。

忽背雕戎役，旋瞻获宝祠。蜀城余出守，吴岳尔归思。
欢悵更伤此，眷殷殊念兹。扬麾北林径，跂石南涧湄。
中作壶觞饯，回添道路悲。数花临磴日，百草覆田时。
有美同人意，无为行子辞。酣歌拔剑起，毋是答恩私。

卷 74_28 【奉和崔尚书赠大理陆卿鸿胪刘卿见示之作】

苏颋

戏藻嘉鱼乐，栖梧见凤飞。类从皆有召，声应乃无违。
美价逢时出，奇才选众稀。避堂貽后政，扫第发前几。
出曳仙人履，还熏侍女衣。省中何赫奕，庭际满芳菲。
吏部端清鉴，丞郎肃紫机。会心歌咏是，回迹宴言非。
北寺邻玄阙，南城写翠微。参差交隐见，仿佛接光辉。
宾序尝柔德，刑孚已霁威。巨源林下契，不速自同归。

卷 74_29 【敬和崔尚书大明朝堂雨后望终南山见示之作】

苏颋

奕奕轻车至，清晨朝未央。未央在霄极，中路视咸阳。
委曲汉京近，周回秦塞长。日华动泾渭，天翠合岐梁。
五丈旌旗色，百层粉黛光。东连归马地，南指斗鸡场。
晴壑照金甌，秋云含璧珰。由余窥霸国，萧相奉兴王。
功役隐不见，颂声存复扬。权宜珍构绝，圣作宝图昌。

在德期巢燧，居安法禹汤。冢卿才顺美，多士赋成章。
价重三台俊，名超百郡良。焉知掖垣下，陈力自迷方。

卷 74_30 【夜闻故梓州韦使君明当引绋感而成章】

苏颋

恻矣南邻问，冥然东岱幽。里閭宁相杵，朝叹忽迁舟。
君心惟伯仲，吾人复款游。对连时亦早，交喜岁才周。
序发扶阳赠，文因司寇酬。讵期危露尽，相续逝川流。
卧疾无三吊，居闲有百忧。振风吟鼓夕，明月照帷秋。
藓驳题诗馆，杨疏奏伎楼。共将歌笑叹，转为弟兄留。
感物存如梦，观生去若浮。余非忘情者，雪涕报林丘。

卷 74_31 【御箭连中双兔】

苏颋

宸游经上苑，羽猎向闲田。狡兔初迷窟，纤骊讵著鞭。
三驱仍百步，一发遂双连。影射含霜草，魂消向月弦。
欢声动寒木，喜气满晴天。那似陈王意，空随乐府篇。

卷 74_32 【奉和圣制过潼津关】

苏颋

在德何夷险，观风复往还。自能同善闭，中路可无关。

卷 74_33 【山鹧鸪词二首】

苏颋

玉关征戍久，空闺人独愁。寒露湿青苔，别来蓬鬓秋。

人坐青楼晚，莺语百花时。愁多人易老，断肠君不知。

卷 74_34 【汾上惊秋】

苏颋

北风吹白云，万里渡河汾。心绪逢摇落，秋声不可闻。

卷 74_35 【山驿闲卧即事】

苏颋

息燕归檐静，飞花落院闲。不愁愁自著，谁道忆乡关。

卷 74_36 【将赴益州题小园壁】

苏颋

岁穷惟益老，春至却辞家。可惜东园树，无人也作花。

卷 74_37 【咏礼部尚书厅后鹊】

苏颋

怀印喜将归，窥巢恋且依。自知栖不定，还欲向南飞。

卷 74_38 【咏死兔】

苏颋

兔子死兰弹，持来挂竹竿。试将明镜照，何异月中看。

卷 74_39【夜宴安乐公主新宅】

苏颋

车如流水马如龙，仙史高台十二重。
天上初移衡汉匹，可怜歌舞夜相从。

卷 74_40【侍宴桃花园咏桃花应制】

苏颋

桃花灼灼有光辉，无数成蹊点更飞。
为见芳林含笑待，遂同温树不言归。

卷 74_41【奉和圣制幸韦嗣立庄应制】

苏颋

树色参差隐翠微，泉流百尺向空飞。
传闻此处投竿住，遂使兹辰扈蹕归。

卷 74_42【重送舒公】

苏颋

散骑金貂服彩衣，松花水上逐春归。
悬知邑里遥相望，事主荣亲代所稀。

卷 74_43【句】

苏颋

飞埃结红雾，游盖飘青云。

指如十挺墨，耳似两张匙。

丑虽有足，甲不全身。见君无口，知伊少人。

第七十五卷

卷 75_1【龙池篇】

姜晞

灵沼萦回邸第前，浴日涵春写曙天。始见龙台升凤阙，
应如霄汉起神泉。石匱渚傍还启圣，桃李初生更有仙。
欲化帝图从此受，正同河变一千年。

卷 75_2【龙池篇】

姜皎

龙池初出此龙山，常经此地谒龙颜。日日芙蓉生夏水，
年年杨柳变春湾。尧坛宝匣馀烟雾，舜海渔舟尚往还。
愿似飘飘五云影，从来从去九天关。

卷 75_3 【奉和圣制龙池篇】

蔡孚

帝宅王家大道边，神马潜龙涌圣泉。昔日昔时经此地，
看来看去渐成川。歌台舞榭宜正月，柳岸梅洲胜往年。
莫疑波上春云少，只为从龙直上天。

卷 75_4 【打球篇】

蔡孚

德阳宫北苑东头，云作高台月作楼。金锤玉釜千金地，
宝杖雕文七宝球。窦融一家三尚主，梁冀频封万户侯。
容色由来荷恩顾，意气平生事侠游。共道用兵如断蔗，
俱能走马入长楸。红鬃锦鬣风騄骥，黄络青丝电紫骝。
奔星乱下花场里，初月飞来画杖头。自有长鸣须决胜，
能驰迅走满先筹。薄暮汉宫愉乐罢，还归尧室晓垂旒。

卷 75_5 【阮公体】

徐晶

秦王按剑怒，发卒戍龙沙。雄图尚未毕，海内已纷拏。

黄尘暗天起，白日敛精华。唯见长城外，僵尸如乱麻。

卷 75_6【同蔡孚五亭咏】

徐晶

章奏中京罢，云泉别业归。拂琴铺野席，牵柳挂朝衣。
翡翠巢书幌，鸳鸯立钓矶。幽栖可怜处，春事满林扉。

卷 75_7【蔡起居山亭】

徐晶

文史归休日，栖闲卧草亭。蔷薇一架紫，石竹数重青。
垂露和仙药，烧香诵道经。莫将山水弄，持与世人听。

卷 75_8【送友人尉蜀中】

徐晶

故友汉中尉，请为西蜀吟。人家多种橘，风土爱弹琴。
水向昆明阔，山连大夏深。理闲无别事，时寄一登临。

卷 75_9 【赠温驸马汝阳王】

徐晶

畴昔承馀论，文章幸滥推。夜陪银汉赏，朝奉桂山词。
梁邸调歌日，秦楼按舞时。登高频作赋，体物屡为诗。
连骑长楸下，浮觴曲水湄。北堂留上客，南陌送佳期。
忆昨陪临泛，于今阻宴私。再看冬雪满，三见夏花滋。
都尉朝青阁，淮王侍紫墀。宁知倦游者，华发老京师。

卷 75_10 【边词】

张敬忠

五原春色旧来迟，二月垂杨未挂丝。
即今河畔冰开日，正是长安花落时。

卷 75_11 【戏咏】

张敬忠

有意嫌兵部，专心望考功。谁知脚踏蹬，几落省墙东。

卷 75_12【题巴州光福寺楠木】

史俊

近郭城南山寺深，亭亭奇树出禅林。结根幽壑不知岁，
耸干摩天凡几寻。翠色晚将岚气合，月光时有夜猿吟。
经行绿叶望成盖，宴坐黄花长满襟。此木尝闻生豫章，
今朝独秀在巴乡。凌霜不肯让松柏，作宇由来称栋梁。
会待良工时一眄，应归法水作慈航。

第七十六卷

卷 76_1【仪坤庙乐章·永和】

徐彦伯

猗若清庙，肃肃荧荧。国荐严祀，坤兴淑灵。
有几在室，有乐在庭。临兹孝享，百禄惟宁。

卷 76_2【仪坤庙乐章·金奏】

徐彦伯

阴灵效祉，轩曜降精。祥符淑气，庆集柔明。
瑶俎既列，雕桐发声。徽猷永远，比德皇英。

卷 76_3【拟古三首】

徐彦伯

遥裔烟屿鸿，双影旦夕同。交翰倚沙月，和鸣弄江风。

灌若茂芳序，君子从远戎。云生阴海没，花落春潭空。
红泪掩促柱，锦衾罗薰笼。自伤琼草绿，讵惜铅粉红。
裂帛附双燕，为予向辽东。

读书三十载，驰骛周六经。儒衣干时主，忠策献阙廷。
一朝奉休盼，从容厕群英。束身趋建礼，秉笔坐承明。
廨署相填噓，僚吏纷纵横。五日休浣时，屠苏绕玉屏。
橘花覆北沼，桂树交西荣。树栖两鸳鸯，含春向我鸣。
皎洁绮罗艳，便娟丝管清。扰扰天地间，出处各有情。
何必岩石下，枯槁闲此生。

颓光无淹晷，逝水有迅流。绿苔纷易歇，红颜不再求。
歌笑当及春，无令壮志秋。弱年仕关辅，窳门豁御沟。
敷愉东城际，婉娈南陌头。荷花娇绿水，杨叶暖青楼。
中有绮罗人，可怜名莫愁。画屏绕金膝，珠帘悬玉钩。
纤指调宝琴，泠泠哀且柔。赠君鸳鸯带，因以鹔鹕裘。
窗晓吟日坐，闺夕秉烛游。无作北门客，咄咄怀百忧。

卷 76_4【赠刘舍人古意】

徐彦伯

女床閼灵鸟，文章世所希。巢君碧梧树，舞君青琐闱。
或言凤池乐，抚翼更西飞。凤池环禁林，仙阁霭沉沉。
璇题激流日，珠缀绵清阴。郁穆丝言重，荧煌台座深。
风张丹旆翻，月弄紫庭音。众彩结不散，孤英跼莫寻。

浩歌在西省，经传恣潜心。

卷 76_5【和李適答宋十一入崖口五渡见赠】

徐彦伯

闻有独往客，拂衣捐世心。结欣薄枉渚，撰念萦旧林。
经亘去崖合，冥绵归壑深。琪树环碧彩，金潭生翠阴。
沿洄弄沙榜，诡仄眺明岑。夕闻桂里猿，晓玩松上禽。
杂佩蕴孤袖，琼敷缀双襟。我怀沧洲想，懿尔白云吟。
秉愿理方协，存期迹易寻。兹言庶不负，为报岩中琴。

卷 76_6【雪】

徐彦伯

雪暗穷海云，洒空纷似露。朔风吹故里，宛转玉阶树。
孤妾调玉瑟，早寒生锦衿。况君张罗幕，愁坐北庭阴。

卷 76_7【比干墓】

徐彦伯

大位天下宝，维贤国之镇。殷道微而在，受辛纂颓胤。

山鸣鬼又哭，地裂川亦震。媒黠皆佞谀，虔刘尽英隽。
孤卿帝叔父，特进贞而顺。玉床逾皓洁，铜柱方歆焮。
奉国历三朝，观窍明一瞬。季代猖狂主，蓄怒提白刃。
之子弥忠讷，愤然更勇进。抚膺誓陨越，知死故不吝。
已矣竟剖心，哲妇亦同殉。骊龙暴双骨，太岳摧孤仞。
周发次商郊，冤骸悲莫殣。锋剑剿遗孽，报复一何迅。
驻罕歌淑灵，命徒封旅榘。自尔衔幽酷，于嗟流景骏。
丘坟被宿莽，坛坫缘飞磷。贞观戒北征，维皇念忠信。
荒坟护草木，刻桷吹煨烬。代远恩更崇，身殒名益振。
帝词书乐石，国饌罗芳衅。伟哉烈士图，奇英千古徇。

卷 76_8 【题东山子李適碑阴二首】

徐彦伯

陇嶂萦紫气，金光赫氛氲。美人含遥霭，桃李芳自薰。
图高黄鹤羽，宝夺骊龙群。忽惊薤露曲，掩噎东山云。

回也实夭折，贾生亦脆促。今复哀若人，危光迅风烛。
夜台沦清镜，穷尘埋结绿。何以赠下泉，生刍唯一束。

卷 76_9 【淮亭吟】

徐彦伯

贞寂虑兮淮山幽，怜芳若兮揽中洲。崩湍委咽日夜流，

孤客危坐心自愁。矧鹤唳兮风晓，复猿鸣兮霜秋。
熠熠飞兮蟋蟀吟，倚清瑟兮横凉琴。擷瑶芳兮吊楚水，
弄琪树兮歌越岑。山礚礚兮隈曲，水涓涓兮洞汨。
金光延起兮骤兴没，青苔竟兮绿蘋歇。
绿蘋歇兮凋朱颜，美人寂历兮何时闲，
君不见可怜桐柏上，丰茸桂树花满山。

卷 76_10【芳树】

徐彦伯

玉花珍簟上，金缕画屏开。晓月怜筝柱，春风忆镜台。
筝柱春风吹晓月，芳树落花朝暝歇。稿砧刀头未有期，
攀条拭泪坐相思。

卷 76_11【游禁苑幸临渭亭遇雪应制】

徐彦伯

玉律藏冰候，彤阶飞雪时。日寒消不尽，风定舞还迟。
琼树留宸瞩，璇花入睿词。悬知穆天子，黄竹谩言诗。

卷 76_12【奉和送金城公主适西蕃应制】

徐彦伯

凤宸怜箫曲，鸾闺念掌珍。羌庭遥筑馆，庙策重和亲。
星转银河夕，花移玉树春。圣心凄送远，留蹕望征尘。

卷 76_13【幸白鹿观应制】

徐彦伯

凤舆乘八景，龟策向三仙。日月移平地，云霞缀小天。
金童擎紫药，玉女献青莲。花洞留宸赏，还旗绕夕烟。

卷 76_14【胡无人行】

徐彦伯

十月繁霜下，征人远凿空。云摇锦车节，海照角端弓。
暗碛埋沙树，冲飙卷塞蓬。方随膜拜入，歌舞玉门中。

卷 76_15【婕妤】

徐彦伯

君恩忽断绝，妾思终未央。巾栉不可见，枕席空余香。
窗暗网罗白，阶秋苔藓黄。应门寂已闭，流涕向昭阳。

卷 76_16【采莲曲】

徐彦伯

妾家越水边，摇艇入江烟。既觅同心侣，复采同心莲。
折藕丝能脆，开花叶正圆。春歌弄明月，归棹落花前。

卷 76_17【孤烛叹（一作闺怨）】

徐彦伯

切切夜闺冷，微微孤烛然。玉盘红泪滴，金烬彩光圆。
暖手缝轻素，嚬蛾续断弦。相思咽不语，回向锦屏眠。

卷 76_18 【闺怨】

徐彦伯

征客戍金微，愁闺独掩扉。尘埃生半榻，花絮落残机。
褪暖蚕初卧，巢昏燕欲归。春风日向尽，衔涕作征衣。

卷 76_19 【饯唐州高使君赴任】

徐彦伯

香萼媚红滋，垂条萦绿丝。情人拂瑶袂，共惜此芳时。
骊驎已踟躅，鸟隼方葳蕤。跂予望太守，流润及京师。

卷 76_20 【奉和幸新丰温泉宫应制】

徐彦伯

姬典歌时迈，虞篇记省方。何如黑帝月，玄览白云乡。
翠仗萦船岸，明旆应萑阳。风摇花眊彩，雪艳宝戈芒。
御陌开函次，离宫夹树行。桂枝笼驷裹，松叶覆堂皇。
仙石含珠液，温池孕璧房。涌疑神瀆溢，澄若帝台浆。
独沸流常热，潜蒸气转香。青坛环玉甃，红础铄金光。
藻曜凝芳洁，葳蕤献淑祥。五龙归宝算，九扈叶时康。

同预华封老，中衢祝圣皇。

卷 76_21【同韦舍人元旦早朝】

徐彦伯

夕转清壶漏，晨惊长乐钟。逶迤纶禁客，假寐守铜龙。
予亦趋三殿，肩随谒九重。繁珂接曙响，华剑比春容。
相问韶光歇，弥怜芳意浓。愿言乘日旰，携手即云峰。

卷 76_22【侍宴韦嗣立山庄应制】

徐彦伯

鼎臣休浣隙，方外结遥心。别业青霞境，孤潭碧树林。
每驰东墅策，遥弄北溪琴。帝眷纾时豫，台园赏岁阴。
移銮明月沼，张组白云岑。御酒瑶觞落，仙坛竹径深。
三光悬圣藻，五等冠朝簪。自昔皇恩感，咸言独自今。

卷 76_23【送特进李峤入都祔庙】

徐彦伯

特进三公下，台臣百揆先。孝图开寝石，祠主卜牲筵。

恩级青纶赐，徂装紫囊悬。绸缪金鼎席，宴饫玉潢川。
北斗分征路，东山起赠篇。乐池歌绿藻，梁苑藉红荃。
骑转商岩日，旌摇关塞烟。庙堂须臾议，锦节伫来旋。

卷 76_24 【春闺】

徐彦伯

戍客戍清波，幽闺幽思多。暗梁闻语燕，夜烛见飞蛾。
宝鸭藏脂粉，金屏缀绮罗。裁衣卷纹素，织锦度鸣梭。
有使通西极，缄书寄北河。年光只恐尽，征战莫蹉跎。

卷 76_25 【奉和兴庆池戏竞渡应制】

徐彦伯

夹道传呼翊翠虬，天回日转御芳洲。青潭晓霭笼仙跸，
红屿晴花隔彩旒。香溢金杯环广坐，声传妓舸匝中流。
群臣相庆嘉鱼乐，共晒横汾歌吹秋。

卷 76_26 【苑中遇雪应制】

徐彦伯

千钟圣酒御筵披，六出祥英乱绕枝。

即此神仙对琼圃，何烦辙迹向瑶池。

卷 76_27【上巳日祓禊渭滨应制】

徐彦伯

晴风丽日满芳洲，柳色春筵祓锦流。
皆言侍跸横汾宴，暂似乘槎天汉游。

卷 76_28【夜宴安乐公主新宅应制】

徐彦伯

凤楼开阖引明光，花酎连添醉益香。
欲知帝女薰天贵，金柯玉柱夜成行。

卷 76_29【饯唐永昌】

徐彦伯

金溪碧水玉潭沙，鳧舄翩翩弄日华。
斗鸡香陌行春倦，为摘东园桃李花。

卷 76_30 【侍宴桃花园】

徐彦伯

源水丛花无数开，丹跗红萼间青梅。
从今结子三千岁，预喜仙游复摘来。

卷 76_31 【石淙】

徐彦伯

碧淀红洳崿嶂间，淙嵌湫岨洊成湾。琪树璿娟花未落，
银芝黼黻露初还。八风行殿开仙榜，七景飞舆下石关。
张芟席云平圃宴，焜煌金记蕴名山。

第七十七卷

卷 77_1【夏日游德州赠高四】

骆宾王

日观邻全赵，星临俯旧吴。鬲津开巨浸，稽阜镇名都。
紫云浮剑匣，青山孕宝符。封疆恢霸道，问鼎竞雄图。
神光包四大，皇威震八区。风烟通地轴，星象正天枢。
天枢阴南北，地轴殊乡国。辟门通舜宾，比屋封尧德。
言谢垂钩隐，来参负鼎职。天子不见知，群公讵相识。
未展从东骏，空戢图南翼。时命欲何言，抚膺长叹息。
叹息将如何，游人意气多。白雪梁山曲，寒风易水歌。
泣魏伤吴起，思赵切廉颇。凄断韩王剑，生死翟公罗。
罗悲翟公意，剑负韩王气。骄饵去易论，忌途良可畏。
夙昔怀江海，平生混泾渭。千载契风云，一言忘贱贵。
去去访林泉，空谷有遗贤。言投爵里刺，来泛野人船。
缔交君赠缟，投分我忘筌。成风郢匠斫，流水伯牙弦。
牙弦忘道术，漳滨恣闲逸。聊安张蔚庐，讵扫陈蕃室。
虚室狎招寻，敬爱混浮沉。一诺黄金信，三复白珪心。
霜松贞雅节，月桂朗冲襟。灵台万顷浚，学府九流深。
谈玄明毁璧，拾紫陋籛金。鹭涛开碧海，凤彩缀词林。
林虚星华映，水澈霞光净。霞水两分红，川源四望通。

雾卷天山静，烟销太史空。鸟声流向薄，蝶影乱芳丛。
柳阴低槁水，荷气上薰风。风月芳菲节，物华纷可悦。
将欢促席赏，遽尔又归别。积水带吴门，通波连禹穴。
赠言虽欲尽，机心庶应绝。潘岳本自闲，梁鸿不因热。
一瓢欣狎道，三月聊栖拙。栖拙隐金华，狎道访仙查。
放旷愚公谷，消散野人家。一顷南山豆，五色东陵瓜。
野衣裁薜叶，山酒酌藤花。白云离望远，青溪隐路赊。
倪忆幽岩桂，犹冀折疏麻。

卷 77_2 【在江南赠宋五之问】

骆宾王

井络双源浚，浔阳九派长。沦波通地穴，输委下归塘。
别岛笼朝蜃，连洲拥夕涨。韞珠澄积润，让璧动浮光。
浮光凝折水，积润疏圆沚。玉轮涵地开，剑阁连星起。
风烟标迥秀，英灵信多美。怀德践遗芳，端操惭谋已。
谋已谬观光，牵迹强凄惶。揆拙迷三省，劳生昧两忘。
弹随空被笑，献楚自多伤。一朝殊默语，千里易炎凉。
炎凉几迁贸，川陆疲臻凑。积水架吴涛，连山横楚岫。
风月虽殊昔，星河犹是旧。姑苏望南浦，邯郸通北走。
北走平生亲，南浦别离津。潇湘一超忽，洞庭多苦辛。
秋江无绿芷，寒汀有白蘋。采之将何遗，故人漳水滨。
漳滨已辽远，江潭未旋返。为听短歌行，当想长洲苑。
露金熏菊岸，风佩摇兰坂。蝉鸣稻叶秋，雁起芦花晚。
晚秋云日明，亭皋风雾清。独负平生气，重牵摇落情。

占星非聚德，梦月讷悬名。寂寥伤楚奏，凄断泣秦声。
秦声怀旧里，楚奏悲无已。郢路少知音，丛台富奇士。
温辉凌爱日，壮气惊寒水。一顾重风云，三冬足文史。
文史盛纷纶，京洛多风尘。犹轻五车富，未重一囊贫。
李仙非易托，苏鬼尚难因。不惜劳歌尽，谁为听阳春。

卷 77_3【晚憩田家】

骆宾王

转蓬劳远役，披薜下田家。山形类九折，水势急三巴。
悬梁接断岸，涩路拥崩查。雾岩沦晓魄，风湫涨寒沙。
心迹一朝舛，关山万里赊。龙章徒表越，闽俗本殊华。
旅行悲泛梗，离赠折疏麻。唯有寒潭菊，独似故园花。

卷 77_4【出石门】

骆宾王

层岩远接天，绝岭上栖烟。松低轻盖偃，藤细弱丝悬。
石明如挂镜，苔分似列钱。暂策为龙杖，何处得神仙。

卷 77_5【至分陕】

骆宾王

陕西开胜壤，召南分沃畴。列树巢维鹖，平渚下睢鸠。
憩棠疑勿剪，曳葛似攀樛。至今王化美，非独在隆周。

卷 77_6【寓居洛滨对雪忆谢二（一作洛滨对雪忆谢二兄弟）】

骆宾王

旅思眇难裁，冲飙恨易哀。旷望洛川晚，飘飘瑞雪来。
积彩明书幌，流韵绕琴台。色夺迎仙羽，花避犯霜梅。
谢庭赏方逸，袁扉掩未开。高人傥有访，兴尽讵须回。

卷 77_7【北眺春陵】

骆宾王

揽辔疲宵迈，驱马倦晨兴。既出封泥谷，还过避雨陵。
山行明照上，谿宿密云蒸。登高徒欲赋，词殫独抚膺。

卷 77_8【夏日游目聊作】

骆宾王

暂屏嚣尘累，言寻物外情。致逸心逾默，神幽体自轻。
浦夏荷香满，田秋麦气清。讵假沧浪上，将濯楚臣缨。

卷 77_9【同崔驸马晓初登楼思京】

骆宾王

丽谯通四望，繁忧起万端。绮疏低晚魄，镂槛肃初寒。
白云乡思远，黄图归路难。唯馀西向笑，暂似当长安。

卷 77_10【月夜有怀简诸同病】

骆宾王

闲庭落景尽，疏帘夜月通。山灵响似应，水净望如空。
栖枝犹绕鹊，遵渚未来鸿。可叹高楼妇，悲思杳难终。

卷 77_11【叙寄员半千】

骆宾王

薄宦三河道，自负十馀年。不应惊若厉，只为直如弦。
坐历山川险，吁嗟陵谷迁。长吟空抱膝，短翮讵冲天。
魂归沧海上，望断白云前。钓名劳拾紫，隐迹自谈玄。
不学多能圣，徒思鸿宝仙。斯志良难已，此道岂徒然。
嗟为刀笔吏，耻从绳墨牵。岐路情虽狎，人伦地本偏。
长揖谢时事，独往访林泉。寄言二三子，生死不来旋。

卷 77_12【咏怀古意上裴侍郎】

骆宾王

三十二馀罢，鬓是潘安仁。四十九仍入，年非朱买臣。
纵横愁系越，坎壈倦游秦。出笼穷短翮，委辙涸枯鳞。
穷经不沾用，弹铗欲谁申。天子未驱策，岁月几沉沦。
轻生长慷慨，效死独殷勤。徒歌易水客，空老渭川人。
一得视边塞，万里何苦辛。剑匣胡霜影，弓开汉月轮。
金刀动秋色，铁骑想风尘。为国坚诚款，捐躯忘贱贫。
勒功思比宪，决略暗欺陈。若不犯霜雪，虚掷玉京春。

卷 77_13【春夜韦明府宅宴得春字】

骆宾王

酌桂陶芳夜，披薜啸幽人。雅琴驯鲁雉，清歌落范尘。
宿云低迥盖，残月上虚轮。幸此承恩洽，聊当故乡春。

卷 77_14【过张平子墓】

骆宾王

西鄂该通理，南阳擅德音。玉卮浮藻丽，铜浑积思深。
忽怀今日昔，非复昔时今。日落丰碑暗，风来古木吟。
惟叹穷泉下，终郁羨鱼心。

卷 77_15【从军中行路难二首（一作行军军中行路难，军中行路难）】

骆宾王

君不见封狐雄虺自成群，冯深负固结妖氛。
玉玺分兵征恶少，金坛受律动将军。将军拥旄宣庙略，
战士横行静夷落。长驱一息背铜梁，直指三巴登剑阁。
阁道岿峩起戍楼，剑门遥裔俯灵丘。邛关九折无平路，

江水双源有急流。征役无期返，他乡岁华晚。
杳杳丘陵出，苍苍林薄远。途危紫盖峰，路涩青泥坂。
去去指哀牢，行行入不毛。绝壁千里险，连山四望高。
中外分区宇，夷夏殊风土。交趾枕南荒，昆弥临北户。
川原绕毒雾，溪谷多淫雨。行潦四时流，崩查千岁古。
漂梗飞蓬不自安，扞藤引葛度危峦。昔时闻道从军乐，
今日方知行路难。沧江绿水东流驶，炎洲丹徼南中地。
南中南斗映星河，秦川秦塞阻烟波。三春边地风光少，
五月泸中瘴疠多。朝驱疲斥候，夕息倦樵歌。
向月弯繁弱，连星转太阿。重义轻生怀一顾，
东伐西征凡几度。夜夜朝朝斑鬓新，年年岁岁戎衣故。
灞城隅，滇池水，天涯望转积，地际行无已。
徒觉炎凉节物非，不知关山千万里。弃置勿重陈，
征行多苦辛。且悦清笳杨柳曲，讵忆芳园桃李人。
绛节朱旗分白羽，丹心白刃酬明主。但令一被君王知，
谁惮三边征战苦。行路难，几千端，无复归云凭短翰，
空馀望日想长安。（此首一作辛常伯诗）

君不见玉关尘色暗边庭，铜鞮杂虏寇长城。
天子按剑征馀勇，将军受脤事横行。七德龙韬开玉帐，
千里鼙鼓叠金钲。阴山苦雾埋高垒，交河孤月照连营。
连营去去无穷极，拥旆遥遥过绝国。阵云朝结晦天山，
寒沙夕涨迷疏勒。龙鳞水上开鱼贯，马首山前振雕翼。
长驱万里誓祁连，分麾三命武功宣。百发乌号遥碎柳，
七尺龙文迥照莲。春来秋去移灰琯，兰闺柳市芳尘断。
雁门迢递尺书稀，鸳被相思双带缓。行路难，行路难，
誓令氛祲静皋兰。但使封侯龙额贵，讵随中妇凤楼寒。
（同辛常伯作）

卷 77_16【帝京篇】

骆宾王

山河千里国，城阙九重门。不睹皇居壮，安知天子尊。
皇居帝里崑函谷，鹑野龙山侯甸服。五纬连影集星躔，
八水分流横地轴。秦塞重关一百二，汉家离宫三十六。
桂殿嶽岑对玉楼，椒房窈窕连金屋。三条九陌丽城隈，
万户千门平旦开。复道斜通鵷鹊观，交衢直指凤凰台。
剑履南宫入，簪缨北阙来。声名冠寰宇，文物象昭回。
钩陈肃兰帟，璧沼浮槐市。铜羽应风回，金茎承露起。
校文天禄阁，习战昆明水。朱邸抗平台，黄扉通戚里。
平台戚里带崇墉，炊金馔玉待鸣钟。小堂绮帐三千户，
大道青楼十二重。宝盖雕鞍金络马，兰窗绣柱玉盘龙。
绣柱璇题粉壁映，锵金鸣玉王侯盛。王侯贵人多近臣，
朝游北里暮南邻。陆贾分金将宴喜，陈遵投辖正留宾。
赵李经过密，萧朱交结亲。丹凤朱城白日暮，
青牛紺幘红尘度。侠客珠弹垂杨道，倡妇银钩采桑路。
倡家桃李自芳菲，京华游侠盛轻肥。延年女弟双凤入，
罗敷使君千骑归。同心结缕带，连理织成衣。
春朝桂尊尊百味，秋夜兰灯灯九微。翠幌珠帘不独映，
清歌宝瑟自相依。且论三万六千是，宁知四十九年非。
古来荣利若浮云，人生倚伏信难分。始见田窦相移夺，
俄闻卫霍有勋。未厌金陵气，先开石椁文。
朱门无复张公子，灞亭谁畏李将军。相顾百龄皆有待，
居然万化咸应改。桂枝芳气已销亡，柏梁高宴今何在。

春去春来苦自驰，争名争利徒尔为。久留郎署终难遇，
空扫相门谁见知。当时一旦擅豪华，自言千载长骄奢。
倏忽抟风生羽翼，须臾失浪委泥沙。黄雀徒巢桂，
青门遂种瓜。黄金销铄素丝变，一贵一贱交情见。
红颜宿昔白头新，脱粟布衣轻故人。故人有湮沦，
新知无意气。灰死韩安国，罗伤翟廷尉。
已矣哉，归去来。马卿辞蜀多文藻，扬雄仕汉乏良媒。
三冬自矜诚足用，十年不调几遭回。汲黯薪逾积，
孙弘阁未开。谁惜长沙傅，独负洛阳才。

卷 77_17 【畴昔篇】

骆宾王

少年重英侠，弱岁贱衣冠。既托寰中赏，方承膝下欢。
遨游灞水曲，风月洛城端。且知无玉馔，谁肯逐金丸。
金丸玉馔盛繁华，自言轻侮季伦家。五霸争驰千里马，
三条竞骛七香车。掩映飞轩乘落照，参差步障引朝霞。
池中旧水如悬镜，屋里新妆不让花。意气风云倏如昨，
岁月春秋屡回薄。上苑频经柳絮飞，中园几见梅花落。
当时门客今何在，畴昔交朋已疏索。莫教憔悴损容仪，
会得高秋云雾廓。淹留坐帝乡，无事积炎凉。
一朝披短褐，六载奉长廊。赋文惭昔马，执戟叹前扬。
挥戈出武帐，荷笔入文昌。文昌隐隐皇城里，
由来奕奕多才子。潘陆词锋骆驿飞，张曹翰苑纵横起。
卿相未曾识，王侯宁见拟。垂钓甘成白首翁，

负薪何处逢知己。判将运命赋穷通，从来奇舛任西东。
不应永弃同刍狗，且复飘飘类转蓬。容鬓年年异，
春华岁岁同。荣亲未尽礼，徇主欲申功。
脂车秣马辞乡国，萦轡西南使邛僰。玉垒铜梁不易攀，
地角天涯眇难测。莺啭蝉吟有悲望，鸿来雁度无音息。
阳关积雾万里昏，剑阁连山千种色。蜀路何悠悠，
岷峰阻且修。回肠随九折，迸泪连双流。寒光千里暮，
露气二江秋。长途看束马，平水且沉牛。
华阳旧地标神制，石镜蛾眉真秀丽。诸葛才雄已号龙，
公孙跃马轻称帝。五丁卓犖多奇力，四士英灵富文艺。
云气横开八阵形，桥形遥分七星势。川平烟雾开，
游戏锦城隈。墉高龟望出，水净雁文回。寻姝入酒肆，
访客上琴台。不识金貂重，偏惜玉山颓。
他乡冉冉消年月，帝里沈沈限城阙。不见猿声助客啼，
唯闻旅思将花发。我家迢递关山里，关山迢递不可越。
故园梅柳尚馀春，来时勿使芳菲歇。解鞅欲言归，
执袂怆多违。北梁俱握手，南浦共沾衣。别情伤去盖，
离念惜徂辉。知音何所托，木落雁南飞。回来望平陆，
春来酒应熟。相将菌阁卧青溪，且用藤杯泛黄菊。
十年不调为贫贱，百日屡迁随倚伏。只为须求负郭田，
使我再干州县禄。百年郁郁少腾迁，万里遥遥入镜川。
涔江拂潮冲白日，淮海长波接远天。
丛竹凝朝露，孤山起暝烟。赖有边城月，常伴客旌悬。
东南美箭称吴会，名都隐轸三江外。涂山执玉应昌期，
曲水开襟重文会。仙镒流音鸣鹤岭，宝剑分辉落蛟濑。
未看白马对芦刍，且觉浮云似车盖。江南节序多，
文酒屡经过。共踏春江曲，俱唱采菱歌。舟移疑入镜，

棹举若乘波。风光无限极，归楫碍池荷。
眺听烟霞正流眄，即从王事归舳转。芝田花月屡裴回，
金谷佳期重游衍。登高北望嗤梁叟，凭轼西征想潘掾。
峰开华岳耸疑莲，水激龙门急如箭。人事谢光阴，
俄遭霜露侵。偷存七尺影，分没九泉深。穷途行泣玉，
愤路未藏金。茹荼空有叹，怀橘独伤心。
年来岁去成销铄，怀抱心期渐寥落。挂冠裂冕已辞荣，
南亩东皋事耕凿。宾阶客院常疏散，蓬径柴扉终寂寞。
自有林泉堪隐栖，何必山中事丘壑。我住青门外，
家临素浐滨。遥瞻丹凤阙，斜望黑龙津。荒衢通猎骑，
穷巷抵樵轮。时有桃源客，来访竹林人。
昨夜琴声奏悲调，旭旦含颦不成笑。果乘骢马发嚣书，
复道郎官禀纶诰。冶长非罪曾缧绁，长孺然灰也已经溺。
高门有阅不图封，峻笔无闻敛敷妙。适离京兆谤，
还从御史弹。炎威资夏景，平曲况秋翰。画地终难入，
书空自不安。吹毛未可待，摇尾且求餐。
丈夫坎壈多愁疾，契阔迢迢尽今日。慎罚宁凭两造辞，
严科直挂三章律。邹衍衔悲系燕狱，李斯抱怨拘秦桎。
不应白发顿成丝，直为黄沙暗如漆。紫禁终难叫，
朱门不易排。惊魂闻叶落，危魄逐轮埋。霜威遥有厉，
雪枉遂无阶。含冤欲谁道，饮气独居怀。
忽闻驿使发关东，传道天波万里通。涸鳞去辙还游海，
幽禽释网便翔空。舜泽尧曦方有极，谗言巧佞傥无穷。
谁能跼迹依三辅，会就商山访四翁。

卷 77_18【艳情代郭氏答卢照邻】

骆宾王

迢迢芊路望芝田，眇眇函关恨蜀川。归云已落涪江外，
还雁应过洛水漣。洛水傍连帝城侧，帝宅层甍垂凤翼。
铜驼路上柳千条，金谷园中花几色。柳叶园花处处新，
洛阳桃李应芳春。妾向双流窥石镜，君住三川守玉人。
此时离别那堪道，此日空床对芳沼。芳沼徒游比目鱼，
幽径还生拔心草。流风回雪傥便娟，骥子鱼文实可怜。
掷果河阳君有分，货酒成都妾亦然。莫言贫贱无人重，
莫言富贵应须种。绿珠犹得石崇怜，飞燕曾经汉皇宠。
良人何处醉纵横，直如循默守空名。倒提新缣成慊慊，
翻将故剑作平平。离前吉梦成兰兆，别后啼痕上竹生。
别日分明相约束，已取宜家成诫勖。当时拟弄掌中珠，
岂谓先摧庭际玉。悲鸣五里无人问，肠断三声谁为续。
思君欲上望夫台，端居懒听将雏曲。沉沉落日向山低，
檐前归燕并头栖。抱膝当窗看夕兔，侧耳空房听晓鸡。
舞蝶临阶只自舞，啼鸟逢人亦助啼。独坐伤孤枕，
春来悲更甚。峨眉山上月如眉，濯锦江中霞似锦。
锦字回文欲赠君，剑壁层峰自纠纷。平江淼淼分清浦，
长路悠悠间白云。也知京洛多佳丽，也知山岫遥亏蔽。
无那短封即疏索，不在长情守期契。传闻织女对牵牛，
相望重河隔浅流。谁分迢迢经两岁，谁能脉脉待三秋。
情知唾井终无理，情知覆水也难收。不复下山能借问，
更向卢家字莫愁。

卷 77_19【代女道士王灵妃赠道士李荣】

骆宾王

玄都五府风尘绝，碧海三山波浪深。桃实千年非易待，
桑田一变已难寻。别有仙居对三市，金阙银宫相向起。
台前镜影伴仙娥，楼上箫声随凤史。凤楼迢递绝尘埃，
莺时物色正裴回。灵芝紫检参差长，仙桂丹花重叠开。
双童绰约时游陟，三鸟联翩报消息。尽言真侣出遨游，
传道风光无限极。轻花委砌惹裾香，残月窥窗觇幌色。
个时无数并妖妍，个里无穷总可怜。别有众中称黜帝，
天上人间少流例。洛滨仙驾启遥源，淮浦灵津符远筮。
自言少小慕幽玄，只言容易得神仙。珮中邀勒经时序，
箫里寻思复几年。寻思许事真情变，二人容华识少选。
漫道烧丹止七飞，空传化石曾三转。寄语天上弄机人，
寄语河边值查客，乍可匆匆共百年，谁使遥遥期七夕。
想知人意自相寻，果得深心共一心。一心一意无穷已，
投漆投胶非足拟。只将羞涩当风流，持此相怜保终始。
相怜相念倍相亲，一生一代一双人。不把丹心比玄石，
惟将浊水况清尘。只言柱下留期信，好欲将心学松筠。
不能京兆画蛾眉，翻向成都骋驺引。青牛紫气度灵关，
尽素艳鳞去不还。连苔上砌无穷绿，修竹临坛几处斑。
此时空床难独守，此日别离那可久。梅花如雪柳如丝，
年去年来不自持。初言别在寒偏在，何悟春来春更思。
春时物色无端绪，双枕孤眠谁分许。分念娇莺一种啼，
生憎燕子千般语。朝云旭日照青楼，迟晖丽色满皇州。

落花泛泛浮灵沼，垂柳长长拂御沟。御沟大道多奇赏，
侠客妖容递来往。宝骑连花铁作钱，香轮鹜水珠为网。
香轮宝骑竞繁华，可怜今夜宿倡家。鸂鶒杯中浮竹叶，
凤凰琴里落梅花。许辈多情偏送款，为问春花几时满。
千回鸟信说众诸，百过莺啼说长短。长短众诸判不寻，
千回百过浪关心。何曾举意西邻玉，未肯留情南陌金。
南陌西邻咸自保，还辔归期须及早。为想三春狭斜路，
莫辞九折邛关道。假令白里似长安，须使青牛学剑端。
蘋风入驭来应易，竹杖成龙去不难。龙飙去去无消息，
鸾镜朝朝减容色。君心不记下山人，妾欲空期上林翼。
上林三月鸿欲稀，华表千年鹤未归。不分淹留桑路待，
只应直取桂轮飞。

第七十八卷

卷 78_1【从军行】

骆宾王

平生一顾重，意气溢三军。野日分戈影，天星合剑文。
弓弦抱汉月，马足践胡尘。不求生入塞，唯当死报君。

卷 78_2【王昭君（一作昭君怨）】

骆宾王

敛容辞豹尾，缄恨度龙鳞。金钿明汉月，玉箸染胡尘。
古镜菱花暗，愁眉柳叶颦。唯有清笳曲，时闻芳树春。

卷 78_3【于紫云观赠道士】

骆宾王

碧落澄秋景，玄门启曙关。人疑列御至，客似令威还。

羽盖徒欣仰，云车未可攀。只应倾玉醴，时许寄颓颜。

卷 78_4【渡瓜步江】

骆宾王

捧檄辞幽径，鸣榔下贵洲。惊涛疑跃马，积气似连牛。
月迥寒沙净，风急夜江秋。不学浮云影，他乡空滞留。

卷 78_5【途中有怀】

骆宾王

眷然怀楚奏，怅矣背秦关。涸鳞惊照辙，坠羽怯虚弯。
素服三川化，乌裘十上还。莫言无皓齿，时俗薄朱颜。

卷 78_6【至分水戍】

骆宾王

行役忽离忧，复此怆分流。溅石回湍咽，萦丛曲涧幽。
阴岩常结晦，宿莽竞含秋。况乃霜晨早，寒风入戍楼。

卷 78_7 【望乡夕泛】

骆宾王

归怀剩不安，促榜犯风澜。落宿含楼近，浮月带江寒。
喜逐行前至，忧从望里宽。今夜南枝鹊，应无绕树难。

卷 78_8 【久客临海有怀】

骆宾王

天涯非日观，地屺望星楼。练光摇乱马，剑气上连牛。
草湿姑苏夕，叶下洞庭秋。欲知凄断意，江上涉安流。

卷 78_9 【游兖部逢孔君自卫来，欣然相遇若旧】

骆宾王

游人自卫返，背客隔淮来。倾盖金兰合，忘筌玉叶开。
繁花明日柳，疏蕊落风梅。将期重交态，时慰不然灰。

卷 78_10【西京守岁】

骆宾王

闲居寡言宴，独坐惨风尘。忽见严冬尽，方知列宿春。
夜将寒色去，年共晓光新。耿耿他乡夕，无由展旧亲。

卷 78_11【同辛簿简仰酬思玄上人林泉四首】

骆宾王

闻君招隐地，仿佛武陵春。缉芰知还楚，披榛似避秦。
崩查年祀积，幽草岁时新。一谢沧浪水，安知有逸人。

芳晨临上月，幽赏狎中园。有蝶堪成梦，无羊可触藩。
忘怀南涧藻，蠲思北堂萱。坐叹华滋歇，思君谁为言。

林泉恣探历，风景暂裴徊。客有迁莺处，人无结驷来。
聚花如薄雪，沸水若轻雷。今日徒招隐，终知异凿坏。

俗远风尘隔，春还初服迟。林疑中散地，人似上皇时。
芳杜湘君曲，幽兰楚客词。山中有春草，长似寄相思。

卷 78_12【秋日饯陆道士陈文林】

骆宾王

青牛游华岳，赤马走吴宫。玉柱离鸿怨，金罍浮蚁空。
日霁崤陵雨，尘起洛阳风。唯当玄度月，千里与君同。

卷 78_13【送郑少府入辽，共赋侠客远从戎】

骆宾王

边烽警榆塞，侠客度桑干。柳叶开银镝，桃花照玉鞍。
满月临弓影，连星入剑端。不学燕丹客，空歌易水寒。

卷 78_14【送费六还蜀】

骆宾王

星楼望蜀道，月峡指吴门。万行流别泪，九折切惊魂。
雪影含花落，云阴带叶昏。还愁三径晚，独对一清尊。

卷 78_15【秋日送侯四得弹字】

骆宾王

我留安豹隐，君去学鹏抟。岐路分襟易，风云促膝难。
夕涨流波急，秋山落日寒。惟有思归引，凄断为君弹。

卷 78_16【秋日送尹大赴京】

骆宾王

挂瓢余隐舜，负鼎尔干汤。竹叶离樽满，桃花别路长。
低河耿秋色，落月抱寒光。素书如可嗣，幽谷伫宾行。

卷 78_17【秋夜送阎五还润州】

骆宾王

通庄抵旧里，沟水泣新知。断云飘易滞，连露积难披。
素风啼迥堞，惊月绕疏枝。无力励短翰，轻举送长离。

卷 78_18【送王明府参选赋得鹤】

骆宾王

振衣游紫府，飞盖背青田。虚心恒警露，孤影尚凌烟。
离歌凄妙曲，别操绕繁弦。在阴如可和，清响会闻天。

卷 78_19【秋日送别】

骆宾王

寂寥心事晚，摇落岁时秋。共此伤年发，相看惜去留。
当歌应破涕，哀命返穷愁。别后能相忆，东陵有故侯。

卷 78_20【别李峤得胜字】

骆宾王

芳尊徒自满，别恨转难胜。客似游江岸，人疑上灞陵。
寒更承夜永，凉景向秋澄。离心何以赠，自有玉壶冰。

卷 78_21 【在兖州饯宋五之问】

骆宾王

淮沂泗水地，梁甫汶阳东。别路青骊远，离尊绿蚁空。
柳寒凋密翠，棠晚落疏红。别后相思曲，凄断入琴风。

卷 78_22 【游灵公观】

骆宾王

灵峰标胜境，神府枕通川。玉殿斜连汉，金堂迥架烟。
断风疏晚竹，流水切危弦。别有青门外，空怀玄圃心。

卷 78_23 【夏日游山家同夏少府】

骆宾王

返照下层岑，物外狎招寻。兰径薰幽珮，槐庭落暗金。
谷静风声彻，山空月色深。一遣樊笼累，唯馀松桂心。

卷 78_24 【初秋登王司马楼宴得同字】

骆宾王

展骥端居暇，登龙喜宴同。绵赏三清满，承欢六义通。
野晦寒阴积，潭虚夕照空。顾惭非梦鸟，滥此厕雕虫。

卷 78_25 【初秋于窦六郎宅宴】

骆宾王

千里风云契，一朝心赏同。意尽深交合，神灵俗累空。
草带销寒翠，花枝发夜红。唯将澹若水，长揖古人风。

卷 78_26 【冬日宴】

骆宾王

二三物外友，一百杖头钱。赏洽袁公地，情披乐令天。
促席鸾觞满，当炉兽炭然。何须攀桂树，逢此自留连。

卷 78_27 【镂鸡子】

骆宾王

幸遇清明节，欣逢旧练人。
刻花争脸态，写月竞眉新。
晕罢空馀月，诗成并道春。
谁知怀玉者，含响未吟晨。

卷 78_28 【咏美人在天津桥】

骆宾王

美女出东邻，容与上天津。
整衣香满路，移步袜生尘。
水下看妆影，眉头画月新。
寄言曹子建，个是洛川神。

卷 78_29 【送宋五之问得凉字】

骆宾王

愿言游泗水，支离去二漳。
道术君所笃，筌蹄余自忘。
雪威侵竹冷，秋爽带池凉。
欲验离襟切，岐路在他乡。

卷 78_30【宪台出紵寒夜有怀】

骆宾王

独坐怀明发，长谣苦未安。自应迷北叟，谁肯问南冠。
生死交情异，殷忧岁序阑。空馀朝夕鸟，相伴夜啼寒。

卷 78_31【送郭少府探得忧字】

骆宾王

开筵枕德水，辍棹舫仙舟。贝阙桃花浪，龙门竹箭流。
当歌凄别曲，对酒泣离忧。还望青门外，空见白云浮。

卷 78_32【冬日过故人任处士书斋】

骆宾王

神交尚投漆，虚室罢游兰。网积窗文乱，苔深履迹残。
雪明书帐冷，水静墨池寒。独此琴台夜，流水为谁弹。

卷 78_33【送刘少府游越州】

骆宾王

一丘余枕石，三越尔怀铅。离亭分鹤盖，别岸指龙川。
露下蝉声断，寒来雁影连。如何沟水上，凄断听离弦。

卷 78_34【赋得白云抱幽石】

骆宾王

重岩抱危石，幽涧曳轻云。绕镇仙衣动，飘蓬羽盖分。
锦色连花静，苔光带叶熏。讵知吴会影，长抱谷城文。

卷 78_35【赋得春云处处生】

骆宾王

千里年光静，四望春云生。槩日祥光举，疏云瑞叶轻。
盖阴笼迥树，阵影抱危城。非将吴会远，飘荡帝乡情。

卷 78_36 【在狱咏蝉】

骆宾王

西陆蝉声唱，南冠客思侵。那堪玄鬓影，来对白头吟。
露重飞难进，风多响易沉。无人信高洁，谁为表予心。

卷 78_37 【咏水】

骆宾王

列名通地纪，疏派合天津。波随月色净，态逐桃花春。
照霞如隐石，映柳似沉鳞。终当挹上善，属意澹交人。

卷 78_38 【同张二咏雁】

骆宾王

唼藻沧江远，衔芦紫塞长。雾深迷晓景，风急断秋行。
阵照通宵月，书封几夜霜。无复能鸣分，空知愧稻粱。

卷 78_39【咏雪】

骆宾王

龙云玉叶上，鹤雪瑞花新。影乱铜乌吹，光销玉马津。
含辉明素篆，隐迹表祥轮。幽兰不可俪，徒自绕阳春。

卷 78_40【咏云酒】

骆宾王

朔空曾纪历，带地旧疏泉。色泛临瑒瑞，香流赴蜀仙。
款交欣散玉，洽友悦沉钱。无复中山赏，空吟吴会篇。

卷 78_41【尘灰】

骆宾王

洛川流雅韵，秦道擅苛威。听歌梁上动，应律管中飞。
光飘神女袜，影落羽人衣。愿言心未翳，终冀效轻微。

卷 78_42【秋晨同淄川毛司马秋九咏·秋风】

骆宾王

紫陌炎氛歇，青蘋晚吹浮。乱竹摇疏影，萦池织细流。
飘香曳舞袖，带粉泛妆楼。不分君恩绝，纨扇曲中秋。

卷 78_43【秋晨同淄川毛司马秋九咏·秋云】

骆宾王

南陆铜浑改，西郊玉叶轻。泛斗瑶光动，临阳瑞色明。
盖阴连凤阙，阵影翼龙城。讵知时不遇，空伤流滞情。

卷 78_44【秋晨同淄川毛司马秋九咏·秋蝉】

骆宾王

九秋行已暮，一枝聊暂安。隐榆非谏楚，噪柳异悲潘。
分形妆薄鬓，镂影饰危冠。自怜疏影断，寒林夕吹寒。

卷 78_45【秋晨同淄川毛司马秋九咏·秋露】

骆宾王

玉关寒气早，金塘秋色归。泛掌光逾净，添荷滴尚微。
变霜凝晓液，承月委圆辉。别有吴台上，应湿楚臣衣。

卷 78_46【秋晨同淄川毛司马秋九咏·秋月】

骆宾王

云披玉绳净，月满镜轮圆。裊露珠晖冷，凌霜桂影寒。
漏彩含疏薄，浮光漾急澜。西园徒自赏，南飞终未安。

卷 78_47【秋晨同淄川毛司马秋九咏·秋水】

骆宾王

贝阙寒流彻，玉轮秋浪清。图云锦色净，写月练花明。
泛曲鸕弦动，随轩凤辖惊。唯当御沟上，凄断送归情。

卷 78_48【秋晨同淄川毛司马秋九咏·秋萤】

骆宾王

玉虬分静夜，金萤照晚凉。含辉疑泛月，带火怯凌霜。
散彩萦虚牖，飘花绕洞房。下帷如不倦，当解惜馀光。

卷 78_49【秋晨同淄川毛司马秋九咏·秋菊】

骆宾王

擢秀三秋晚，开芳十步中。分黄俱笑日，含翠共摇风。
碎影涵流动，浮香隔岸通。金翘徒可泛，玉斝竟谁同。

卷 78_50【秋晨同淄川毛司马秋九咏·秋雁】

骆宾王

联翩辞海曲，遥曳指江干。阵去金河冷，书归玉塞寒。
带月凌空易，迷烟逗浦难。何当同顾影，刷羽泛清澜。

卷 78_51【乐大夫挽词五首】

骆宾王

可叹浮生促，吁嗟此路难。丘陵一起恨，言笑几时欢。
萧索郊埏晚，荒凉井径寒。谁当门下客，独见有任安。

蒿里谁家地，松门何代丘。百年三万日，一别几千秋。
返照寒无影，穷泉冻不流。居然同物化，何处欲藏舟。

昔去梅笳发，今来薤露晞。彤驺朝帝阙，丹旌背王畿。
城郭犹疑是，原陵稍觉非。九原如可作，千载与谁归。

一旦先朝菌，千秋掩夜台。青乌新兆去，白马故人来。
草露当春泣，松风向暮哀。宁知荒垄外，吊鹤自徘徊。

忽见泉台路，犹疑水镜悬。何如开白日，非复睹青天。
华表迎千岁，幽扃送百年。独嗟流水引，长掩伯牙弦。

卷 78_52【丹阳刺史挽词三首】

骆宾王

百龄嗟倏忽，一旦向山阿。丹桂销已尽，青松哀更多。
薰风虚听曲，薤露反成歌。自有藏舟处，谁怜隙驷过。

惻怆恒山羽，留连棣萼篇。佳城非旧日，京兆即新阡。
城郭三千岁，丘陵几万年。唯馀松柏垞，朝夕起寒烟。

短歌三献曲，长夜九泉台。此室玄扃掩，何年白日开。
荒郊疏古木，寒隧积陈茭。独此伤心地，松声薄暮来。

卷 78_53 【称心寺】

骆宾王

征帆恣远寻，逶迤过称心。凝滞衡灌岸，沿洄楂柚林。
穿溆不厌曲，舫潭惟爱深。为乐凡几许，听取舟中琴。

卷 78_54 【陪润州薛司空丹徒桂明府游招隐寺】

骆宾王

共寻招隐寺，初识戴颙家。还依旧泉壑，应改昔云霞。
绿竹寒天笋，红蕉腊月花。金绳倘留客，为系日光斜。

第七十九卷

卷 79_1【棹歌行】

骆宾王

写月涂黄罢，凌波拾翠通。镜花摇芰日，衣麝入荷风。
叶密舟难荡，莲疏浦易空。凤媒羞自托，鸳翼恨难穷。
秋帐灯华翠，倡楼粉色红。相思无别曲，并在棹歌中。

卷 79_2【海曲书情】

骆宾王

薄游倦千里，劳生负百年。未能槎上汉，讵肯剑游燕。
白云照春海，青山横曙天。江涛让双璧，渭水掷三钱。
坐惜风光晚，长歌独块然。

卷 79_3 【蓬莱镇】

骆宾王

旅客春心断，边城夜望高。野楼疑海气，白鹭似江涛。
结绶疲三入，承冠泣二毛。将飞怜弱羽，欲济乏轻舠。
赖有阳春曲，穷愁且代劳。

卷 79_4 【和李明府】

骆宾王

传闻叶悬履，飞向洛阳城。驰道临层掖，津门对小平。
霞残疑制锦，云度似飘缨。藻掞潘江澈，尘虚范甑清。
讵怜冲斗气，犹向匣中鸣。

卷 79_5 【春晚从李长史游开道林故山】

骆宾王

幽寻极幽壑，春望陟春台。云光栖断树，灵影入仙杯。
古藤依格上，野径约山隈。落蕊翻风去，流莺满树来。
兴兰荀御动，归路起浮埃。

卷 79_6 【冬日野望】

骆宾王

故人无与晤，安步陟山椒。野静连云卷，川明断雾销。
灵岩闻晓籁，洞浦涨秋潮。三江归望断，千里故乡遥。
劳歌徒自奏，客魂谁为招。

卷 79_7 【晚渡黄河】

骆宾王

千里寻归路，一苇乱平源。通波连马颊，迸水急龙门。
照日荣光净，惊风瑞浪翻。棹唱临风断，樵讴入听喧。
岸迥秋霞落，潭深夕雾繁。谁堪逝川上，日暮不归魂。

卷 79_8 【宿山庄】

骆宾王

金陵一超忽，玉烛几还周。露积吴台草，风入郢门楸。
林虚宿断雾，磴险挂悬流。拾青非汉策，化缁类秦裘。
牵迹犹多蹇，劳生未寡尤。独此他乡梦，空山明月秋。

卷 79_9 【晚度天山有怀京邑】

骆宾王

忽上天山路，依然想物华。云疑上苑叶，雪似御沟花。
行叹戎麾远，坐怜衣带赊。交河浮绝塞，弱水浸流沙。
旅思徒漂梗，归期未及瓜。宁知心断绝，夜夜泣胡笳。

卷 79_10 【夕次蒲类津（一作晚泊蒲类）】

骆宾王

二庭归望断，万里客心愁。山路犹南属，河源自北流。
晚风连朔气，新月照边秋。灶火通军壁，烽烟上戍楼。
龙庭但苦战，燕颔会封侯。莫作兰山下，空令汉国羞。

卷 79_11 【远使海曲春夜多怀】

骆宾王

长啸三春晚，端居百虑盈。未安胡蝶梦，遽切鲁禽情。
别岛连寰海，离魂断戍城。流星疑伴使，低月似依营。
怀禄宁期达，牵时匪徇名。艰虞行已远，时迹自相惊。

卷 79_12 【早发诸暨】

骆宾王

征夫怀远路，夙驾上危峦。薄烟横绝巘，轻冻涩回湍。
野雾连空暗，山风入曙寒。帝城临灞浹，禹穴枕江干。
橘性行应化，蓬心去不安。独掩穷途泪，长歌行路难。

卷 79_13 【望月有所思】

骆宾王

九秋凉风肃，千里月华开。圆光随露湛，碎影逐波来。
似霜明玉砌，如镜写珠胎。晚色依关近，边声杂吹哀。
离居分照耀，怨绪共裴徊。自绕南飞羽，空忝北堂才。

卷 79_14 【送吴七游蜀】

骆宾王

日观分齐壤，星桥接蜀门。桃花嘶别路，竹叶泻离樽。
夏老兰犹茂，秋深柳尚繁。雾销山望迥，风高野听喧。
劳歌徒欲奏，赠别竟无言。唯有当秋月，空照野人园。

卷 79_15【西行别东台详正学士】

骆宾王

意气坐相亲，关河别故人。客似秦川上，歌疑易水滨。
塞荒行辨玉，台远尚名轮。泄井怀边将，寻源重汉臣。
上苑梅花早，御沟杨柳新。只应持此曲，别作边城春。

卷 79_16【和王记室从赵王春日游陀山寺】

骆宾王

鸟旗陪访道，鹫岭狎栖真。四禅明静业，三空广胜因。
祥河疏叠涧，慧日皎重轮。叶暗龙宫密，花明鹿苑春。
雕谈筌奥旨，妙辩漱玄津。雅曲终难和，徒自奏巴人。

卷 79_17【夏日夜忆张二】

骆宾王

伏枕忧思深，拥膝独长吟。烹鲤无尺素，烹鱼劳寸心。
疏麻空有折，芳桂湛无斟。广庭含夕气，闲宇澹虚阴。
织虫垂夜砌，惊鸟栖暝林。欢娱百年促，羁病一生侵。
讵堪孤月夜，流水入鸣琴。

卷 79_18【寒夜独坐游子多怀简知己】

骆宾王

故乡眇千里，离忧积万端。鹑服长悲碎，蜗庐未卜安。
富钩徒有想，贫铗为谁弹。柳秋风叶脆，荷晓露文团。
晚金丛岸菊，馀佩下幽兰。伐木伤心易，维桑归去难。
独有孤明月，时照客庭寒。

卷 79_19【在军中赠先还知己】

骆宾王

蓬转俱行役，瓜时独未还。魂迷金阙路，望断玉门关。
献凯多惭霍，论封几谢班。风尘催白首，岁月损红颜。
落雁低秋塞，惊凫起暝湾。胡霜如剑锓，汉月似刀环。
别后边庭树，相思几度攀。

卷 79_20【秋日山行简梁大官】

骆宾王

乘马陟层阜，回首睇山川。攒峰衔宿雾，叠嶂架寒烟。
百重含翠色，一道落飞泉。香吹分岩桂，鲜云抱石莲。

地偏心易远，致默体逾玄。得性虚游刃，忘言已弃筌。
弹冠劳巧拙，结绶倦牵缠。不如从四皓，丘中鸣一弦。

卷 79_21【晚泊江镇】

骆宾王

四运移阴律，三翼泛阳侯。荷香销晚夏，菊气入新秋。
夜乌喧粉堞，宿雁下芦洲。海雾笼边徼，江风绕戍楼。
转蓬惊别渚，徙橘怆离忧。魂飞灞陵岸，泪尽洞庭流。
振影希鸿陆，逃名谢蚁丘。还嗟帝乡远，空望白云浮。

卷 79_22【浮槎】

骆宾王

昔负千寻质，高临九仞峰。真心凌晚桂，劲节掩寒松。
忽值风飙折，坐为波浪冲。摧残空有恨，拥肿遂无庸。
渤海三千里，泥沙几万重。似舟飘不定，如梗泛何从。
仙客终难托，良工岂易逢。徒怀万乘器，谁为一先容。

卷 79_23【晚泊河曲】

骆宾王

三秋倦行役，千里泛归潮。通波竹箭水，轻舸木兰桡。

金堤连曲岸，贝阙影浮桥。水净千年近，星飞五老遥。
叠花开宿浪，浮叶下凉飙。浦荷疏晚药，津柳渍寒条。
恹惶劳梗泛，凄断倦蓬飘。仙槎不可托，河上独长谣。

卷 79_24 【早发淮口望盱眙】

骆宾王

养蒙分四渚，习坎奠三荆。徙帝留馀地，封王表旧城。
岸昏涵蜃气，潮满应鸡声。洲迴连沙静，川虚积溜明。
一朝从捧檄，千里倦悬旌。背流桐柏远，逗浦木兰轻。
小山迷隐路，大块切劳生。唯有贞心在，独映寒潭清。

卷 79_25 【边城落日】

骆宾王

紫塞流沙北，黄图灞水东。一朝辞俎豆，万里逐沙蓬。
候月恒持满，寻源屡凿空。野昏边气合，烽迴戍烟通。
膂力风尘倦，疆场岁月穷。河流控积石，山路远崆峒。
壮志凌苍兕，精诚贯白虹。君恩如可报，龙剑有雌雄。

卷 79_26 【宿温城望军营】

骆宾王

虏地寒胶折，边城夜柝闻。兵符关帝阙，天策动将军。
塞静胡笳彻，沙明楚练分。风旗翻翼影，霜剑转龙文。
白羽摇如月，青山断若云。烟疏疑卷幔，尘灭似销氛。
投笔怀班业，临戎想顾勋。还应雪汉耻，持此报明君。

卷 79_27 【过故宋】

骆宾王

旧国千年尽，荒城四望通。云浮非隐帝，日举类游童。
绮琴朝化洽，祥石夜论空。马去遥奔郑，蛇分近带丰。
池文敛束水，竹影漏寒丛。园兔承行月，川禽避断风。
故宋诚难定，从梁事未工。唯当过周客，独愧吴台空。

卷 79_28 【边夜有怀】

骆宾王

汉地行逾远，燕山去不穷。城荒犹筑怨，碣毁尚铭功。
古戍烟尘满，边庭人事空。夜关明陇月，秋塞急胡风。

倚伏良难定，荣枯岂易通。旅魂劳泛梗，离恨断征蓬。
苏武封犹薄，崔駰宦不工。惟馀北叟意，欲寄南飞鸿。

卷 79_29 【伤祝阿王明府】

骆宾王

洛川真气上，重泉惠政融。含章光后烈，继武嗣前雄。
与善良难验，生涯忽易穷。翔鳧犹化履，狎雉尚驯童。
钱满荒阶绿，尘浮虚帐红。夏馀将宿草，秋近未惊蓬。
烟晦泉门闭，日尽夜台空。谁堪孤陇外，独听白杨风。

卷 79_30 【四月八日题七级】

骆宾王

化城分鸟堞，香阁俯龙川。复栋侵黄道，重檐架紫烟。
铭书非晋代，壁画是梁年。霸略今何在，王宫尚岿然。
二帝曾游圣，三卿是偶贤。因兹游胜侣，超彼托良缘。
我出有为界，君登非想天。悠悠青旷里，荡荡白云前。
今日经行处，曲音号盖烟。

卷 79_31【和孙长史秋日卧病】

骆宾王

霍第疏天府，潘园近帝台。调弦三妇至，置驿五侯来。
尚想欢娱洽，吁嗟岁月催。金坛分上将，玉帐引环材。
决胜鲸波静，腾谋鸟谷开。白云淮水外，紫陌灞陵隈。
节变惊衰柳，笳繁思落梅。调神和玉烛，挹藻握珠胎。
怅矣欣怀土，居然欲死灰。还因承雅曲，暂喜跃沈鳃。

卷 79_32【饯郑安阳入蜀】

骆宾王

彭山折坂外，井络少城隈。地是三巴俗，人非百里材。
畏途君怅望，岐路我裴徊。心赏风烟隔，容华岁月催。
遥遥分凤野，去去转龙媒。遗锦非前邑，鸣琴即旧台。
剑门千仞起，石路五丁开。海客乘槎渡，仙童驭竹回。
魂将离鹤远，思逐断猿哀。唯有双凫舄，飞去复飞来。

卷 79_33【咏怀】

骆宾王

少年识事浅，不知交道难。一言芬若桂，四海臭如兰。

宝剑思存楚，金锤许报韩。虚心徒有托，循迹谅无端。
太息关山险，吁嗟岁月阑。忘机殊会俗，守拙异怀安。
阮籍空长啸，刘琨独未欢。十步庭芳敛，三秋陇月团。
槐疏非尽意，松晚夜凌寒。悲调弦中急，穷愁醉里宽。
莫将流水引，空向俗人弹。

卷 79_34 【春日离长安客中言怀（一作春霁早行）】

骆宾王

年华开早律，霁色荡芳晨。城阙千门晓，山河四望春。
御沟通太液，戚里对平津。宝瑟调中妇，金罍引上宾。
剧谈推曼倩，惊坐揖陈遵。意气一言合，风期万里亲。
自惟安直道，守拙忌因人。谈器非先木，图荣异后薪。
擢揄惭路鬼，憔悴切波臣。玄草终疲汉，乌裘几滞秦。
生涯无岁月，岐路有风尘。还嗟太行道，处处白头新。

卷 79_35 【夕次旧吴】

骆宾王

维舟背楚服，振策下吴畿。盛德弘三让，雄图枕九围。
黄池通霸迹，赤壁畅戎威。文物俄迁谢，英灵有盛衰。
行叹鸱夷没，遽惜湛卢飞。地古烟尘暗，年深馆宇稀。
山川四望是，人事一朝非。悬剑空留信，亡珠尚识机。

郑风遥可托，关月眇难依。西北云逾滞，东南气转微。
徒怀伯通隐，多谢买臣归。唯有荒台露，薄暮湿征衣。

卷 79_36【早秋出塞寄东台详正学士】

骆宾王

促驾逾三水，长驱望五原。天阶分斗极，地理接楼烦。
溪月明关陇，戎云聚塞垣。山川殊物候，风壤异凉暄。
戍古秋尘合，沙寒宿雾繁。昔余迷学步，投迹忝词源。
兰渚浮延阁，蓬山款禁园。影纓陪绂冕，载笔偶玕璠。
汲冢宁详蠹，秦牢讵辨冤。一朝从篚服，千里骛轻轩。
乡梦随魂断，边声入听喧。南图终铄翮，北上遽催辕。
吊影惭连茹，浮生倦触藩。数奇何以托，桃李自无言。

卷 79_37【幽絳书情通简知己】

骆宾王

昔岁逢杨意，观光贵楚材。穴疑丹凤起，场似白驹来。
一命沦骄饵，三缄慎祸胎。不言劳倚伏，忽此遘遄回。
骢马刑章峻，苍鹰狱吏猜。绝嫌非易辨，疑壁果难裁。
揆画惭周道，端忧滞夏台。生涯一灭裂，岐路几裴徊。
青陆春芳动，黄沙旅思催。圆扉长寂寂，疏网尚恢恢。
入阱先摇尾，迷津正曝腮。覆盆徒望日，蛰户未经雷。

霜歇兰犹败，风多木屡摧。地幽蚕室闭，门静雀罗开。
自悯秦冤痛，谁怜楚奏哀。汉阳穷鸟客，梁甫卧龙才。
有气还冲斗，无时会凿坏。莫言韩长孺，长作不然灰。

卷 79_38【久戍边城有怀京邑】

骆宾王

扰扰风尘地，遑遑名利途。盈虚一易舛，心迹两难俱。
弱龄小山志，宁期大丈夫。九微光贲玉，千仞忽弹珠。
棘寺游三礼，蓬山筮八儒。怀铅惭后进，投笔愿前驱。
北走非通赵，西之似化胡。锦车朝促候，刁斗夜传呼。
战士青丝络，将军黄石符。连星入宝剑，半月上雕弧。
拜井开疏勒，鸣桴动密须。戎机习短蔗，祆祲静长榆。
季月炎初尽，边亭草早枯。层阴笼古木，穷色变寒芜。
海鹤声嘹唳，城乌尾毕逋。葭繁秋色引，桂满夕轮虚。
行役风霜久，乡园梦想孤。灞池遥夏国，秦海望阳纡。
沙塞三千里，京城十二衢。杨沟连凤阙，槐路拟鸿都。
璧殿规宸象，金堤法斗枢。云浮西北盖，月照东南隅。
宝帐垂连理，银床转辘轳。广筵留上客，丰馔引中厨。
漏缓金徒箭，娇繁玉女壶。秋涛飞喻马，秋水泛仙舡。
意气风云合，言忘道术趋。共矜名已泰，讵肯沫相濡。
有志惭雕朽，无庸类散樗。关山暂超忽，形影叹艰虞。
结网空知羨，图荣岂自诬。忘情同塞马，比德类宛驹。
陇坂肝肠绝，阳关亭候迂。迷魂惊落雁，离恨断飞凫。
春去荣华尽，年来岁月芜。边愁伤郢调，乡思绕吴歔。

河气通中国，山途限外区。相思若可寄，冰泮有衔芦。

卷 79_39 【在军登城楼】

骆宾王

城上风威冷，江中水气寒。戎衣何日定，歌舞入长安。

卷 79_40 【于易水送人】

骆宾王

此地别燕丹，壮士发冲冠。昔时人已没，今日水犹寒。

卷 79_41 【咏镜】

骆宾王

写月无芳桂，照日有花菱。不持光谢水，翻将影学冰。

卷 79_42 【挑灯杖】

骆宾王

稟质非贪热，焦心岂惮熬。终知不自润，何处用脂膏。

卷 79_43 【咏尘】

骆宾王

凌波起罗袜，含风染素衣。别有知音调，闻歌应自飞。

卷 79_44 【玩初月（一作沈佺期诗）】

骆宾王

忌满光先缺，乘昏影暂流。既能明似镜，何用曲如钩。

卷 79_45 【送别】

骆宾王

寒更承夜永，凉夕向秋澄。离心何以赠，自有玉壶冰。

卷 79_46 【忆蜀地佳人】

骆宾王

东西吴蜀关山远，鱼来雁去两难闻。
莫怪常有千行泪，只为阳台一片云。

卷 79_47 【咏鹅（七岁时作）】

骆宾王

鹅鹅鹅，曲项向天歌。白毛浮绿水，红掌拨清波。

第八十卷

卷 80_1【奉和圣制夏日游石淙山】

武三思

此地岩壑数千重，吾君驾鹤□乘龙。掩映叶光含翡翠，
参差石影带芙蓉。白日将移冲叠嶂，玄云欲度碍高峰。
对酒鸣琴追野趣，时间清吹入长松。

卷 80_2【仙鹤篇】

武三思

白鹤乘空何处飞，青田紫盖本相依。缙山七月虽长去，
辽水千年会忆归。缙山杳杳翔寥廓，辽水累累叹城郭。
经随羽客步丹丘，曾逐仙人游碧落。迢迢碧落断氛埃，
霞堂云阁几重开。欲寻东海黄金灶，仍向西山白玉台。
九皋独唳方清切，五里惊群俄断绝。月下分行似度云，
风前颺影疑回雪。风前月下路漫漫，水宿云翔去几般。
宛转能倾吴国市，裴回巧拂汉皇坛。琴中作曲从来易，
鼓里传声有甚难。夜夜恒飞银汉曲，朝朝常饮玉池澜。

别有闻箫出紫烟，还如化履上青天。霜毛忽控三神下，
玉羽俄看二客旋。燕雀终迷横海志，蜉蝣岂识在阴年。
莫言一举轻千里，为与三山送九仙。

卷 80_3【宴龙泓】

武三思

登临开胜托，眺瞩尽良游。岩嵒萦纡上，澄潭屈曲流。
泛兰清兴洽，折桂野文遒。别后相思处，崎岖碧涧幽。

卷 80_4【凝碧池侍宴应制得出水槎】

武三思

彼木生何代，为槎复几年。欲乘银汉曲，先泛玉池边。
拥溜根横岸，沉波影倒悬。无劳问蜀客，此处即高天。

卷 80_5【奉和宴小山池赋得溪字应制】

武三思

年光开碧沼，云色敛青溪。冻解鱼方戏，风暄鸟欲啼。
岩泉飞野鹤，石镜舞山鸡。柳发龙鳞出，松新麈尾齐。

九韶从此验，三月定应迷。

卷 80_6【奉和过梁王宅即目应制】

武三思

岩居多水石，野宅满风烟。本谓开三径，俄欣降九天。
穿林移步辇，拂岸转行旃。凤竹初垂箨，龟河未吐莲。
愿持山作寿，恒用劫为年。

卷 80_7【奉和春日游龙门应制】

武三思

凤驾临香地，龙輿上翠微。星宫含雨气，月殿抱春辉。
碧涧长虹下，雕梁早燕归。云疑浮宝盖，石似拂天衣。
露草侵阶长，风花绕席飞。日斜宸赏洽，清吹入重闱。

卷 80_8【秋日于天中寺寻复礼上人】

武三思

妙域三时殿，香岩七宝宫。金绳先界道，玉柄即谈空。
喻筏知何极，传灯竟不穷。弥天高义远，初地胜因通。

理诣归一处，心行不二中。有无双惑遣，真俗两缘同。
摘叶疑焚翠，投花若散红。网珠遥映日，檐铎近吟风。
定沼寒光素，禅枝暝色葱。愿随方便力，长冀释尘笼。

卷 80_9【句】

武三思

云螭非易匹，月驷本难俦。（咏马，见《海录碎事》）

卷 80_10【奉和圣制夏日游石淙山】

张易之

六龙骧首晓駸駸，七圣陪轩集颍阴。千丈松萝交翠幕，
一丘山水当鸣琴。青鸟白云王母使，垂藤断葛野人心。
山中日暮幽岩下，泠然香吹落花深。

卷 80_11【侍从过公主南宅侍宴探得风字应制】

张易之

逐赏平阳第，鸣笳上苑东。鸟吟千户竹，蝶舞百花丛。
时攀小山桂，共挹大王风。坐客无劳起，秦箫曲未终。

卷 80_12 【出塞】

张易之

侠客重恩光，骏马饰金装。
瞥闻传羽檄，驰突救边荒。
转战磨笄地，横行戴斗乡。
将军占太白，小妇怨流黄。
骖袅青丝骑，娉婷红粉妆。
一春莺度曲，八月雁成行。
谁堪坐秋思，罗袖拂空床。

卷 80_13 【泛舟侍宴应制】

张易之

平明出御沟，解缆坐回舟。
绿水澄明月，红罗结绮楼。
弦歌争浦入，冠盖逐川流。
白鱼臣作伴，相对舞王舟。

卷 80_14 【奉和圣制夏日游石淙山】

张昌宗

云车遥裔三珠树，帐殿交阴八桂丛。
涧险泉声疑度雨，川平桥势若晴虹。
叔夜弹琴歌白雪，孙登长啸韵清风。
即此陪欢游阆苑，无劳辛苦向崆峒。

卷 80_15【少年行】

张昌宗

少年不识事，落魄游韩魏。珠轩流水车，玉勒浮云骑。
纵横意不一，然诺心无二。白璧赠穰苴，黄金奉毛遂。
妙舞飘龙管，清歌吟凤吹。三春小苑游，千日中山醉。
直言身可沉，谁论名与利。依倚孟尝君，自知能市义。

卷 80_16【太平公主山亭侍宴】

张昌宗

淮南有小山，嬴女隐其间。折桂芙蓉浦，吹箫明月湾。
扇掩将雏曲，钗承堕马鬟。欢情本无限，莫掩洛城关。

卷 80_17【奉和圣制夏日游石淙山】

薛曜

玉洞幽寻更是天，朱霞绿景镇韶年。飞花藉藉迷行路，
嘒鸟遥遥作管弦。雾隐长林成翠幄，风吹细雨即虹泉。
此中碧酒恒参圣，浪道昆山别有仙。

卷 80_18【子夜冬歌】

薛曜

朔风扣群木，岩霜凋百草。借问月中人，安得长不老。

卷 80_19【舞马篇】

薛曜

星精龙种竞腾骧，双眼黄金紫艳光。一朝逢遇升平代，
伏皂衔图事帝王。我皇盛德苞六宇，俗泰时和虞石拊。
昔闻九代有馀名，今日百兽先来舞。钩陈周卫俨旌旄，
钟鎛陶匏声殷地。承云嘈囋骇日灵，调露铿铉动天驷。
奔尘飞箭若麟螭，躡景追风忽见知。咀衔拉铁并权奇，
被服雕章何陆离。紫玉鸣珂临宝镫，青丝彩络带金羁。
随歌鼓而电惊，逐丸剑而飙驰。态聚踔还急，骄凝骤不移。
光敌白日下，气拥绿烟垂。婉转盘珊殊未已，
悬空步骤红尘起。惊舄翔鹭不堪俦，矫凤回鸾那足拟。
蘅垂桂裊香氛氲，长鸣汗血尽浮云。不辞辛苦来东道，
只为箫韶朝夕闻。阊阖间，玉台侧，承恩煦兮生光色。
鸾锵锵，车翼翼，备国容兮为戎饰。充云翘兮天子庭，
荷日用兮情无极。吉良乘兮一千岁，神是得兮天地期。
大易占云南山寿，赓觴共乐圣明时。

卷 80_17【正夜侍宴应诏（《英华》作正月望夜上阳宫侍宴应制）】

薛曜

重关钟漏通，夕敞凤凰宫。双阙祥烟里，千门明月中。
酒杯浮湛露，歌曲唱流风。侍臣咸醉止，恒惭恩遇崇。

卷 80_18【送道士入天台】

薛曜

洛阳陌上多离别，蓬莱山下足波潮。
碧海桑田何处在，笙歌一听一遥遥。

卷 80_19【奉和圣制夏日游石淙山】

杨敬述

山中别有神仙地，屈曲幽深碧涧垂。岩前暂驻黄金辇，
席上还飞白玉卮。远近风泉俱合杂，高低云石共参差。
林壑偏能留睿赏，长天莫遽下丹曦。

卷 80_20 【奉和圣制夏日游石淙山】

于季子

九旗云布临嵩室，万骑星陈集颍川。瑞液含滋登禹膳，
飞流荐响入虞弦。山扉野径朝花积，帐殿帷宫夏叶连。
微臣献寿迎千寿，愿奉尧年倚万年。

卷 80_21 【咏云】

于季子

瑞云千里映，祥辉四望新。随风乱鸟翅，泛水结鱼鳞。
布叶疑临夏，开花讵待春。愿得承嘉景，无令掩桂轮。

卷 80_22 【咏萤】

于季子

卉草诚幽贱，枯朽绝因依。忽逢借羽翼，不觉生光辉。
直念恩华重，长嗟报效微。方思助日月，为许愿曾飞。

卷 80_23【早春洛阳答杜审言】

于季子

梓泽年光往复来，杜霸游人去不回。若非载笔登麟阁，
定是吹箫伴凤台。路傍桃李花犹嫩，波上芙蓉叶未开。
分明寄语长安道，莫教留滞洛阳才。

卷 80_24【咏项羽】

于季子

北伐虽全赵，东归不王秦。空歌拔山力，羞作渡江人。

卷 80_25【咏汉高祖】

于季子

百战方夷项，三章且代秦。功归萧相国，气尽戚夫人。

卷 80_26【南行别弟（一作杨师道诗，《英华》作韦承庆南中咏雁）】

于季子

万里人南去，三春雁北飞。不知何岁月，得与尔同归。